




VOX TVBÆ ANGELI LVCIS

A D

Revocandum è Calvinianis tenebris ad
regionem Catholicæ veritatis P.F.Fœ-
licem Emanuelem, cui nomen in sæ-
culo DD.Emanuel de Portugal.

*Auctore P. F. HILARIO à S. Augustino Carmelit.
Discalc. per Belgium & Burgundiam Vicario Pro-
vinciali & Conventus Bruxellensis Priore.*


Verba Sapientum, sicut stimuli, & quasi clavi in altum
defixi, quæ per Magistrorum consilium data sunt
à Pastore uno. His ampliùs, Fili mi, ne
requiras. *Eccles. 12.*




*Ad usum
sancti de hest.
Pertinet ad
Conventu St.
Francisci
Trattibet.*

B R V X E L L Æ,

Typis Huberti Anthonii Velpii, Typog. Reg.
sub Aquilâ aureâ juxta palatium 1635.





EXCELLENTISSIMO
E T
ILLVSTRISSIMO
DOMINO
D. EMANVELI
D E
PORTVGAL.



*ON miror, Excellen-
tissime Princeps, quod
te in mœrore & squal-
lore jacentem cerno;
quod te flentem & ni-
mium dolentem conspicio, ob lamenta-
bilem & miserandum Primogeniti tui
Emanuelis, recentem & inopinatum
lapsum, quem omnes penè Orthodoxi*

)-(2

meritò

E P I S T O L A

meritò deplorant. Si enim Rex David ob mœstum Absalonis filii sui interitum, uberrimas profudit lacrymas; quis non videt haud minùs rationi consentaneum esse, pereuntis filii spirituales mortem deflere, æternumq; lugere exitium? Optarem quidè̃m vehementer inusitato isti tuo dolori levamen aliquod adferre posse. Sed quid afflicto afflicto solatii præstare valet, qui eâdem animi egritudine tabescens, ejusdem prorsus medelæ subsidio indiget? nisi istud quaecumq; calamitatis nostræ lenimen vocemus, quod iisdem malis involuti, earumdem pœnarum socii simus effecti. Communis planè dolor & quidè̃m penetrabilior omni gladio arcepi, pertingens usquè ad divisionem animæ ac spiritus, compagum quoquè ac medullarum. Vtraquè siquidè̃m familia

uno

D E D I C A T O R I A.

uno velut ictu gravissimè sauciata, & foedissimâ labe fuit conspurcata. Augusta videlicet Lusitaniæ Regum prosapia, quæ à tot sæculis Catholicam & Apostolicam Romanæ Ecclesiæ Religionem perpetuò intemeratam servavit; & Sacer B. Virg. Mariæ Montis Carmeli Ordo. Illa, inquam, quæ ardentissimo Dei honoris amplificandi zelo, per tot regna & provincias, confractis impiorum Principum sceptris & turpissimis idolorum simulachris destructis, Orthodoxam Fidem longè, latèq; quaquâ patet Orbis terrarum propagavit, totq; animarum myriades jugo & imperio Christi æterni Regis subdidit: & nunc turpissimam hanc ignominie maculam cogitur sustinere. Quas lamentationes antè omnipotentis Dei thronum, si ita loqui fas, profundet Sanctissima Eliza-
betha

E P I S T O L A

betha Lusitaniæ Regina , à quâ cognomen accepit Infœlix Emanuel , dùm saculo nuntium remittens , sacrum Religionis habitum assumpsit ? Quid verò loquar de gloriosæ & sanctæ memoriæ Serenissimâ Principe Isabellâ Clarâ Eugeniâ Hispaniarum Infante ; quæ ipsum , sacrum Carmeli nostri habitum recipientem , solemnis postea professionis vota Deo nuncupantem , ac demùm primitias Sacerdotii celebrantem , inclytæ Majestatis suæ præsentiam , cum summæ pietatis ac singularis benevolentiæ significatione mirificè decoravit ? Quales insuper Sancta Carmeli nostri Discalceatorum Religio angustias , quos dolores , ut parturientis , persentiscit , conspiciens filium clarissimis natalibus , Regio videlicet sanguine illustrem hæreseos maculâ , quâ fœdior excogitari nequit , esse

DEDICATORIA.

esse contaminatum? Quomodo cecidisti, ô Infœlix Emanuel, qui manè oriebaris? Oriebaris, inquam, velut stella matutina, dùm assiduis orationibus, divinis laudibus, omnigenâq; virtutum exercitationi fuisti intentus. Sed jam, proh dolor! quomodo obscuratum est aurum, mutatus est color optimus puritatis vitæ, dispersi sunt lapides sanctuarii in capite omnium platearum? Accommodatissimus, Excellentissime Princeps, mihi communi nostrò luctui exprimendo videtur Sancti Patriarchæ Iacob lessus, dilectissimi Filii sui, quem è medio sublatum opinabatur, mortem deplorantis: heu fera pessima devoravit filium nostrum Emanuele.

Fera, inquam, pessima, & truculentissima, nempe hæresis, quæ eum exanimem reliquit. Si enim justus ex fide vivit,

E P I S T O L A

ablatâ fide, nulla prorsus est spes vitæ,
 vel salutis æternæ, nisi aliquandò re-
 sipiscat. Quod uti ardentissimè pro sin-
 gulari nostrâ ergâ ipsum charitate, ac
 benevolentia optamus: itâ in hoc sum-
 moperè nobis incumbendum est, ut con-
 tinuis precibus ac sacrificiis, id ipsum à
 Divinâ clementiâ impetremus. Hinc
 quoquè nobis saluberrimum suppetit
 consilium, quo commonemur, quàm ado-
 randa, ac tremenda sint Dei judicia,
 quæ sunt, ut Propheta ait, abyssus
 multa. Nequè hic, quantumvis fune-
 stus, casus nos nimium perturbare de-
 bet, perindè atquè si numquam simile
 quidpiam contigisset: non enim erat
 infœlix noster Emanuel fortior Samsone,
 sapientior Salomone, vel Prophe-
 tâ Davide sanctior, qui labi non posset.
 Nihil aptius ad mœrorem nobis exi-
 men-

DEDICATORIA.

mendum, animosq; nostros erigendos, mihi dici posse videtur iis, quæ Sanctissimus Pater, & præclarum illud Ecclesiæ lumen D. August. scribit (epist. 137. ad Cler. Hypon.) suadens nè scandalum paterentur, vel nimium mirarentur, aut turbarentur, ex infœlici quodam eiusmodi casu, qui in domo ipsius contigerat. Quantumlibet, inquit, vigilet disciplina domus meæ, homo sum, & inter homines vivo: nec mihi arrogare audeo, ut domus mea melior sit, quàm arca Noe, ubi tamen inter octo homines reprobis unus inventus est: aut melior sit quàm domus Abrahamæ, ubi dictum est, Ejice ancillam & Filium ejus: aut melior sit, quàm domus Isaac, cui de duobus geminis dictum est, Jacob dilexi, Esau autem odio habui:

E P I S T O L A

bñi: aut melior sit, quàm domus ipsi-
 us Jacob, ubi lectũ Patris filius ince-
 stavit: aut melior sit, quàm domus ip-
 sius David, cujus filius cum sorore
 concubuit, cujus alter filius contra
 Patris tam sanctam mansuetudinem
 rebellavit: aut melior, quàm coha-
 bitatio Pauli Apostoli, qui tamèn, si
 inter omnes bonos habitaret, non
 diceret; Foris pugnæ, intus timores:
 aut melior, quàm cohabitatio ipsius
 Domini Christi, in quâ undecim
 boni, perfidum & furem Iudam to-
 leraverunt: aut melior sit postremò,
 quàm Cælum, unde Angeli cecide-
 runt. *Possemus adjungere paradysum*
terrestrem, in quo ipsemet primus pa-
rens tam miserabiliter cecidit. Tan-
dèm concludit Sanctus Doctor dicens:
 Ex quo Deo servire cœpi, quomo-
 do

DEDICATORIA.

dò difficile sum expertus meliores,
quàm qui in monasteriis profecerunt: ità non sum expertus peiores,
quàm qui in monasteriis ceciderunt.
Excellentissime Domine, non potuit non incidisse in manus tuas libellus ille, quem operâ cuiusdam malè feriatì Ministri, evulgavit noster Emanuel, totus consutus ex omnibus penè hæreseon rapsodijs, quibus impia Calvinistarum secta, ab orthodoxâ Religione dissidet. Mei muneris esse existimaui, quæ author istius libelli, quisquis is sit, impijs dogmatibus stabiliendis vndequaquè corrasit solidè convellere. Hanc verò meam opellam, nec potui, nec debui sub alterius, quàm vestræ Excellentie auspicijs in lucem emittere. Non dubito paternæ tuæ & charitatis & pietatis viscera vehementissimè commoveri, ob deplorandam prodigi istius filij sortem
qui

E P I S T O L A

qui eximiam illam atque opulentam avitæ Religionis substantiam tam turpiter decoxit. Quare supervacaneum arbitror E. V. calcar addere, ut quod suâ sponte facit, assiduis orationibus divinam fatiget bonitatem, ut sicuti S. Monica Augustinum ex errorum, quibus immersus iacebat tenebris, ad veritatis lucem convertere valuit: ita hanc ovem perditam, & immani luporum sævitie datam in prædam ad Christi ovile reducere possis. Hæc est votorum meorum summa, & huius exigui mei laboris, quem solo Catholicæ veritatis propugnandæ zelo incensus, & propensissima meæ in miserrimum nostrum Emanuele voluntatis affectu impulsus, me suscepisse profiteor.

E. V. Servus humillimus

F. HILARIUS à S. AUGUSTINO.

A P P R O B A T I O.

Rationes quas nuper Ministri Calviniani evulgârunt, sub nomine Emanuelis de Portugal, quibus sædam ejus apostasiam & Calvinianæ Hæresis ab eodem factam in Synagogâ Satanæ publicam professionem velare conati sunt sub nomine actitulo Catholicæ & Apostolicæ professionis puri Evangelii, solide & eruditè in hoc tractatu confutantur: & calumniæ quibus Religiosum Ordinem Carmelitarum Excalceatorum totamquæ Christi Ecclesiam affecerunt Ministri Satanæ, transfigurati velût ministri justitiæ, penitus absterguntur à Reverendo admodum Patre *F. Hilario à S. Augustino* Carmelit. Discalc. per Belgium Vicario Provinciali. Ideoque judico eundem tractatum magno fructu in lucem edi posse. Datum Lovanii, die 26. Octob. anno 1635.

GUILIELMVS AB ANGELIS
S. Th. Doctor & Professor Lovanii.

A P P R O B A T I O.

Perutiliter Typis excudetur communi bono Reipublicæ & Ecclesiæ liber, cui titulus: *Vox tube Angeli lucis*, compositus à Reverendo admodum Patre *F. Hilario à S. Augustino* Priore Conventus Fratrum Carmelitarum Discalceatorum Bruxellis, & Vice-provinciali. Constat enim stilo facili,
benè

benè terſo, & nervoſo, abundatq̃ue luce verbi Dei, non ſecundùm proprium ſpiritum, ſed ſecundùm ſenſum, quem dederunt Sancti Patres, receptum & probatum in Eccleſiâ Catholicâ & Apoſtolicâ, columnâ & firmamento veritatis, quæ cum internâ tranquillitate ſuavitateq̃ue legentium ſe mentibus eorum infundens, manifeſtat evidenter impoſturam, quàm Author ſuſcepit declarandam, tamquàm effectum Angeli tenebrarum, transfigurati in Angelum lucis. Simul etiã convincit, quantum abundè requirere poteſt Chriſtiana prudentia, P. F. Fœlicem Emanuelem imprudenter admodum egiſſe, & malè ac impiè, dùm fidem inſtinctu Spiritus Sancti, plurimorum Sapientium benè exercitatorum in diſcernendis ſpiritibus, ſi ex Deo ſint, probato, ſpontaneè & omninò liberè in publico fidelium magnatumq̃ue & Sereniſſimæ Hiſpaniarum Infantis *Iſabellæ*, datam Deo de ſequendis Domini noſtri Ieſu Chriſti conſiliis, paupertate, caſtitate & obedientiâ perpetuâ, in Ordine Fratrum Carmelitarum Diſcalceatorum, quantum in ſe fuit, irritam fecit: & Sanctam ſuorum Confratrum Societatem, cum eorundem de intimo charitatis affectu mœſtitiâ magnâ deſeruit, adjungens ſe ſocietati novellorum, in quâ non invenitur, qui per vota ſpontanea & libera, in Scripturis Sanctis, & Patribus communi conſenſu totius Eccleſiæ verè Catholicæ & Apoſtolicæ totiuſq̃ue temporis ejuſdem uſu ab initio uſquè nunc, probata miris modis & laudata, inſiſtat

insistat servandis Christi consiliis. Ut capropter
Pater Frater Fœlix Emanuel, casu nimis inœlix,
seriò se monitum attendere debeat, quatenùs pœ-
nitentiam agat, reddatque vota Domino Deo suo,
sitque lux iterum in Domino, ut filius lucis ambu-
let: fructus enim lucis est in omni bonitate & ju-
sticia, & veritate, ad Ephesios cap. 5. d. 9. Et ex-
emplo suo veluti proclamet universis & singulis:
Audite vocem tubæ Angeli lucis. Datum Lovanii
Anno 1635.

HENRICVS RAMPEN. S. Th.

Doctor & Professor Lovanii.

C E N S U R A.

Fortissimi duces Israel olim muros Ierichuntinos ac in-
numerabilem Madianitarum exercitum clangen-
tibus tubis facile destruxerunt. Nunc Reverendus ac Eru-
ditissimus P. Hilarius à S. Augustino monstrosa deliria
verbi-ministrorum Synagogæ Calvinianæ hâc vocæ tubæ
diffat ac nervose dissolvit. Quare ut omnium auribus in-
sonare possit, publicari poterit. Ita censeo hâc 27. Octobris
1635. Bruxellis.

HENRICVS CALENVS S. Th.

Lic. Archipr. Bruxell, libr. Censor.

LICENTIA ORDINIS.

FR. Agathangelus à IESU MARIA Carmelitarum Discalceatorum Congregationis S. Eliæ Definitor Generalis, necnon Provinciæ Belgicæ S. Ioseph Visitator Generalis, tenore præsentium libellum, cui titulus est, *Vox tubæ Angeli lucis, ad revocandum P. F. Fœlicem Emanuelem &c. à R. P. F. Hilario à Sancto Augustino Conventus nostri Bruxellensis Sanctæ Mariæ de monte Carmelo Priore, & Exprovinciali compositum, de consensu Réverendi admodum Patris nostri Præpositi Generalis permittimus typis mandari. Datum Bruxellis die 2. Ianuarii, anno 1635.*

F. Agathangelus à Iesu Maria Visitator Generalis.

LICENTIA REGIA.

REgia sua majestas in Senatu suo Brabantia permisit R.adm. P.F.Hilario à S. Augustino Carmelitarum Discalceatorum in Belgio Vicario Provinciali, & Priore Bruxellis, ut per eum typographum, quem lubuerit, imprimi curet libellum, cui titulus est. *Vox tubæ Angeli lucis ad revocandum è Calvinianis tenebris P. F. Fœlicem Emanuelem à S. Elisabethâ &c. Vt latius constat ex litteris suis patentibus, datis Bruxellæ die 3. Novemb. 1635. & signatis. Cools. Ipse verò R. Pater Hilarius præfati indulti vigore Hubertum Antonium Typographum Regium elegit.*



VOX TVBÆ ANGELI LVCIS.

*Narrantur gesta Patris Fratris Fœlicis
Emanuelis, ex quo venit ex Hollandiâ
in Brabantiam, & quomodo suscepit
habitum Carmelitarum Discalcea-
torum Bruxellis, usque ad præ-
sentem statum, in quo m. ser è in
Hollandiâ agit.*

PRODIIT paucis ab hinc
mensibus, & ad manus
meas pervenit, libellus
vulgari idiomate conscri-
ptus, & Roterodami ty-
pis excusus: cujus titulus
erat. *Declaratio rationum, quibus adductus
fuit D. Emanuel, natus Princeps Lusitaniæ,*
A antea

antea Monachus Ordinis Carmelitarum Discalceatorum, sub nomine P. Felicis Emanuelis, ut desertâ Romanâ Religione Ecclesie (quam author Catholicam & Apostolicam appellat) se adjungeret. Opusculum est (ut quod ipse sentio liberè dicam; & res ipsa vel obiter perpenſa clamat) planè hæreticum, & sentina quædam infinitorum errorum, quibus simul & semel è medio tollendis, non tam responsione eruditi viri quàm flammis opus erat. Quia tamen Spiritus Sanctus monet, nos semper paratos esse oportere, ad reddendam unicuique nostræ fidei rationem; danda est nobis opera, ut & justis piorum querelis fiat satis (qui ignaviæ ac torporis nos accusare possent, quod pestilentissimum hæreseos virus, simplicium animis instillari, citra ullum antidotum sineremus) & impiorum nobis insultantium vana insolentia retundatur, qui non vererentur (ut perfrictæ ac meretriciæ prorsus sunt frontis) jactitare, nos rationum momentis destitui, ad ejusmodi cavillationes labefactandas. Quàmobrem statui, impetratâ prius Superiorum facultate, omnia argu-

argumenta cum orthodoxâ fide pugnantia, quibus libellus scatet, haustis ex divinarum literarum promptuario argumentis, perspicuè convellere. Ad auctorem operis quod attinet, liquidò constat, eum non esse P. F. Emanuelem. Evidentissimè id ipsum comprobo. Dùm enim Sanctæ nostræ Religioni nomen dedit, non solum Sacram Theologiam, & in eâ controversas quæstiones, vel à limine non salutârat; sed & linguæ latinæ omninò rudis erat. Ita ut necessaria fuerit Superiorum indulgentia, ut præter consuetum nostrum morem admitteretur. Ego ipse (quod mei tunc muneris erat) ipsi tradidi præceptorem, à quo humaniorum literarum rudimentis informaretur. Postea ad scholas Philosophicas missus fuit, in quibus (ut quod res habet, bonâ ipsius pace dicatur) non nisi mediocres progressus fecit. Vndè igitur illi repentinè tantus hic doctrinæ apparatus, ut de quibusvis fidei dogmatibus, usque adeo disertè argutetur, atque audacter pronuntiet? Non sunt igitur, ut dixi, hæc proprio ipsius Marte confectâ. Certissimum est, esse

foetum ingenii cuiusdam ministri Ecclesie Gallicanae apud Delphos, qui incautum hominem illaqueavit, & in suam nassam fraudulenter pertraxit. Vnde vel hoc ipso veniam consequi meretur, quod ignorans fecerit; & hoc quantumvis pudendum facinus impostorum fallaciis, miserè seductus, admisit. Quare hæc mea scriptio, non tam ipsum P. F. Emanuelem impetit, quàm eos, qui acuerunt linguas suas sicut serpentis; sub quibus latet venenum aspidum insanabile, quo fascinatus ad perennem miser tendit interitum.

Priusquàm verò rem ipsam aggrediar, lubet breviter Lectori, velut sub uno intuitu subdicere, quæ noster Emanuel gessit, ex quo primum è Bataviâ in Brabantiam venit, usque ad illud tempus, quo summâ illâ levitate à Romanâ Religione descivit. Dùm Breda à Marchione Spinolâ obsideretur, ipse in eâ pro Ordinibus confœderatis militem agebat: ubi autem ea in potestatem Regis Catholici venit, ipse in Brabantiam, quò prius Excellentissimus Dominus Parens ipsius ac
Frater

Frater venerant, se recepit, ut Regi serviret. Qui aliquantò post dùm Bruxellis in aulâ Serenissimæ Principis Isabellæ Claræ Eugeniæ versaretur, constitutus est Dux cujusdam cohortis equitum. Indè missus in civitatem Linghem, incidit in periculosum morbum. Remedium afflictæ valetudinis sibi à Superis expectandum arbitrans, peregrinationem ad sacram Beatissimæ Virgini Matri Lauretanæ ædem, toto orbe celeberrimam, se suscepturum Deo sanctè promisit. Voti compos factus, Bruxellam confirmatâ valetudine rediit, ubi Christianæ pietatis officiis impensius deditus, templum Carmelitarum Discalceatorum frequens adire solebat, ac poenè quotidie sacrosancto missæ sacrificio interesse. Contigit autem, ut sub idem tempus quidam Lusitanus, non infimæ inter suos nobilitatis, sæculo valere jussò, nostram Religionem ingrederetur. Ei nomen fuit Dominus Alvarus de Sosâ, nunc P. F. Elias à Sanctâ Mariâ Magdalena. Fuerat is nostro Fœlici Emanueli familiari necessitudine conjunctus. Ab illo ergò die, quo D. Al-

varus sacrum Religionis habitum suscepit, incessit animo Emanuelis, idem sanctum desiderium. Sentiebat quippè se à Deo, arcano quodam impulsu moveri, ut præclarum illud amici sui exemplum sequens, idem Religiosæ perfectionis institutum capesceret. Ac tandem post maturam deliberationem statuit, illo ipso die, quo Dominus Alvarus decurso approbationis anno, solemniter erat Religionem professurus, obligatione prioris voti, videlicet peregrinationis, juxta sacros Ecclesiæ canones suspensâ, ejusdem sacrae Religionis habitum assumere. Sancti illius sui propositi ac consilii me certiore fecit, atque enixè rogavit, ut non gravarer adire Serenissimam Principem, omnemque lapidem movere, quò ei persuaderem, ut bonâ ipsius veniâ, liceret exequi, quod divinitus sibi inspiratum non dubitaret. Non potui ego, tam justæ ipsius voluntati morem non gerere. Principem itaque adii, quæ pro singulari suâ in omnibus, ac potissimum similibus rebus prudentiâ, mihi respondit; ad tanti momenti negotium, seriâ deliberatione, ac
matu-

maturo opus esse consilio: præsertim ubi de repentinâ tanti Principis summo loco nati, ad ejusmodi vitæ institutum amplectendum, conversione ageretur. Se quidem tam generoso ipsius proposito, à quo tot, tamque eximia salutis æternæ commoda sperarentur, nequaquam obstare velle. Eâ enim insigni pietate semper fuit Princeps, ut etiam suas familiares, quas & in oculis ferebat & in delitiis habebat, facilè posthabitâ privatorum obsequiorum utilitate, ad monasticæ vitæ professionem transire permetteret. Hanc tamen facultatem nemini indulgere solebat, nisi accuratissimâ circumspeditione ac cautione adhibitâ, quò exploratum haberet, num prudenter, & à Deo verè vocatè, ejusmodi statum ambirent. Addebat autem se dubitare, an hic novæ istius vitæ candidatus, posset usque adeò austeri instituti asperitates ac labores perferre. Hominem videri ad tristitiam naturæ propensioris; ac magnoperè timendum esse illud dedecus, quod probro verti solet viris illustribus (quantò magis huic regiæ stirpis Principi) si quando etiam citra suam culpam,

susceptum ejusmodi statum deferere coguntur. Verendum prætereà maximè, ne levi aliquâ ac merè humanâ ratione, ad istud consilium suscipiendum impelleretur. Perstitit Serenissima Princeps in illâ suâ sententiâ, neq; ab eâ longo satis tempore dimoveri potuit. Emanuel horum omnium per me factus certior, respondit se in sancto suo proposito constanter persistere, minimèque dubitare, se divinæ opis præsidio, omnibus nostræ Religionis austeritatibus tolerandis parem fore, & in eâ usque ad ultimum vitæ terminum perseveraturum. Nequè his contentus, ipsemet Principem adivit, à quâ cum easdem, quas priùs retuli, objectiones audiisset, eâdem semper constantiâ, eas diluit ac propulsavit. Cùmque Princeps nihil intentatum relinquens, quò animum ipsius exploratiùs pernosceret, ei diceret, etiam atque etiam cavendum esse, ne illud vitæ genus amplecteretur, eo fortè vano metu perculsus, quod minùs prosperos reflantis fortunæ successus formidaret: se enim in eo ornando atque euehendo, nullum benevolæ atque propensi-

penfiffimæ voluntatis officium prætermiffuram. Generofum hoc dedit refponfum, fe videlicèt ufquè adeò firmiter fufcepto confilio adhærefcere, ut nè quidem Rêge Catholico Lufitaniæ regnum fibi offerente, mentem mutaturum. Quæ omnia, ut à me referuntur, funt veriffima: nec ipfe ea negare ullo modo poteft. Excellentiffimus & piiffimus Dominus Pater ipfius Emanuelis, ubi iftud filii fui confilium ingrediendi Religionem refcivit, dictu mirum, quibus non machinis animum ipfius arietare cœperit, ipfumq; deterrere, pofitis ei ob oculos omnibus difficultatibus, quas excogitare poterat. Quo enim pacto, inquiebat, iftas tam austeri inftituti afperirates, eâ quâ es corpusculi imbecillitate perferes, præfertim iis nunquàm antea afluetus? an non perpendere oportuerat, quàm dura, quàm difficilia, quàmque ardua iftius Religionis professoribus funt perpetienda. Parùmne te commovet timor ifte, nè poftquam inconfultâ temeritate, te huic inftituto alligare cœperis, maximo totius noftre familiæ dedecore, ab eo poftèa def-

ciscere cogaris? quod si hæc animo tuo sedet sententia, omninòque tibi decretum est monasticen profiteri, cur non in alios Ordines, qui tot sunt, florentque in Ecclesiâ Dei, ac Religiosæ perfectionis observatione meritò commendantur, suaviusque illud CHRISTI jugum ac levius onus portant, oculos conjicis? cur hic præ cæteris omnibus tibi maximè arrisit? an nescis nobis perfacilè esse, benignissimæ Principis favore, impetrare pinguem aliquam Abbatiam, ut in aliâ Religione (quod in istâ tibi non permittetur) commodè & cum dignitate & opimis proventibus vitam tolerare possis? Atque ut paucis tibi animum meum aperiam, si hoc feceris, me repugnante facies. Sic Pater animum filii expugnare conabatur; & furdo, ut dici solet, fabulam canebat: permanebat enim ille immobilis, nec de constantiæ fastigio deturbari poterat, non aliter

Quàm si dura silex aut stet marpesia cantes.

Magis enim eligebat affligi cum populo Dei (ut de Moyse ab Apostolo dictum est) quam temporalis peccati habere jucunditatem, majores divitias aestimans impro-

improprium CHRISTI thesauro Ægyptiorū, id est, quem habere poterat in Ægypto hujus sæculi: aspiciebat enim in remunerationem. Perruptis igitur omnibus his repagulis, illo ipso die, quo F. Elias (de quo supra) solemniter Religionem nostram professus est, ipse ejusdem sacrum assumpsit habitum. Aderat Serenissima Princeps, stipata omnibus familiæ suæ nobilibus. Ipse verò novellus CHRISTI miles incredibili gaudio perfusus, luculentis interioris alacritatis signis foras erumpentibus, mœstos (ut in ejusmodi eventibus fieri solet) præsentium amicorum animos mirificè exhilarabat. Missus deindè Lovanium, ut cum aliis tyronibus approbationis annum perageret, sic se gessit, ut singulari quâdam regularis observantiæ perfectione, quâ aliis palmam præripere contendebat, magnam nobis omnibus futuræ aliquando eximiæ suæ virtutis expectationem concitaret. Omnes difficultates strenuo & generoso animo superabat, & si quando indulgentiùs cum ipso Superiores agere vellent, ipse ad amissim omnia observare ardentissimè cupiens, con-

constanter reluctabatur. Decurso approbationis spatio, nihil prius habuit in votis, quàm ut vehementissimè peteret ad professionem admitti : quod & factum est in Conventu nostro Bruxellensi, ubi eam fecit in manibus meis, præsente iterum Serenissimâ Principe, ac ipso Sedis Apostolicæ Legato, omnibusque aulicis spectantibus. Iam verò Professus, nihil de pristino conversationis Religiosæ fervore remisit, laudabilis vitæ bonum omnibus præbens exemplum. Quapropter rationi consentaneum duxi, ut & Philosophicis disciplinis erudiretur, & etiam ad Sacerdotii dignitatem eveheretur. Nunquàm verò ille arreptum semel iter interrupit : loquor de iis, quæ in oculos incurrun; de oculis enim ille solus judicat, qui renes & corda hominum scrutatur. Non multò post tempore, dedit ad me literas, quibus significabat, animum suum coelitus impelli, præsertim dùm in oratione cum Deo familiariùs ageret, ad investigandam viam aliquam, quâ Sororibus, quæ in Hollandiâ Calvinisticæ impietatis erroribus tenerentur, & in aperto
æternæ

æternę salutis discrimine versarentur , jubente id fraternâ charitate , opitulari posset : sibi autem spem non dubiam affulgere , ut si Superiorum permissu illuc proficisci liceret , posset utique , si non omnes , saltem duas aut tres , quarum mores probè perspectos habebat , CHRISTO lucrificere. Eâdem de re priùs cum Serenissimâ Principe egerat Excellentissimus Dominus Parens ipsius Emanuelis : quę ut ad quodvis pietatis & charitatis Christianę opus erat propensissima , omnem suam operam ac patrocinium ipsi prolixè pollicebatur. Eram id temporis Romę , ob generalia Ordinis nostri comitia , quibus ex officio me interesse oportebat. Ille verò nihil sibi omitendum ratus , quò expetitam illam profectionem sibi conficere liceret , idem suum desiderium mihi per literas Romam transmissas iterùm aperuit. Quod ubi ex me Reverendus admodum Pater N. Generalis intellexit , haud gravatè ipsius petitioni annuit : hâc tamen cautelâ adhibitâ , si Serenissima Princeps & Excellentissimus Dominus Parens ita factò opus esse existimarent. Tandem missus

missus est in Hollandiam, comitatus duobus aliis nostri Ordinis Sacerdotibus natione Hollandis: sed eâ conditione ut intra sex menses reverterentur. Socii verò ipsius experti ferventem Catholicorum ibi degentium pietatem in audiendis concionibus, ac Sacrosanctis Ecclesię Sacramentis frequentandis, allecti spe animas Deo in propriâ patriâ lucrificandi, opportunè, importunè à R. P. N. Generali petierunt, atque etiam impetrarunt, ut concessum illud ibi manendi spatium, diutiùs prorogari juberet. Dùm hæc aguntur, miser noster Emanuel variis modis exagitari cœpit, tùm ab hæreticis circâ fidei negotium, tùm à politicis, animum ipsius ad Catholicę Majestatis odium concitantibus. Quibus turbinibus concussum tenellum illud germen, quod non satis altas solide virtutis radices egerat, facilè labefactari potuit. Statuit igitur in Brabantiam non reverti. Cùmque à Superioribus revocaretur, imò & ab ipsâ Serenissimâ Principe, ut constat ex ipsius literis, quarum exemplar in calce libelli sui apponi curavit, hanc excusationem prætexebat, quod

quod revertēdi facultatem à Generali non haberet: quâ postea obtentâ, ad aliud asy- lum confugit, dicens famam suam à malevolis hominibus, etiam sui Ordinis, multis mendaciis confictis in Brabantiâ, etiam apud Serenissimam Principem fuisse denigratam, & per summam iniquitatem laceratam. Quapropter se illuc reverti nolle, sed Italiam, vel alias Provincias cogitare: nimirum, ut ait Sapiens Prover. 18. *Occasiones quarit, qui vult recedere ab amico.* Quæ tamen ipsius de Fratribus suspicio, omninò à veritate est aliena: nemo enim nostrum quicquàm effutivit, quod ipsius existimationem, vel tantillum offuscare posset. Sed contrà potius sedulò curavimus, ut si quid sinistro vulgi rumore hîc spargeretur, quod nomini ipsius labem aliquam inurere posset, id quoad ejus fieri poterat, eluere, & in meliorem partem interpretari. Quid verò mirum, si in tam exiguâ locorum intercapedine, quâ Provinciæ Regis Catholici Imperio subditæ ab Hollandiâ sunt dissitæ, non divulgaretur scandalum, quod patiebantur Catholici, dùm ipsum viderent neglectis

Etis solitis viri religiosi officiis, in alium
 hominem subito commutatum? Vbi verò
 tota res, publicâ famâ ita ubique percre-
 buit, ut nullâ jam tergiversatione vel ne-
 gari, vel occultari posset, postremùm
 hoc, quod nobis superesse videbatur, tan-
 to malo remedium adhibendum duxi-
 mus. Tres nostri Ordinis Religiosos, quos
 ei conjunctiores fuisse noveramus, in Hol-
 landiam ablegavimus, qui ipsi ad nos re-
 ditum persuadere conarentur. Conven-
 runt illi hominem: quibus statim respon-
 dit, se propedièm rediturum: quod qui-
 dem etiam datis literis ad Parentem suum,
 ad P. N. Generalem, & ad me testatum
 fecit. Sed breve fuit hoc falsum nostrum
 gaudium, qui eum obviis sincerissimæ
 charitatis ulnis expectabamus. Quam-
 primùm enim Serenissimam Principem
 è vivis excessisse inaudiit, illud statim
 hæreticæ pravitatis venenum, quod pe-
 ctore reconditum gestabat, cum maximo
 totius orbis Christiani scandalo evomu-
 it, abjuratâ in publicâ hominum luce, or-
 thodoxâ fide, in quâ à teneris unguiculis
 educatus fuerat, ac militiæ filiorum Beli-
 al no-

hial nomen dedit. Et ne turpissimi illius facinoris memoria apud Posteris non extaret, edito publicè hoc libello, quem confutandum suscepimus, illud perennare voluit.

Allatis per eum rationibus & excusationibus ad justificandum recessum à Catholicâ & Carmeliticâ Religione satisfi.

§. I. Priusquàm argumenta, quæ adversus orthodoxam fidem, in hoc libello proferuntur, confutem; lubet figillatim ea excutere, quæ author veluti proëmii loco habet. *Scribit igitur Emanuelem ingentes Deo agere gratias, quod illa ipsa civitas, in quâ illi contigit nasci, & divini numinis favore, sacro Baptismatis fonte renasci. fidei, quàm publicè profitetur, sit testis.*

Resp. Novus profectò & hætenus inauditus peregrinæ hujus Theologiæ Deum glorificandi modus, à Delphicis magistris inventus: ut infœlix noster Emanuel, per abominabile & execrandum Apostasiæ à fide & Religione flagitium, Deo gratum se exhibeat. Videntur planè de illorum

B nume-

numero esse, qui latantur cùm malè fecerint & exultant in rebus pessimis, Proverb. 2. 14. §. 2. Dicit se, ut omnium utriusque partis votis morem gerat, Ecclesie videlicet, & quam deserit, & quam ingreditur, velle hujus mutationis causas exponere. Ac primùm protestatur, se neque à carne, neque à sanguine consilium accepisse: sed à Spiritu Dei, à quo identidem impellebatur, ut mandatum illud sequeretur, quod habetur Apocalip. 18. Exite de illâ, scilicet de Babylone, populus meus: ut ne participes sitis delictorum ejus, & de plagis ejus non accipiatis.

Resp. *Spektatum admissi risum teneatis amici.*

Cùm enim ridendi facultas proprium sit homini quarto modo; quis est qui modò vel micam mentis habeat, hîc non diffluat risu, dùm admirabile hoc Consistorii Delphici audit oraculum: nimirùm non esse consilium carnis, & sanguinis, sed Spiritus divini, misero huic homini persuadere, ut illius S. Religionis statum impiè desereret, in quâ nihil est non carni & sanguini contrarium, jejunia, vigiliæ, ab esu carnium abstinentia,

tia, nuditas, singularis castitas, & maximæ paupertatis custodia, flagellationes, divitiarum sæcularium fuga, & omnium eorum, quæ sensualitati adblandiuntur, insuper assidua divinarum rerum meditatio. Quæ omnia ex diametro cum carne & sanguine pugnant, & passim nobis in divinis literis à Spiritu Sancto commendantur: ita ut alia præcepto jubeantur, alia consilio suadeantur. Quis igitur sanæ mentis non faciliè perspicit, insignem istorum vel malitiam, vel ignorantiam, vel utramque simul; qui ejusmodi sanctum instituendæ vitæ modum, Babylonem blasphemio ore vocare audeant, atque Spiritus Sancti jussu deferendum esse affirmant? Indubitatum est, exitum è Babylone non intelligi à S. Ioanne in Apocalipsi, de ipsâ civitate, quæ sita est in intimis Persidis regionibus, quæ caput extulit suprâ cæteras gentes: sed de Babylone tropicè conceptâ, quæ significat confusionem, teste Augustino tom. 8. mihi pag. 267. & multis aliis in locis. Sic passim ab omnibus. In quo sensu loquebatur S. Petrus Apostolorum Princeps, in 1. epi-

ſtolâ cap. 5. in fine dicens : *Salutat vos Ecclesia, quæ est in Babylone coëlectâ.* Accipiebat enim pro Babylone Romam, ut Hieronymus, Beda, OEcumenius, Eusebius & alii. Nàm sicuti in Babylone confusio- nem linguarum immisit Deus, *ut non audiret unusquisque vocem proximi sui*, ut dicitur Gen. 11. 7. & idcirco *vocatum est nomen illius Babel, quia ibi confusum est labium universæ terræ* : Eodem planè modo contigit antiquitùs Romæ, dùm in Gentilitatis tenebris adhuc versaretur, ut eleganter docet S. Leo Papa, Serm. 1. Natal. Apost. Petri & Pauli, dicens : *Hæc autem civitas, ignorans suæ profectionis auctorem, cùm penè omnibus dominaretur gentibus, omnium gentium serviebat erroribus : & magnam sibi videbatur assumpsisse Religionem, quia nullam respuebat falsitatem.*

Quantò igitur magis proprium & consentaneum est, Sectariorum populum, quàm Catholicorum cætum Babylonem nuncupare. In hoc enim non est nisi unum labium, una fides, unusque & idem sensus. Inter Sectarios autem non est nisi confusio linguarum, portentosum illud discre-

discrepantium opinionum chaos : ita ut in
 eâdem domo, eâdemque familiâ ferè non
 reperiantur, qui inter se cohæreant. Idq;
 non de his tantum, in quibus licet unum-
 quemque in sensu suo abundare, utpotè
 de fide adhuc non determinatis; quod
 etiam Catholicis licet: sed in ipsis fidei
 principiis dissentientes. Dùm enim Se-
 ctariorum unusquisque detrectat se sub-
 mittere cathedræ Petri, in varios & pe-
 nè infinitos, maximosque errores impin-
 gunt. Liquidò igitur constat istos
 prodigiosæ ignorantiae vertigine cir-
 cumagi, & non Magistros veritatis; sed
 puros putos impostores esse, ac menda-
 ciorum Architectos, qui hæc malefani
 capitis sui deliramenta ac vanitates & in-
 fantias falsas pro salubribus consiliis, ho-
 minibus incautis & inexpertis obtrudere
 non verentur. Ipsumque proinde infoeli-
 cem Emanuele, non à Deo vocatum,
 sed carnis & sanguinis illecebris inescu-
 tum ex nobis exiisse. Nec inficieris hæc,
 aut exultes, Sectari, eo quod allegaverim
 S. Petrum, Romam nuncupasse Babylo-
 nem: nec existimes eodem pariter modo



B 3

Roma

Romanam Ecclesiam Babylonem esse vocandam: nam licet in Vrbe fundata fuerit & hucusque firma & inconcussa in eâ permanferit; non ab Vrbe ipsâ, non à Romanis Imperatoribus, non à Senatorum prudentiâ, nec à Ciceronianiâ eloquentiâ; sed ab ipsomet Deo fulcita & solidata permanet & conservatur. Ad eum modum quo CHRISTVS Dominus Pilato dixit: Ioan. 18. 36. *Regnum meum non est de hoc mundo.* Non quòd non esset in mundo Regnum CHRISTI, sed quòd non haberet ab ipso radices: & postea magis explicuit, dicens: *Regnum meum non est hinc.* Sic Romana Ecclesia, licet Romę caput suum visibile habeat; non tamen ab antiquis idolis, non à turpibus simulachris, aut variis superstitionibus (in quibus erat Babylonica illa, de quâ Petrus, confusio) originem ducit; sed à cælesti Hierusalem, que est civitas pacis & unionis, in quâ veritas æterna refulget. Quapropter confusionem tuam Calvinisticam Babylonem melius ac convenientius appellaveris: sicut unionem Catholicam & fidelium coctum rectius Hierusalem vocaveris,

caveris, seu, quod idem sonat, pacis visionem.

§. 3. *Prævidere se ait, maledicta, probra, & obtrectiones, quibus passim est proscindendus, ob novum istud susceptum consilium: omnia verò hæc æquo animo pro CHRISTO toleraturum, memorẽ illius, quod habetur Math. 5.* Beati estis cum maledixerint vobis, & persecuti vos fuerint, & dixerint omne malum adversum vos: gaudete, & exultate, quoniam merces vestra copiosa est in cælis, *item & illius: Qui cum malediceretur, non maledicebat, & rursus, Benefacite eis qui oderunt vos, & orate pro persequentibus vos.*

Respondetur. Quis neget beatos, ac fortunatissimos, in scholâ & militiâ Christi, qui persecutiones & injurias patiuntur? quod tamen intelligendum est, si id fiat propter justitiam, ut ipse Christus Dominus asserit, non autem contrà justitiam; propter Deum, non contrà Deum; ut jam noster Emanuel, qui dereliquit pactum Domini: votum fecit Deo Jacob, sed non reddidit Altissimo vota sua, ac propterea ista non sustinet propter Deum, sed

propter mundum, carnem & diabolum. Satiùs illi fuisset habere curam de bono nomine, juxtà consilium Ecclesiastici cap. 41. Hoc enim generosis & excelsis animis à naturâ infitum est, ut bono nomine nihil carius, nihilve antiquius habeant. Hoc enim, ut idem ait Ecclesiasticus, ei magis permaneret, quàm mille thesauri pretiosi, & magni. Sed, proh dolor! incautus Emanuel, quasi alter Ephraim factus est: ut columba seducta non habens cor, alienis dedit honorem suum, contrà monitum Spiritus Sancti Proverb. 5. Nec cupit dicere cum Apostolo Paulo Corint. 2. *Christi bonus odor sumus in omni loco*, hoc est habemus bonum nomen apud omnes, famam, honorem, & gloriam, quæ juxtà D. Thomæ & communem aliorum doctrinam, est clara cum laude notitia. Vtitur S. Paulus metaphorâ boni odoris: nam quemadmodum hic coalescit ex diversis, & pretiosissimis aromatibus, aut ex variis & flagrantibus floribus; ita bonum nomen, seu fama conflatur ex cumulo omnium virtutum, & honestarum actionum: sicut è contrà amittitur per actus virtuti con-

contrarios. Quæ omnia paucis complexus est Sapiens Proverb. 10. *Memoria iusti cum laudibus, nomen autem impiorum putrescet.* Benè audiit noster Emanuel, quàm diu inter nos versatus est: & à primò die quo assumpsit habitum Carmelitarum, usque ad ipsius in Hollandiam profectionem, nemo fuit qui de eo non honorificentissimè, & sentiret, & loqueretur. Fama ipsius summis laudibus inclyta, per totam Europam circumvolitabat, & celebrabatur. At ubi primùm in Hollandiâ cum sæcularibus, ac potissimum cum Hæreticis agere cœpit, videruntque Hollandi Catholici eum ambulantes non secundum Deum, sed vias indirectas; percrebuit statim rumor de repentinâ vitæ ipsius mutatione: primùm quidem per totam Bataviam, & mox per reliquas Belgii partes; ac tandem vix fuit in orbe locus tam inaccessus, quem non pervaserit: ut proindè non sint loquelæ neque sermones, quibus non publicetur tam lamentabilis, & inopinata mutatio, non quidem dextræ excelsi, sed sinistræ diaboli.

§. 4. *Cupit omnibus compertum esse, se non*

B 5

occul-

occultè è Monasterio, in quo religiosum institutum professus fuerat, egressum esse; sed ex facultate Generalis Ordinis, Serenissimâ Infante, & excellentissimo Parente suo scienciis & consentientibus. Animitamen sui consilium fatetur se celasse: hunc verò prætextum se confinxisse. Cupere videlicet se in Hollandiam proficisci, ut Sorores isthîc degentes pelliceret ad hoc, ut ad Patrem reverterentur: sine quo commento, nullus patebat aditus consequendæ libertati, quâ nunc fruitur.

Resp. Ingenuè fatemur egressum ipsius, ut ipse narrat, ita contigisse. Quod autem simulaverit se, sub prætextu lucrificandi Sorores suas, Hollandiam petere, animo relinquendi fidem orthodoxam, aliundè non constat, quàm ex ipsius testimonio; qui solus præter Deum, pectoris sui arcana nosce potest, teste Apostolo 1. Corinth. 2. 11. Quis enim hominum scit, quæ sunt hominis, nisi spiritus hominis qui in ipso est? Memini tamen paucis post ipsius ex Brabantiâ in Hollandiam discessum mensibus, me ab ipso literas missas Hagâ Comitæ accepisse, quæ hæc verba continebant: Nulla spes affulget Sorores meas Bru-
xellam

xellam adducendi, proinde jam ad Monasterium reverti possumus. Ex quibus manifestè constat, ipsum id temporis nondùm constituisse à fide & religione, quod postea fecit, turpiter deficere. Vt ut sit, ipse viderit. Possumus illi dicere cum Prophetâ Oseæ 13.9. *Perditio tua Israel.* Seipsum decepit, ac vinculis tartareis illaqueavit. Certissimùm enim est, ut dicitur Sap. 1. 5. *Spiritus Sanctus disciplina effugiet fictum.* Ac propterea ab ipso derelictus tanquàm alter Cain profugus, nisi respiscat, in mundo ambulare cogetur, donec postea detrudatur in tenebras exteriores, ubi erit fletus & stridor dentium.

§. 5. *Omni*bus quoque notum esse cupit, se ob defectum aliquem, vel culpam, vel quod ferendo vigori istius Instituti par non esset ex Religione dimissum non fuisse: idque constare ex literis patentibus, quas ex me, tùm Provincialem agente, ex commissione R. P. N. Generalis: item id ipsum patere ex aliis Provincialis, item Serenissimæ Infantis ac Parentis sui, aliorumq; literis, ad ipsum in Hollandiam transmissis: quæ omnia nihil aliud testabantur, quàm summam Ordinis ergà ipsum benevolentiam

*lentiam, & charitatem; nullamq; de ipso, mentis
cujusquam sinistram opinionem obrepfisse, do-
nec conciones Calvinistarum ipsum frequenta-
re constans fama huc pertulit.*

Resp. Iam supra fassi sumus non semel,
ipsum quàm diu inter nos versatus fuit,
semper laudabiliter vixisse, nec ullam de
se conquerendi ansam cuiquàm præbu-
isse. Et hæc causa fuit, quæ Superiores
impulit, ut eum saltem ad breve tempus
in Hollandiam mittere non dubitaverint.
Verùm abusus fuit candore ac sincera
confidentiâ suorum Superiorum, qui me-
liorem de ipso opinionem conceperant,
atquæ in Dei timore & fide constantio-
rem fore existimabant; tùm quod præ-
clarum probitatis saltem externæ speci-
men jam antea dederat, tùm quod excel-
lenti animo eum esse crederet, quàm ut
honoris sui tam levem esse jacturam du-
ceret. Sed jam nostro malo didicimus,
non facile fidendum de juniorum probi-
tate, donec multorum annorum experi-
entiâ, altas solidasque virtutum radices
egisse comprobetur.

§. 6. *Quod si quis, inquit, objiciat, huma-
nis ra-*

nis rationibus impulsus Religionem ipsum deseruisse. Hoc quidem fatetur, sed negat eas fuisse precipuum motivum. Dicit eas tanquam adminicula dumtaxat deservisse fini principali consequendo, qui spiritualis erat: ut videlicet per libertatem corporis acquireret liberam facultatem Deo purè serviendi, ac sanctum ipsius nomen sine periculo confitendi. Veritas itaque, cujus antea sufficientem habuerat notitiam, ipsum ut à Religione discederet, urgebat. Cumque utraque libertas, anima nimirum & corporis, adeò conjunctæ essent, ut alteram sine alterâ obtinere non posset, necesse fuit eâdem viâ utramque sectari.

Resp. Si verum esset, quod non puto, quod diabolus jam antea misisset in cor infidelitatis, seu hæresis tenebras; immortales Clementissimo Deo oporteret nos grates rependere, pro singulari illo beneficio, quo permisit eum à nobis separari: & quò citius id factum, eò melius. Quæ enim conventio lucis ad tenebras? Certè multò magis nobis intus nocere poterat, quam extrà: lethale enim venenum in stomacho latens facilè cæteras omnes corporis partes labefactat. Nec vacat grandi periculo

culo ejusmodi aspides in sinu fovere. At tamen potius hoc dictum credimus ex Rabbinis Delphici malitiosâ imposturâ, quàm ex Emanuelis nostri subdolâ machinatione : nobilissimum enim ac generosum animum , hæc & id genus alia fingere haud quaquàm decet.

§. 7. *Ait se è Monasterio non decessisse , quò sibi liceret , sæculi voluptates liberiùs sectari : nullam enim cellam usque adeò circumseptam atque obturatam esse , etiam inter rigidissimas Monasteriorum austeritates , in quâ sat multæ rimæ non reperiantur , per quas transeant objecta , ad quæ suspirant ii , qui ore tenus dumtaxat sensualitati renuntiarunt.*

Resp. O execrabile mendacium , ac prorsus satanicum , & infernale venenum , haud dubiè à pharmacopolis Synagogæ Delphicæ confectum ! nec enim fieri potest , ut misero Emanueli tam infanda cogitatio in mentem venerit. Neque credibile est ipsum ita à Domino Deo derelictum esse , ut tam iniquam , tamque ab omni veritate alienam sententiam , repugnante propriâ conscientia , vel fingere audeat , vel proferre. Si carnis voluptatibus indul-

indulgere nobis fuisset in animo, quid necesse erat sæculum deferere, in quo per matrimonium concessâ venere frui licebat? quis ergò vel mediocri pollens iudicio Consistoriales illos Delphicos sanæ mentis esse existimet? quis non exhibilet? qui nescio quibus intemperijs acti, & ipsi putent, & orbi persuadere studeant ista de viris religiosis, qui suapte sponte, repudiatis sæculi illécebris, se Dei obsequio mancipârunt, nuncupatis tribus illis solemnibus votis, obedientiæ, castitatis & paupertatis. Adde propterea arctissimam obligationem vivendi secundum regulam & constitutiones Ordinis, diuturna per octo ferè menses quotannis jejunia, continuam ab esu carnum abstinentiam nisi ægritudo iis vesci ex medicorum præscripto cogat; ut nihil dicam de vigiliis, trinâ singulis hebdomadis flagellatione, nuditate, vilitate, & asperitate habitus, strictissimo silentio; cujus tam accurata est observantia, ut non solum cum sæcularibus Religioso citrà Superioris facultatem loqui liceat; sed ne quidem cum alio Religioso; solitudinis denique accessus

cessus custodiam exactissimam. Quod si quando necessitas succurendi proximo claustro egredi compellat, ea quidem facultas, ei qui evocatur, à Superiore conceditur, sed datur individuus comes, qui testis sit & arbiter omnium, quæ ab alio foris geruntur. Omitto, quod inviolabiliter hoc semper observatum fuerit, ut mulieribus Monasterii septa ingredi non liceat. Per quas igitur rimas, ejusmodi objecta sensualitati adblandientia irrepent? Vel dicat ipsemet Emanuel, num aliquando quid simile ipsi, dum inter nos ageret, contigerit, vel in alio Fratre viderit? Potissima enim media, quibus ad Religiosæ vitæ puritatem ac perfectionem contendimus, sunt spiritualia exercitia, orationes videlicet & meditationes, quibus dies noctesque incumbimus, ut oculos intentos in Deum semper habere possimus, qui evellat de laqueo pedes nostros. Accedit frequens usus Sacramentorum, Sacrosancti Missæ sacrificii quotidiana celebratio, assiduum psallendi exercitum: quæ omnia, dictu mirum! quantum conferant ad animas Deo uniendas, ipsiusque timore car-

re carnes configendas. Quàmobrem fit, ut verissimùm esse experiamur, quod habetur Proverb. 1. vers. 17. *Frustrà jactitur rete antè oculos pennatorum.* Retia videlicèt & laquei quos infernales venatores dæmones ponunt, vel jaciunt ad capiendas animas. Quod frustrà faciunt antè oculos eorum, qui per ejusmodi exercitia, ita à fluxis ac labentibus mundi rebus se abstrahunt, ut eorum conversatio tota sit in cælis. Nequè tamen, licet omnibus his præfidiis muniti simus, nobis blandimur, quasi de nostrâ in viâ virtutis perseverantiâ à lapsu securi. Nota est enim atquè explorata nobis tentatoris, nusquàm non insidias struentis vafricies: manifesta est quoquè humanæ infirmitatis atquè fragilitatis, semper in deteriora propendentis corruptio. Præsertim cùm nulli obscurum sit, tam admirandos ac tremendos contigisse, ac quotidie contingere lapsus. Salomon iis sapientiæ dotibus à Deo cumulatissimè ditatus, quò non amentiae devenit: Judas ex Apostolatus culmine miserabiliter excidit: & in lege gratiæ refert S. Augustinus se vidisse in Ecclesiâ

Dei primates viros, proceros sicùt cedros Libani, qui ferè cum Hieronymo & Ambrosio conferri poterant, turpissimè corruisse. Quales casus videtur Deus inscrutabili suâ providentiâ, quamquàm non usq; adeò frequentes, etiam in austerioribus Religionibus permittere, per aliquorum apostasiam, qui nondùm fatis *carnem suam cum vitiis & concupiscentiis crucifixerunt, & ideò traditi sunt in reprobum sensum, & videtur adimpletum illud Ecclesiastici. 19. Quod vinum & mulieres apostatare faciunt sapientes.* Quæ fatis superque nos movent, ut semper simus memores salutaris consilii Apostoli, dicentis 2. Corin. 7. 15. *Cum timore & tremore salutem vestram operamini.*

§. 8. *Dicit se non deseruisse Religionem allectum spe commodorum, sive successionum temporalium. Conqueritur de Regibus Hispania, quasi injustè Regnum Lusitania in vaserint, atque occupent, & quod Excellentissimo Domino Parenti Bruxellis denegatus sit titulus Principis Lusitaniae.*

Resp. Non esse mei vel propositi, vel muneris, examinare quo iure prudentissimus & Augustissimus Philippus II. Regni Lusitaniæ

fitaniæ possessionem vendicarit. Hoc mihi certò persuadeo, quod & ab aliis accepi; istud factum non fuisse, nisi prius consultis eruditissimis, gravissimisque Theologiæ, ac Juris Doctoribus, non solum sub ipsius ditione florentibus in Academiis, sed etiam ex aliis Regnis. Insuper concors Lusitanæ gentis, eaque animi inclyti, applausus; nec non totius Regni permanens consensus, quo tanti Regis acquiescunt & parent ditioni, irrefragabile æquissime possessionis argumentum præbent. Quod verò attinet ad titulum Principis Lusitanæ: non est mirum quod nequè Bruxellis, nequè in ullis regnis, aut Provinciis, quæ Hispaniarum Monarchæ Imperio parent, Excellentissimo Domino Emanueli non concedatur: quandoquidem juxtà communem, ac consuetum loquendi modum titulus Principis Regni, solum competat illi, qui directè & immediatè debet in regnum succedere. Vndè apud Hispanos solus primogenitus vocatur Princeps regni, sicut in Galliâ Delpinus: cæteri omnes Filii, quàmvis in regnum succedere possint non

Principes, sed Infantes nuncupantur. Videat igitur etià atque etià noster Emanuel, ne aliquâ ambitionis, aut umbratilis gloriolæ aurâ afflatus, calcatâ CHRISTI humilitate, quàm antea profitebatur, miserandi sui lapsus causam dederit. Ac memor sit, quomodo Serenissimæ Infanti renitenti ac recusanti facultatem Religiosum habitum recipiendi, sic respondit. Etiam si Rex, Lusitaniæ Regnum mihi conferre dignaretur, potius monasticen acceptarem quàm illud. Cur igitur qui omnia, ut nudus CHRISTVM sequeretur, reliquerat, fugacibus citòque perituris commoditatibus seipsum irretire cupit.

§. 9. *Narrat copulatos fuisse matrimonio Parentes suos, quàmvis contrariis Religionibus constanter ac mordicè adherentes; Patrem quidem Romanæ, Matrem verò Calvinianæ: cum hac verò conditione matrimonium fuisse initum, ut liberi mares, qui ab ipsis procrearentur, Patris fidem; fœminæ verò Matris amplecterentur. Gloriat in super infelix Emanuel, sibi Baptismi Sacramentum collatum fuisse Delphis in templo Calvinistarum: idque à mi-*

à ministro heretico, spondentibus patrinis qui ex more adhiberi consueverunt, ipsum rudimentis fidei, quàm Mater sectabatur se imbuturos. Quod Mater haudquaquàm negligendum putavit. Cumq; parvuli non nisi Matri adhærescere soleant, donec firmatis corporis viribus, & affulgente aliquâ judicii maturescen-
tis luce idonei videantur, qui alio ablegentur, ipse ad annum usque duodecimum sub tutelâ ac disciplinâ Matris permansit, à quâ hausit primas illas instructiones Fidei ex Cathéchismo Calvinistico, quas fatetur animo semper inhæsisse, simulq; propensum ad Matris Religionem affectum.

Resp. Nolo hîc quæstionem illam disputando attingere, liceátne, vel saltem expediat ut Catholici cum Hæreticis matrimonium ineant; nam causæ politicæ sæpè numero in ipsâ praxi rationibus Theologicis præponderant. Veniam ad rem ipsam quâ de agitur. Vulgatum est illud in scholis Dialecticorum, conclusionem sequi debiliorem partem antecedentis syllogistici. Istud imitari voluisse videtur noster Emanuel, qui Matris Religioni adhæ-
rere maluit, quàm Patris. Quod ta-

men consilium non est secundum Deum, nequè secundum scientiam, nequè secundum prudentiam justorum. Age, dic mihi, obsecro, quid te potissimum impulit, ut isti te sectæ addiceres? Si enim materialiter, ut dicitur, id est, ratione subjecti consideres solam Matrem: ipsam reperiēs, ac Principem Guilielmum Nassauvium, ejus Patrem, atquè Avum, qui primò ex nobilissimâ illâ, & antiquissimâ stirpe dereliquerunt pactum Domini, & ab Eccesiâ Catholicâ recesserunt; idq; intuitu motivorū merè temporalium, ut omnibus notum est. Cæteri verò majores inter eximias suas laudes, quas nulla posteritas filebit, hanc sibi non infimam jure vendicāt, quod à Fide, quàm Romana tradit Eccesia, numquàm ne latum quidè unguem deflexerunt. Quid dicam de Patre tuo, viro tùm pietate spectatissimo, tùm prorsus singulari ergà Catholicam Fidem zelo? qui tametsi à puero inter Principes ac populos Hæreticos egerit, numquàm tamen vel minimâ erroris rectæ Fidei contrarii labeculâ fuit respersus, sed traditam à majoribus Religionem constan-

stantissimè semper inuolatam conserva-
vit. Nihil dico de universis Lusitaniæ Re-
gibus, inter quos ne vel unus reperitur,
qui à Fide Catholicâ alienus fuerit. Ob-
versetur animo tuo Avus tuus Serenissi-
mus Dominus Antonius de Portugal, ra-
rum quoddam omnis pietatis & virtutis
exemplum; qui ad instar Davidis, librum
cælesti doctrinâ plenum edidit: quo di-
vina charismata, quibus cælitus abundan-
tissimè cumulatus erat, in legentium cor-
da effudit. Cur igitur horum vestigia non
sectaris? cur unus tuæ Matris Religio-
nem, tot præclarissimorum majorum tuo-
rum pietati, sapientiæ, ac fidei anteponis?
Sed quibus, obsecro, stabilita est fundamē-
tis? quibus nititur columnis fides Matris
tuæ, quàm sequeris? Qui eam orbi invexe-
runt, fuerunt Lutherus, & Calvinus, Go-
marrus, eorumque discipuli, ejusdemque
farinæ tenebriones: quos ab Ecclesiâ, ob
vitæ improbitatem ac perversam doctri-
nam resectos ac ejectos, veluti foetida, &
mortua membra, universus orbis execra-
tur. Minimè verò illud prætereundum
est, quod ait, se in templo Calvinistarum,

eorum ritu, à Ministro hæretico baptizatum fuisse : quæ omnia suspicione ac metu non carent, ne hujus Sacramenti collationi quippiam defuerit, quod illud reddiderit invalidum, ac inanè, experisque effectuum, quos ex divinâ institutione operari solet. Quid enim si aquâ rosaceâ, aut aliâ odoriferâ, loco elementaris (quod nonnumquàm à Ministris, extremâ vel ignorantia, vel malitiâ fieri solere fertur) adhibita fuerit? Quid si alio ablutente, alius essentialia formæ verba protulerit? Ut nihil dicam de crassis erroribus, qui in Calvinistico symbolo, circâ augustissimæ Trinitatis mysterium habentur. Quocircâ prudentissimè sancitum est à Patribus Synodi Mechliniensis, ut ii qui ab Hæreticis baptizati ad fidem Catholicam convertuntur, Catholico more sub conditione rebaptizentur. Quid igitur mirum, si noster Emanuel tam debili, infirmo, ambiguo, ac quod maximè timendum est falso fundamento nixus, tam miserè corruerit?

§. 10. *Dicit se ab Excellentissimo Parente missum cum Fratre ex Hollandiâ in Galliam ad Ex-*

ad Excellentissimum Patrum Dominum Christophorum de Portugal, virum Catholicæ Fidei cultorem eximium. Et verè ex Bataviâ raptus dici poterat, ne malitia mutaret intellectum ejus. Sed ait, se dubium semper hæsisse ex illâ gratiâ sibi divinitus concessâ, quâ prima materne instructionis elementa animo impressa retinuit: dubium, inquam, num Romana Religionis cultus Deo placeret. Se nihilominus inter hos errores Parentis jussu, eam secutum fuisse, atque id quidem sponte fecisse: semper tamen ingenti desiderio æstuasse accuratius veram salutis, inter Paternæ Maternæq; Religionis discrimina, viam cognoscendi. Tandem agit de impedimentis, quæ ipsum retardabant, quò minùs hanc viam invenire posset: cùm esset, ut ait, densissimis tenebris immersus. Præterea nescio qua supersticiosâ in quemdam Religiosum Ordinem propensione tenebatur, plurimis ipsum illuc impellentibus: cùm nec deessent quoquè rationes politicæ, aliæq; causæ, quæ compendiosorem, securiorem in calum cursum ostendere videbantur, si se turbulentis mûndanarum rerum fluctibus eriperet. Atquè ita tandèmpost ancipites illos dubitationum ætus, habitum Religiosum de manu Serenissimæ

Principis Infantis accepit. In quo statu, per annos circiter quatuor permansit. Instructus fuit in linguâ latinâ. Hausit quoquè Philosophiæ præcepta. Quibus præsidiiis munitus, faciliorem sibi fecit aditum ad eam, ad quam potissimum anhelabat scientiam, veram scilicet Deicognitionem, ut ei in veritate placeret, animæq. suæ salutem, cum proximorum ædificatione promoveret.

Resp. Mira Consistorialium Delphicorum in hâc postremâ sermonis parte vertigo, quæ vel sola argumento esse poterat, nihil eorum quæ hîc scribuntur, ab Emanuele fuisse compositum: sed nec fortassis visum, priùsquàm tam præclarus partus lucem aspiceret, ac omnium manibus tereretur. Imprimis enim ignorare non potest Religiosum habitum non recepisse de manu Serenissimæ Infantis: sed illius, qui eo tempore Provincialis munere in Ordineungebatur. Prætereà quomodo ipse sibi constat, dùm ait, animo suo semper inhæsisse, primas illas materne instructionis delineationes: ac propterea semper dubitasse; nùm Fides, quàm Romana Ecclesia profitetur, Deo accepta esset.

esset. Postea verò sui oblitus affirmat, se
 in eâ Religione tanquàm in proprio ele-
 mento, id est, cum magnâ animi tran-
 quillitate ac securitate vixisse? Quid de-
 indè vel magis ridiculum, vel minus veri-
 tati consentaneum esse potest, quàm pro-
 fessionem Religionis Romanæ, vitam la-
 tam appellare: tacitè insinuando Hæreti-
 corum vitam esse arctam viam? Ecclesia
 Catholica obligat ad jejunia, ad ciborum
 delectum, ad obediendum Præpositis, ad
 Sacramentorum susceptionem, præser-
 tim Poenitentiae, in quo omnia delicta
 quantumvis occultissima Sacerdoti ape-
 rienda sunt, ac injustè ablatorum resti-
 tutio fieri præcipitur. Multa deniquè alia
 jubentur, quibus effrænis hominum cu-
 piditas compescitur. Quid verò simile
 apud Calvinistas reperitur? Apud hos nul-
 la Sacramenti Confessionis, seu poeni-
 tentiae obligatio, nulla jejuniorum, nulla
 à carnibus abstinentiae lex est, nulla Præ-
 latorum obedientia, actus meritorios tol-
 lunt, ac sine illis de salute consequendâ
 securos se esse inaniter præsumunt. Judi-
 cet nunc quivis æquus arbiter inter nos &
 Cal-

Calvinistas, horúmne, an nostra via sit arcta vel lata? Quod verò attinet ad id quod Delphici Consistoriales nos vocant Regnum tenebrarum, & professionem mendacii: se verò regnum lucis, suamque Religionem professionem veritatis, & alimentum salutis: his videtur appositissimè respondere Isaias, dùm ait, cap. 5. *Væ qui dicitis malum bonum, & bonum malum: ponentes tenebras lucem, & lucem tenebras: ponentes amarum in dulce, & dulce in amarum.* O incoelix Emanuel, utinam scperes, & intelligeres, ac novissima provideres. Et hæc ad satisfaciendum huic proëmio malè sano sufficient.

. Propo-



Proponuntur & refelluntur argumenta & motiva, quibus sese convictum fatetur, ut Romanâ Ecclesiâ spretâ, ad Calvinismum transvolaret.

MOTIVVM I.



IT, quod de Romana Religionis & monasteriorum more, Sacrorum Doctorem studio applicatus, in ipsis plures contradictiones animadverterit. Ipsum S. Augustinum ceterorum facile Principem, retractationum librum edidisse compererit. Ex tunc scripta ejus sibi suspecta fuisse, & existimasse veritatem, Patribus inherendo, non esse indagandam. Eosdem antea filios fuisse, ac lumen suum ab aliis mutuasse. Ad fontem & originem luminis recurrendum: nempe ad Sacram Scripturam Prophetis, Apostolis, & Evangelistis divinitus revelatam. Hos esse fundamenta Ecclesie, supra angularem lapidem Christum Iesum, qui est lux vera illuminans omnem homi-

hominem venientem &c. Ioan. 1. 9. *Ab hoc fonte omnes alios suam hausisse doctrinam. Nos moneri eundem perquirere sollicitè, Ioan. 5. 39. Scrutamini scripturas. 2. Pet. 1. 19. Habemus firmiorem Propheticum sermonem, cui benefacitis attendentes, quasi lucernæ lucenti in caliginoso loco. Undè infert, ex ipsius Scripturæ puritate Patrum doctrinam esse dijudicandam.*

R E S P O N D E T V R.

*Ostendendo quàm turpiter Sectarii
Sanctorum Patrum doctrinam
despiciant.*

FOntem quidè limpidissimum esse Sacras literas; & Apostolicam doctrinam; undè aquam vitæ SS. Patres, & Ecclesiæ Doctores protinùs hausisse oportuerit; quo & eorum scripta revocanda sint, velut ad lapidem Lydium; quo explorata delimentur, non est qui dubitet. Nullus ea unquàm secundum se regulas fidei esse voluit. *Nequè enim, ait August. epist. 111. ad*

ad Fortunatianum, *quorumlibet disputationes quàmvis Catholicorum & laudatorum hominum, velut Scripturas Canonicas habere debemus.* Rectè tamen quisquis Orthodoxus est, hoc voluit: quod Doctorum & Sanctorum Patrum doctrina, à tot sæculis in universali Ecclesiâ recepta, & approbata, verbi divini, tùm scripti, tùm traditi fidelissima sit interpret: & quod potius suspectum sit, proprium ac particulare cujusque in interpretandis Sacris paginis judicium; quàm tot & tantorum virorum genuina interpretatio, Pontificiâ, & Conciliorum autoritate præsertim fulcita. Si errare in aliquo potuerunt, aut re verâ aliquis eorum non in omnibus veritatem plenè sit affecutus, seipsum ipse corrigat: sin minùs, universa eum corrigat Ecclesia. Semel autem ab eâ approbatus, suspectos habere: aut nostrum Doctorem Delphicū, vel alium quemvis particularem, suum ipsis præferre judicium, stultum planè & arrogantis animi facinus arbitramur. Et numquid suum illis judicium anteposit, qui se illorum judicem & censorem propriâ, ac privatâ auctoritate, teme-

temerario ausu constituit, eorum doctrinam ignorantiae aut falsitatis arguendo, quàm antiquitas ut Sanctam venerata est: quàm Ecclesie universitas, ut certam complexa est? Nos summâ cum devotione ac animi demissione Sanctorum Patrum libros, prout ab Ecclesiâ approbati sunt, perlegimus, amplectimur & veneramur: tanquàm eos qui mentes nostras illuminant, & quasi manuducunt ad divina mysteria aeternasque veritates, quæ in sacris paginis latent, intelligendas. Nequè propterea allegatis Joannis & Petri testimoniis ullatenus contravenimus. Admonent Scripturas scrutari, prophetico sermoni attendere. Hoc facimus, illud non omittimus. Scrutamur, attendimus. Verùm tamen dum in his cæcutimus, ad Sacrorum Doctorum scripta recurrimus, non tanquàm ad canonem, aut fidei regulam; sed tanquàm ad adminicula, quibus ad Sacram Scripturam clariùs intelligendam, promovemur. Et hoc inter cæteros potissimum nobis præstat Augustinus, cujus doctrinam propter retractationum libros irreverenter fugillat hic tenebrio. Eò nimirum

mirum impudentiæ devenit, ut eam quasi suspectam rejiciat, quàm universa Dei Ecclesia ideò vel maximè suscipit, ac suspicit: quàm nec Hæretici alii, nec eorum antesignanus Calvinus, licèt polluto ore, & caninâ rabie cæteros Patres infectetur, despiciunt. Quin imò tantò eam dignatur honore, ut lib. 1. Institutionum pag. 849. cap. de coenâ Domini, dicere non dubitaverit: *Audiamus Augustinum, quem unum habemus Ecclesiæ fidelissimum vetustatis interpretem.* Ità cælestis ille splendor, noctuæ hujus oculis obvolitans, etiam mediâ errorum nocte, aliquo usquè secer- ni potuit, & vel ab invito testimonium veritatis extorsit.

MOTIVVM II.

SI Sanctorum Patrum scripta cum sacris li-
steris conferantur, inveniri graviter à viâ
veritatis aberrasse. Rejicienda tamen absolutè
non esse, cùm non sint in omnibus vitiosa; sed
nequè prorsus admittenda, tanquàm infallibi-
lia Fidei & veritatis testimonia, cùm veritas
Dei hominum testimoniis non indigeat.

D

R E S-

R E S P O N D E T V R.

*Et docetur quid valeant SS. Patrum testimonia in rebus
Fidei.*

VBi Sanctorum Patrum & Doctorum scripta, à quibusdam propositionibus, in quibus fortasse aliqui eorum humanitùs erraverunt; universali Dei Ecclesię consensu purgata fuerint, inoffenso pede percurruntur. Quod etiam in ipsis suis primordiis Ecclesia semper præstitit, ut nunc quælibet Hæreticorum censura, etiã Consistorii Delphici, superveniens, ferius incidat, auctoritate careat. Quinimò, iudicio destituitur, qui mavult iudicium proprium (ut tu mavis) iudicio universali præferre, ac dicere impudenter, ut tu implicite dicis: hic locus Augustini v. g. omnium antiquorum iudicio veritati consonat: meo dissonat, & emendandus est. Tu ita cense dum vis: nos Sanctis Patribus acquiescimus, atque eorum dicta à personis privatis corrigi nefas putamus.

Non

Non quod existimemus veritatem Dei hominum testimoniis indigere, ut in se vera sit & constans, cùm teste Psalmista Psalm. 116. 2. *Maneat in æternum*: requirit tamen ea, ut hominibus proponatur pura & puta, sicùt credenda est, & intelligenda. Ita nempe Deus voluit, ut quemadmodum inferiores Angeli, ut Areopagita nos docet cap. 8. & 15. Cælestis Hierarchie, à Superioribus ordine Hierarchico servato addiscunt, & illuminantur: sic & homines, præsertim ignari, instruuntur, & ad cognitionem veritatis deducantur per eos, quos Deus *dedit Ecclesiæ, Pastores & Doctores ad consummationem Sanctorum in opus ministerii*. Ephes. 4. 11. Hunc à Deo præscriptum ordinem pervertit, quisquis neglecto Ecclesiæ, ac Sanctorum Patrum judicio, suo particulari credit & confidit. Ridiculum profectò est, unius Calvini, Lutheri, Zuvinglii, Oecolampadii, Bezæ, Gommari, Armeni, imò fabri alicujus, vilis lanionis, nautæ, & quod dicere pudet, unius mulierculæ, vix sibi in ullo constantium, & aliorum similia, qui tamquàm fœces Christianissi-

mi, anathemate projecti sunt ab Ecclesiâ Dei in sterquilinum infidelitatis, opiniones diffformes, multiformes, novellas antepone, conformi, uniformi, antiquæ, à tot sæculis probatæ, & approbatæ doctrinæ SS. Augustini, Ambrosii, Gregorii, Hieronymi, Basilii, Chrysostomi utriusque Cirilli, Thomæ Aquinatis. In cuius unius scriptis, velut Catholicæ Fidei firmamento, omnium tam Græcorum, quàm Latinorum Patrum intellectus potissimum effulget. Dic mihi, vir Delphice, quis Sacræ paginæ infallibilem veritatem propiùs assequitur, & pluris facit? an qui eam à tantorum virorum, & universalis Ecclesiæ testimoniis? an qui eam è suo unius cerebello haustam cupit? Veritas Dei sicùt æterna, ita & una est. Ego e.g. bonorum operũ necessitatem adstruo, tu destruis: uterquè pro se Scripturam allegat. Alter nostrũ necessariò veritati æternæ conformatur, alter ab eâ recedit. Ex duabus enim contradictoriis altera necessariò vera est, altera falsa secundum Philosophum. Quis hic fallitur? an ego cum Patribus, an tu cum tuo particulari judi-

judicio? Judicet hic æquus rerum æstimator.

MOTIVVM III.

EXindè in contemptu SS. Patrum persistens, allegat hæc loca Scripturæ. Ezechielis 20. 18. & 19. Dixi autem ad filios eorum in solitudine: in præceptis Patrum vestrorum nolite incedere, nec judicia eorum custodiatis, nec in idolis eorum polluamini. Ego Dominus Deus vester; in præceptis meis ambulate; judicia mea custodite, & facite ea. Et Math. 23. 10. Nec vocemini magistri, quia magister vester unus est CHRISTVS. Et Ioan. 10. 27. Oves meæ scilicet CHRISTI, vocem meam audiunt. Ex quibus concludit eos, qui aliter docent, quàm docuit CHRISTVS, non esse Doctores, sed Seduciores; non Pastores, sed impostores.

RESPONDETUR

*Sanctorum Patrum magisterium,
quod Sectarii abnuunt, vendicando.*

Verum est consequens, licet ex præmissis malè intellectis, & perperam
D 3 appli-

applicatis deductum. Quis quæso aliter docet, quàm docuit CHRISTVS? SS. Patres, an Calvinistę? Ego Calvinistas, ut alienos à CHRITO infimulo, tu Patres: & videris probare velle per illud Ezechiel. *In preceptis Patrum vestrorum &c.* Ad scripturam appellasti, ad scripturam ibimus. Paulò superiùs in cap. citato Ezech. repete: & facilè adverteres, ibidem Prophetę voce Spiritum Sanctum non loqui de SS. Patribus & Ecclesię Doctoribus, qui verbo & exemplo CHRISTVM Dominum sunt secuti: sed de Patribus Judæorum, qui multoties pòst egressum ex Ægypto, Deum suum, fontem aquę vivæ dereliquerunt, fodientes sibi cisternas dissipatas. Subdo verba textus Ezech. 20. 16: *Iudicia mea projecerunt, & in preceptis meis non ambulaverunt, & Sabbatha mea violaverunt: pòst idola enim cor eorũ gradiabatur.* Et quis opera illa mortis posteris imitanda proponeret, quę nedùm legibus humanis, quin & divinis & naturę contraveniunt? Aliter ubi de operibus malis apud Prophetas; aliter ubi de bonis agitur, est sermo. Hinc Isaïę 51. 2. *Attendite ad Abraham Patrem vestrum &c.* Imò etiàm cùm de sa-

de sanâ doctrinâ eorum, quos constituit Ecclesiam suam regere, quàmvis fortè aliud verbo, aliud exemplo doceant, non ita CHRISTVS, ut Calvinistæ sentiunt, Math. 23. 2. *Super Cathedram Moysis, inquit, sederunt Scribæ & Pharisei. Omnia ergò quæcumque dixerunt vobis servate & facite: secundum verò opera eorum* (ea nempe quæ exprobravit Ezechiel, & his similia) *nolite facere.* Sanctis Patribus & Doctoribus nihil hujusmodi objici potest. Si eorum vitam inspiciamus, sanctissima fuit: si doctrinam, sanissima, universali Ecclesiæ consensu receptissima. Hos si carpas, Deum ipsum incesis, qui tales Ecclesiæ suæ dedit Pastores, & Doctores, & Magistros, Ephes. 4. 11. *Superaddis: Magister unus est Christus.* Conaris inferre: ergò ipsi non fuerunt Magistri. Simili argumento probem te non esse Patrem filiorum tuorum, si quos habes. CHRISTVS Math. 23. 9. *Patrem, inquit, nolite vocare vobis super terram, unus est enim Pater vester, qui in Cælis est.* Ergò &c. Profectò secundum te malè locutus est Isaac Genes. 22. 7. *Pater mi, ubi est victima &c.* Malè loquuta B. Virgo

LUC. 2. 48. *Ecce Pater tuus, & ego dolentes querebamus te.* Peccavit CHRISTVS non corripiendo inordinatum modum loquendi? Malè loquutus est Joan. 6. 49. *Patres vestri manducaverunt manna?* &c. Verus igitur Scripturæ sensus est, ut quemadmodum Deus antonomasticè, & longè excellentiori modo, imò in perfectione creaturis incommunicabili, Pater est æternus. Ita Patres vocari super terram prohibet. Admittit tamen homines ex quâdam participatione & analogicè Patres à filiis vocari. Itaque quàmvis *Magister unus est Christus*, tam perfectus videlicet, ut nemo ad ejus magisterii perfectionem, nè quidem remotè possit accedere; cum ipse venerit plenus gratiâ & veritate. Verumtamen non excluduntur, nequè hoc nomine privantur alii ipsius Vicarii & substituti, qui de ejus plenitudine lumen, & gratiam receperunt: nisi Paulum erroris accusas qui *Pastores & Doctores* in Ecclesiâ admitti vult, ut suprâ. Sanè cum idem Redemptor noster seipsum lucis nomine indigetavit, Joan. 8. 12. *Ego sum lux mundi*, omninò verum dixit; quoniam *erat lux vera,*

vera, quæ illuminat omnem hominem venientem in hunc mundum. Joan. 1. 9. & comparisonem, ad eum factam, ipse quo *major non surrexit inter natos mulierum* Math. 11. 11. *non erat ille lux*, ipsomet Joanne asserente, Joan. 1. 8. *Sed ut testimonium perhiberet de lumine.* Et nunquid falsò & adulatoriè discipulos suos eodem titulo CHRISTVS cohonestavit, Math. 5. 14. *Vos estis lux mundi?* an fortè eandem lucis excellentiam in se & discipulis suis demonstratam voluit? minimè. Ipse erat ergò lux vera, quæ illuminabat à seipso: illi etiàm lux vera, sed mutuato ab ipso lumine. Simili modo SS. Patres, si comparisonem cum Christo ineamus, tantum fuerunt discipuli: si ab illâ comparisonem recedamus verè fuerunt magistri à Domino constituti, ad edocendam plebem, aut Scripturarum mysteria explicanda, aut quæ ipsæ silentio prætergressæ reliquerunt, Doctorum ore posteris tradenda. Magistri quidem & Doctores, quibus dictum sit Math. 28. 19. *Euntes ergò docete omnes gentes.* Quos qui audit, vocem Christi audit, quia voce Christi loquuntur, non propriâ sicut Calvinistæ.

M O T I V V M I I I I .

S *Anctis Patribus non opus esse tanquàm Doctōribus & Magistris, convincitur testimonio Pauli 2. Timot. 3. 16. Omnis Scriptura divinitus inspirata, utilis est ad docendum, ad arguendum, ad corripiendum, ad erudiendum in justitiā; ut perfectus sit homo Dei ad omne opus bonum instructus. Vndè etiam concludit, non solum utilem esse, sed & sufficientem Scripturam ad instruendum nos in omnibus, quæ ad salutem æternam spectant. Blasphemare Ecclesiæ Romanæ Doctores, cum eam accusant de insufficiētiā, & traditiones necessarias asserunt.*

R E S P O N D E T V R .

Traditionum Ecclesiasticarum auctoritatem astringendo.

E Rgò & blasphemavit Paulus, qui Scripturam utilem tantum dixit, ubi æquè facile dixisset sufficientem: aut certè aliud doces Doctor Delphice, aliud Paulus. Ipse eam dicit utilem, tu sufficientem.

Sed

Sed & hoc esto. Liberaliter agere tecum
 decrevi. Sufficiens sit ipsa Sacra Scriptu-
 ra, ut ad vitæ perfectionem quemlibet
 perducere possit: dummodò tamen polli-
 cearis, te præcepta ipsius in omnibus fi-
 deliter impleturum, & ab ejus doctrinâ
 nullatenus recessurum. Propono illud
 Deutero: 17. 8. *Si difficile & ambiguum*
apud te judicium esse perspexeris &c. & 9.
Surge & ascende ad locum &c. Veniesq; ad
Sacerdotes Levitici generis, & judicem, qui
fuerit illo tempore: quæresq; ab eis, qui indica-
bunt tibi judicii veritatem. Lege & illud
 Malachiæ 2. 7. *Labia enim Sacerdotis custo-*
dient scientiam & legem requirent ex ore ejus;
quia Angelus Domini exercituum est: & ex
 his & diversis aliis locis, quæ postea refe-
 ram, colliges in veteri testamento, insur-
 gentibus dubiis & difficultatibus, tum
 circa res Fidei, tum alias quaslibet, ad Sy-
 nagogæ Prælatos recurrendum fuisse. Con-
 cordat etiam Evangelium Luc. 10. 16.
Qui vos audit me audit, & qui vos spernit me
spernit. Sic discipulos suos ipsa veritas allo-
 quitur, & in ipsis uniuersos Ecclesiæ suæ
 Pastores, & eorum successores. Et Paulus
 ad Heb.

ad Heb. 13. 17. *Obedite Præpositis vestris & subjacete eis: ipsi enim pervigilant, quasi rationem pro animabus vestris reddituri.* Quàm rectè obediunt Evangelio Sectarii, quando SS. Patres, Doctores, & Ecclesiæ Pastores impudenter rejiciunt, & in ipsis ipsum Christum Ducem ac Magistrum? An Christum audiunt, qui Vicariis ejus non obaudiunt? Generatio prava *confregisti jugum, ut ille apud Jerem. 2. 20. rupisti vincula, & dixisti non serviam, non obediam.* Et non solum non obeditis, sed ipsum Evangelium obtruncatis, & contemnitis. Audite Paulum 2. ad Thes. 2. 14. *Itaque Fratres state, & tenete traditiones quas didicistis, sive per sermonem, sive per epistolam nostram.* Etiamnùm non pudet asserere supervacaneas esse traditiones, quas Paulus tenendas esse jubet, quas passim Scriptura tam serio commendat. Deuter. 32. 7. *Interroga Patrem tuum, & annuntiabit tibi, majores tuos & dicent tibi.* Et Jerem. 6. 16. *Interrogate de semitis antiquis.* Et Exodi 13. 8. *Narrabis filio tuo in die illo dicens: hoc est, quod fecit mihi Dominus.* Et Job 8. 8. *Interroga enim generationem pristinam,*

*nam, & diligenter investiga Patrum memoriam, & Jud. 6. 13. Vbi sunt mirabilia, quæ narraverunt Patres nostri, & Psal. 43. 1. Deus auribus nostris audivimus, Patres nostri annuntiaverunt nobis, opus quod operatus es. & Psal. 77. 6. Quanta mandavit Patribus nostris nota facere filiis suis, ut cognoscat generatio altera. Filii qui nascentur & exurgent, & narrabunt filiis suis. Quid clariùs dici potuisset? quomodo Traditiones disertius commendari? imò quâ ratione expressius explicare aut declarare potuisset Spiritus Sanctus modum, rationem, & praxim, per quam Traditiones in Ecclesiâ Sanctâ Catholicâ invexit. Quanta enim & quàm multa mandavit Patribus nostris Apostolis, nota facere filiis suis, seu successoribus immediatis; ut per illos filios cognoscat generatio altera, & de filiis in nepotes, & de nepotibus in eorum pronepotes aut discipulos, & sic deinceps continuâ temporum successionem deriverentur, ea omnia, quæ Apostoli cæteri que Patres nostri, non scripto tantum, sed etiâ verbo tenus *narraverunt filiis suis*: quæ filii, non solum oculis legerunt, sed etiam quæ à Pa-*

à Patribus suis annunciata, *auribus suis audiverunt*. Quàm igitur cavendum est ab his qui ab hujusmodi Patribus narrata, auribus suis audire nolunt, nisi eadem oculis suis legerint. Ita planè cavendum est : nàm & hoc nos admonet idem Spiritus Sanctus. Eccles. 8. 11. *Non te pratereat generatio seniorum, ipsi enim didicerunt à Patribus suis, quoniam ab ipsis discas intellectum &c.* Hæc inter cætera propè infinita Scripturæ loca, quibus solidissimè & luculentissimè Ecclesiasticæ Traditiones astruuntur, sufficiant. Conabitur ea fortasse sciolus aliquis Sectarius pro more suo eludere : didicisse Judæos à Patribus suis illa dumtaxat, quæ jam Moyses divino numine afflatus, scripta reliquerat. Verùm absquè fundamento hæc assereret. Imò contrarium liquidò patet : nàm nec in Exodo, nec in aliis libris Moyſis reperiet, quod inter plagas, quas persenserunt Ægyptii, in liberatione populi Israëliti, possessiones eorum fuerint igne consumptæ : verùmtamen inter ea quæ David profitetur se à Patribus excepisse, Psal. 77. 48. *Et tradidit grandini jumenta eorum, &*
possessio-

possessionem eorum igni, in terminis exprimitur. Et in novo Testamento, Apostolus qui traditiones in tantum commendavit, exemplo eas confirmatas reliquit, Actor. 20. 35. *Oportet*, inquit, *suscipere infirmos*, *ac meminisse verbi Domini* JESU. *Quoniam ipse dixit: Beatiùs est magis dare quam accipere.* In quo Evangelio scriptum est, quod Christus Dominus hanc sententiam sacro ore protulerit? Non invenies. Paulus igitur hæc verba Christi non ex scripturâ, sed ex traditione Ephesiis credenda proposuit. Ecce habes aliquid traditum, quod non erat scriptum. Crede igitur Scripturæ Traditiones approbanti, & desine eas improbare. Tu eam sufficientem verbo asseris, facto mutilas, ubi seniorum Traditiones, quas amplectitur, non admittis. Nos Catholici, veræ Ecclesiæ Dei filii, sic mutilam de insufficientiâ increpamus: integram verò sufficientem sustinemus, quandoquidem Dominus Deus plenissime nobis omnia media, quibus ad vitam Christianam, & perfectionem Evangelicam, ac demùm ad æternam felicitatem perducamur, proposuit. Ex quibus

quibus illa non infima sunt, ut Præpositis nostris subjaceamus, Traditionibus acquiescamus &c. quæ procùl dubio frustrà nobis à Spiritu Sancto præcepta fuissent, si media necessaria non essent, ad Ecclesiam Dei rectè instituendam, & plenè formandam, aut si nudum Dei verbum scriptum absquè Traditionibus pro omni rerum, temporum, & locorum differentiâ sufficeret. Profectò verbo Dei injuriùs es, quisquis illud ad paucas illas, quas ex divinis literis habemus paginas, restringis, quod teste Evangelistarum Aquila Joanne c. 21. 25. sui Evangelii, mundus quaquâ parte patet, capere non posset, *Sunt inquit & alia multa, quæ fecit JESVS, quæ si scribantur per singula, nec ipsum arbitror mundum capere posse, eos qui scribendi sunt libros.* Certum quippè est, quod Christus Dominus, dùm inter nos visibilis degeret, nihil sacro ore protulerit, aut factò probaverit, quod ad nostram doctrinam & ædificationem, factum, dictumque non fuerit. Vndè ergò tam multa (si Evangelistæ credimus) Scriptores Sacri silentio præterierunt? haud dubiè ideò, ut Do-

ctori-

ctoribus atque Prælatiſ multa tradenda, docendaque relinquerentur. Nec eâ de cauſâ inſufficiens dicenda erit Scriptura, cùm illud ipſum digito monſtret. *Traditiones tenete. Obedite Præpoſitiſ veſtriſ. Qui voſ audit, me audit.* Imò tu ipſe (tàm ſibi inconstans eſt hæreſiſ) in multis, quæ ab Eccleſiâ Dei vel invitus recepisti, invitus quoque Traditiones admittis. Vbi enim ſcriptum eſt, quod dieſ Dominica loco ſabbathi ſit obſervanda? Vnde tibi ex Scripturiſ conſtat, ipſa quatuor Evangelia eſſe canonica; multa verò alia quæ in primordiis naſcentiſ Eccleſie circumferebantur, eſſe apocrypha? maneat igitur vendicatum illud Paſtorum atque Doctorem munus, docendi videlicet & tradendi ea, quæ à Chriſto & Apoſtoliſ docenda ac tradenda exceperunt.

MOTIVVM V.

R Ejicit manus Interpretum, eò quod Sacrae Litera non ſint obſcura, motuſ argumeto, *Pſal. 118. 105.* Lucerna pedibui meiſ verbum tuum, & lumen ſemitiſ meiſ.

E

Conclu-

Concludit, ad adipiscendum verum & legitimum earum sensum, non opus esse interprete.

R E S P O N D E T V R.

Quomodo Ecclesiae Pastoribus, ac Doctoribus S. Scripturae interpretationem Deus reliquerit, liquiddò demonstrando.

H Ic mendacem reddis Apostolorum Principem Petrum epist. 2. c. 3. 16. dicentem, quod in epistolis Pauli sunt quaedam difficilia intellectu, quae indocti & instabiles (quales vos estis) depravant, sicut & ceteras Scripturas, ad suam ipsorum perditionem. Vel certè alter vestrum mendax est: aut tu qui genuinum Scripturae sensum cuilibet obvium, & clarum asseris: aut Petrus & in eo Spiritus Sanctus, qui in quibusdam difficilem intellectu pronuntiat. Perpende tantisper, quis Scripturas depravat difficiles intellectu: an nos qui Doctis & Sanctis Patribus earum interpretationem relinquimus, an vos, qui indoctis quibusque & infime fortis homunculis, & , quod
puden-

pudendum est, etiã mulierculis? Audi
 Apostolum increpãtem *Qua indocti deprav-*
ant. Nos Fidei puritatem, prout à Patri-
 bus nostris accepimus, intactam & illiba-
 tam à tot sæculis intrepidè retinemus. Vos
 velut *nubes sine aqua*, proprii judicii vento
 circumferimini, in tot sectas quot capita
 divisi: *Qua instabiles depravant.* quid de-
 pravant? Epistolas Pauli, & cæteras Sa-
 cras Scripturas intellectu difficiles. Plus
 dico, claras & faciles corrumpunt, & ut
 cum Apostolo Judâ loquar v. 10. *Quæcum-*
que quidẽ ignorant, blasphemant, quæcum-
que autem naturaliter, tanquã muta animalia
norunt, in his corrumpuntur. Etenim expref-
 sissima Scripturę testimonia, de operum
 meritoriorum necessitate, de dignis poe-
 nitentię fructibus, de reali Servatoris no-
 stri præsentia in Sacrosancto Eucharistię
 Sacramento, & multa denique alia ad
 suam ipsorum, & aliorum perniciem de-
 torquent. Justo Dei judicio factum est,
 ut qui aures audiendi habuerunt, & audi-
 re detrectarũt, clara nempè & aperta
 intelligere; in obscurioribus penitũs cœ-
 cutiant, & auditu audiant, non intelligant.

Quod si clara sint omnia, & omnibus aperta quaecumque in Bibliis scripta sunt, cur Redemptor noster ad turbas vix aliter, quàm in parabolis locutus est? *Hæc omnia,* ait Math. 13. 34. *locutus est JESVS in parabolis ad turbas, & sine parabolis non loquebatur eis.* Dimissis autem turbis, Discipulis suis parabolas planè difficiles, quas nec ipsi intellexerant, edifferebat. Interrogantibus Discipulis Math. itidem 13. 11. *Quare in parabolis loqueris eis? Qui respondens ait illis, quia vobis datum est nosce mysteria Regni Cælorum: illis autem non est datum.* Inter turbas plurimi crediderunt in Christum; nec eum omnes sequebantur, ut tentarent, sicut Pharisei; sed desiderio vitæ plurimi. Attamen in parabolis loquebatur ad eos, Discipulis verò clarè. Vndè hoc? nisi quia voluit in Scripturis quædam esse subobscura, in quibus indocti à Doctoribus, oves à Pastoribus, plebei à suis præpositis edocerentur: atquè eâ ratione hierarchicus ille ordo, à constitutione Ecclesiæ apprimè servatus, institueretur. Cum negari non possit, multa esse parabolica & obscura, quæ interpretatione indigeant: lu-
cerna

cerna quidem est verbum Dei, & lumen
ad dirigendos pedes nostros in viam pacis, iis
 præsertim qui simplici ac depurato men-
 tis oculo ad illud accedunt; vespertilionibus
 perindè tenebræ, papilionibus incau-
 tis ignis est comburens, *Scrutator enim*
Majestatis opprimetur à gloriâ, Proverb. 25.
 27. Dices, Scripturæ sensum per seip-
 sum innotescere, siue uno siue alio loco.
 Quod si ita est, cur inter vos tot dissen-
 siones, tot divisiones, tot sectæ, quibus
 vestem inconsutilem Christi, utpotè Ec-
 clesiam, dilaceratis, eamque infinitis fal-
 sis dogmatibus confunditis? ideo sine du-
 bio, quod indocti & instabiles, debili ve-
 stro judicio adhærentes, illud lumen per-
 peram respuitis; rejectis doctis & stabili-
 bus Sacræ Scripturæ interpretationibus,
 quas Sancti Patres & Ecclesiæ Doctores
 in œcumenicis Consilijs unanimi con-
 sensu diversis sæculis tradiderunt. For-
 sitan argues, non fuisse in Spiritu Sancto
 legitimè congregatos: seductores potius
 & impostores dicendos, quàm Doctores
 & Pastores: adeòque nec verum Scriptu-
 ræ sensum fuisse affecutos. Hæc dicis, sed

non probas. Incumbit tamen tibi, tuisq; novellis hâc in causâ actoribus, probandi onus, si tibi, tuisque, ab æquis rerum æstimatoribus fidem haberi desideras: contrâ eos etenim agis, qui horum titulorum ac jurium à mille sexcentis & amplius annis possessionem continuatam sunt affecuti. Atque hæc quàm iniquè & perversè, absque ullâ veritatis, aut rationis, umbrâ dixeris, inextinguibile Sectariorum odium, quo in Ecclesiam Dei effervescent, satis superque demonstrat. Estis enim (sicût ab initio fuistis) blasphemi in Deum & Superos, velût filii Agar semen maledictum, qui benedictam progeniem Isaac continuò persequuntur.

M O T I V V M V I.

Prosequitur Evangelium Christi regulam esse Fidei: sicuti lex Dei sola est regula obedientiæ. Nihil quod scriptum non sit in Sacris & Canonicis libris esse admittendum. Ceteras doctrinas, tanquàm merè hominum execrandas esse, & detestandas: utpotè anathematis fulmine ab Apostolo percussas, ad Gal. 1.8. & 9.

Sed

Sed licet nos, aut Angelus è Cælo evangelizet vobis, præterquàm quod evangelizavimus vobis, anathema sit. Sicut prædiximus, & nunc iterùm dico: si quis vobis evangelizaverit, præter id quod accepistis, anathema sit.

R E S P O N D E T V R.

Traditionum auctoritatem iterùm impetitam rursus confirmando.

AD hæc abundè superiùs responsum puto, ubi diximus solum verbum Dei esse regulam Fidei: verùm non omne scriptum, at aliquod prætereà esse traditum. Quisquis itàque Apostolicæ doctrinæ & Evangelicæ contravenit, etiàm de voto meo anathema sit. Sed in hujusmodi scopulos nullus Catholicorum impingit: capiti tuo fulmen illud imminet; veriùs dicam, jàm pridèm evibratum est. Contrariam Paulo doctrinam evangelizasti, Traditiones non esse tenendas, cùm ille prædicet: *Tenete traditiones*, 2. ad Thess. 2. 14. Denique, dic quæso, five particula

tricula illa (præter) dicat habitudinem contrarietatis directæ, sive disparatæ; quid illo Scripturæ loco contrà Traditiones probas? Nequè enim solo scripto evangelizavit, seu prædicavit Christus, Paulus, & alii Apostoli. Verùm etiàm plurimùm verbo tenus: nequè illa omnia scripto tradita, nisi expresso divi Joannis Evangelistæ testimonio c. 21. 25. superiùs citato, fatearis te ex asse contrariari. *Sunt & alia multa*, inquit, *quæ fecit JESVS quæ si scribantur, &c.* Nequè scripto omnia tradiderat Paulus, quæ ab eo acceperant Galatæ: *Tenete*, inquit, *Traditiones vestras, quas didicistis, sive per sermonem, sive per epistolam*, 2. ad Thess. 2. 14. Vndè ille Pauli locus ad Gal. 1. 9. inclarescit: *Si quis vobis evangelizaverit, præter id quod accepistis, per sermonem videlicet, sive per epistolam, anathema sit.* Cùm igitur Catholici Traditiones prædicant, nihil præter id quod Christus evangelizavit, vel Apostoli, evangelizant: sed illud ipsum dumtaxat, quod Patres nostri ab ipsorum ore receperunt, posteris suis, consentiente, & approbante Ecclesiâ tradiderunt: quod & ad nos usquè per Traditione

ditionem derivatum, rectè credendum proponitur ; tanquàm ab ipso Domino acceptum, & ab Apostolis, eorumque Successoribus evangelizatum. Hæc si inspexissēs, non tàm impertinenter ea, quæ sequuntur improperares.

MOTIVVM VII.

Q*Uod Eckius loc. comm. c. 3. asseruerit, ipsammet Scripturam Sacram nullâ ratione esse authenticam, sine auctoritate Ecclesiæ. Ecclesiam esse antiquiorem Sacrâ Scripturâ. Hanc autem esse regulam plumbeam, aut nasum cereum, qui ad quamlibet partem flectitur. Esse velut fabulam Æsopi, si Ecclesiæ ei desit auctoritas. Esse causam Hæresum; ac propterea Laicis ejus lectionem esse prohibendam. Quod Tridentinum (ut impiè calumniatur) conciliabulum, æqualem tribuat Traditionibus ac Scripturæ auctoritatem & reverentiam: Non secus ac si forent veræ Fidei fundamentum, sine quo pondus & auctoritas Scripturæ evanescit. Has propositiones, multiplici censurâ notatas, rejicit ut blasphemias, insolentes, & verbo di-*

vino detractorias, quod illud quasi ab hominum voluntate dependere faciat. Iactare quidem Religionis speciem: re verâ tamen magis creaturæ, quàm Creatori famulari, magis gloria hominum quàm honori divino intendere. Hanc vel unicam causam sibi sufficere, ut Religionem Romanam detestetur, &c.

R E S P O N D E T V R.

Scripturæ, Traditionum, & Ecclesiæ dignitates conferendo. Quibus Scriptura sit regula plumbea; & cur plebeiis non ita facilè permittatur?

E Go verò ob eam rationem vel maxime, Romanam Ecclesiam verè Catholicam & Apostolicam amplector, & veneror; quod ipsâ Scripturâ sit antiquior: quod per ipsam Scriptura nobis sit authentica & canonica: quod Traditiones Scripturæ conjungat. Per hoc enim, quo ad nos, inæstimabilis verbo Dei conferitur dignitas, ejus honor & gloria mirum in modum ampliatur, & quod eo amplius est,

us est, Fidei nostrę certitudo mirificè stabilitur. Hęc ut magis innotescant, dic obsecro, quicumque solis ac nudis Scripturis inniteris, vndè habes illas ipsas esse canonicas? an à Traditione? illam respuis. An à Sanctis Patribus? illos contemnis ut lubet. An ab Ecclesiâ Catholicâ & Romanâ? illam non audis. An à Lutherana vel Calvinisticâ? si ais; inquirō, à quo habuit illa antè centum circiter annos, cùm nondum hæreses istæ essent exortæ? Certè hîc Romanæ Ecclesiæ aut Patribus, aut Traditionibus honorem illum deferres: aut si nolis, valdè infirma & caduca est Fides tua. Recurres ad particularem spiritum tuum. Quid eò insolentiùs? iudicio tuo, verbo Dei injurius est, detractor tantæ majestatis habendus, qui iudicium illud, *Scripturane sit authentica* Catholicæ, & Romanæ Ecclesiæ Conciliisq; œcumenicis relinquit: quantò magis, qui auctoritate propriâ, unius homunculi nutu, Scripturam facit authenticam, ex libris canonicis quos lubet aut rejiciens aut admittens, ejus honori injurius detrahit. In causâ gravi, unius advocati iudicio

NON

non statur , copiosior Jurisprudentium numerus adhibetur. In morbo periculoso, unico medico non contentus, quoscumque potes advocas expertissimos. In rebus tùm politicis tùm bellicis Respublica Venetorum & Provinciæ rebelles pluralitatem Senatorum adhibent. Tu verò in re longè gravissimâ discernendâ, Quænam sit vera, Canonica & authentica Scriptura, Spiritui tuo particulari stare non erubescis? & quod ferendum non est, tibi soli arrogas, quod universali Ecclesiæ, quod Sapientissimorum, juxtâ ac Sanctissimorum virorum consilio, & unanimi omnium consensui concedere, blasphemum & insolens reputasti. Acquiesce igitur, per salutem animæ tuæ precor, Sacrosanctæ Romanæ Ecclesiæ, Catholicæ & Apostolicæ, quæ in omnibus sæculis multorum, eorumque celeberrimorum virorum sanctitate & doctrinâ refulsit. Acquiesce inquam, communi judicio, non ita proprio. Acquiesce Pastoribus, ad quos hæc Christi promissio, nullâ unquam injuriâ temporum interrumpenda, *Ego vobiscum sum omnibus diebus, usquè ad consummationem*

mationem sæculi, Math. 28. 20. Illa enim tam affecurata promissio, privatis hominibus facta non est; sed Apostolis & Ecclesiæ Pastoribus, præsertim in nomine Domini uno in loco adunatis. Et super hoc audi Sapientissimum Augustinum de quant. animæ c. 7. tom. 1. ejusque consilio vel aliquando acquiesce: *Auctoritati credere, magnum compendium est, & nullus labor.*

Porrò quod tibi novum videtur, cùm dicitur Ecclesiam Sacris Literis esse antiquiorem. Si de veteri Testamento sermo est, pluribus sæculis Abel justus Moysen Agiographorum primum antecessit. Si de novo, Ecclesia jam erat, antequàm Mathæus primus inter Evangelistas, Evangelium conscriberet: prior erat Ecclesia, quàm cæteri omnes Evangelistæ, ac Apostoli suas tùm Epistolas, tùm Evangelia evulgarent. Joannes viginti circiter annis à Passione Christi Evangelium scripsit: tempore intermedio jam erat Ecclesia. Quod itaque sit illud inconueniens, quod Ecclesia Scripturis ætate sit prior, quod antiquior? Vndè mirum videri non debet,

bet, quod ab eâ auctoritatem Scriptura trahat, cùm ipsa sit, quæ Mathæi, Marci, Lucæ, & Joannis Evangelia, quibusdam Apocryphis, ut Petri, Thomæ, Nazaræorum, & ejusmodi rejectis, auctoritate suâ stabilivit. Ita clarè fatetur August. contrâ epist. Manichæo, c. 5. tom. 6. *Ego verò, inquit, Evangelio non crederem, nisi me Catholica Ecclesia commoveret auctoritas.* Blasphemum deindè censes, si Scriptura dicatur velût regula plumbea, aut nasus cereus. Et ita profectò est, experienciâ teste, in vobis, qui pro libitu eam exponitis, & quocumque fert libidò detorque-
tis. Nec deest, qui numerarînt istorum verborum, *hoc est corpus meum*, plures centum, toto Cœlo distinctas, novas, paucis ab hinc annis effictas à vestris expositiones. Quæ regula plumbea, aut quis nasus cereus tam versatilis sit? solis tamen Sectariis plumbea, aut cerea est: Catholicis inconcussa, ære firmior, nullâ novatorum arte labefectanda, plenè stabilis. Ab ipsis Ecclesiæ primordiis unicâ expositione; eâdemque ad literam, quisquis Catholicus fuit, ad hæc usquè tempora propositionem

tionem allatam explicuit. Quare si Sacrae Literae causa sunt, vel occasio potius errorum, nequàquam id illis vitio vertendum est: sed illis potissimum imputandum, qui illarum specie potius abutuntur, quàm utuntur. Duo namque maximè earum lectori considerata sunt, litera quæ plerumque occidit; deindè Spiritus, seu verus Ecclesiae sensus, qui vivificat. Vulgus indoctum literæ ac verborum còrtici ut plurimum inhærens, mysteria ignorat penetrare, & occiditur: Ecclesia Spiritum scrutatur, & vivificatur. Id Augustinus agnoscens præ dolore exclamavit tom. 10. ferm. 70. de Temp. *Infelices Iudæi, & plus infelices hæretici, qui dùm solum literæ aspiciunt sonum, quasi corpus sine animâ, ita sine vivificante Spiritu mortui remanserunt.* Ut interim paulò hæc ampliùs inclarescant, addo, quod posito illo Calvinistarum fundamento, videlicèt quod rejectis Traditionibus, Ecclesiae, & Sanctorum Patrum legitimis interpretationibus, particulari spiritu Scriptura sit intelligenda, vix ulla est, aut fuit unquàm hæresis, quæ defendi & propugnari non possit.

possit. Gratis non assero, rem digito demonstro. Sit exemplum: Tu cum Sabelianis somnias Patrem & Filium & Spiritum Sanctum non esse tres personas distinctas, sed diversas in Deo denominationes, secundum diversos respectus; multò faciliùs defendes, quàm dùm negas realem Corporis Christi in Eucharistiâ præsentiam. Dices enim, hoc nomen, Persona, non esse ex Scripturis sumptum, hoc tibi dogma à Spiritu particulari dictari, Ecclesiam & Sanctos Patres, quidquid dicant contrarium, non esse audientes. Hâc viâ etiàm quilibet sui cerebri homuncio, tui similium more, quosvis turpissimos errores propugnaverit. Nequè miror deinceps, quod in tot horrendas hæreses, imò non in multo graviores, illo fundamento strato, incideris. In Ecclesiâ Catholicâ, his incommodis abundè provisum est: ubi Scriptura interprete non indiget, primas obtinet: ubi obscura, Doctorum interpretationes requirit, quæ à tot sæculis semper sibi fuere conformes. Ad eas tanquàm ad sacram anchoram recurritur. Et his concurrentibus, nequè

nequè plumbea nequè cerea est, sed certa & ineffabilis, quarumcumque hæresum malleus, & Christianarum veritatum magistra. Sapientissimè autem in Ecclesiâ sancitum est, *Regulâ 4. Indicis lib. prohibet.* ut Bibliorum in vulgari linguâ lectio non concedatur, nisi à Catholicis auctoribus verforum, atquè iis qui ex huiusmodi lectione non damnum, sed Fidei & pietatis augmentum capere possunt. Non enim in dubium revocari potest, vulgus imperitum faciliùs scandalis immergi, difficiliùs emergere, subtilitatum & distinctionum incapax. Vidimus & audivimus Arianorum, Manichæorum, Donatistarum, & omnium poenè antiquiorum hæreticorum voces, inclamantium Scripturas, ad Scripturas provocantium, & dùm literam sequerentur, non Spiritum, suo se gladio jugulasse. Ingemiscit de facto Germania, ingemiscit Anglia, Gallia, Belgium ab hæreseos peste non immunes, & interitus sui infoelicem hanc causam, ex eâ legendi libertate natam, seriùs deplorant. Rectè Ambros. comment. in c. 3. Lucae. *Verendum esse, nè Scripturarum*

lector ignarus, magis vulnus ex imprudentiâ, quàm salutem ex lectione sentiat. Præclarissima illa ingenia Augustinus, Ambrosius, & alii, quos labores, quas vigilias, perpetuò lucubrantes in adipiscendâ Scripturarum intelligentiâ non impenderunt? Nihilominus audi, vir Delphice, & cumque tecum de Scripturarum claritate gloriantur, Augustinum inter Doctores Ecclesiæ velut aquilam, de seipso loquentem, Tract. 36. in Joannem. *Iam ergo videte quàm sublimia loqui debuit, qui est aquila comparatus; & tamen etiâ nos humi repentes, infirmi, & vix ullius momenti inter homines, audemus tractare ista, & ista exponere: & putamus nos, aut capere posse cùm cogitamus, aut capi dùm dicimus.* Ita ille de se, qui doctrinâ & ingenio ultrâ mille parasangaste & tuos pòit se relinquit, non aliter quàm aquila vespertilionem. Nec tamen pudet vel cogitare, quod Scripturarum sensum capiat, ubi absquè ullo studio, non rarè in ipsâ superficie vocum immoramini, ad vestrum & aliorum interitum. De veteri Testamento ait Hieron. epist. 151. ad Algasiam, quod tantis difficulta-

cultatibus, ac futurorum typis obvolutum sit, ut interpretatione totum quantum indigeat. In novo autem tam profunda Dei consilia, tam arcana & plena Majestate mysteria sub verborum cortice delitescent, ut vix dum & solum ab aquilis inter tot radios deprehendi & discerni possit. De Epistolarum Pauli obscuritate Petrum Apostolum nuper audivimus: adjungo D. Hieron. de epist. ad Rom. quæst. 10. ad Hedibiam epist. 150. *Omnis quidem ad Romanos Epistola interpretatione indiget, & tantis obscuritatibus obvoluta est, ut ad intelligendam eam, Spiritus Sancti indigeamus auxilio.* Apocalypsis absquæ tergiversatione, tota symbolis, tota sensuum obscuritate scatet. Inter has Scripturæ tenebras, secus esse non potuit, quin hi, qui supernaturali lumine se duci non patiuntur, sed proprio & naturali oculo eam contemplari conantur, à veritatis tramite deviant. Duci ab Ecclesiâ (contrà quam portæ Inferi non prævalebunt) ejusque Pastoribus, quibus perpetuam Deus assistentiam promittit, divino ac supernaturali lumine duci est. Supernaturalia, penes quæ

versatur Fides nostra, proprio oculo videre velle, coëcutire est. Quàmobrem nihil sapientiùs sanciri, nihil populo Christiano salubriùs excogitari potuit, quàm salutaris illa prohibitio: nè nimius ille lucis æternę splendor, si ab imprudenti & indocto oculo petatur, visum consternat, & legentem perimat; nè mucro ille imbecillioribus manibus credatur, nè offendantur. A Latinis, Græcisque codicibus, quorum probata est versio, nullus arceatur: quòd harum linguarum periti passim doctiores præsumentur. Cæteros longè consultiùs est per conciones, ac Pastorum instructiones, juxtà uniuscujusque captum & doctrinam, in Evangelicâ doctrinâ institui ac edoceri: eâ ratione satiùs Christiana Plebs in pietate, humilitate, & Dei timore continetur, nè per Scripturæ lectionem in cogitationibus suis superbè evanescat, proprio nixa judicio. Plurima denique sunt in Sacris Literis, quæ si ad imperitum vulgus devenirent, facilè riderentur, aut quod pejus est, in pravos usus converterentur; qualia passim in Canticis Cant. libro Ruth, & alibi reperiuntur. Ob
occa-

occasionem non abfimilem Manichæi à veteris Testamenti reverentiâ imprudenter, & impudenter recefferunt. Tanti incommodi occasio meliùs tolli non potuit, quàm ab imperitorum manibus sacros codices amovendo; ut quos cùm rariùs triverint, ut solet, majori veneratione prosequantur.

Tandem etiàm blasphemum non est, imò nec inconveniens Traditionibus Apostolicis æqualem ac Sacræ Scripturæ honorem deferre, easque antiquiores asserere: dummodò verè sint Traditiones universalis Ecclesiæ à sæculo in sæculum deductæ, receptæ & approbatæ.

Et quantumvis hæc superiùs discussa fuerint, ratione novæ objectionis rursus tangenda videbantur. Quid obsecro interest Imperatorum jussa scripto intimentur, aut vivâ totius Senatus, populi que voce denuncientur? Certè quoquomodo fiant, eadem reverentia, eadem debetur obedientia. Similiter nihil absurdum æterni Regis imperata, vel scripto, vel Ecclesiæ vocali denuntiatione cognoscantur, cognita credantur, credita pari ac

scripta honore excipiantur. Nequè honor ille in hominem cadit, sed in Deum, cuius homines instrumenta sunt, quibus velut per canales divina voluntas innotescit. Et si hoc magis creaturæ subjici sit, quàm Creatori, quod verbo non scripto eadem Fides, quæ scripto adhibeatur; profectò creaturæ quoquè subjici est; & non Deo, per exaratam characteribus chartam, primam veritatem agnoscere. Quare Traditionibus & Scripturæ credere, nihil aliud putamus, quàm Deo credere revelanti; à quo utrumque, licet per diversâ media, intimatum nobis est. Nequè enim ad unum manus Dei ligata est. Ille quippè non solum Imperatoris indignationem justè incurrit, qui ejus voluntatem literis traditam contemnit: sed ille quoquè, qui Legatū ejus audire recusat, ad hoc præfertim auctorizatum, ut hîc & nunc in rebus suæ legationis audiatur. Audiendi itaque sunt Ecclesiæ Doctores, & Pastores in rebus sui muneris, quales etiam sunt Traditiones: cum ad hoc verè & manifestè missi, verè destinati sint, utpotè ad quos illa dirigantur, *Qui vos audit,*
me

me audit LUC. 10. 16. *Rogavi autem pro te, ut non deficiat Fides tua, &c.* LUC. 22. 32. *Portæ inferi non prævalebunt* Math. 16. 18. *Tenete Traditiones*, 2. ad Theff. 2. 14. Nec minoris faciendæ sunt Ecclesiasticæ Traditiones quàm Sacra Scriptura, cui illas exequare non dubitavit Paulus: *Tenete Traditiones &c. sive per sermonem* 1. verbum Dei non scriptum, *sive per epistolam* 1. verbum Dei scriptum: adeoque tamquàm æqualis auctoritatis non scriptum scripto antepōnit, velut tempore prius: velut ideò infallibile non sit, quod scriptum, vel non scriptum sit; sed quod à Deo procedat revelante, qui & hoc revelavit etiàm antequàm scriberetur. Certum quoque est ea, quæ scripta sunt, tradita plerumque prius fuisse, vndè Paulus 1. ad Cor. 11. 23. *Ego enim accepi à Domino, quod & tradidi vobis.* Et ipse Lucas in ipso sui Evangelii limine, se à Traditione ea quæ scripsit accepisse confitetur: *Sicut tradiderunt nobis, qui ab initio ipsi viderunt, & ministri fuerunt sermonis.* LUC. 1. 2. Clarum igitur est ex Scripturâ haberi, Traditiones præcessisse; tantò magis quod Scripturam Canonicam &

authenticam esse nunquam sciveris, nisi magistrâ Traditione, aut (quod in idem recidit) Ecclesiâ, cujus auctoritate Traditiones comprobantur.

Forſitan objicies quod hominum natura ſit fallax, quod *omnis homo mendax*: adeoque in Eccleſiam facile introduci poſſe plurimos errores, cum ex hominibus conſtet; qui errores decurſu temporum, quaſi Traditiones Apoſtolicæ facile haberentur, atque adeo nec in materiâ Fidei, nec morum, regulas poſſe conſtitui infallibiles, quæ à tam fallaci principio petantur.

Occurro quod eâdem prorfus ratione dicere poſſis; quoties appetitui tuo videretur, Sacros Evangeliorum Codices humanâ malitiâ corruptos & adulteratos. Dices etiam Moysen, Prophetas, Apoſtolos, & Evangeliſtas homines fuiſſe, adeoque fallaces, mendaces nec infallibiles. Nos longè aliter, eos homines quidem ſecundum naturam corruptam, variis erroribus & corruptionibus obnoxios eſſe dicimus: ſi tamen à Spiritu Sancto inſtruantur ac dirigantur, omninò infallibiles, errare
non

non posse. Tales putamus Moyſen & Prophetas, qui Spiritu Sancto dictante, veteris Testamenti paginas conſcripſerunt. Tales Apoſtolos & Evangeliſtas, quibus dictum eſt Joan. 16. 13. *Cum autem venerit ille Spiritus veritatis, docebit vos omnem veritatem.* Talem deniquè univerſalem Eccleſiam, quæ fundata eſt ſuprà firmam petram, adverſus quàm portæ inferi non prævalebunt, Sponſam Chriſti, columnam & firmamentum veritatis. Conſtat autem hanc Eccleſiam eſſe viſibilem, & ex hominum univerſitate conſtari; quibus in unum per unitatem Fidei congregatis, non per ſchiſma & opinionum particularium diviſionem ſejunctis, peculiarem Chriſtus Dominus uſquè ad finem mundi promiſit aſſiſtentiam, *Ego vobiscum ſum in omnibus diebus uſquè ad conſummationem ſæculi*, Math. 28. 20. Sicùt igitur illi, qui verbum Dei, quod eſt ipſa veritas, divino numine aſpirante, ſcriptis mandarunt, nequaquàm potuerunt errare: ita nec ipſi qui verbum Dei non ſcriptum ſpeciali Spiritus Sancti aſſiſtentiâ nobis proponunt. Et ſi dicas verbum ſcriptum

talem divinæ veritatis splendorem emit-
tere, ut per seipsum satis patefiat, his præ-
fertim qui vero Fidei lumine illustran-
tur; ego planè minores radios ex verbo
non scripto ab Apostolis continuâ succef-
sione ad nos derivato, vix aut numquàm
deprehendo. Quasi verò verbum Dei ali-
ter sonet, aut minùs resplendeat in ore
universalis Ecclesiæ, quàm in chartâ.
Quod autem Hæretici illud Scriptu-
ræ lumen sibi micare asserant, arrogan-
ter omninò sibi & nobis imponunt. Et-
enim si ita est undè tam pertinaciter &
furiosè pro vero Scripturæ sensu inter
se decertant? Quod unus affirmat, alter
negat. Rectè in illos quadrat illud, *Quot
homines tot sententia*: ita ut turrim Baby-
lonicam verè exstruere dici possint. Lon-
gè aliter Sanctæ Ecclesiæ Romanæ filii,
qui quamvis loco, tempore, ac naturali
propensione plurimùm inter se distent,
unanimes tamen consensu in unicum do-
ctrinæ, & veritatis splendorem conspi-
rant, in immutabile unius Fidei lumen
conveniunt, & cohærent. Licèt enim
plura sint membra, quia tamen in unius

cor-

corporis communione copulantur, unico Fidei oculo vident : & si quid unum clarè vident , per Spiritum Sanctum vident, *Qui inhabitare facit unius moris in domo*, Psal. 67. 7. qui singularis Spiritus Sancti effectus est. Hæretici verò qui seipfos velut putrida membra ab hoc corpore , separarunt , ab illâ Spiritus Sancti assistentiâ , quæ corporis hujus anima est , planè recedunt : & tot sibi oculos fabricant , quot separata membra sunt. Sicùt autem utenti perspiciliis polygonis unicus nummus verus , plures verò falsi apparent : Ita in rebus Fidei veritas unica est , quàm circumambiunt plura hæreseon mendacia , plures umbræ. Et quemadmodum illa male sibi constans certum falsitatis & mendacii argumentum est : ita concors illa unitas infallibile signum veritatis , quo vera Ecclesia à falsâ , verus populus Christianus ab Hæreticis dignoscatur. Aperi itaque oculos infœlix Emanuel : imò oculos illos tuos hebetes & proprii judicii , si quos habes , occlude , ut uno & infallibili communi Ecclesiæ oculo videas , & revertere ad petram undè abscissus es , nisi malis

malis ordinariam infidelitatis poenam, perpetuę obcecationis damnum subire.

M O T I V V M V I I I .

Hic in medium producit duas notas veræ Ecclesiæ Christi à falsâ distinctivas : quarum prima sit, Pura & pura Verbi divini prædicatio; altera Sacramentorum sincera administratio. Vtramque Romana Religioni deesse, ideòque immeritò Ecclesiæ Christi nomen usurpare. Priorem quidè manifestè, cùm populus verbum Dei non cognoscat, nec illud possit addiscere ex Scripturæ lectione linguâ vernaculâ, nisi de licentiâ Superiorum. Hinc non immeritò illis improperari possit, quod Christus Sadduceis Math. 22. 29. Erratis nescientes scripturas. Scripturarum loco libellos devotionum, Beatissimæ V. & Sanctorum officia & huiusmodi alia obtrudi, nec intelligi à populo. Adimpleri illud 1. ad Corinth. 14. 11. Si nesciêro virtutem vocis, ero ei, cui loquor barbarus : & qui loquitur, mihi barbarus. Ex illâ Scripturarum ignorantia infinitos errores suboriri.

R E S-

RESPONDETUR.

Veras aliquas Ecclesiæ notas assignando, quæ soli Catholicæ conveniunt; sicut & illæ, quas minister Delphicus malè refert. An omnium sit Scripturam interpretari? Defenduntur etiã preces horariæ Catholicorum.

NOtæ quæ veram Ecclesiam à falsâ fecernant, tales sint necessum est, quas Sectarii de Religione suâ mentiri non possint: manifestissimæ, quibus digito ostendi possit; hæc est, non illa: & propriissimæ seu nulli alteri communes. Porro illæ duæ notæ, quas hîc Doctor Delphicus attulit, quàmvis veræ Dei Ecclesiæ omninò convenire debeant, attamen non satis sunt manifestæ & obviæ, ut per eas veram à falsâ Religione distinguas; utpotè quas de se quælibet Sectæ prædicent. Vndè nisi manifestiores assignari possint, dicam non satis humano generi provisum

provisum , ut verum Christi ovile cognoscat : adeoque nec salutem suam, quam extra veram Ecclesiam operari non est, consequi posse. Sit exemplum. Dùm Emanuel quondam noster vacillare cœpit, & dubitare de veritate Religionis, si sibi dari postulasset certa & infallibilia indicia, quibus veram Dei Ecclesiam potuisset dignoscere, ac ministellus aliquis respondisset, Vbi est pura verbi Dei prædicatio, & sincera Sacramentorum administratio, ibi vera est Religio. Quid clariùs vidisset quàm antè? Hoc sibi arrogant Lutherani, hoc Calvinistæ, hoc Zuingliani, hoc prædicant de se Puritani, hoc Armeniani, Gommaristæ, Anabaptistæ, Hussitæ, & id genus alij, hoc & ipsi Judæi, & deniquè jure merito de se Catholici. Itaque recensenda sunt ex Symbolo Nicæno aliæ notæ, quæ sic veræ Ecclesiæ conveniant, ut alteri convenire nec possint, nec fingi. Sit igitur Ecclesia Dei oportet, una, Sancta, Catholica, & Apostolica. Vna quidèm unitate Fidei, unitate Spiritus; licet per orbem terrarum longè latèque diffusa. Sancta, sanctitate morum,

rum, sanctitate doctrinæ. Catholica seu oecumenica aut universalis, cujus in omnem terram sonus exiverit, & in fines orbis terræ verba delata sint. Apostolica, ab Apostolis nempè continuâ, & non interruptâ successionem, per legitimos successores ad nos usquè deducta. Hæc si possis, quisquis es, qui Romanam falsitatis arguis, alteri applica. Ego potiori jure illas quas allegas notas, illi quadrare demonstro, quàm ulli alteri. Quia tamen hîc primam tuam notam solum Romanæ denegas, de illâ solâ hîc verba faciam: alteram occasionem reseruabo. Illa est pura verbi divini prædicatio, quæ fit non solum de doctrinâ sanâ & incorruptâ Catholicæ fidei; sed etiâ modo legitimo, per legitimos ministros. Hoc soli Romanæ Religionis competit: sola illa ministros habet legitimè vocatos, legitimè missos per legitimam successionem & ordinationem. Ostendant Sectarii vel vestigium suæ missionis. *Quomodo verò prædicabunt nisi mittantur?* Ad Rom. 10. 15. Ipsi viderint. Et quomodo sanam & incorruptam Catholicæ Fidei doctrinam prædicabunt, cum
toties

toties divisi, tot diversis opinionibus implicentur, atque ita proprio quilibet cerebello ducatur, ut vix dùm duos sit invenire conformes? Sit ergò sola Romana Ecclesia verè una, Sancta, Catholica & Apostolica, cui soli competat syncera Sacramentorum administratio, pura & puta verbi divini prædicatio. Nequè verò puritati illi adversantur Concionatores & Doctores Catholici, quod interdùm humanis scientiis utantur; cùm illis non utantur, ut verbum Dei prophānent, aut divinas veritates occultent, sed illas, instar ancillarum, ad munitissimam Sacre Theologiæ arcem advocant, ut *Invisibilia Dei à creaturâ mundi, per ea quæ facta sunt intellecta conspiciantur, sempiterna quoquè ejus virtus & divinitas*. Ad Rom. I. 20. Non obstat etiā quod Biblia plebeiis passim non permittantur, tantò enim purius verbum Dei servatur, quantò doctioribus & purioribus mētib; reservatur, quantò cautiùs, pretiosissima hæc margarita à fœdâ porcorum contrectatione custoditur. Quid namquè aliud est, Sacros libros, earumque interpretationem quibilibet indiffe-

indifferenter, etiàm mulierculis, ut suprà diximus, lanionibus. cauponibus, & abjectis homunculis inter foecundos calices & spurcissimas fabulas permittere, quàm mittere margaritas antè porcos? Indignum profectò est, & Deum ipsum irridere, divinamque Spiritus Sancti dispositionem, qui admirabili sapientià & providentià distribuit charismatum dona, constituēs in Ecclesià Pastores & Doctores: quibus interpretationem sermonum, & genera linguarum concessit, per donum sapientiæ, scientiæ & intellectus. Vos autem notorii doctrine Evangelicæ desertores, omnes absquè discrimine facitis Prophetas, Doctores, Interpretes, Apostolos, etiàm Paulo renitente 1. Corinth. 12. 28. *Quosdam quidem posuit Deus in Ecclesià, primum Apostolos, secundo Prophetas, tertio Doctores &c.* & v. 29. *Numquid omnes Apostoli? numquid omnes Prophetæ? numquid omnes Doctores?* & v. 30. *Numquid omnes linguis loquuntur? numquid omnes interpretantur?* Sic Ecclesiam Dei confunditis, ut vestram, quæ Satanæ est, astruatis, quæ conduit ad regionem illam, quam Pro-

G

pheta

pheta Job appellat. c. 10.22. *Terram miseriae, & tenebrarum, ubi umbra mortis & nullus ordo, sed sempiternus horror inhabitat.* Et hæc Ecclesiæ vestræ certissima nota est, in quâ nullus ordo: quandoquidem totum ordinem Hierarchicum funditùs subvertitis. Ecclesia verò Romana & Catholica non permittit, ut unusquisque pro ingenii sui libidine Sacram Scripturam interpretetur, nisi inhæreat sententiæ illorum, quos Deus dedit Ecclesiæ *Pastores & Doctores.* Quæ ob hoc vel maximè *primitivorum* dicenda est: cum ejus filii eundem planè styllum, & ordinem primorum Patrum nascentis Ecclesiæ penitùs insequantur. Series Sacrorum Conciliorum argumento est. Pòst primum nimirum Apostolorum, Christi quæ Discipulorum, in quo congregati fuerunt pro doctrinâ sanâ componendâ & defendendâ, tam quoad Fidem, quàm mores; aliorum Sanctorum Patrum, Ecclesiæ Pastorum, & Doctorum, qui pro tempore fuerunt successit Conc. Nicænum Calcedonense, Ephesinum, Carthaginense, Lateranense, & cætera, usque ad ultimum Tridentinum,

num, in quo anathemate percussi sunt errorum vestrorum magistri. Et hæc quidè Conciliorum nostrorum series: referant, si possint, ex aduerso Sectarii suorum ordinem. Non inuenio Concilia: inuenio Lutherum & Calvinum, qui suâ auctoritate, non Apostolicâ, sed diabolicâ; doctrinæ Apostolicæ destructores, in animarum ruinam leges tulerunt. Obtrudes forsitan Conciliabulum Dordracenum, & Ultrajectinum. Sed ediffere, quos ibi Doctores, quos Pastores & magistros Ecclesia vestra congregavit? Certè non nisi mechanicos, opifices, mercatores, qui statuta Ecclesiastica condiderunt, & Provinciis rebellibus seruanda proposuerunt. Ita mentes vestras elusit Princeps tenebrarum harum, Pater mendacii, caput Ecclesiæ malignatum, qui unico sibi lo antiqui serpentis, insufflauit in aures Parentum vestrorum, virus inobedienciæ & tùm in Regem, tùm in Deum rebellionis. In vos itaque illud Christi ad Sadducæos potius cadit, *Erratis nescientes Scripturas*. Literam occidentem sequimini, vivificantem Spiritum abominamini. Non

est deniquè quod oblatretis contrà Preces horarias, orationum formulas, quas Fidelibus suis S. Mater Ecclesia evolendas exhibet: cùm nihil nec in re, nec in modo contineant, quod laude dignum non sit. In re, quoniam ex Psalmis potissimum & selectissimis quibusque Hymnis & Sanctorum Patrum precibus desumuntur. Quo quid laudabilius? In modo, propter horarum divinarum atque nocturnarum ordinatissimam dispositionem: hinc nihil, quod ad pietatem non provocet. Quod verò Latino passim idiomate, evulgentur, ita planè: conveniens fuit, quandoquidem maximâ ex parte è Sacris Literis selignantur: ideòque vulgari sermone distrahi non conveniat, cùm nulla versio ab Ecclesiâ hætenus fuerit approbata. Vnde tametsi ipsi orantes linguam illam non intelligant; sufficit, sciant laudes esse divinas, quibus suam intentionem, secundum Ecclesiæ mentem conforment. Sic enim tantò gratius & acceptius Deo sacrificium laudis offerunt, quantò majori unionis vinculo ipsi Ecclesiæ copulati, suam intentionem conjungunt. Idque Deo
fatis

fatis est, cui lingua nulla barbara esse potest. Nàm locus ille Apostoli contrà nos allegatus, apertè de locutione hominis cum homine loquitur, & satis indicatur in ejusdem capitis 14. initio vers. 2. *Qui enim loquitur linguâ, scilicet ignotâ, non hominibus loquitur, sed Deo.* Ex quibus luculentissimè colligitur, quod non ex præscripto rationis: sed ex inveterato in Ecclesiam Romanam odio, calumniandi ansam undecùmque (in vanum tamen) assumitis.

MOTIVVM IX.

Quod Romanæ Ecclesiæ interpretationes, quas plerumq. Catholici in explicandis Sacra Scripturæ locis adhibemus, vel falsæ sint, vel risu dignæ, aut minùs veræ. Nolle autem se sua assertionis veritatem docere, omnia tangendo: satisfacturum se, paucula quædam, velut reliquorum indices, in medium proferendo. Et hoc imprimis cognosci posse, ex libello excuso Bononiæ anno 1590. dedicato Cardinali de Ruvere, cui titulus, Conformitates S. Francisci: eò quod refertus sit fabulis, adulterinis miraculis, prodigiosis mendaciis, horribilibus

bilibus blasphemis. Talis deniquè, cujus impudentia nullis verborum hyperbolis expendi aut declarari possit.

R E S P O N D E T V R.

*Nulli fundamento calumnias
illas inniti.*

P *Arturiunt montes ; nascetur ridiculus
mus.*

Adfer hîc quæso, ministelle Delphice, execrabilium mendaciorum, & blasphemiarum exempla, ut censuræ tuæ tam rigida fundamenta trutinentur.

M O T I V V M X.

V *Nicum, inquit, hoc exemplum sufficere. Vbi auctor illius libelli 2. prologo, folio 6. col. 2. dictarum conformitatum, asserit S. Franciscum singulari Dei providentiâ in hunc mundum destinatum fuisse, ei applicans illud Genes, 1. 26. Faciamus hominem ad imaginem. & similitudinem nostram, quasi à Sanctissimâ Trinitate hæc verba ad ipsum dirigerentur.*
Ex quo

*Ex quo concludit : illa ergò verba ad Adamum
protoparentem nostrum applicari, aut si ad Ada-
mum, ergò non ad Sanctum Franciscum.*

RESPONDETUR.

*Et multiplices Scripturæ sensus : ac-
commodatitii usus licitus : duæ ve-
ræ Ecclesiæ notæ obiter
tanguntur.*

SToliditatis & ignorantiae tuæ mani-
festissimum vestigium. Illæne sunt
horrendæ blasphemiae, detestabilia men-
dacia, quæ nobis occinis? Quis ferat in
viro, cui vel mica falis vel scientiæ, tam
expertem iudicii illationem? Consimili ar-
gumento probo te esse immortalem,
aut saltem non esse obnoxium morti natu-
rali. Dictum est Adamo Genes. 3. 19.
Pulvis es, & in pulverem reverteris. Ergò
hoc tibi dictum non est. Luc. 23. 43. *Hodie
mecum eris in Paradiso.* Ergò tu cum Chri-
sto, nec ullus tui similis minister, eris in
Paradiso. Vndè rectè videris, si talis sis in

rectâ Philosophiâ tenebrio ; qualis eris in Theologiâ. Si enim tua concludunt, etiâ mea : cum par utrobique sit ratio. Infolens tibi & inusitatum videtur, tam in divinis , quàm in humanis literis nomina , encomia , epitheta , præter primariam suam significationem , per metaphoram , analogiam , anagogiam , allegoriam , aut similem loquendi modum ad aliud significatum transferri ? Quoties Paulus loca Scripturæ ; ubi de terrestri Hierusalem sermo est , de Cælesti intelligit , & è contrâ ? Vbi Genes. 25. & Malach. 1. de Idumæis & Israëlitis, seu de Jacob & Esau ad literam scribitur, Apostolus ad Rom. 9. de Electis ad gloriam, & de reprobatis anagogicè interpretatur. Sicût & ad Gal. 4. 22. 23. *Scriptum est enim, quoniam Abraham duos filios habuit, unum de ancillâ & unum de liberâ. Sed qui de ancillâ, secundum carnem natus est : qui autem de liberâ, per repromissionem. Quæ sunt per allegoriam dicta. Hæc enim sunt duo testamenta, &c.* Resume itaque argumentum tuum, & insurge contra Gentium Apostolum. Gen. 21. sermo est de Isaac & Ismael filiis Abra-

Abraham, ergò non de duobus Testamentis, seu de populo Christiano, & Judaico: aut si de populo Fidei & Judaico, & de duobus Testamentis, ergò non de Isaac & Ismael. Ecce quàm bellè rem acu tãgis, in his & similibus allegoriis, quæ passim in Sacris Literis obviæ sunt. Absit à rectè Philosophantibus ille philosophandi modus: asseramus utrumque sensum & literalem & mysticum (quod certissimum est) à Spiritu Sancto intentum fuisse: hunc quidè primariò, illum secundariò. Putamus autem, ad Mystici sensus exemplum, nonnulla ex Scripturis (quando suadet rationis paritas) ad alias res & personas, sensu, vocant, accommodatio posse applicari. Non quidè, quod à Spiritu Sancto sensus ille forsitan intentus fuerit: sed quia eadem verba, in uno sensu ab eo scripta aut prolata, alteri apprimè convenient, ideòque eidem debita cum reverentiâ licite possunt accommodari: dùm præcipuè virtutis alicujus commendatio id suadet, dùm viri alicujus illustris & amici Dei encomium id permittit, aut in aliis hujusmodi casibus honestis. Atquè sensus

hujus accommodatii usus in Ecclesiâ Catholicâ non est recenter introductus. Eum passim usurparunt Sancti & antiqui Patres: ex quibus hæc ex innumeris exempla profero. Quod Paulus Rom. 8. 17. de Christo pronunciavit: *Si tamen compati-mur, ut & conglorificemur*, hoc Augustinus ferm. 44. de Sanct. uni Martyri sine scrupulo accommodavit. Gregorius verò Nazian. in orat. funeb. S. Basilii hæc habet. *Basilii autem pulchritudo virtus erat, magnitudo verò Theologia; at cursus, mobilitas assidua, quæ ascensibus suis ad Deum usquè perducit; vires verò, satio sermonis atquè distributio: ita ut rectè mihi Scripturæ illud de consurpare liceat.* In omnem terram exivit sonus ejus, & in fines orbis vis verborum ejus: quod B. Paulus de Apostolis à Davide dictum esse ait. Vndè liquidò habes, Nazianzenum jam suâ ætate triplicem illius versiculi sensum agnovisse: literalem de coelis, mysticum de Apostolis, & de S. Basilio accommodatum, quem ipse usurpavit. Quænam igitur blasphemia, aut quæ novitas, si auctor ille locum controversum, *Faciamus hominem, &c.* qualicumque ex his sen-

his sensibus S. Francisco rectè prudenterque adaptavit. Nequè enim ille minùs imaginem & similitudinem Dei representavit, quàm Adam, sive naturam spectes, sive gratiam. Si naturam; uterquè homo fuit ejusdem speciei, tribus potentiis intellectu, memoriâ & voluntate, in unâ eâdemque animâ præditus, quæ expressissima est Sanctissimæ & individuae Trinitatis (si quæ alia esse possit) imago & similitudo. Si gratiam: uterque imaginem illam peccato deformavit, Adam actuali, Franciscus originali, quod commisit in Adam. Restaurarunt tamen, ille remedio in lege naturæ præscripto, hic Sacri Baptismatis ablutione; rursus facti divinæ consortes naturæ. Adam supernaturali illâ Dei imagine recuperatâ, illam continuis virtutum ac perfectionis augmentis in dies illustravit, ut non sine fundamento sancti Patres opinantur: S. Franciscus de virtute in virtutem, de perfectione in perfectionem, non solum viam mandatorum, verum etiâ angustam consiliorum Evangelicorum semitam feliciter peragravit, ut testes sunt historiæ certissime,

me,

mæ. Dixerat Christus Math. 19. 21. *Si vis perfectus esse, vade, vende quæ habes, & da pauperibus &c. & sequere me.* Audiit Franciscus, reliquit sua, dedit pauperibus, secutus est Christum, & quod Divinæ Majestati similior fieret, perfectissimus evasit, juxtà consilium Christi Math. 5. 48. *Estote perfecti, sicut Pater vester cælestis perfectus est.* Quasi diceret, si vultis ad imaginem & similitudinem Dei perfectissimo modo pervenire, ad Christianam perfectionem, quod potestis ardentissimè, asperate: & quantò altiùs ejus culmen conscenderitis, tantò perfectiùs imaginem Dei (& hoc sibi vult particula Sicut) referetis. In hunc modum S. Franciscus naturâ, gratiâ, & perfectione imaginem Dei in se expressit, sicut & Adam. Potuit igitur ipsi aptissimè applicari locus ille, *Faciamus hominem, &c.* Nec te moveat obsecro, quod illud ipsum à Sanctissimâ Trinitate ad S. Franciscum directum dicatur: nam Theologorum certissimum effatum est, & doctrina communis, quod quidquid Deus producit ad extra, à tribus personis debeat procedere. Id ex Hebraici

braici

braici textus lectione non obscure colligitur, *Vayomer Elohim nangase Adam be-thsalmenu, kidmutsenu. Dixit Deus: faciamus hominem ad imaginem & similitudinem nostram.* Vbi verbum *Vayomer, dixit*, singularis est numeri: nomen verò, cum quo construitur *Elohim, Deus sive Indices* pluralis: ut ostendatur in unitate essentiae, personarum pluralitas. Nec denique hoc te moveat, quod S. Francisco hæc quodammodò dicta proponantur: quoniam verba illa, nihil aliud præter æternum plasmandi hominem Dei consilium significant, quo non intendebat solum protoplastum Adam ex nihilo creare: sed & universum genus humanum, per propagationem ex ipso producere. Nequè absurdum est, hæc cuilibet etiàm singulari homini, secundariò saltèm, & præcipuè viris perfectissimis applicari, inter quos S. Franciscus velut lucidissimum modò Ecclesiæ triumphantis sydus effulget. Hæc defensionis ergò: impetitionis ansam è re natâ præbet occasio. Duas notas verè Ecclesiæ nuper attulisti: duas alias, licèt non ex præcipuis, ex hac tuâ objectione

ctione colligo. Prima. Illa est vera Dei Ecclesia, in quâ summa viget Christianæ vitæ perfectio. Nihil clariùs: ubi enim perfectiùs Deus colitur, ibi est vera Religio. Perfectio verò alia consistit in mandatorum nudâ observatione, alia in confiliorum Evangelicorum adimpletione, quæ prioris velut complementum est. Ita ipse Christus Math. 19. Primam sublati bonorum operum meritis valdè diminuunt Calvinistæ. Secundam nè foveant quidè, imò impossibilem putant: voti reos apostatas qui missâ manu ad aratrum retrò respiciunt, vel ideò maximè impunè admittunt. Apud eos quasi exilio damnati sunt *Eunuchi illi qui seipsos castraverunt propter regnum Cælorum*, Math. 19. 12. Nullos invenire est, qui vadant, vendant quæ habent, & Christum sequantur in obedientiâ simplici, nudâ paupertate, purâ castitate, rigidâ corporis sui mortificatione, & ardentissimâ charitate. In Ecclesiâ Romanâ sive Catholicâ innumerabiles hominum Religiosorum cætus in eâ perfectione Deo militant, & gratissimo obsequio, devincti & religati sunt: quorum magnâ

magnâ ex parte antesignanus fuit S. ille Franciscus, quem tu jocabundus exhibilas, non minùs impudenter quàm impiè. Hæcce tuo examini, & Neophiti tui considerationi impensiori ulteriùs relinquo.

Qui credit in me, inquit Christus Joan. 14. 12. *opera quæ ego facio, & ipse faciet, & majora horum faciet.* In verâ namquè Ecclesiâ, quæ miraculis solet comprobari, tanquàm alterâ notâ evidenti, hæc signa non desunt. Initio nascentis Ecclesiæ frequentissima fuerunt, & etiam nûm hodie apud Indos, ubi lux Evangelii propagatur; & per singulas ætates, ubi necessarium fuit Fidei astruendæ, viros sanctitate conspicuos Deus Optimus Maximus miraculorum patratorum gratiâ insignes Ecclesiæ suæ dedit. In quorum numero S. Franciscus suo tempore etiàm claruit, & adhuc de facto claret. Sectarii vel unum miraculum ostendant, quod doctrinæ suæ novitatem confirmet. Hæc è pluribus Ecclesiæ notis ex occasione natâ obiter.

MOTIVVM XI.

Quod dictus libellus introducat Christum per illa verba Nathan Propheta ad David 2. Reg. 7. 9. compellantem S. Franciscum : Eeci tibi nomen grandè , iuxtà nomen magnorum , qui sunt in terrâ. Et illud Ecclesiastici 45. 3. & 4. Glorificavit illum in conspectu Regum , & iussit illi coràm populo suo , & ostendit illi gloriam suam. In fide & lenitate ipsius Sanctum fecit illum. Adeoq; impudenter, ita in verbis Scripturæ Catholicos ludere.

RESPONDETUR.

Locorum illorum accommodatorem defendendo.

Quid ad rem magis accommodè in laudem tanti viri dici potuisset ? nomen & gloriam ejus venerantur Reges , & Principes , nobiles , & plebei , divites , & pauperes , qui magno ducunt honori in tam Sancti Pauperis filios adscribi , chordam

dam quâ præcingantur gestare, magnum ferendæ coronæ, sceptrique præsidium æstimantes. Quid itaque mirum si Davidi comparetur? Quid si Moyfi? Eminētissimis charismatum donis fuit insignitus dilectus Deo & hominibus, quem poenè infinita hominum millia secuti sunt. Moyses Israëlitici populi Dux fuit; hic innumerorum Religiosorum, qui sub ejus insignibus Deo, summâ cum laude, & vitæ perfectione militant. Non est ergo quod inomico spiritu has comparationes calumnieris. Sed cave ultrâ, velut alter, Assur populum Dei suggillare, nè in te cadat illud Psal. 71. 4. *Et humiliabit calumniatorem.*

MOTIVVM XII.

QUod quidam redarguens eos, qui bona Ecclesiastica prodigunt in meretrices, comædos, canes venaticos, & alios hujusmodi usus prophanos; abutatur illo Marci 7. 27. Non est bonum sumere panem filiorum, & mittere canibus. Deindè minitando illis, qui beneficia Ecclesiastica conferunt sibi consanguineis

H neis

neis & affinibus, applicet illud Abacuc 2. 12.
Væ qui ædificat ciuitatem in sanguinibus.
Citat Lavacrum conscientie fol. 5. & 6.

R E S P O N D E T V R.

Malè ab aliquorum abusibus contrà integrum statum, aut contrà ipsam Ecclesiam argui.

H Oc loco Rabbinus noster insigniter vulpes est. Quasi demoliturus Ecclesiæ Romanæ vineam, intentat duo. I. Contendit Catholicos Scripturis abuti, & detorquere ad sensus illicitos. Verum circà hec paulò superiùs illi alas & caudam succidimus, ubi secundùm diversos sensus diversimodè sacrae paginae verba licitè & legitimè (quod hîc etiàm fit) applicari ostendimus. Deindè ex industriâ, alieni nominis beneficio, Ecclesiasticorum abusus recensens, dente canino (ut rabiem Sectariorum notes) Ecclesiæ Prælatos lacessit, ut qui de patrimonio Ecclesiæ, scortorum & histrionum manus divitent, venationibus, & plerisque illicitis vacantes.

tes. Antiquum illum hæreticorum morem, iàm olim grauitè infectatus est August. epist. 137. *Ne similes eis, inquit, sitis, qui non habendo, quod in causâ suâ divisionis defendant, non nisi hominum crimina colligere affectant, & ea ipsa plura falsissimè iactant: ut quia ipsam divinæ Scripturæ veritatem, quâ ubiquè diffusa Christi Ecclesia commendatur, criminari, & obscurare non possunt, homines per quos prædicatur, adducant in odium; de quibus & fingere quidquid in mentem venerit, possunt.* Sed ain, quos carpis? An omnes? si ais, etiàm consodaliũ tuorum iudicio mentieris splendidè. Aliquot ex iis dixeris? Assentior dolenter. At quid indè habes? Nequè mirandum equidèm quod in tam copioso numero, singulari cultu Deo destinatorum, quidam interdum labantur. Nec enim eò ipso, quo vestem clericalem induerunt, hominem suum exuerunt, & ad Ecclesiam triumphantem, ubi charitas non excidit, illicò pervolarunt. Dignitatem nimirum Ecclesiasticam thesaurum inæstimabilem portant in vasis fictilibus: fieri itaque potest, ut quæ frangantur & occumbant.

Conclude si potes: ergò omnes Ecclesiastici perversi sunt, Ecclesia Romana una non est, sancta non est, Catholica non est, Apostolica non est. Conclusero & ego contrà te, & omnes tui similes, ut adulteros, fures, & si quid his pejùs. Aliqui vestrum adulteri sunt, fures sunt, &c. ergò omnes: ergò vestra Ecclesia Christi non est, sed Satanæ. Si rectè concludo, pessimo loco res vestrae sunt. Nequè est quod statum Ecclesiasticum damnes, cùm caveas damnare conjugalem, licèt eò interdum conjuges abutantur. Vitia quorundam Prælatorum particularium dignitatis & status sanctitati non obsunt. Leges quas ipsis Sancta præscripsit Ecclesia, nihil non sanctum spirant. Plurimos habent hoc nostrum Belgium & cætera Regna Prælatos Ecclesiæ, morum & vitæ sanctitate conspicuos, eosque poenè innumera-biles. Ad illos potiùs quàm ad malos respice. Malorum potiùs misereri te oporteret, quàm propter illos Ecclesiam militantem sic calumniari: quæ sagma quidè est plena bonis & malis permixtim piscibus: ager, in quo semini bono zizania super-

superfeminantur. Sed ista zizania ac malitia, nullo modo proveniunt ex illâ quàm nobis Ecclesia proponit, doctrinâ, quæ omnes hujusmodi rigidissimè, prohibet abusus. Verùm si vestras nequitias penitiùs considerare voluero, primâ fronte apparebunt non solùm ex quorundam particularium, imò omnium pœnè vestrùm abusu, sed ex ipsâmet Calvinisticâ aut Lutheranâ doctrinâ derivari. Estis etenim infidelitatis & rebellionis ergà legitimos vestros Principes, artifices nequissimi, bonorum Ecclesiasticorum usurpatores iniquissimi, Templorum prophanatores, votifragorum fautores ac defensores. Vndè? ex infernalibus vestris dogmatibus foetus illi infœlices cùm pluribus aliis, sine controversiâ pullularunt. Quod si deniquè Prælati nostri interdùm consanguineis suis de beneficiis Ecclesiasticis provideant; fieri contingit, quod capaciores sint, vel saltem ceteris æquales: sin minùs abusus hic paucorum est, personis ipsis tribuendus, non Statui, aut Religioni.

M O T I V V M X I I I .

A Buti Romanos etià Scripturis , in coronatione Pontificum, inter illas quas adhibent cœremonias. Quod in Sede Pontificali à Canonicis Lateranensis Ecclesiæ collocatus Papa à Cardinalibus elevetur, illud Anna 1. Reg. 2. 8. proferentibus : Suscitavit de pulvere egenum , & de stercore elevavit pauperem , ut sedeat cum Principibus & solium gloriæ teneat. Quod elevatus, in populum projiciat pugillum pecuniæ æræ, pronuntians illa verba, Act. 6. Argentum & aurum non est mihi, quod autem habeo, hoc tibi do. Quod postmodum abundantius nummos tam argenteos quam aureos, Pontifex per suos famulos , in populum profundit. Hic inquit , utrum non sit mendacii reus, dum dicit argentum & aurum non est mihi?

R E S P O N D E T V R .

Cœremonias illas à calumniâ
vindicando.

N On est novum Hæreticis in sacras & antiquas Ecclesiæ cœremonias rectè
insti.

institutas & sanctè obseruatas perfrictâ fronte debaccari. Quid concluderetur contra Ecclesiam Catholicam, etiam si huiusmodi coëremoniaë, nullum alium ob finem, quàm ut obseruarentur ea quæ antiquitas ritè constituit, adhiberentur? Certè in singulis ferè nationibus, in convictu, conuersatione, vestitu, salutatione, & multis aliis, variaë ac valdè diversæ, quin & interdum contrariaë obseruantur coëremoniaë: neque ideò ab iis, qui vel mediocri pollent discretionis iudicio; sed solùm à nugacibùs, quos hâc in parte apprimè agunt Sectarii, deridentur. At præterea minima ex Ecclesiasticis coëremoniis sancta est, & mysteriis plena. Hæc ignoras, & quæcumque *ignoras, blasphemas*. No- veris facilè de quibus loquatur Iudas Apostolus. Neque malè verba Scripturæ in coëremoniis illis applicantur: suscitatur enim verè Pontifex de pulvere naturæ mortalis (quæ pulvis est & in pulverem re- vertetur) & de stercore eiusdem naturæ infectæ: pauper & egenus; quia nudus egres- sus est de utero: pauper & egenus propter humilitatem, sicut cùm Dauid Rex po-

tentissimus dicebat Psal. 85. *Inclina Domine aurem tuam & exaudi me : quoniam inops & pauper sum ego.* Dic quoquè Davidem mentitum. Pauper & egenus, respectu illius dignitatis, ad quam elevatur: *Ut sedeat cum Principibus*, imò super Principes, Reges & Imperatores, ut suo tempore ostendam, & *solum gloriæ teneat*, supremum videlicet in terris Dei Vicariatum. Cùm verò dicit, *Argentum & aurum non est mihi*, nihil aliud significare intendit, nisi quod suprema illa, ad quam assumitur, dignitas, non ideò instituta fuerit, ut ipse Fideles collatâ bonorum temporalium abundantia locupletet: sed principaliter, ut spirituales gratias, quæ ad vitam perducunt æternam, conferat atquè dispense. Licet per accidens ex liberali piorum Fidelium largitione, uberes Ecclesiastici proventus beneficiorum collationem subsequantur, in divini cultus decorem, & ministrorum Ecclesiæ tuendam majestatem. Nihil hîc mendacii, nihil hîc abusus.

MOTIVVM XIV.

IN vulgatâ Bibliorum editione frequentissimos errores irrepsisse: cujus tamen auctoritatem Conc. Trid. Græcis & Hebraicis codicibus anteponit, quasi spurium pro legitimo fœtum substituens. Allegat proinde plurima loca fuisse adulterata, conatus illud ostendere nonnullis exemplis. Imprimus hunc locum Genes. 3. 15. Ipsa conteret caput tuum: cum deberet legi ipsum, nempe semen mulieris, ut ita possit applicari Divæ Virgini, quod soli Christo Domino debetur: & hoc necessario fatendum esse à quolibet vel mediocriter Hebraicæ perito.

RESPONDETUR.

Et Vulgatæ editionis auctoritas defenditur, ac Deiparæ Virginis victoria propugnatur.

AVt numquàm Conc. Trid. legisti, Vir Delphice, aut maliciosè quod asseveras imponis. Hebræos & Græcos Codices, nullâ eorum mentione factâ, fidei

H 5

& au-

& auctoritati suæ relinquit Concilium: nihil enim opus erat de illis definire, de quorum auctoritate nulla exorta fuerat controversia. De Latinis editionibus, quæ plures & variæ circumferebantur, dubium esse poterat. Definit itaque Vulgatam illam cæteris versionibus latinis esse præponendam, quam jam Ecclesia à mille & amplius annis, ut authenticam coluit: quam Augustinus, sub Italicæ editionis nomine, ab antiquitate & fidelitate commendat. Vt autem ad oculum pateat, nullam de Græcis aut Hebræis illuc fieri mentionem, Concilii verba profero, sess. 4. decreto de editione & usu sacrorum librorum. *Insuper eadem Sacrosancta Synodus considerans, non parum utilitatis accedere posse Ecclesiæ Dei, si ex omnibus latinis editionibus, quæ circumferuntur, Sacrorum librorum, quænam pro authenticâ habenda sit, innotescat: statuit & declarat, ut hæc ipsa vetus & Vulgata editio, quæ longo tot seculorum usu, in ipsâ Ecclesiâ probata est, pro authenticâ habeatur.* Et paulò antè anathemate percussit eum qui illam non receperit. Et quamvis Vulgatam Latinam, Græcis, Hebræisque

Codi-

Codicibus, saltē illis quos nunc habemus prætulisset, nullum foret inconveniens. Verisimilius namque est Verbi divini puritatem, continuis mille & eo pluribus annis, in Ecclesiâ Latinâ (quę Fidem Deo incontaminatam semper servavit) fuisse magis conservatam, quàm apud Græcos, qui in varios errores inciderunt; aut apud Hebræos, quorum si Codices in suâ puritate remansissent, certissimum est non fore postponendos. De Vulgatâ verò Latinâ ex decreto & usu universalis Ecclesiæ, quod sit authentica constat: maximè cum ab eâ antè mille annos non potuerit vitari contrà Lutheri & Calvinii dogmata, quæ solùm à centum circiter annis insurrexerunt. Atquē adeò legitimus potius illa factus dicenda erit: cum certum sit, quod Ecclesia à primis focculis & tunc eam approbarit, cum adhuc fontes in suâ puritate persisterent. De Hebræis autem, & Græcis Codicibus, prout nunc circumferuntur, incertum est, an spuria aliqua substituerint Rabbini, Hæretici, aut Librarii, sive per ignorantiam idiomatum, sive per maliciam.

Quid-

Quidquid exindè obgannit hic noster magister Delphicus, illum Genes. loc. 3. 15. *Ipsa cõteret caput tuum*, non esse conformem lectioni Hebraicæ, ex eo quod pronomen foemininum substituatur, ut dicit, cùm legi deberet in masculino, manifestè errat. Hebræa dictio communis est & indifferenter accipitur pro masculino & foeminino, ut idem sit quod (ipsa vel ipse) ut manifestum est Hebraicæ linguæ peritis. Hanc demùm vulgatam lectionem sequuntur August. lib. 2. in Genes. contrà Manichæos cap. 18. & lib. 2. de Genes. ad literam cap. 36. Chrysost. homil. 17. in Genes. Ambr. lib. de fugâ sæculi cap. 7. Bernardus, Beda, Rupertus, Rabanus, Lyranus & alii, ipsa non ipse legunt. Licuit ergò & Vulgatæ sensum sequi cùm tot Patribus consonantem, & ab Hebræâ non dissonantem. Nec ob id quidquam immensæ Servatoris nostri JESU gloriæ detractum est, cùm nusquàm dicamus, quod Beatissima Virgo MARIA caput antiqui serpentis, propriâ virtute, & tamquàm causa principalis contriverit, solus enim Christus Dominus hâc ratione de mundo

mundo & ejus Principe victor triumphavit: secundum illud Psal. 73. 13. 14. *Contribulaſti capita draconum in aquis. Tu confregeſti capita draconis.* Non ita Virgo Deipara: sed vel occasionaliter contrivit, pariendo nobis Salvatorem sæculorum, qui tam magnificâ potitus est victoriâ: vel etiam retunditur rebellis Luciferi, mirum in modum caput & superbia, dùm Virgunculæ supereminentiſſimam horrefcens ſanctitatem conſpicit, & naturam humanam ſuper omnes Angelicos ordines longo intervallo elevatam. Retunditur etiã per patrocinia ſua: retunditur per poteſtatem ſibi à Deo conceſſam. Quod ſi Michaeli Archangelo victoriam ex antiquo ſerpente reportatam Scriptura Sacra Apoc. 12. attribuit, quantò magis Mariæ, Michaelis & omnium Angelorum *retributio* tribuenda eſt?

MOTIVVM XV.

Illud Eccl. 6. 1. Nescit homo, utrùm amore an odio dignus ſit: ſed omnia in futurum ſervantur incerta, *eſſe corruptum aſſerit: debere*

debere legi cum Hebræo, Amorem & odium non est sciens homo, sed omnia ante faciem ipsorum. Ita verò Romanos depravasse ad stabiliendam salutis nostræ incertitudinem & diffidentiam: atque ideo etiam verba illa malitiosè addidisse v. 2. sed omnia in futurum servantur incerta.

R E S P O N D E T V R.

Et lectio illa vulgatæ astruitur. Vana Sectariorum de suâ salute præsumptio destruitur.

Quidquid hîc cum Calvino, Kemnitio, & similibus hæreticis machinarius, in vanum est. Sensus hujus loci in nostrâ Vulgatâ expressus certissimus est, & textui Hebræo consentaneus: quem D. Hieron. in hujus loci commentario sic explicat, *Porro hîc, inquit, sensus est, Inveni iustorum quidè opera in manu Dei esse, & tamen utrum amentur à Deo, an non, nunc eos scire non posse: In futuro igitur scient. Et in vultu eorum sunt, id est, antecedit eos, cùm de hâc vitâ decesserint, notitia hujus rei: quia*
tunc

tunc est judicium, non certamen. Quæ omnia meliùs dici non potuerunt, quàm per hæc verba, *Nescit homo, utrum amore, an odio &c.* Et cur Romani locum illum adulterassent, quibus non desunt efficacissima alia Scripturæ testimonia, quibus doctrina illa Catholica solidissimè comprobatur? 1. ad Corinth. 4. 4. *Nihil enim mihi conscius sum, sed non in hoc justificatus sum.* Subjungit rationem: *qui autem judicat me Dominus est.* Et si tanta sit justorum de suâ salute certitudo (ut perperam Sectarii præsumunt) cur Propheta Job, quem nullus conscientiae stimulus reprehendebat, tremens nihilominùs, & in dubio fluctuans, hæc profert c. 9. 28. *Verebar omnia opera mea, sciens quod non parceres delinquenti.*

M O T I V V M. XVI.

V *Ersum illum Ps. 98. 5. Adorate scabellum pedum ejus, quoniam sanctum est, sicut præcedentia loca Scripturæ etiàm esse corruptum asserit. Ejus loco legi debere, Adorate antè scabellum. Ut indè eruamus creaturarum*

turarum adorationem, ita esse de industriâ à nobis factum.

RESPONDET V R.

*Confirmando nostram lectionem, &
Crucis adorationem stabiliendo.*

Tantum abest, ut in Vulgatâ lectione locus ille fuerit corruptus, quin potius plenissimè conformis sit textui Hebræo, ut cuilibet Hebraica exemplaria introspicienti, ac rem diligentius examini-
nanti constare poterit: cùm adorare antè, & adorare scabellum, ut alibi probabimus, juxtâ phrasim Scripturæ prorsus eadem sint: imò plura loca secundùm vocis Hebraicę energiam sic legi possunt. Vbi enim habet Psal. 131. 7. *Introibimus in tabernaculum ejus, adorabimus in loco ubi steterunt pedes ejus.* Rectissimè secundùm Hebræum, de verbo ad verbum latinè conversum legi posset, *Adorabimus scabellum pedum ejus.* Per scabellum pedum Dei, olim intelligebatur Arca testamenti: nam 1. Paralip. 28. 2. introducitur Salomon loquens:

quens, *Cogitavi, inquit, ut adificarem domum, in quâ requiesceret arca fæderis Domini, & scabellum pedum Dei nostri & 2. Reg. 6. 2. Ut adducerent arcam Dei, super quam invocatum est nomen Domini exercituum sedentis in Cherubim super eam.* Ex quibus apertissimè colligitur, commendatam fuisse à Deo adorationem arcæ testamenti, tamquàm rei sacre. Eodem quoquè modo nos Crucem Dominicâ, in quâ pedes Domini potiori ratione, quàm in arcâ steterunt, tenemur adorare: nec idcirco Idololatræ dicendi sumus, cum creaturas non sic adoremus, quâ tales præcisè sunt, sed sub formalitate longè diversâ: nequè enim Idololatræ dici velint Calvinistæ, dum suos magistratus venerantur.

MOTIVVM XVII.

Quod Hebr. 13. 16. Beneficientiæ autem & communionis nolite oblivisci: talibus enim hostiis promeretur Deus; *Locum illum Romana versio perperam legat, ex eo quod legi debeat, Deus delectatur talibus Sacrificiis.*

I

RES

R E S P O N D E T V R.

*Hoc posito, nihil à bonorum operum
merito tolli.*

H Oc dato gratis & non concesso, disputationis vitandę causâ: quid inde contrà nos inferri possit, ubi in idem incidit, esse gratum Deo per bona opera, & per ea mereri? Nàm si Deus delectatur talibus Sacrificiis beneficentię, & communionis nostrę cum operibus Christi, & Sanctorum, certum est esse grata ipsi, & ex consequenti meritoria: quandoquidem ex multis locis Sacre Scripture dilucidè constet, æternam vitam & gloriam, nobis conferendam esse in mercedem bonorum operum.

M O T I V V M X V I I I.

B onifacium Octavum irridet, quod ad probandam utramque Ecclesię potestatem, Spiritualem & temporalem, Extrav. Vnam Sanctam, de major. & obed. in Comm. usus fuerit illis

illis Discipulorum verbis , Luc. 22. 38. Ecce duo gladii hîc : quibus Dominus respondit, Satis est. Iterum ad ostendendam utriusque gladii applicationem , ad summum Pontificem Petri successorem pertinere , Mitte gladium tuum in vaginam , Ioan. 18. 11. Item quod Innocentiùs I 11. ex eo quod Deus creaverit duo luminaria magna , potestatem suam probare intendat : eamq; Soli comparet , Imperatoriam dignitatem Lunæ. Tantò Papalem Imperatorie excellentiùs præeminere declarans , quantò Solis lumen Lunæ splendorem antecellit.

RESPONDET VR.

Et legitima hæc applicatio , unà cum Pontificiâ præeinentiâ propugnatur.

VUlgatâ nostrâ expositione relictâ , ad cavillandas nonnullas Summorum Pontificum expositiones calamum tuum transtulisti. Verum non video quid hic arguas. An quod Scripturæ loca præter sensum literalem applicata sint ? Superiùs vidimus quàm id optimè fiat. An quod probationes illæ doctrinam propositam

non fatis firmiter demonstrant? Miror hîc acumen ingenii tui, qui demonstrationem Theologicam, aut Philosophicam in eo requiris, qui leges sancit, & non potiùs majestatem, potestatem, & imperium. Quamvis & sufficienter probant, eo probationis genere, quo veritas aliqua Catholica & recepta, per alicujus Scripturę applicationem, seu mysticum ejus sensum illustratur ac roboratur. Homo dùm unam sententiam profert, vix nisi unum sensum spiritu limitatus intendit. At Spiritus Sanctus, ut Divinitate immensus, ita sensibus fœcundus, in suis verbis plures intendit, non quidẽ sibi contrarios, sed planè cohærentes: quos interpretandi Ecclesię Sponsę suę facultatem concessit. Verba illa *Ecce duo gladii hîc*, vix intelliguntur in quem finem prolata sint, si soli sensui literali inhærendum putes, nec ad mysticum recurras. A quo verò mysticum sensum nisi ab Ecclesiâ, ejusque in terris Capite visibili, meliùs accipiamus? Forsitan non ita applicationem improbabis, & modum probandi: sed arrogantiam & præsumptionem in illis scriptis, tuo
judi-

judicio latentem. Profectò jure merito Summus Pontifex absquè ullâ superbiæ, aut arrogantie notâ, dignitatis suæ præminentiam Regiæ & Imperatoriæ potestati anteponere & potest & debet. Talis est enim excessus sublimitatis & celsitudinis, inter dignitatem & jurisdictionem Pontificiam, atquè Regum & Imperatorum auctoritatem, qualis est inter spiritum & corpus. Si quidè regimen Pontificium, velut primarium & principale objectum, animarum in vitam æternam directionem respicit. Regium autem merè & per se in pacificâ & temporali subditorum gubernatione versatur, & ibi sistit. *Quia* (ut inquit Angelicus Doctor lib. 4. de regim. princip. cap. 11.) *Deus providit de eis* (nempè Regibus) *ut regnum regant & gubernent, & unumquemque in suo jure conservent. Et hic est finis regiminis.* Undè & in præcedenti cap. 10. postquam efficaciter probavit plenitudinem potestatis Petri, & successorum ejus, ex illis Christi verbis, *Quodcumque ligaveris &c.* sibi objicit ac respondet. *Quod si dicatur ad solam referri Spiritualem potestatem, hoc esse non potest.*

test. Quia corporale & temporale ex spirituali & perpetuo dependet : sicut corporis operatio, ex virtute animæ.. Sicut ergò corpus per animam habet esse, virtutem, & operationem, ut ex verbis Philosophi & Augustini de immortalitate animæ patet ; ita & temporalis jurisdictio Principum per spirituales Petri & successorum ejus. Hæc S. Doctor, quæ & exemplis confirmat. Carolum enim magnum Imperatorem creavit Adrianus Papa, Othonem Leo. Vndè liquidò pater, quod ubicumquè Spiritualis & Ecclesiastica gubernatio à sæculari potestate dependet, ei quæ subditur, ibi planè ordo fit præposterus & distortus, nec commodè, imò nec sufficienter de animarum salute fit ibidem provisum. Vbi Reges & Principes Ecclesiasticæ jurisdictionis potestatem non usurpant : sed permittunt, & imperant, ut reddantur quæ sunt Cæsaris Cæsari, & quæ sunt Dei Deo, ibi rectè instituta est Respublica. Quicumque enim Sacerdotes Dei per quem Reges regnant, & legum conditores justa decernunt, suspiciunt & venerantur, à Deo Opt. Max. in quem ministrorum suorum honor

honor redundat, amplam remunerationem expectant. Deniquè Sacerdotalis dignitatis præminentiam abundè colligimus Num. 27. 14. & 18. ubi Moyſes inſtantiſſimè ſibi mortem præſentiens, de ſucceſſore ſollicitus ſic oravit, *Provideat Dominus Deus ſpirituum omnis carnis, hominem qui ſit ſuper multitudinem hanc &c. dixitque Dominus ad eum, Tolle Joſue filium Nun, virum in quo eſt Spiritus, & pone manum tuam ſuper eum, qui ſtabit coràm Eleazaro Sacerdote &c. & v. 21. Pro hoc, ſi quid agendum erit, Eleazar Sacerdos conſulet Dominum: ad verbum ejus egredietur ipſe, & omnes filii Iſraël cum eo.* Vbi hoc ſanè animadverſione dignum eſt, quod Joſue vir Divino Spiritu plenus, ingredi & egredi debebat ad verbum Eleazari Sacerdotis: adeòque ab eodem doceri & inſtrui, quod eſt verum Sacerdotis & Pontificis munus. Ex hoc loco, ſicùt & cæteris plurimis, Principum ſæcularium à Pontifice dependentiam jure divino traditam videmus. Joſue populi iſraëlitici Dux ſtare debebat coràm Eleazaro Sacerdote, non ſedere: ut colligamus, quem debeant honorem Principi-

pes Statui Ecclesiastico. Simile refert Suidas de Sancto Leontio Episcopo, qui ab Eusebiâ Constantii Cæsaris conjuge rogatus, ut ad aliqua negotia pertractanda eam inviseret, sinè morâ respondit: Si me ad te venire desideras, mihi reverentiam Episcopis debitam exhibe: ut statim atque pedem in tuam aulam intulero, mox è folio tuo sublimi descendas, atque venienti mihi cum pudore occurras. Postmodum ego sedeam: tu verò stes, donèc per me tibi fiat sedendi facultas. Si acquiescis, te invisam: sin minùs, scias quod nusquam impetratura sis, quod honori Sacerdotali, iure divino firmato, fiam injurius. Hæc Leontius. Hunc Sanctum Episcopum Sectarii fortè præsumptionis & superbię accusabunt, qui talem sibi reverentiam ab Imperatrice deferri voluerit. Verum hinc nihil superbię, nihil præsumptionis quod carpi possit: cum illum honorem personæ propriæ deferri non quæsiverit, sed dignitati, non Leontio, sed Episcopo, non sibi, sed Deo, cujus vices Ecclesiæ ministri ob-eunt, & in cujus honorem honor ille refundebatur. Probè enim vir Dei noverat, quod

quod ipse Christus inter salutaria, quæ nobis reliquit, præcepta, unum hoc esse voluerit, Ecclesiæ Prælatos esse colendos: neque modò sanctos & perfectos, sed ipsos etiàm Scribas & Phariseos, super Cathedram Moysis sedentes.

MOTIVVM XIX.

QUod versio quedam Gallica Sacra Scriptura edita Parisiis anno 1538. typis Antonii Bonne-mere, valdè infida sit, multis mendis scateat, multa habeat addita, multa deleta. Idque Romana Ecclesiæ imputat, ut jaciat fundamenta errorum.

RESPONDETUR.

Hujusmodi translationes non approbat, imò reprobatur Ecclesia.

Hic non satis sibi constat noster Ministellus. Superiùs Ecclesiam Romanam arguit, quod Bibliorum in linguam vernaculam translationes non solum non approbet, sed etiàm Laicos ab earumdem lectione avertat: nunc

Gallicam editionem illam, quòd mendosa sit, nobis impingit. Hîc iterùm repeto quod Sancta Ecclesia Catholica nullam editionem Gallicam pro authenticâ habeat, nec facilè eas cuicumque permittat, tùm ob rationes supra deductas, tùm etiàm ob eam, quod interdum priuatorum hominum, & non rarò Hæreticorum auctoritate tales translationes fiant, quæ cum vulgatâ Latinâ non sint conformes. Vndè errores similes privatis hominibus potiùs tribuendi sunt, quàm Ecclesiæ: quæ tantum abest, ut auctrix illorum sit, quin potiùs severissima castigatrix. Quare non est, quod ego (qui non particulares abusus, sed Ecclesiam defendendam suscepi) in hujus translationis defensione laborem; nec in iis, quæ ipsi, aut imponuntur, aut de eâ referuntur, refellendis operam perdam; cùm contrà nos non militent. Præsertim cùm facta sit eo præcisè tempore, quò hæreses in Galliâ grassabantur. Ac proptereà prudentissimè isti malo occurrerunt Doctores Academia Lovaniensis, qui Gallica Biblia castigarunt & correxerunt, secundum Vulgatam Latinam: ut
illi

illi qui Gallicis uti debitâ cum facultate voluerint, illa saltèm emendata & correctâ reperiant.

MOTIVVM XX.

Quod locus ille Math. 4. 17. (quem ipse hoc modo legi vult, *Emendate vos, appropinquavit enim Regnum Cælorum, aut per hæc verba, amendez vous, &c.*) falsificatus sit dùm legitur, Pœnitentiâ agite, appropinquavit enim Regnum Cælorum: ut inde Romana Ecclesia eruat, quod Cælum per opera meritoria, & Pœnitentiâ acquiri debeat.

RESPONDETUR.

Et Pœnitentiâ necessitas, simul & loci illius cum suis fontibus concordia demonstratur.

EXcederet instituti mei rationem, hîc plura infidelitatis vestræ, quæ in interpretandis Scripturis plusquàm in mille locis apparet, argumenta adferre: cùm hoc ordinarium vobis sit Scripturas corrumpere.

corrumpere, ubi vobis adverfantur. Sufficiet quod dicamus, te & tuos hunc potiùs locum adulterâsse, ut opera poenitentiae, quæ odistis, rejiciatis; quàm nos dùm legimus *Pœnitentiam agite*. Nequè enim ad hoc nos ulla ratio cogere potuisset, cùm aliundè fatis bonorum operum & Pœnitentiae necessitatem possimus astruere. Lutherus, Calvinus, & alii per Pœnitentiam tam ferè à Christo Domino toties commendatam, intelligunt simplicem peccandi desistentiam absquè positivâ poenitudine, & offensionis divinæ tùm internâ, tùm externâ detestatione. Verùm hic error jam pridem in Ecclesiâ damnatus, apertè falsitatis convincitur multis argumentis. Primò quia manifestè justitiam Dei destruit, cujus interest, nulla crimina impunita transire, saltem per poenam aliquam: quæ si voluntariè suscipitur cum intimo cordis dolore, in sanguine Domini nostri JESU CHRISTI faciliùs peccatum abluitur: sin minùs voluntariè, minùs exactè. Licèt enim sanguis divinus de se sufficientissimus sit, ut emundet nos ab omni peccato: æterna tamen

men Dei Majestas dispositionem aliquam
 in nobis requirit; nempè ut arreptâ Cru-
 ce, Christum sequamur, saltèm ex parte,
 in acerbissimâ ejus Passione. Atquì si suf-
 ficeret simplex desistentia, nec aliquis de
 præteritâ culpâ dolor ad minùs require-
 retur, peccata nostra omnimodè remane-
 rent impunita, & nos nullâ ratione ejus
 Passioni compateremur: quod divinæ ju-
 stitiæ manifestissimè adversaretur. Secun-
 dò patet ab exemplo lachrymarum Petri,
 Magdalenæ, & aliorum, qui nusquam
 contenti fuerunt simplici desistentiâ. Ipsa
 quoquè Filii prodigi parabola clarissimè
 intento nostro servit, quàm Dominus no-
 ster JESVS, Luc. 15. 11. & seq. in ty-
 pum & exemplum peccatorum, Ecclesiæ
 suæ proponit. Cùm enim substantiam su-
 am vivendo luxuriosè dissipâisset, poeni-
 tentiâ ductus, sic Patrem alloqui proponit,
 vers. 18. & 19. *Pater, peccavi in Cælum, &
 coràm te: jam non sum dignus vocari filius
 tuus: fac me sicut unum de mercenariis tuis.*
 In quibus verbis, tres poenitentiae partes
 non obscurè designantur, Contritio siue
 poenitentia interior, quia, priùs intra se il-
 la ver-

la verba concepit, doloris peccatorum præteritæ vitæ significatiua. Exindè illa ipsa Patri ore proprio manifestavit : ibi est Confessio, seu sui ipsius humilis accusatio, quam illis verbis exprimit, *Peccavi, Non sum dignus &c.* Postremò cum dicit; *Fac me sicut unum de mercenariis tuis*, se promptum paratumque exhibet, ad exteriorem poenitentiam suscipiendam, ad opera videlicet poenalia & laboriosa, in quibus versatur satisfactio. Non itaque consistit poenitentia in simplici à peccatis desistentiâ.

3. Patet ex diversis aliis locis: Luc. 5. 32. *Non veni vacare justos, sed peccatores ad poenitentiam.* Item Luc. 15. 7. *Gaudium erit in celo super uno peccatore poenitentiam agente, quam super nonaginta novem justis, qui non indigent poenitentia.* & Ioel 2. 12. *Convertimini ad me in toto corde vestro, in jejunio, & in fletu, & in planctu.* & Job ult. 6. *Idcirco me reprehendo & ago poenitentiam in favillâ & cinere.* Et Math. 11. 21. *Olim in cilicio & cinere poenitentiam egissent.* Quis sanè mentis talia de simplici resipiscentiâ intelligat, quæ tam expressè mentis & corporis afflictionem significant? Illud Ezechiæ addo

Isa. 38.

Isa. 38. 15. *Recogitabo tibi omnes annos meos, in amaritudine animæ meæ.* Et illud 2. ad Cor. 7. 10. *Quæ enim secundum Deum tristitia est, pœnitentiam in salutem stabilem operatur.* Vnde qui hujusmodi pœnitentias cum peccatorum dolore suscipiunt, gratiam & reconciliationem cum Deo, à Spiritu Sancto consequuntur: ut videre est ex Ps. 33. 19. *Iuxta est Dominus iis qui tribulato sunt corde.* Vbi August. & Basil. pro tribulato, legunt contrito. Psal. 50. 19. *Cor contritum & humiliatum Deus non despicies.* Isa. 66. 2. *Ad quem autem respiciam, nisi ad pauperculum, & contritum spiritu.* Secus delicatuli Sectarii, qui ut compunctionis animi, & pœnitentiæ degunt expertes, ita illos Dominus non respicit, sed despicit, & longè ab illis est, quoniam tribulato corde esse contēnunt. Quod si dolor ille de peccatis commissis inutilis est, cur quæso diuina bonitas peccatores tam sæpè ad eum incitat? Genes. 3. 13. mulierem ad contritionem vocat, *Quare hoc fecisti?* & Genes. 4. 10. *Quid fecisti?* & Isa. 68. 1. *Clama, ne cesses & annuntia populo meo scelera eorum.* & Jerem. 8. 6. *Nullus est qui agat pœnitentiam super peccato suo, dicens,*

dicens, quid feci? Hæc adeò clara sunt ut veritatis hujus Catholicæ splendor, etiàm vestrum Calvinum non præterfugerit. Ille enim lib. 3. Institut. c. 4. §. 2. *Equidèm sedulo, ait, & acriter instandum esse fateor, ut quisque amarè deflendo sua peccata, se ad eorum displicentiam & odium magis acuat.* Et Kemnitius non inferior tali magistro discipulus, noctua cū noctuis, illud etiàm non potest diffiteri. 2. p. examinis. p. 954. inquit, *Hinc sequitur dolor conscientiaè graviter dolentis se peccasse, & peccatis offendisse Deum. Incipit igitur peccatum odisse & detestari.* Has rationes & auctoritates alia ratio Theologica ab omnibus communiter recepta, mirum in modum corroborat, atque irrefragabiles reddit. Peccatum enim, iuxta communem Theologorum sententiam, est averfio voluntatis à Deo, & conversio ad creaturam, in hac ultimum finem appetitive constituendo: hoc est, præferendo cum aliquâ complacentiâ & amore bonum creatum & commutabile, bono increato & incommutabili, quod est Deus. Igitur ut deleatur tale peccatum, & voluntas ad primum rectitudinis statum rediga-

redigatur, necessum est, ut actum ex diametro contrarium eliciat: nimirum ut avertat se à creaturâ cum aliquâ displicentiâ & odio, & cōvertat se totam ad Deum, per actum dilectionis, quâ tenetur diligere Deum super omnia: In quo verè & propriè consistit actus contritionis. Quomodo ergò cum hâc certissimâ & ab omnibus approbatâ doctrinâ subsistere potest vestra simplex à peccando desistentia, quæ nullum ex se animi motum, nullam aversionem positivam à creaturâ, & conversionem ad Creatorem importat? Longè aliter quàm vos, conversionem istam, dùm toties eam nobis inculcat, intellexit Spiritus Sanctus, eam enim sæpius cum intimâ cordis, atquè interdum etiâ corporis afflictione conjunxit; ut Joel. 2. 12. *Convertimini ad me in toto corde vestro, in ieiunio, & in fletu, & in planctu, & scindite corda vestra, & non vestimenta vestra.* Et id genus alia variis in locis. Ex his manifestè patet, quod poenitentiæ necessitas aliundè, quàm ex illo Matthæi loco controverso, abundè probatur: adeòque nulla necessitas Catholicos compulerit, ad illam lectionem cor-

rumpendam. Sola igitur vera & genuina lectio Interpretem nostrum Vulgatum movit, ut *Pœnitentiam agite* diceret, non resipiscentiam. Quem etiã secuti fuerunt antiquissimi Patres, Tertullianus, Cyprianus, Chrysostomus, Augustinus, Ambrosius, & alii: apud quos resipiscentiæ nomen est rarum; pœnitentiæ & μετανοίας familiarissimum, plerumque semper cum aliquo vel corporis vel animi dolore conjunctũ. Quod quidẽ temerẽ ab ipsis factũ non est, sed ex ipso fonte Hebræo haustum; in quo habetur verbũ *Nacham* quod ab illius linguæ peritis, & passim ab ipsis Septuaginta Interpretibus per μετανοειν Græcè redditur. Hoc autem verbũ Græcum probatissimi quique Auctores, ubicumque subjectum id ferre potest, aliquem de præteritis dolorem connotare intellexerunt. Id ipsemet Beza de Aufonio & Plutarcho fatetur: quamvis insolenti, ut solet, arrogantia, ipsis & Auctorum torrenti contradicat. Ut vel indẽ appareat quod antiquas vocum significationes maluit corrumpere, ut errori suo faveat, quã cũ Ecclesiã Catholicã recte sentire. Ap-
geigi-

ge igitur quisquis poenitentiam, quâ Deo reconciliamur, de medio tollis: & per hoc verus animarum seductor à remedio, lapsus ad resurgendum planè necessario, peccatorem retrahis. Apage quisquis animas per viam poenitentiae arctam, quæ ducit ad vitam, ambulantes revocas: & provocas ad contrariam & latam, quæ ducit ad perditionem. Vos increpat Paulus ad Philip. 3. 18. & 19. *Multi enim ambulant, quos sæpè dicebam vobis (nunc autem & flens dico) inimicos crucis Christi, quorum finis interitus.* Inimicos, inquam, poenitentiae, contritionis, mortificationis; amicos ventris, commoditatis, & deliciarum. Illa est pura illa & sincera, quam ore dumtaxat prædicant Sectarii, Evangelicæ doctrinæ observantia.

MOTIVVM XXI.

QUod in illis Bibliis Gallicis suprâ laudatis, ad illa verba Luc. 23. 44. Hodie mecum eris in paradiso, additum sit maliciose quoddam glossema, quo astruatur Limbus.

R E S P O N D E T V R.

*Limbum Patrum ex Scripturâ
confirmando.*

Quidquid fit de illâ trāſſatione, in quâ non immoror, vera, orthodoxa, & Catholica, communi Sanctorum Patrum & Doctorum calculo approbata eſt doctrina, quę de Limbo traditur, & de Chriſti Victoris in illum adventu. Illorum teſtimonia non refero, utpotè quę nihili facias. Ex Scripturis oſtendo 1. ex illo Zach. 9. 11. ubi Propheta, Chriſto de morte per mortem ſuam triumphanti lætum Pocanacanus, ſic eſſatur. *Tu quoquē in ſanguine teſtamenti tui emiſiſti vinctos tuos de lacu, in quo non eſt aqua.* Reſpondet Calvinus l. 2. Inſtit. cap. 16. §. 6. per lactum ſine aquâ intelligi Babylonicę captivitatis profunditatem: ſed ex ſuo cerebro deſumpta eſt hæc interpretatio. Nam præterquàm quod Divinæ Literę, cum de eâ, ad quam abducti ſunt captivi Iſrahitę, provinciâ loquuntur, magis indicant locum fuiſſe

fuisse palustrem & aquosum, quàm sine aquâ. Deindè etiàm apertè eo capite vaticinatur Zachar. de Christo, ut ex contextu patet, & maximè illis verbis v. 9. *Exulta satis filia Sion &c. Ecce Rex tuus veniet tibi, Iustus & Salvator &c.* SS. Ambr. & Hilar. illud Psalm. 106. 16. *Contrivit portas areas, & vectes ferreos confregit*, intelligunt de descensu Salvatoris nostri ad inferos. Eccli. 24. 45. *Penetrabo omnes partes inferiores terræ, & inspiciam omnes dormientes, & illuminabo omnes sperantes in Domino.* Mat. 12. 40. *Sicut enim fuit Ionas in ventre ceti tribus diebus, & tribus noctibus: sic erit filius hominis in corde terræ tribus diebus, & tribus noctibus.* Hic iterùm Calvinus pro phantasiæ suæ libitu, asserit cetum, mortis aut sepulchri figuram prætulisse. Sed quidquid sit de figurâ, constat ex hoc ipso loco, quod Christus fuerit realiter in corde terræ tribus diebus, hoc est in meditullio ipsius, aut circitè; sicuti cor ferè in medio est cuiusque animalis. Nequè dici potest de sepulchro, cùm fuerit in superficie terræ; nequè de corpore Christi exanimi, cùm non fuerit in terram, aut pulverem redactum, utpote

cui datum sit non videre corruptionem. Atque adeò de Limbo intelligi debet, quem S. Mater Ecclesia situm esse in medio terræ hætenus credidit. Et confirmatur per illud Ephes. 4. 8. Vbi Apostolus triumphum Christi exponens, inquit, *Captivam duxit captivitatem &c.* & v. 9. *Quod autem ascendit, quid est, nisi quia & descendit primum in inferiores partes terræ?* Et Regius Vates in personâ Christi Psal. 15. 10. *Quoniam, inquit, non derelinques animam meam in inferno*, animam meam, non corpus. Quis verò dixerit animam Christi fuisse in sepulchro? expressè dicit, *in inferno*: & quamvis vox *Seol* hebraicè sepulchrum simùl & infernū significet; attamen Chaldeus, Septuaginta, & Hieron. Infernum non sepulchrum transtulerunt. Et nè sit dubitandi locus, ipse S. Luc. Act. 2. 27. referens illum eundem versum pro voce *Seol*. Græcè dixit ᾅδης, quæ manifestè infernum significat. Gen. 37. 35. Jacob Joseph perditum lugens, *Descendam*, ait, *ad filium meum lugens in infernum*. Non existimabat Jacob, se tunc in cœlum post obitum suum ascensurum, sed descensurum in infer-

in infernum : non quidẽm damnatorum,
 cùm iustus effẽt ; sed in aliquem alium lo-
 cum subterraneum. Hęc locorum infer-
 nalium diversitas , satis innuitur Luc. 16.
 23. Vbi dives ille sepultus in inferno, *Vi-*
dit Abraham à longè, & Lazarum in sinu eius.
 Vidit in inferno; sed tamen à longè, id est,
 intercedente magno inter utrumq̃ue lo-
 cum intervallo. Deniquè hoc ipsum satis
 ostenditur ex Samuelis Sauli apparentis
 historiã. 1. Reg. 28. 12. & seq. Qui non vi-
 sus est de cœlo descendere , sed potius de
 terrã, aut aliquo loco subterraneo. Quod
 autem non imaginariẽ, aut ex præstigio a-
 nima Samuelis apparuerit , satis indicant.
 ipsa Scripturæ verba cap. & vers. citatis.
Cùm autem vidisset mulier Samuelem &c. Di-
xit ad Saul &c. Item, Intellexit ergò Saul quod
Samuel esset &c. Dixit Samuel ad Saul &c. Et
 ampliùs declaratur Eccli. 46. 23. ubi inter
 laudes Samuelis connumeratur, quod pòst
 obitum suum prophetarẽt. *Notum fecit Re-*
gi, & ostendit illi finem vitæ suæ, & exaltavit
vocem suam de terrã in Prophetiã. Quę si per
 spectum, aut doemonem gesta fuissent,
 perperã inter Samuelis laudes id ipsum

computaretur. Ipse itaque est, qui apparuit exiens è terrâ ; ut certum fiat, concedendum esse locum aliquem subterraneû, in quo ante Ascensionem Dominicam, iustorum animæ Redemptoris sui adventum expectabant.

M O T I V V M XXII.

Quod in Gallicâ illâ editione memoratâ, verba Apost. 1. ad Cor. 14. 18. Gratias ago Deo meo, quod omnium vestrum linguâ loquor, corrupta sint, & legatur, qui omnium vestrum linguâ loquitur, eo sine, ut Romani in Sacrificiis suis linguâ incognitâ utentes, rectè facere doceantur, quasi sufficiat eam Deum intelligere. Quod etiâ versus sequens sit truncatus, & illa verba omittantur, ut alios instruam, ob eundem, & similem finem.

R E S P O N D E T V R.

Veram lectionem divinis Officiis latino sermone peragendis nihil officere.

Quid prætenderit illa versio Gallicâ mihi curæ non est. Certum interim est,

est, quod sensus Pauli illo loco sit, quod licet obtinuerit donum linguarum, ut cæteri Apostoli: tamen uti nequaquam velit linguâ incognitâ ad ostentationem, & finè fructu: sed in Ecclesiæ ædificationem verbis paucis, ut alios instruat intelligibiliter. Hoc facit Ecclesia Catholica, quæ etsi latino sermone officia divina peragat (quæ non sunt tam ad instructionem, quàm ad orationem & cultum divinum) interpretatur tamen sacra mysteria linguâ vernaculâ ad populum, non ad ostentationem, sed ad ædificationem, & instructionem. Aliàs enim indoctis omnia pandere, magis cederet in ejus destructionem, ut suprâ diximus. Mavult autem Apostolus quinque verba intelligibilia ad aliorum instructionem loqui, quàm copiosâ uti verborum farragine, ut solent Sectarii: qui majorem eloquentiæ impendunt operam, ut flosculis Rhetoricis errorum suorum venenum contegant; quàm veræ sapientiæ, quæ mentem reficit, & vivificat. Deniquè loqui linguâ hanc vel illâ, ex se indifferens est. Si fiat ad ostentationem, vanam gloriam, aut ob si-

milem finem; vituperabile est: si propter rationabilem aliquam causam, veluti cùm non habeatur alia translatio approbata, nè vulgus ob suam imperitiam, nesciens scrutari ea quæ sunt spiritus, nimis inhæreat litteræ, in suam ipsius ruinam; honestum planè & laudabile est.

M O T I V V M X X I I I.

Illud Pauli ad Hebr. 10. 17. & 18. Peccatorum & iniquitatum eorum jàm non recordabor ampliùs. Vbi autem horum remissio, jàm non est oblatio pro peccato, *dicit in dictis gallicis Bibliis non esse fideliter translatum, eo quod ultima illa verba jàm non est oblatio pro peccato, nequiter omissa sint, eo quod Sacrificio Missæ, precibus, anniversarijs, & suffragijs pro defunctis, directè repugnent.*

R E S P O N D E T V R.

*Sacrosanctum Missæ sacrificium
stabiliendo.*

HÆc si omissa sint, indubiè malè omissa sunt. In translatione gallicâ editâ

ditâ Lugduni & à Lovaniënſibus corre-
ctâ, & in aliis editionibus, ſi quæ ſint, re-
ceptis, nè vel apex quidè illorum ver-
borum omiſſus reperitur. Quod verò illa
Sacroſancto Miſſæ ſacrificio, anniverſa-
riis & ſuffragiis pro defunctis expreſſè ad-
verſentur, apertiffimè falſum eſt. Nihil
enim aliud præſendit Apoſtolus, ut ex
ejuſdem capitis contextu ſatis luculenter
apparet, quàm perſuadere Hebræis ho-
locauſta & ſacrificia Moſaicæ legis, quæ
pro peccato offerebantur, & peccatum
non delebant, inanes umbras & ineffica-
cia fuiſſe remedia. Quod oſtendit illis ver-
bis v. 4. *Impoſſibile enim eſt ſanguine tauro-
rum & hircorum auferri peccata*, ſolummo-
dò, JESVM CHRISTVM Dei filium in
arâ Crucis ſeipſum veram hoſtiam, Deo
placentem, immaculatam, pro omnium
peccatis obtuliſſe, cujus pretioſiſſimo ſan-
guine redempti & abluti ſumus. Nos verò
in incruento Miſſæ ſacrificio non aliam
præter hanc eandem hoſtiam offerimus:
nec aliud intendimus, quàm cruentum
illud, quo in Cruce facta eſt copioſa re-
demptio, iterùm atquè iterùm proponere
& ap-

& applicare. Nequè humanum est commentum, sed divina promissio, divinà institutio, imò mandatum divinum. Hanc oblationem Spiritus Sanctus per Malach. c. i. ii. Ecclesiæ suæ diù antè prædixerat. *Ab ortu enim solis usquè ad occasum, magnum est nomen meum in gentibus, & in omni loco sacrificatur, & offertur nomini meo oblatio munda.* Vbi præiens pro futuro, more Prophetico ponitur. Nequè locus iste de ullâ aliâ oblatione, præterquàm de sacrificio Missæ concinnè interpretari potest, quod in omni loco & natione, hodiernâ die sacrificatur & offertur in Gentibus, hoc est, in Ecclesiâ, quæ maximâ ex parte ex Gentibus ad Deum conversis congregata est, & per universam terram diffusa. Sacrificia verò Judæorum, extrâ Judæam non offerebantur, atquè hîc Propheta eadem cessatura prædicit. Sacrificia Gentilium non fiebant nomini divino, sed dæmoniis. Deniquè sacrificia improprie dicta, quale est sacrificium laudis, justitiæ, bonorum operum, per illam Prophetiam nullâ ratione intelligenda veniunt, tum quia ex adversariorum sententiâ, nulla opera

opera nostra, bona & munda sunt, sed omnia sicùt pannus menstruate; ergò non sunt oblatio munda. Tùm quia apertè loquitur Malach. de aliquo verò & propriè dicto sacrificio, quod veris Judæorum sacrificiis opponit, iisque substituendum prænuntiat. Restat igitur ut de sacrificio Missæ intelligatur. Hanc etiàm instituit simul & mandavit Christus, quando Apostolis, & in ipsis omnibus Sacerdotibus Luc. 22. 19. dixit, *Hoc facite in meam commemorationem.* Quem locum etiàm Paulus commemorat 1. ad Corinth. 11. 24. Notandum verò quod verbum *facere* sæpè in sacris Literis pro *sacrificare* usurpetur, ut Levit. 23. 19. *Facietis & hircum pro peccato.* & Ezech. 45. 22. *& Faciet Princeps in die illâ pro se, & pro universo populo terræ, vitulum pro peccato.* Quare per hoc *facite rectè, sacrificate* intellexeris: non quomodolibet, sed in meam commemorationem, id est, cruentum illud Sacrificium, quod mox oblaturus erat, & non aliud, per incruentum commemorando. Quod autem verissimum sit Sacrificium ex ipsâ definitione deducitur. Nihil enim est aliud quàm oblatio

oblatio religiosa soli Deo facta , circà quam aliquid exteriùs exercetur, cum im-
mutatione rei oblatae. Sed hæc circà Eu-
charistiam fiunt : nam soli Deo offertur,
benedicitur, consecratur, elevatur, fran-
gitur, consumitur : ergò est verissimum
Sacrificium. His accedit communis San-
ctorum Patrum à principio nascentis Ec-
clesiæ consensus. Instar omnium profero
Conc. Nicenum can. 4. cæteraque Conc.
oecumenica , quæ passim docent , non ha-
bere Diaconos potestatem Sacrificia offe-
rendi : sed id solis Sacerdotibus congrue-
re. Quare verè stultissimum est , contrà
omnium antiquorum Doctorum torren-
tem , hanc veritatem Catholicam negare :
idquè unico illo fundamento verborum
Pauli superiùs allegatorum, & malè intel-
lectorum. Dùm enim ipse loquitur de
solis legis Mosaicæ Sacrificiis , secundùm
subjectam materiam, Novatores illam in-
telligunt de hoc sacrosancto incruentæ
oblationis mysterio, quæ nihil cum legis
antiquæ Sacrificiis, nisi quantum umbra
cum corpore, commune habet. Et ut me-
lius percipiatur, quàm in hujus loci expli-
catione

catione fallantur , si quid contrà Missæ
 Sacrificium valeret , militaret etiàm , ex
 mente Sectariorum , contrà omne opus
 bonum , quod Calvinus & alii (licèt erro-
 neè) verum esse Sacrificium astruunt :
 nàm pari evidentiâ concluderet. Vt si di-
 camus. Vbi peccatorum remissio facta est
 in arâ Crucis , jam non est oblatio boni
 operis , jam non est Sacrificium laudis ,
 Sacrificium justitię pro peccato , jam non
 est Baptismus in remissionem peccato-
 rum : licèt dicatur Joa. 3. 5. *Nisi quis renatus*
 fuerit &c. Iàm non est facienda eleemo-
 syna , licèt Spiritus Sanctus nos admoneat ,
 Danielis 4. 24. *Peccata tua eleemosynis redi-*
 me. Omnia enim ista , secundum Calvi-
 num , sunt vera Sacrificia. Ex quibus ap-
 paret quàm ineptè Sectarii nostri ex illo
 loco argumententur , ut impugnent sa-
 crosanctum Missæ Sacrificium.

MOTIVVM XXIV.

C *Atholicos hujus corruptionis in Gallicis il-*
 lis Bibliis factæ auctores asserit : idquè (ut
 ceteras ejus nugas transeamus) fraudulentâ, in-
quit,

quit, pietate, nè animarum commercium in Ecclesiâ Romanâ cessaret, & fertilis campus Indulgentiarum & Iubilaeorum sterile sceret.

RESPONDETUR.

Antiquum Indulgentiarum usum falsis testimonijs non indigere.

NVgas occinis. Quasi verò indigeamus illius versionis Gallicæ corruptione, aut cuiusquàm alterius; aut quâpiam piâ, sive impiâ fraude opus foret ad probandam Indulgentiarum concedendi facultatem, penes Ecclesiæ Prælatos residere: quibus claves regni coelorum traditæ sunt Math. 16. 19. quibus solvendi super terram, sicut & in coelis, data est absquè controversiâ potestas. Recense nobis, si pòtes Hæretice, vel unicum probatum authorem Catholicum, qui falsâ illâ & corruptâ (ut susponimus) translatione usus fuerit ad Indulgentiarum defensionem. Certè etiâ nunc absquè illius patrocínio, & multis antè ipsam sæculis, ab ipsis Ecclesiæ primordiis, viguit semper inter
Ortho-

Orthodoxos Indulgentiarum usus. Hoc prima & œconomica Patrum Concilia factis testatum nobis reliquerunt. Ancyranum passim, Neocesariense c. 3. Nicenum cap. 1. & 2. Carthaginense quartum c. 75. Agathense c. 60. Qui igitur tot testes omni exceptione majores habuimus, cùm falsarios subornaremus? Quamobrem majori cum fundamento, ego intervos animarum cōmercia tractari dixero, & planè veriùs: quàm id ullus Novatorum ostenderit de nobis aut Romanâ Ecclesiâ, quæ animarum saluti impensissimè studet.

MOTIVVM XXV.

QUod Romana Ecclesia pari infidelitate, quâ sacras Litteras tractavit, eas passim corrumpendo, processerit ad Sanctorum Patrum scripta, plurimis in locis ea mutilando, & delendo illa quæ Conc. Trid. decretis adversabantur: nè acutiores & illuminatiores qui de numero simplicium, id est, ignorarorum, ut ait, Religiosorum non sunt, deveniant in cognitionem, atquè advertant antiquorum Patrum sententias novitatibus impiis Romanæ Ecclesiæ ut
L pluri-

plurimum contravenire. Cùm verò nec sic illi, quibus mutilandi provincia commissæ erat, eum quem intendebant finem consequi possent, nisi planè abraderent, quod fieri non poterat: artificiosâ inventione asseruerunt, illorum Patrum sententias cautè legendas; & vel planè negandas, vel excusandas, aut plausibiliter interpretandas.

R E S P O N D E T V R.

Quis pluris faciat Patrum scripta, Catholici, an Calvinistæ?

V Trobiquè impostor est Delphicus ministellus. Circà Sacras Litteras superiùs vidimus; circà Sanctos Patres id numquàm de nobis probaverit; sicùt nec in aliis. Cùm verissimum sit in Ecclesiâ Romanâ, quæ verè Catholica est, puros & incorruptos SS. Patrum & Ecclesiæ Doctorum libros hùc usquè fuisse integrè cōservatos, & poenè omnium etiamnum originalia extare. Verissimum, quod hùc usquè eorum doctrinam, quos ut veros semper Magistros & Fidei nostræ luminaria Ecclesia

Ecclesia semper venerata est, tamquàm de coelo lapsam suspexerit, atquè secuta sit. Nequè enim deprehendi potest aut probari, quod à sententiis rectè intellectis, SS. Augustini, Gregorii, Hieronymi, Ambrosii, Dionisii Areopagitæ, Basilii, Chrysostomi, Nazianzeni, utriusque Cyrilli, Epiphani, Hilarii, Bernardi, Thomæ Aquinatis, nè vel in apice quidè, in rebus Fidei haftenùs recesserit. Et maximè de Augustino ausim asserere, præter ea quæ ipsemet retractavit (in quibus etiàm nihil ex Augustini mente intellectum Fidei contrarium erat) cætera omnia ab ipso tradita integerrimè observari, & ab omnibus Catholicis Doctoribus magnâ cum veneratione suspici. Quod si nonnulli alii antiqui Patres in quosdam humanitùs errores delapsi sunt, ut Tertullianus, Cassianus, & alii, hos sacrosancta Concil. Oecumenica modestè correxerunt: imò nè correxerunt quidè, sed libris eorum integris ad nos usquè transmissis, quinam errores, quinam scopuli nobis vitandi sint, digito demonstrarunt: & si quid saniori interpretatione in Catholicum sensum reduci potuit, inter-

pretandum magis reverenter, quàm errori vertendum duxerunt. Verùm non possum non mirari, quod Rabbini noster cum suis affeclis, hoc Sacræ Romanę Ecclesię vitio vertat, cùm falsò asserere non dubitaverit Sanctorum Patrum scripta, & nominatim Augustini, pluribus in locis cum seipsis pugnare, atquè ob frequentes contradictiones sibi esse suspecta. Voluit procul dubiò omnes Sanctos Patres Calvinistico spiritui conformiter corrigi, ne dicā foedari, ut sic eos sequeretur; & hoc privatâ auctoritate & iudicio proprio: ubi Catholici omnes, non nisi quod communis Ecclesię consensus, per eos qui in Cathedrâ Petri sedent corrigendum iudicavit, correctum desiderant.

M O T I V V M XXVI.

Quod Catholici enormissimum, ut putat, & maximè execrabile sacrilegium perpetrent, imò peccatum suum vehementer aggravent, prævaricando illud præceptum Deuter. 4. 2. Non addetis ad verbum, quod vobis loquor, nec auferetis ex eo. *Item Proverb.*

Proverb. 30.6. Ne addas quidquàm verbis illius, & arguaris, inueniarisque mendax. Et Apocal. 22. 18. & 19. Contestor enim omni audienti verba Prophetiæ hujus: si quis apposuerit ad hæc, apponet Deus super illum plagas scriptas in libro isto, & si quis diminuerit de verbis libri Prophetiæ hujus, auferet Deus partem ejus de libro vitæ. Ad has minas vult ut Romana Ecclesia exhorrescat.

RESPONDETUR.

Quod aduersarii in illorum locorum, perperam ab ipsis intellectorum transgressionem potius incidant, quàm Catholici.

HÆc loca Scripturæ Doctor noster Delphicus, vel intelligit de solo Verbo scripto excludendo non scriptum, vel de utroque simul. Si de solo scripto, præceptum illud Deuteron. transgressi sunt, quotquot, dictante etiàm Spiritu Sancto, aliquid addiderunt. Transgressus fuerit David addendo Psalmos, Prophete Prophetias, & Evangeliste Evangelia. Incide-

L 3 rit in

rit in proprium gladium excerptus de libro viventium S. Ioannes Evangelista, qui Apocalypsi suę prius conscriptę superaddidit Evangelium. De universâ forsitán Scripturâ intelligendũ dixeris, nam alioquin revelâte Deo & suscitante novos Prophetas, qui revelata scripto traderent, verbum scriptum succedēs nullius fidei esset: Verũ nec hoc dici potest, nec sustineri. Aliter itaq̃ue illa Scripturę loca interpretanda sunt, illud enim Deuter. 4. 2. *Non addetis, &c.* iuxta phrasim Scripturę nihil aliud denotat, quam Deum velle præcepta illa, quę populo Judaico tunc imposuerat, integrẽ & perfectẽ observari, nequẽ falsâ aliquã interpretatione depravari. Vndẽ Deuter. 17. 11. sub eãdem phrasi dicitur, *Nec declinabis ad dexteram, nec ad sinistram.* Quod sicũt merẽ litteraliter intelligendũ non est: alioquin enim numquam liceret incedendo vel tantillũ deflectere: sic etiã addere vel minuere, in allegato superiũ loco, ita intelligi debet, ut ad nutum Dei & Legislatorum eius in terris, etiã alia præcepta tradi possint hominibus servanda. Proverb. vero 30. 6. apertẽ Sapiens loquitur

loquitur de omni verbo tam scripto,quàm non scripto. Et deniquè Apocal. 22. versibus citatis, solùm vult Ioannes ne depravetur Apocalypsis, vel additione eorum, quæ sua non sunt, vel truncatione eorum quæ sua sunt. Alium autem sermonem divinum extra Apocalypsim, sive scriptus ille sit, sive non sit, integerrimè admittit. Quamobrem audiendi non sunt Sectarii: sed habendi tamquàm Ethnici & Publicani, dùm traditiones & verbum non scriptũ explodi volunt, quod ipsemet S. Paulus 2. ad Theff. 2. 15. ut suprà vidimus, impensè commendat. *Tenete traditiones.* Nequè Catholici arguendi sunt, quod illas sacræ Scripturæ adjungi velint, tamquàm ejusdem auctoritatis. Neque in hoc præceptis Deut. & Apocalyp. & cæteris contraverunt; quinimmo omnes contrarium docentes, diminutione eorum, quæ teneri deberent, in illa præcepta peccant.

MOTIVVM XXVII.

Quod Ecclesia Romana è Decalogo secundum præceptum expungat Exod. 20. 4.

L 4

Non

Non facies tibi sculptile, neque omnem similitudinem, quæ est in coelo, &c. *Vt liberiùs sibi sculptilia & similitudines fabricet, quas indebito cultu populo adorandas obtrudat. Gloriam Creatoris creaturis impertiatur, Deo reclamante Isaia 42.8. Gloriam meam alteri non dabo, & laudem meam sculptilibus. Quod tam frequentes in templis & extrà, Imagines adorandæ proponantur, ut rectè possit inferri, quod Romana Religio sit imaginaria & picta.*

R E S P O N D E T V R.

Imaginum sacrarum usum Deo, Scripturis, antiquitate, ratione, imò & necessitate annuentibus approbari.

R Omanam Ecclesiam verè Catholicam & Apostolicam, secundùm præceptum è Decalogo expungere, mera impostura est. Gloriam Dei alteri dare, & laudē eius sculptilibus calūnia est eorum, qui sub Calvinì vexillo militantes, antiqui serpentis spiritu aguntur. Veri imitatores
Judæorum

Judæorum & Mahumetanorum, in illud perversitatis & maliciæ culmen adacti sunt, ut quod pudor saltèm impedire debuisset, nos arguant de peccato omnium maximo, quale est Idolorum servitus. Verumtamen, ut & malèsanis fiat satis, ad Catholicam doctrinam solidandam nonnulla præmitto. Importat imprimis nomen idoli quid falsum, fictitium & inane, ubi id quod adoratur, nullam habet in se dignitatem, honori & reverentiæ quæ exhibetur, correspondentem. Illud videre est, cùm Judæi Deuteron. 32. 17. *Immolantes demoniis & non Deo; diis quos ignorabant, prævaricati sunt.* Adorât Catholici Deum Vnum & Trinum, quem adorandum, nedùm lumen Evangelicum, sed & naturæ docet, cultu patriæ illi soli debito. Ac proindè mendacium famosissimum est, nos esse de genere eorum, qui *mutaverunt gloriam Dei in similitudinem vituli comedentis fœnum.* Ps. 105. 20. Sanctos cultu longè diverso prosequimur; debito nimirum propter heroicas virtutes, & singularem vitæ puritatem, quem Dulciæ cultum dicimus. Et hæc cultuum diversitas evidenter colli-

L 5 gitur,

gitur, tùm ex pluribus locis, tùm ex illo 1. Paralip. 29. 20. *Inclinaverunt se & adoraverunt Deum, & deindè Regem.* Nequè enim eo modo quo Deum, ipsum Regem adorârunt; sed longè inferiori, utpotè quem *deindè* adoraverint. Sic & nos primò Deũ, deindè Sanctos veneramur, quibus ipse magna & pretiosa donaverit promissa, ut consortes divinæ naturæ facti, velût *amici Dei nimis honorificati sunt, & nimis confortatus principatus eorum.* Psal. 138. 17. Propter eminentissimam dignitatem, quâ omnem puram creaturam antecessit mater Viventis Dei, superabundans gratiâ & prærogativis, perindè ut omnes generationes meritò ipsam proclamant Beatam, non ordinario cultu Dulciæ, sed Hyperduliæ eam prosequimur, ut Reginam Sanctorum omnium. Hæc de prototypis: ad Imagines modò descendamus, ob quarum venerationem, ariolandi peccatum Catholici Sectariorum iudicio incurrunt. Hîc animadvertendum est, bino nos ab illis iaculo peti: quod Imagines aut sculptile faciamus contrà Dei prohibitionem: Exodi 20. 4. *Non facies tibi sculptile, nequè*

nequè omnem similitudinem. Secundò quod ea adoremus renitente etiàm præcepto: *Non adorabis ea nequè coles.* Et quia utrumque nos facere arbitrantur, exultant sicùt victores captâ prædâ. Verumtamen ipsorum tela facili negotio retundemus. Nequè enim Imaginibus utimur, ut Deos alienos colamus in illis: hoc quippè idololatrare est. Sed ut Deum verum cultu debito, Sanctos quoquè suo afficiamus honore. In quem finem licitè & debitè Imagines fieri, Deum ipsum habemus authorem, ubi in paradiso ad auram post meridiem deambulans Protoparentibus nostris, qui remordente conscientia se à facie ejus absconderant, apparuit Gen. 3. 8. Item Gen. 28. 12. Jacob vidit scalam, *Angelos quoquè Dei ascendentes & descendentes per eam, & Dominum innixum scala dicentem sibi &c.* & Exodi 3. 2. & seq. *Apparuit Moyfi Dominus in flammâ ignis de medio rubi &c.* Daniel quoquè vidit Antiquum dierum, sedentem in throno: Danielis 7. 9. Et hæc Sacrae Scripturae loca, præter innumera alia. tum veteris, tum novi Testamenti, quæ brevitatis causâ omitto

mitto, sufficiant. Quæ omnia in proprio & litterali sensu de Deo intelligi nequeunt, absquè gravissimæ blasphemix notâ, nisi in formâ aliquâ corporeâ, humanâ videlicèt, quæ magis congrua videtur, sese Patribus videndum exhibuerit. Non ignoro quidèm duas Authorũ de hâc re esse sententias, & utramque probabilem ob eximiam Authorum gravitatem & rationum efficaciam, quæ utrimquè proponuntur. Prima est Theodoretĩ quæst. 5. in Exod. Justinĩ Martyris, Tertulliani, Hilarii, Ambrosii & Chrysostomi, qui intrepidè asseverant ipsam personam Filii Dei in præfatis visionibus apparuisse. Probant ex modo loquendi: dixit enim Moyse, *Ego sum Deus Abraham, Deus Isaac, & Deus Iacob.* Exod. 3. 6. & infrà v. 14. *Ego sum qui sum.* Quæ verba solus Deus proferre possit. Idẽ sentiendum esse de cæteris. Contrariam tamen sententiam amplexi sunt Dionys. Areop. cap. 4. de Eccles. Hierarch. Hieron. in c. 3. ad Galatas. Gregor. in præfat. Comment. in Job, & pleriquè alii, dùm asserunt eundem per Angelos suos apparuisse. Quibus favet sacer textus in Act. Apost.

Apostol. 7. 53. dicente Stephano Judæis,
Accepistis legem in dispositione Angelorum.
 August. autem quæst. 3. in Exodum, hanc
 quæstionem proponit, sed indecisam re-
 liquit. Quidquid sit, siue prima ex his opi-
 nionibus sit vera, siue secunda, ex Sacris
 Literis certum & exploratum est, Deum
 ipsum siue immediatè per se, siue media-
 tè per Angelum Sanctis illis Patriarchis
 in corporea Imagine apparuisse, & locu-
 tum fuisse: ac proindè habemus ipsum esse
 auctorem Imaginum, & Sacrarum simi-
 litudinum, quas admittit Ecclesia. Id ip-
 sum manifestè probatur: nam Statuaria,
 Graphica & similes artes laudabiles sunt,
 & Deum consequenter habent auctorem:
 quod esse non posset, si earum effectus &
 objecta, Imagines videlicèt & sculptilia
 intrinsecè mala forent, aut jure divino
 prohibita. Et Exodi 31. 2. Dominus ip-
 se testatur quod Beseleel, & socium ejus
 Ooliab impleverit *Spiritu Dei, sapientiâ, &*
intelligentiâ & scientiâ in omni opere, ad ex-
cogitandum quidquid fabrefieri potest ex auro
& argento, & ære, marmore, & gemmis &
diversitate lignorum. Et inter cætera Che-
 rubinos

rubinos' plures in tabernaculo & superar-
cam efformari curavit, & alias plures
imagines Exodi 25. 18. & seq. Et num. 21.
9. Serpentem æneum. Duos alios Cheru-
bim de lignis oliuarū 3. Reg. 6. 23. Lique-
fit igitur ex his omnibus tantum abesse,
quod Deus prohibuerit absolutè sculptilia
fieri, quin ea ipse fieri iusserit, & fecerit.
Quoad secundum difficultatis punctum,
in quo disputationis nodus versatur, res-
pondendum est similiter, non solum non
esse intrinsecè malum, vel in lege prohibi-
tum similitudines Dei & Sanctorum co-
lere ac venerari: sed omninò licitum, à
Deo permissum, sanctum & laudabile,
Christi fidelibus mirum in modum utile,
nam Genes. 18. 2. apparuit Abrahamo
Dominus: *Cùmq; elevasset oculos, apparue-
runt ei tres viri, stantes propè eum: quos cùm
vidisset, cucurrit in occursum eorum de ostio
tabernaculi sui, & adoravit in terram.* Om-
nes communiter Doctores & Sancti Pa-
tres asserunt hoc loco, eum vidisse, & re-
velatum sibi fuisse Sanctissimæ Trinitatis
mysterium: & adorasse, non utique ter-
ram ipsam, quæ indigna prorsus venera-
tione

tione est : sed ipsum Deum in tribus illis
 figuratum : quandoquidē ille modus
 adorandi , qui fit prostratione corporis in
 terram , latriæ cultum redolet : non enim
 alius est modus magis humilis , submissio-
 nem & reverentiam præstandi Deo. Ità
 August. lib. 2. de Trinit. cap. 11. Et eod.
 lib. cap. ult. ex visione Antiqui dierum se-
 dentis in throno, & regnum Filio hominis,
 hoc est Christo tradentis, asserit & probat
 personam Patris æterni, tunc Danieli in
 formâ humanâ apparuisse. Et re verâ in-
 credibile est, & ab omni prorsus humanâ
 & divinâ ratione alienum , tantos ac tam
 pios viros ad hujusmodi conspectum non
 exhibuisse Deo debitum honorem, cultu
 tam interno, quàm externo latriæ. De
 Abraham apertissimum est , quod pronus
 in terram adoravit, ut colligere est ex illis
 verbis, *Domine si inveni gratiam in oculis*
tuis, &c. Gen. 18. 3. A Moyse expressis-
 simè etiàm adorari Deus voluit, Exod. 3.
 5. jubens nè accederet, donec calceamen-
 ta de pedibus solvisset, eo quod locus in
 quo stabat Sanctus erat. Et quid, quæso,
 hoc sibi aliud volebat, quod Moyfes faci-
 em

em suam abscondebatur, non audens aspice-
 re contrà Dominum, nisi recognitionem
 & protestationem æterni numinis & Di-
 vinæ Majestatis, quàm in illâ imagine ve-
 nerabatur. Jussit etiàm Deus Moyfi Nu-
 mer. 21. 8. exaltare serpentem æneum
 in deserto, ad quem sanitatis recuperan-
 dæ causâ ægri confugerent: non quidè-
 m simplici tantùm intuitu, sed reverenter
 & cum fiduciâ in Deum. Serpens autem
 ille fuit typus, & figura Christi, qui exal-
 tandus erat in Cruce, in humani generis
 salutem, ut ipsa veritas testatur Joan. 3.
 14. Nàm in fide J E S U C H R I S T I ventu-
 ri, tunc temporis Judæi sanabantur: atquè
 adeò tunc verissimè Imaginem illam co-
 luerunt. Quàm etiàm si postmodùm Rex
 Ezechias confringi jussit, non id fuit
 quod Imaginum usus malus esset, sed ob
 abusum populi idololatrantis. Cherubim
 collocati fuerunt in Sancto Sanctorum,
 loco templi honoratissimo ac sacratissimo.
 Vndè, quemadmodùm Deus mandavit
 arcam adorari Psal. 98. 5. *Adorate scabel-
 lum pedum ejus, quoniam Sanctum est,* & Ps.
 131. 7. *Adorabimus in loco, ubi steterunt pe-
 des ejus*

des ejus. Cùm non pari ratione illi Cherubim adorari poterant? Nequè enim majorem sanctitatem aut dignitatem lignum ipsius arcæ, quàm figuræ Cherubim, super quas Dominus sedebat, continebant. Nec obstat, si dicas in textu Hæbreo non haberi, *Adorate scabellum*, sed, *Adorate ante scabellum pedum ejus*: cùm idem prorsus sit genua flectere antè Regem, & venerari Regem, ut patet ex illo 3. Reg. 19. 18. quandò Dominus dixit Eliæ, *Derelinquam mihi in Israel septem millia virorum, quorum genua non sunt incurvata antè Baal*, id est, qui non adoraverunt Baal: & Apoc. 22. 8. *Cecidi ut adorarem antè pedes Angeli.* Hæc ex sacris Litteris sufficiant, quibus Sanctarum Imaginum cultus astruatur. Nunc ex usu communi Ecclesiæ, quæ à primordio Religionis Catholicæ, eum semper intactū servavit. Certum enim est, Imagines huc usquè in magnâ veneratione fuisse: usum tamen earum parciolem & moderatorem fuisse initio nascentis Ecclesiæ fateor. Nec hoc sine singulari divinæ providentiæ instinctu, nè vel Judæorum populus in idololatriam proclivis, & noviter

M

conversus

conversus tanti facinoris discrimen subiret; aut Gentes ex paganismo ad Fidem vix perductæ, in idem barathrum dilaberentur: ita volente Deo, ut inclinatum in extrema populorum naturam, objecto in contrarium pondere ad virtutis medium revocaret. Jàm verò orthodoxâ Fide magis stabilitâ, hoc periculo cessante, frequentior earum usus est, jam inde à temporibus Apostolorum paulatim inductus, teste Joanne Damasceno lib. 4. c. 17. ubi docet eum haberi ex traditione Apostolicâ. Damasus Papa in vitâ Silvestri, argenteas Imagines duas Christi Domini in sellâ sedentis, Constantinum Ecclesiæ Lateranensi obtulisse, & Christo Servatori posuisse perhibet. Tertullian. lib. de pudicitia, in sacris calicibus Christum celari, ut pastorem congregantem oves erroneas consuevisse scribit. Eusebius lib. 2. Eccles. Hist. & Damascenus lib. 4. c. 17. Abagaro Edeffenorum Regi Christum ipsum faciei suę Imaginem misisse asserunt. Linteo illo, in quo Christus Crucem suam bajulans, offerente Veronicâ, faciem suam sanguine respersam expressit, Tiberium Cæsarem sanitati

sanitati pristinae restitutum fuisse author est Suetonius, & ob id Christo fuisse decretos honores divinos. Constans etiam per Ecclesiam fama est, Lucam Evangelistam Divam Virginem depinxisse, cujus meminit jam ante mille annos initio suorum collectaneorum Theodorus Lector. Concil. quoque Antiochenum, celebratum tempore Apostolorum anno 57. Romanum sub Stephano III. anno 768. Nicaenum 2. anno 787. Constantinopolitanum 4. anno 869. & plura sequentia sacrarum Imaginum usum approbaverunt, quem cetum annis Imperatores Orientis tyrannice oppugnaverunt. Attamen inter tot saeculi naufragia, semper remansit incolumis, & etiam fumantibus Martyrum sanguine impiorum Judicum tribunalibus, per eos quos Deus dedit Ecclesiae suae *Doctores & Pastores* strenue vindicatus. Unde si hoc idololatrare est, jam olim in ipsis suis initiis Fides Catholica, infidelitatis tenebris obvoluta concidisset, & omni assertore destituta vixdum nata interiisset. Si ita est, licebit profecto ipsum Deum querula voce interpellare, *Vbi sunt misericordia tua an-*

*tique Domine, quas juraſti in veritate tuâ Petro, Apoſtoliſ, & Eccleſiæ ſponſæ tuæ, Porta Inferi non prævalebunt adverſus eam. Vbi à quindecim hūcuſquè ſæculis Paſtores & Doctores latuerunt, qui ovile Chriſti tui ad internecionem, infami tanti facinoris pulvere reſpergi paſſi ſunt. Permiſeritne Nicena Synodus 2. in Spiritu Sancto te vocante congregata, Conſtantinopolitana, & tres Lateranenſes inſequentes approbari Sanctarum Imaginum cultum, ſi Idololatria eſt? Siccinè Eccleſiæ capita de Paſtoribus in lupos rapaces converſi fuerint, ut devorent electiſſimum gregem tuum? Poterantne Inferni portæ ab Eccleſiâ ſpolia magis opima reportare, & glorioſius prævalere, ſi animæ fidelium ex tunc inductæ ſunt ad adoranda idola in contemptum tui & gloriæ tuæ? Siccinè ex inſallibili facta ſit fallibilis promiſſio tua, *Eccè ego vobiscum ſum omnibus diebus uſquè ad conſummationem ſæculi.* Math. ult. c. v. ult. Nequè enim id ſolis Apoſtoliſ pollicitus es, utpotè qui victuri non erant uſquè ad conſummationem ſæculi: ſed eorum quoquè ſucceſſoribus, quibus regimen Eccleſiæ*

fię duraturę in finem mundi, committeretur. Cũ non ex illis fortem aliquem athletam fuscitasti, qui tã graves errores, ac perniciosissimam idolorum servitutem, si ita sit, dissiparet, & confunderet? Itane augustissimum illud Ecclesię Romanę decus ac luminare magnum Augustinus, quẽ & ipsi Sectarii suspiciunt, Hieronymus, Ambrosius, Thomas Aquinas, cæteri que latini Patres, Magnus Chrysostomus, Basilus, Nazianzenus, uterque Cyrillus, & plerique alii Patres Gręci, quorum doctrinã fulget Ecclesia, ut Sole Luna, tã stolidè ac barbarè ignorantie succubuissent? Absit: Abundè Ecclesię sue Deus Optim. Max. providit, nè in promissis suis infidelis inveniretur. Commentum tuum fuit, Generatio prava & exasperans, popule insipiens, qui Heresiarcharum & Patrum tuorum muscipulis caperis, & palpabilioribus errorum tenebris, quàm Ægyptię fuerint, absorberis. Verum, ut & hanc Catholicam veritatem ex ipso lumine nature discas, ratione naturali demonstrare contendo, non solùm Imagines admittendas esse: sed nequẽ verum latrię cultum erga Deum, &

Dulie erga Sanctos absquè illis subsistere posse. Presupponam pauca ex ipsis primis Philosophiæ principiis deducta, de quibus nullus unquam Philosophorum dubitavit. In quâlibet creaturâ rationali esse intellectum & voluntatem, sicuti in quolibet habente sensum est appetitus animalis. Ita D. Thom. 1. p. q. 19. art. 1. Et sicut sensus informatur similitudine rei sensibilis, oportet etiâ intellectum similitudine rei intelligibilis actuari. Visio enim non fit in actu, nisi per hoc quod res visa uniatur videnti; non quidè secundum suam essentiam, & prout in se est, exempli gratiâ, lapis; sed solum per suam similitudinem. Similiter res intelligibiles, ut cognoscantur ab intellectu, cum uniri non possint per suam naturam intimè, per similitudinem ipsi debent copulari. Vndè Aug. Tomo 3. lib. 9. de Trinit. c. 11. circa medium: *Cum Deum, inquit, novimus, fit aliqua similitudo Dei in nobis.* Et S. Thom. 1. p. q. 12. art. 2. ad 2. ait Augustinum loqui de cognitione Dei in viâ. Quamobrem, cum actus adorationis formaliter consistat in exhibitione debiti honoris & reverentiæ, in personam quam

quàm veneramur, ac tritiffimum inter Philosophos axioma fit, nihil effe volitum, quin præcognitum, id eft, priusquàm voluntas ad eliciendum aliquem actum moveatur, debet ejus objectum ab intellectu effe cognitum, & exindè voluntati profequendum proponi. Intellectus verò creatus intelligere nequeat fine Imagine, per ipsum actum intelligendi productâ (quàm communiter Philofophi appellant speciem expreffam, five verbum mentis) debet voluntas in objectum fuum ferri sub eâ ratione, quâ ab intellectu proponitur. Hâc doctrinâ utuntur communiter Theologi, & potiffimum Angelicus Doctor 1. p. q. 27. art. 2. & q. 34. art. 2. idem 2. ad probandam, vel (ut melius dicam) explicandam generationem Verbi in Divinis. Nàm conceptio intellectus, ut inquit S. Tho. in corp. art. 2. eft fimilitudo rei intellectæ in eâdem naturâ existente. Vndè cum in Deo intelligere & effe idem fint, fequitur, quod proceffio Verbi in Divinis dicatur propriè generatio, quæ paffim à Philofophis definitur effe Origo viventis à vivente, in fimilitudinem naturæ,

M 4 & quod

& quod ipsum Verbum procedens, verè sit æterni Patris Filius. Ac propterea S, Paulus ad Hebr. 1.3. Ipsum dicit Figuram substantiæ. Et 2. ad Corinth. 4. 4. Imaginem Dei. Itaque cùm voluntas tendere non possit in Deum per actum amoris si-
ve adorationis, aut cujusvis alterius virtutis, nisi infinita & incommutabilis Dei excellentia priùs ab intellectu cognita, per Imaginem & similitudinem ipsi inhærentem, & sub eâ ratione proponatur voluntati amanda & adoranda; evidens est adorari in hac vitâ Deum à nobis non posse, nisi mediâ Imagine, & specie ipsius representatiâ. Quæ quidèm propter se non adoratur, ut res quædam est: sed ut quo, ut dicunt Philosophi, & Theologi: nequè enim terminus ultimus actus adorationis est, quod competit soli prototypo, si-
ve rei, quàm Imago refert: ità ut terminus adorationis non dividatur in duos, sed unus sit completus, constans ex prototypo qui adoratur, & similitudine, quæ ratio adorandi est. Et eo modo intelligenda est propositio Philosophi, dùm asserit eundem esse motum in Imaginem & rem, re-
præ-

præsentatam. Igitur cum voluntas ferri non possit in rem aliquam, nisi quatenus ab intellectu per speciem repræsentatur, cum non licebit Deum & Sanctos venerari mediâ Imagine aliquâ corporeâ; cum utraqûe mera creatura sit, illa intellectua-
lis, hæc corporea sive materialis. Adeo ut si incurratur peccatum idololatriæ in priori, etiâ incurrere debeat in posteriori, & paritate rationis utrobiquè militante, utraqûe interdici. Quippè non minùs illi idololatræ habendi fuerunt, qui vitulos argenteos & aureos, quàm qui ferreos & ligneos adorârunt. Hec quæ diximus, proportionè servatâ, pariter etiâ circa Sanctos & earum Imagines intelligenda sunt. Nequè propterea secundum Decalogi præceptum transgredimur: quoniam non prohibet sculptilia & similitudines omnes, sed eas dumtaxat, quibus aliquid divinitatis falsò inesse creditur: ut contingit in his quæ Deos alienos repræsentant, ut puta, Jovis, Martis, & ejus farinæ alios, qui tamquàm veri Dii ab insanienti Gentilitate invocati sunt. Quod multis rationibus, iisquæ certissimis & evidentissimis ex ipso

contextu probari potest. Primò ubi dicitur, *Non habebis deos alienos coram me, Non facies tibi sculptile, nequè omnem similitudinem, quæ est in cælo de super, & quæ in terrâ deorsum, nec eorum quæ sunt in aquis sub terrâ. Non adorabis ea, nequè coles, &c.* Quasi dicat: Non habebis deos alienos: Nequè facies tibi sculptile, nequè omnem similitudinem, Deorum scilicèt alienorum, Nequè adorabis ea, nequè coles tamquàm deos alienos. Pensanda est enim & introspectiunda connexio antecedentiũ & consequentium, utpotè quæ se mutuò restringant. Sic ut illo præcepto Decalogi non prohibeatur omnium prorsùs Imaginum usus: sed illarum tantùm quæ falsorum deorum simulachra sint. Alioquin enim non unicum præceptum foret, sed plura: atq; adeò non decem, sed undecim vel duodecim, contrà communem omnium sensum & expressam Scripturarum mentem. Exodi 34. 28. *Scriptis in tabulis verba fæderis decem.* Et Deuter. 4. 13. *Et decem verba, quæ scripsit in tabulis lapideis.* Probari etiàm potest, non omnem Imaginem illo præcepto prohiberi, ex sacris Litte-

ris:

ris: quæ variis in locis illius mentionem facientes loquuntur tantum de Diis falsis. Imprimis Exod. 34. 17. *Deos conflatile non facies tibi*, & alibi passim. Deindè cum hæc præcepta ita sint juris divini, ut etiàm sint naturalis, ut ex inductione quilibet colligere potest: certum autem sit jure naturæ usum sacrarum Imaginum vetitum non esse: quandoquidè, ut suprà ostendimus, sine Imaginibus, saltèm intellectuales, creatura rationalis in viâ Deum adorare non possit, aut Sanctos cultu debito venerari: consequens est non omnem illo præcepto similitudinem interdici. Quin potius humanæ naturæ congruentissimum esse, etiàm corporeis Imaginibus uti, quibus incitetur tum in Dei, tum Sanctorum venerationem quos repræsentant. Quo respectu ablato, tamquàm indignæ omni honore à Catholicis respuuntur, ut cœtera quælibet ligna, saxa & hujusmodi. Ac proindè patet, quod Religio Catholica & Apostolica, imaginaria dicenda non sit, eo quod frequentiam Imaginum tam in Templis, quàm extrà admittat, quæ jam à multis sæculis in Ecclesiâ apprimè commendata

mendata fuit. Et circà Imaginem crucis Chrysost. homil. 55. in Matth. hortatur, ut & in penetralibus & in parietibus, & in fenestris, & in fronte quoquè, ac mente, magno studio crucem inferamus.

M O T I V V M X X V I I I.

Quod Sanctorum festivitatis celebrandis, certi per annum dies ab Ecclesiâ designentur: qui cum omnibus sufficere non possint (tantus enim Sanctorum numerus est) unus generali omnium solemnitati dies deputetur. Hymnis & laudibus eorum libri precarii repleantur. Quod tamquam Divina Majestatis coadjutores Angeli, & utriusque sexus homines constituentur: atque adeò gloria Dei creaturis detur. Quod templa & altaria Sanctis maxime qualificatis dedificentur & consecrentur.

R E S P O N D E T V R.

Per Sanctorum cultum, & invocationem, quæ hic ex Sacris Literis fulciuntur, Deum maxime honorari.

ITà pergit ludere Momus noster, in Deum blasphemus & Sanctos, quasi Eccle-

Ecclesia Romana ità Sanctis dies, aras, templa decernat, ut Deum ipsum secludat. Hoc ipsi nempè sufficere videbatur ordinario Sectariorum more, quod populo illudat & imponat. Dies soli Deo, cujus ordinatione perseverat, principaliter sacer est; Sanctis secundariò, quorum memoria apud Deum in benedictione est; ità ut totum in ipsum semper redundet. Satis hoc videre est ex ipsis precibus, quas Ecclesia quolibèt festo die recitandas indicit, quæ ferè omnes in Deum directè tendunt, pauculis exceptis, quibus beneficia Sanctis à Deo præstita memorantur, & eorum intercessio postulatur. Templa Deo consecrantur, eique soli per se primò, propter immensas gratiarum prærogativas Sanctis collatas: quibus proindè longè inferiori modo deputantur, honoris quidè causâ; attamen ut eò redeat, undè omnia. Jacob pòst admirabilem illam visionem in Bethel. Genes. 28. *Erexit lapidem in titulum domus Dei.* Iosue 4. Filii Israel in gratiarum actionem duodecim lapides in monumentum æternum, in ipso Jordane & Galgalis posuerunt. Esther 9. 26.

9. 26. Judæi diem decimum quartum & decimum quintum mensis Adar, in solemnitatem Phurim, seu sortium, pro recepto à Deo per Esther beneficio dedicârunt : & hoc fine ullâ idololatriæ notâ. Quidni Ecclesia dies, templa, altaria, titulos, in memoriam beneficiorum Sanctis hominibus collatorum Deo consecret, absquè eo quod gloriam divinam alteri tribuat? Profectò perantiqua hæc, & à multis sæculis observata consuetudo est in Ecclesiâ Dei, quàm longâ temporum serie deductâ Sanctorum Patrum testimoniis possem astruere : at unicum S. Augustini sufficiet ferm. 15. de Sanctis, tom. 10. dùm Cathedræ S. Petri mentionem faciens: *Institutio*, inquit, *solemnitatis hodiernæ à Senioribus nostris Cathedræ nomen accepit*. Quod verò Sanctorum nominibus indigetentur. Hoc Templum Petri : Illud Altare Pauli, &c. ad distinctionem fit: cum enim omnia tùm Tēpla, tùm Altaria, tùm dies Deo dedicati sint, per hoc à se mutuo non distinguuntur, sicut per minùs principalem dedicationem, quæ multiplex est. Et si Sanctorum memoriam celebrare hoc modo,

modo, sit gloriam Dei alteri dare, cur Eccles. à cap. 44. usquè ad finem libri, in Sanctorum veteris Testamenti laudibus decantandis tam seriò occupatur? Cùr Paulus ad Heb. 1. tam fusè in eorumdem Patrum encomia prorumpit ex professo? Cùr Regius Vates inter magna Dei opera, quæ extollit, precesque quas fundit, Ps. 138. admiscet etiàm Sanctorum laudes, quasi admirabundus: *Mihi autem nimis honorificati sunt amici tui Deus, nimis confortatus est principatus eorum. Dinumerabo eos & super arenam, &c.* Et certè si is qui alteri potum dederit calicem aquæ in nomine Christi, quâ Christi est, amplam mercedem recipiet, ut testatur Veritas Marc. 9. 41. quantò majorem de jure non recipiet, qui pro Christi nomine intimos ejus amicos ac familiares, Regni Cælestis confortes, honore, laude, gloriâ, hymnis, & canticis condecorat, & prosequitur? cùm illa potissimùm & principaliter in solum Deum cadant, ut Math. 25. 40. Christus asseverat. *Quamdiu fecistis uni ex his fratribus meis minimis, mihi fecistis, & Joa. 12. 27. Vbi ego sum, illic & minister meus erit, & si quis*

quis mihi ministraverit, honorificabit eum Pater meus. Tantum abest ut propter honorem, quem deferimus Sanctis, vel tantillum divinę gratię detrahatur. Israëlite 1. Reg. 7. 8. Samuelem hisce verbis interpellant, *Nè cesses pro nobis clamare ad Dominum Deum nostrum, ut salvet nos de manu Philistinorum, & Job. ult. 8. Ite ad servum meum Iob, &c. Dominus quoque conversus est ad pœnitentiam Iob, cùm oraret ille pro amicis suis, & Rom. 15. 30. Obsecro ergò vos fratres &c. ut adjuvetis me in orationibus pro me ad Deum.* Ex his & pluribus aliis Scripturæ locis constat, licitè vivos invocari, ut pro aliis apud Deum intercedant, & hoc absquē injuriā honoris Divini: cùm similiter non licuerit Sanctos, qui in Cælis sunt velut Angeli Dei, in necessitatibus nostris, tamquàm mediatores inter nos & Deum interpellare? S. Hier. contra Vigilant. tom. 2. cap. 3. *Si Apostoli & Martyres, inquit, adhuc in corpore constituti possunt orare pro cæteris, quando pro se adhuc debent esse solliciti: quanto magis post coronas, victorias & triumphos? Vnus homo Moyses sexcentis millibus armatorum impetrat à Deo veniam: & Stephanus*

phanus imitator Domini sui, & primus martyr in Christo, pro persecutoribus veniam deprecatur: & postquam cum Christo esse cœperint, minùs valebunt? 2. Machab. ult. 14. Onias Judæ Machabæo apparens, de Jeremiâ Prophetâ tunc etiâ apparente testatur, *Hic est, qui multum orat pro populo, & universâ Sanctâ Civitate Ieremias Propheta Dei.* Et hanc orthodoxam veritatem non obscure innuit Evangelistarum aquila Apocalyp. 5. 8. *Et cum aperuisset librum, quatuor animalia, & viginti quatuor seniores ceciderunt corâm Agno, habentes singuli cytharas & phialas aureas, plenas odoramentorum, quæ sunt orationes Sanctorum.* Vbi luce meridianâ clariùs exprimit, quod viginti quatuor seniores, qui Beatorum in cœlis regnantium, & maximè eorum, qui eminentiori sanctitate fulgent, numerum designant, antè Thronum Dei & Agni Sanctorum in terrâ degentium orationes offerunt, & pro nobis intercedunt. Quid igitur prohibet quò minùs nos priùs preces nostras ipsis offeramus; ut illi exindè Deo? Si enim ipsi laudabiliter pro nobis intercedunt, etiâ nos eorum intercessionem laudabiliter expo-

N stula:

stulamus; quippè quod honestum est, honestè petitur. Quandoquidè omnem vim mediandi, seu intercedendi fundamentaliter à Christi meritis obtinuerint: ità ut Christi honor eâ ratione non minuat, sed potiùs dilatetur. Nàm excellentioris est glorię, sic hominum mediatorem esse, ut alios quoquè suis meritis mediatores efficiat. Hinc non abs re Propheta David, postquàm ad cœlestem Hierusalem anagogicis homines suspiriis invitârat, ad supernos cives conversus, pro militantis Ecclesię necessitatibus eorum intercessionem efflagitat, his verbis Ps. 121.6. *Rogate quæ ad pacem sunt Hierusalem.* Et ver. 7. introducit respondentes: *Fiat pax in virtute tuâ, & abundantia in turribus tuis.* Et tantò libentiùs intercessioni isti incumbunt, & se pro militantis Ecclesię pace orare protestantur, quod hoc faciant *propter fratres suos & proximos suos* ex ardenti charitatis affectu. Et hanc hujus Psalmi explicationem amplectitur glossa ordinaria ibidem.

Objiciet forsitan Minister Delphicus, cum magistro suo Calvino, quærens latebras & effugium, Sanctos cœlestis gaudiî deliciis

deliciis ita esse immerfos, ut aures non habeant, quæ ad nostras orationes porrigantur, & oculos adeò perspicaces, qui calamitates nostras intueantur.

Resp. Forſitan verum eſſe poſſet, ſi oculis & auribus tam carnalibus audirent & viderent, prout carnali mente & intellectu hæc Calvinus cum ſuis ſequacibus percipit. Sed quid? *Animalis homo non percipit ea quæ ſunt ſpiritus Dei.* 1. Corinth. 2. 14. Variis modis & tribus potiffimum orationes noſtræ à Beatis exaudiuntur.

Primò Angelis revelantibus & deferentibus. Angelos enim preces noſtras audire, & pro nobis interdum orare, in confeſſo eſt apud omnes: & patet ex illo Tobia 12. 12. *Quando orabas cum lachrymis &c. Ego obtuli orationem tuam Domino.* Apocal. 8. 3. *Alius Angelus venit, & ſtetit ante Altare, habens thuribulum aureum, & data ſunt illi incenſa multa, ut daret de orationibus Sanctorum omnium ſuper altare aureum, quod eſt ante thronum Dei: & aſcendit fumus incenſorum de orationibus Sanctorum de manu Angelorum coràm Deo.* Quid clariùs? Item Luc. 15. 7. *Gaudium erit in Cælo ſuper uno peccatore pœ-*

nitentiam agente, &c. Et verf. 10. Gaudium erit coràm Angelis Dei super uno peccatore pœnitentiã agente. In Cœlum igitur coràm Angelis peccatorum pœnitentium notitia pervenit: quì enim gauderent, nisi cognoscerent? Intercedente itaque strictissimâ inter coelestis Regni concives familiaritate, ita permittente Deo, revelantur illis per Angelos ea quæ in terris pro suo cuiusquẽ honore geruntur, & maximè Fidelium vota, quibus eorum patrocinia expectuntur.

Secundò, Preces nostras cognoscunt Sancti in Verbo, velût in speculo: ubi quęcumquẽ ad beatitudinis perfectionẽ pertinent, clarissimè intuentur. Nequẽ hoc mirum est, cùm non rarò Sanctis adhuc in terrâ degentibus arcana pandantur, & profunda humanorum cordium manifestentur. 1. Reg. 9. 19. *Respondit Samuel Sauli dicens: Omnia quæ sunt in corde tuo indicabo tibi.* Sic 4. Reg. 6. 8. Eliseus arcana Regis Syriæ consilia scivit, longo tamèn sejunctus intervallo. Et 4. Reg. 5. 26. idem Propheta cognovit quęcumq; inter Giezi & Naaman Syrum absentes gesta fuerant.

Sic

Sic Act. 5. 3. & 8. Petrus Apostolus occultam Ananię & Saphyrę fraudem agnovit. Vndè si qui inter mortales occulta mystèria ex revelatione resciant, cùr non potiori ratione Beatorum animę, quę continuâ Verbi visione fruuntur, desideria nostra quantumvis diffita & recondita introspiciant? Isti namquè de torrente voluptatis æternę superaffluenter potantur: illi in terris, si quid simile interdùm consequantur, guttatim percipiunt. Cujus rei ratio à priori hæc designari potest, quod Sancti in illo foelicitatis supremæ gradu, non jam secundùm esse naturale: sed suprâ naturam agunt, & vivunt: ideòque revelationes, quę ex singulari favore & gratiâ in viâ quibusdam conceduntur, intellectui Beato sunt quasi ordinarię & connaturales. Nàm quemadmodùm Reges & Principes famulis suis maximè sibi familiaribus facile secretiora sua consilia communicant, sic Clementissimus Deus illis, qui jam non in ænigmate, sed facie ad facièm, inextinguibile illud lumen contemplantur, pleraque abscondita pandit.

Tertiò. Deniquè orationes nostras au-

dire possunt per applicationem cōceptus, eo modo quo Angeli & Animę Beatę sibi invicem colloquuntur : & hoc propter illam quam habent cum divinâ essentiâ unionem, ita ut nullo loci aut temporis obice prepediantur. Non igitur furdīs auribus canimus, quādo Sanctorum patrociniā imploramus.

M O T I V V M X X I X .

Quod non solum res animatas colamus, sed inanimas etiā, velut ligna, ferrum, lintea & alia huiusmodi. Miratur deinde quod de sacrosancto salutiferæ Crucis ligno Ecclesia concinat, Auge piis iustitiā, reisque dona veniā. & in quādam oratione ad Christum : Concede, ut qui Crucem sanctam tuam adorant, à peccatorum suorum vinculis liberentur. Quod Dominicæ Coronæ spinis convertendi corda & ab omni superbiā purgandi vim tribuamus. Quod tanto honore mappam illam afficiamus, in quā Christus ultimum Pascha cum Discipulis manducavit; sicut & Syndonem, in quā exanime ipsius corpus involutum fuit, ut non vereamur dicere, Sancta Mappa, ora pro nobis, Sancta Syndon,

Syndon, ora pronobis. Vndè colligit novum Symbolum à nobis formari: Credo in crucem, in clauos, in spinas, in mappam, in B. Virginem, in S. Petrum, &c. Commotus hoc loco Pauli ad Rom. 10. 14. Quomodò ergò invocabunt, in quem non crediderunt?

R E S P O N D E T V R.

Qualiter Dominicae Passionis instrumenta veneranda sint.

NEcdùm desinit ineptire hic Doctor Delphicus. Prestitisset homuncionem obmutuisse, cum multis ejusdem farinae ranis, quibus jam olim fortissimi veritatis Orthodoxæ assertores ora occluserant. Inculco tamèn iterùm. Adoramus Crucẽ Domini nostri Jesu Christi, & cætera Passionis ejus instrumenta veneramur, utpotè quæ per contactum membrorum ejus sanctificata sunt. Vndè S. Joannes Damascenus lib. 4. c. 12. *Hoc itaque ingentis sanè pretii lignum, ac venerandum, in quo Christus seipsum sacrificii causâ pro nobis obtulit, ut ex sancti corporis & sanguinis contactu sanctifica-*

tum, optimo jure adorari debet, clavique item & indumenta, & lancea, &c. Non quod illa cultu digna sint de se; sed quod honor ille, qui iis ob Christi contactum debetur, in ipsum Redemptorem totaliter cadat. Sic ut non sistatur in ipso ligno, ferro, aut similibus; sed in eum omnia referantur, qui omni cultu & honore dignus est, qui quidquid honoris ac venerationis sacris ejus passionis instrumentis ascribitur, & exhibetur, sibi soli vendicat, conformiter intentioni colentium. Et certè Hemorrhoiſſa Luc. 8. 44. & 46. solam Dominicæ vestis fimbriam summo devotionis ac Fidei affectu tangendo venerata est. Nihilominus ait Christus, *Quis est qui me tangit?* Indicans honorem fimbriæ suæ exhibitum, non in eâ sistere, sed per intentionem mulieris venerabundæ in se redundare. Nos quoque Crucem præ ceteris vel maxime adoramus, non ratione solius contactus; sed quod Christum crucifixum peculiari quâdam ratione referat, quem in eâ adoramus. Et ideò, inquit Angelicus Doctor 3. p. q. 25. art. 4. in corpore, *Etiâ crucem alloquimur & deprecamur, quasi ipsum cruci-*

cruci-

crucifixum. Vndè mirum non est, quod cruci seu crucifixo canat Ecclesia, *O Crux ave spes unica, hoc passionis tempore, Auge piis justitiam, reisq; dona veniam.* Quod autem hîc Crucifixum potius quàm Crucem alloquamur, manifestum est: cùm illi secundùm se. consideratae, augere justitiam, & donare veniam non competat. Nec est novum in Scripturâ sermonem ad res inanimas quasi ad animatas convertere. Isaie 45. 7. *Rorate cœli de super, & nubes pluant Iustum, Aperiatur terra & germinet Salvatorem.* Rorare tamèn, pluere, & germinare Iustum, sive Christum, non magis cœlo, nubibus, aut terræ competit, quàm Cruci augere justitiam, & donare veniam. Æquè enim, imò potius solius Dei est Verbum mittere, quàm condonare peccata. Idem iudicium esto de Spinis, quibus Servator noster coronatus est. Convertendi corda & à superbiâ extricandi vim habent, per eum qui illis redemitus est: cujus Passionem, si jugi meditatione recolamus, nisi planè lapidei simus, ad tantæ humilitatis exemplum facilè à peccatis resurgemus. Saladini indusium in castris circumlatum

ad contemptum hujus vitæ mortalis, humana corda potuit excitare: quidni Corona spinea, quam tulit Dominus gloriæ & majestatis, superbos emolliat? Ille demùm orandi formulæ, quas falsò objicit, Sanctissimum Sudarium, ora pro nobis, Sanctissima Syndon &c. nequè in Ecclesiâ usitatae sunt, nec probabitur unquam esse usurpatas: quamvis enim ea propter Christi contactum in honore habeamus, cùm Christum non repræsentent speciali quodam modo, sicut Crux secundùm communem æstimationem, non ita specialiter honorantur. Nequè propterea novo symbolo opus est, ut hæc in parte Fidem Catholicam stabiliamus, cùm partim in eo includantur, *Credo in Iesum Christum*, crucifixum videlicet, clavatum, spinis coronatum, syndone involutum, sepultum, &c. partim in illo *Sanctorum Communionem*: à quâ recedunt Hæretici, dùm Beatorum preces & merita ita coarctant, ut vix ullam patiantur nobiscum communionem. Nos quidem in Sanctos non credimus, eos tamèn invocamus. Nec obstat ille locus Pauli ad Rom. 10. 14. *Quomodo ergò*
invoca-

invocabunt, in quem non crediderunt. Neque enim Apostolus ibidem agit de omni invocatione: sed de illâ, quæ divini nominis est: & hoc docet ipse contextus, dùm dicitur, *Omnis quicumq; invocaverit nomen Domini salvus erit.* Quomodo, ergo *invocabunt, in quem non crediderunt?* In Deum credidisse oportet, ut invocetur, quod hæc invocatio Fidem divinam præsuponat. De Sanctis autem credidisse sufficit, quod tamquàm amici Dei & intercessores, necessitatibus nostris possint subvenire. Quin & malè cederet inobedientibus Provinciis, nisi creaturæ, in quam non credunt, & alienam opem invocarent.

MOTIVVM XXX.

Quod Ecclesia Romana Gloriosa Virgini Mariæ, non sine blasphemiâ, titulos soli Deo congruos attribuat. Quod in eius officio canat, Ab initio & ante sæcula creata sum, Per me Reges regnant. Maria Mater misericordiæ, liberans nos à peccatis, sanctificans corda. Et quod intolerabilius ipsi videtur, & maximè injurium Deo; quod Psalmos Davi-

Davidicos mutato Dei in B. Virginis nomine, et applicet: non secus ac si Diva Virgo aequalem adeptæ esset cum Christo gratiæ plenitudinem. Sicut illud Ps. 109. 1. quod Dominus Deus sibi soli applicat, Matth. 22. 44. Dixit Dominus Domino meo, sede à dextris meis, ita tribuit B. Virgini: Dixit Dominus Dominiæ meæ, sede à dextris meis, Et Psal. 56. 1. loco Dei pōnit Domina, Miserere mei Domina, miserere mei, quoniam in te confidit anima mea. Quod passim etiā in aliis Psalmis vocetur Regina Cæli, porta Paradisi, fons Vitæ, misericordiæ, gratiæ, salus omnium sperantium in se. Quæ omnia soli Deo competunt.

R E S P O N D E T V R.

*Et Deiparæ Virginis cultus adversus
nugas objectas protegitur.*

Hic Diaconus noster Delphicus, inter maliciam & ignorantiam, velut inter maris procellas fluctuat. *Noluit intelligere, ut benè ageret Psal. 35. 4. Ignoravit ea quæ soli Deo uno sensu competunt, creature in altero laudabiliter tribui. Ut tamen,*

men, si velit, intelligat, tria hæc potissimū
 notet. Primò quod non solūm humanus &
 communis loquendi usus, verūm etiā
 ipsamet sacra Eloquia easdem voces in
 diversâ significatione, frequenter diversis
 rebus in omni proprietate concedant. Ge-
 nes. 1. 31. *Viditq; Deus cuncta quæ fecerat &
 erant valdè bona.* Vbi solūm de bonitate
 naturali & Phycâ propriè sermo est. De
 Saule 1. Reg. 9. 2. *Saul electus & bonus, &
 non erat vir de filiis Israel melior illo.* Hæc
 bonitate terra bona non est, cūm moralis
 sit, de quâ hîc textus: erat tamen terra bo-
 na. Genes. 1. 10. At Marci 10. 18. Ex ipsius
 Incarnatę Sapientię sententiâ, *Nemo bo-
 nus, nisi unus Deus.* Quomodò ergò Saul in
 adolescentiâ suâ bonus? Quomodò cun-
 cta quæ fecerat Deus, erant valdè bona?
 Quomodò terra bona, si bonus est solus
 Deus? Mentiturne Scriptura, aut blasphe-
 mat? absit. Solus Deus bonus est per essen-
 tiam & independenter, bonitate infinitâ
 immensâ & incomprehensibili, quâ nec
 Saul bonus, nec ulla creatura; licet boni-
 tate participatâ boni sint. Secundò, no-
 tandum est, quod tam homines, quàm Sa-
 cræ

cræ Litteræ, sæpissimè tropicè & figuratè loquantur, ut in his 1. ad Cor. 10. 4. *Petra autem erat Christus*. Apocal. 5. 5. *Vicit leo de tribu Iuda, radix David*. Joan. 15. 1. *Ego sum vitis vera & Pater meus agricola est*. Et ibid. 15. 5. *Ego sum vitis, vòs palmites*. Matth. 19. 24. *Facilius est Camelum per foramen acus transire, quàm divitem intrare in regnum cælorum*, & multò plura hujusmodi alibi. Etiàm in communi sermone plerumquè similium usus est. Quæ si omnia, in suo rigore quis intelligi velit, quod verbi gratiâ, Christus assumpserit hypostaticè Petram, Leonem. &c. ab omnibus ut temerarius, imò & stultus respuetur.

Tertiò deniquè advertendum est, quod quandò aliundè constat de mente tropicè loquentis, ad intellectum repugnantem verba torquere, nugari est, & in re gravissimâ histrionum more ludere. Jàm verò, ut ad rem veniamus, omnes Catholicæ veritatis oppugnatores satis apertè novērunt, quod Beatissimam Virginem Mariam, nec Deo, nec Christo ullatenùs æqualem, sed infinitè distantem & inferiorem doceamus & existimemus. Licèt interim
eam,

eam, maternitatis intuitu, omni puræ creaturæ meritò anteponamus. Hoc multòties dictum & repetitum, à variis orthodoxis Scriptoribus inculcatum, & ad hæreticorum, ministrorumque suorum aures delatum. Verùmtamen quasi illius ignari, erranti plebeculæ imponunt, quæ volunt, eamque decipiunt. In scriptis suis & argumentationibus gesticulantur & similes nugas pro seriis opponunt. Profectò si sincerè & fideliter procederent, dùm per hujusmodi encomiorum formulas, Virginem Matrem veneramur, eas ad intentum ab Ecclesiâ sensum interpretarentur, & ad alienum nusquam detorquerent. Quod enim de ipsâ canit Ecclesia, *Ab initio antè secula creata sum*, non existimavit in æternitate Sapientiæ increatæ parem: sed sicùti Christus ut homo dicitur primogenitus creaturarum omnium, quia in ideâ seu conceptu divino ab omni æternitate antè omnes creaturâs fuit prædestinatus: ita Deiparam in eodem conceptu antè omnes puras creaturas ab æterno fuisse præordinatam semper intellexit. Quo sensu omnes homines, & quæcumque

quæ creata sunt, dici possunt æterna, Christus quidè in instanti rationis & nature, omnium primogenitus, & pòst ipsum ratione maternitatis, Maria. Atquæ ita verè *ab initio & antè sæcula creata est. Per me Reges regnant.* Verissimum est hoc & planè congruum Reginæ Coeli elogium. Et primò quidè literaliter omnes Reges & Principes Israel, qui in genealogiâ Salvatoris ab Evangelistis memorantur, per illam regnarunt: ideò enim illis Deus, Regnum & potestatem detulit, quia ex eorum genere Virgo originem ductura erat, ex quâ carnem ipse induere decreverat. Secundò moraliter, in quantum Christi mater & sponsa Spiritus Sancti est, verè & propriè dici potest Regina Coeli & terræ: etsi in gradu longè minori, quàm Christus. Et in hoc consentiunt omnes Sancti Patres, imprimis August. serm. de Assumpt. Nec propterea Christi regno & dominio officit: sicut gratiæ per Regis matrem concessæ, auctoritati Regis non obsunt, cum ipsas per Regem & ejus auctoritatem, non propriâ virtute concedat. Quidni autè dicatur in proprietate sermonis

monis possibili, fons & mater gratiæ, misericordiæ & vitæ, quæ illum ipsum genuit, qui est via, veritas & vita, & misericordia per essentiam, à quo omnis gratiæ plenitudo diminavit. Certè hunc illi honorem denegare perindè est, ac si Matrem Christi non agnoscas. Quin & intercessionem suâ & meritis quàm maximis gratiam & misericordiam nobis impetrat, *Quia sic est*, ait Bern. serm. de Nativit. Mariæ, *voluntas ejus, qui totum nos habere voluit per Mariam*. Et serm. 2. in Vigil. Natalis Domini. *Quia indignus eras cui donaretur, datum est Mariæ, ut per illam acciperes quidquid haberes, quæ per hoc quod Mater est, genuit tibi Deum, &c.* Quidquid igitur habemus, à Mariâ habemus tamquàm canali: habemus & à Christo tamquàm à fonte. Canales verò etiàm fontes rectè appellantur, ut patet in fontibus artificialibus, longo interdum spatio à suâ origine deductis. Et quemadmodum Luna illuminat, etiàm luce non suâ, sed à Sole mutuata: ità gloriosa Virgo nobis confert vitam, gratiam, & misericordiam, licet virtute divinâ: adeoque Matrem gratiæ, fontem vitæ & misericordiæ.

misericiordiæ, salutem omnium sperantium in se, eam esse absquæ ullo errore sustinemus. Non quòd ipsa spei nostræ objectum formale sit, cùm Theologicarum virtutum proprium objectum sit Deus: sed quòd ipsius meritis & intercessioni plurimùm confidimus, cui nec desit voluntas, nec potestas subveniendi. Non reprehenderint Sectarii amasię suæ abblandientem sponsum, his verbis: Vita mea, Spes mea, Dulcedo mea, Cor meum, &c. arguunt tamèn Orthodoxos, cum Dei Matre, castissimo tamē corde, ita delicias. Vidi non sine horrore Hæreticos, sacrilegis Apostatæ nuptiis applaudentes, quod cùm antea consuevisset dicere *Ave Maria gratia plena*, tunc deinceps potiùs diceret, *Vale Maria gratia plena*: & sponsę suæ, *Ave Maria Velseria gratiofa*. Pudendum! Sacco putido, titioni infernali concedunt, quod in Christi Matre redarguunt. Psalterium deniquè mutato sensu à S. Bonaventurâ, pio devotionis affectu applicatum rectissimè est: nequè ostendere posset Minister quispiam quod eo sensu, quo soli Deo convenit, Virgini Matri applicetur.

Domi-

Dominam vocari uxorem suam etiã patitur, patiatur itã vocari Matrem Domini. Sedere à dextris omnium prædestinatorum est, ut patet Matth. 25.33. sed excellentiùs Reginẽ Sanctorum omnium: excellentissimẽ demùm Christi, *Qui est primogenitus in multis fratribus*, Rom. 8.29. Dicitur Domina miserere mei, nec blasphematur: idem quotidie mendici mulierculis singulis. Sanctifica corda nostra, Libera nos à peccatis; inaudita sunt, & si forsã audita, intelligenda sunt de liberatione & sanctificatione, quæ fit per intercessionem, & non tamquã à causã principali: cùm nullus omninò Catholicorum ignoret solum Deum esse gratiæ auctorem; juxtã illud Psal. 83.12. *Gratiam & gloriam dabit Dominus*. Vndè cùm de Sancti Bonaventuræ & totius Ecclesię mente in his omnibus constet, potiùs nugantur adversarii, quã argumentantur.

MOTIVVM XXXI.

QUod illis, quos in Sanctorum numerum retulit Romana Ecclesia, particulares etiã honores deferat: navigantibus proponat invocandum

candum *S. Nicolaum*; *S. Georgium* rusticis, ad conservandam terram fructus; *S. Rochum* infectis peste; *Sanctum Firminum* podagricis, & sic de cæteris: ut hæc ratione populum excitet ad honorem debitum Creatori soli, creaturis deferendum.

R E S P O N D E T V R.

*Sanctorum patrocinia, Dei
esse dona.*

QUod Sanctorum quorundam patrocinium in particularibus quibusdam necessitatibus invocemus, immeritò confistorii Delphici Rabbini arguunt. Nam sicut divinæ Majestatis immensa liberalitas in hoc singulariter emicuit, quod dum adhuc in hac mortali vitâ degerent, licet in charitate conformes, unumquemque singillatim peculiari aliquo dono aut virtute præ cæteris decoravit; ratione cuius id singulis competat: *Non est inventus similis illi.* Eccli. 44. 20. Ita quamvis omnibus una sit gloria essentialis, accidentali tamen aliquâ remunerantur diversâ. Inter accidentales autem Sanctorum glorias, illa

illa non in minimis habetur, ut qui mundi hujus contemptui se voluntariè objecerunt, non solum in cœlis, sed etiàm ab ipso mundo, Deo ita volente, diversis honoribus in terris afficiantur. Alios itaque honoris causâ constituit in hoc vel illo morbo peculiariter hominum patronos, alios in his aut illis necessitatibus speciales advocatos, quorum intercessione Fidelium preces faciliùs exaudiantur. Nequè hoc novum est, cùm ex Sacris Litteris discamus Angelicos etiàm spiritus diversis officiis & muniis à Deo esse deputatos. Michael repellendis aërearum potestatum conatibus præfectus est: Gabriel nuntiandis Dei mirabilibus: Raphael morbis depellendis. Erunt porrò Beati sicut Angeli Dei in cœlo. Quid ergò vetat quò minùs diversis rebus singulos Deus præfecerit, honorabilesque coràm hominibus, diverso illo munere reddiderit? Prætereà hanc Fidelium ergà peculiare Sanctos in certis necessitatibus devotionem, infinitis propemodùm miraculis Deus approbavit, & etiamnùm approbat in dies. Vidimus quàmplurimos à gravissi-

mis periculis & infirmitatibus naturaliter incurabilibus, Sanctorum intercessione, repentè liberatos. Miracula quidè irritident & contemnunt Sectarii: quæ si nimis evidentia sint, ut diabolica cavillantur, objicientes illud quod Christo Judæi Luc. 11. 15. *In Beelzebub principe demoniorum ejicit demonia.* Nec possunt minùs, ut rectè symbolisent.

M O T I V V M X X X I I .

Quod in Casarii Dialogis, Floribus Exemplorum & aliis quibusdam libellis, tribuantur B. Virgini quadam miracula, ejus integritate planè indigna. Quod invocata, meretricibus sibi devotis, & in partu periclitantibus, Angelorum ministerio præsto fuerit. Quod quarumdam in Monasteriis officium & locum suppleverit, dùm illa per multos annos deliciis veneris operam darent. Hac in S. Virginis injuriam cedere, utpotè quæ eam rei adeò nefariæ cooperatricem faciant: ut & in scandalum proximorum referri, quandoquidè ex tantæ cooperatricis favore ad incestos & sacrilegos amores inducantur.

R E S-

RESPONDETUR.

*Eum Iudaizare, qui B. Virginis ergà
peccatores misericordiam
calumniatur.*

Miracula, quæ hîc nobis attulisti, Doctor Delphice, an falsitatis, an impietatis condemnas? falsa sint aliqua supponamus: nequè ex eorum falsitate, omnium reliquorum veritatem rectè condemnaueris. Si verò impietatis supra memorata insimules: scimus equidèm illa malevolorum & maximè hæreticorum calumniis esse exposita, & ab oculo retorto inspicì, ut flexuosa & adulterina: oculum tamen simplicem & rectum in his & similibus, certum est Dei & gloriosissimæ Matris suæ, ineffabilem ergà peccatores benignitatem & clementiam considerare, atque mirabiles in eruendis è peccatorum coeno hominibus artes admirari. Undè hæc debite perpendens, si peccatis implicetur, ex tam abundanti misericordiâ, veniæ spem concipiens, in meliorem frugem

O 4 gem

gem se transfert, & tantæ bonitatis amore amplius incenditur. Quare etiã si fieri possit, ut oculus nequàm ex his liberius peccandi ansam arripiat, id in Dei & purissimæ Virginis bonitatem ac misericordiã non est refundendum. Nequè ideò Deus peccatorum auctor & fautor, quod sceleratos misericorditer tolleret, dùm evidenti salutis consequendæ medio proposito abutuntur. Christum adulteriis, latrocinis, & hujusmodi spurcitiis favisse, impudenter asserere, blasphemum est. Mulierem nihilominus adulteram à Judæorum intento liberavit: latroni in Cruce pepercit: cum peccatoribus conversatus est, (nec venerat salvare justos, sed peccatores) peccatricis lachrymas, & pedum oscula admisit. Attamen Judæorum calumnias, & Simonis leprosi censuram non evasit. Judæorum imitatores sunt quicumq; beneficia à Sanctissimâ Dei matre peccatricibus sive in partu, sive aliis necessitatibus præstita, exhibitant: præsertim cum constet supradictarum aberrantium conversionem inde fuisse secutam. Quod quâ mente reticueris, cum circumstantia

tia

tia illa in his casibus fit substantialis, ignoro: quandoquidè indè clarum fiat, hæc gesta fuisse non in destructionem, sed ædificationem. Illa quoquè (nequè enim plures sunt, sicut tu imponere studes) cujus Diva Virgo locum in Monasterio supplēvisse dicitur, dùm lubricitati suæ indulgeret, admirabile illud Deiparæ ergà se stratagemà ignoravit: ideòquè peccandi occasio illi esse non potuit. Vbi verò rescivit, tacta dolore cordis intrinsecus, exindè toto vitæ decursu pœnitens in Religione perseveravit. Nequè ex eo quis potius peccandi occasionem desumet, quàm ex boni latronis veniâ, pœnitentiam ad extremum usquè vitæ procrastinandi; aut ex Magdalene condonatione, luxuriandi. Mirabile autè est, quod ex innumeris exemplis, quæ castitatem & continentiam in illis ipsis libris, quos citas, summoperè prædicant, & vitium contrarium maximè detestantur; illud unicum selegeris, in quo non tam ex rei gestæ, quàm ex sinistræ interpretationis occasione, mordendi ansam aliqualem es adeptus: cùm probè noveris, & apud omnes in comperto sit, Religio-

nem Catholicam, apostasiam, incestum, sacrilegium, & omnem luxuriam, supra modum horrere, & execrari. Absit ut tantorum criminum fautricem faciat Sanctissimam Dei Matrem. Castitatem clamant Concilia, Conciones, Scholę, Libri publicè & privatim.

M O T I V V M X X X I I I .

Quod ex Sanctorum numero, Religiosorum Ordines eligant sibi Fundatores & Patriarchas, veluti Franciscum, Dominicum, Ignatium, & alios: & quod à se mutuò distinguantur colore & habitu, non secus ac Magnatum Ephæbi & famuli in curiis Regum & Principum. Quod sibi nomen Patrum usurpent, contra illud (ut fabulatur) Matth. 23. 9. Patrem nolite vocare vobis super terram.

R E S P O N D E T V R .

Quod Ordinum Religiosorum diversitas Ecclesię decoris est, non divisionis.

ITerum nugaris: quid enim facit ad doctrinam quam impugnas, veritatem aut falsi-

falsitatem , Religiosorum Ordines suos habere Fundatores & Patriarchas ? hunc aut illum habitum gestare ? Quisquis hanc sanctam diversitatem depurato affectu pensat, videt quantus ex hac mirâ varietate in accidentalibus, Ecclesiæ Dei decor & pulchritudo accedat : quanta ex uniformitate in substantialibus gratissimâ, concordia. Conveniunt in eo quidè omnes, ut in perfectâ charitate & mandatorum observatione, in domo Dei , Regi suo pacifico & Redemptori deserviant . Sed nonnulli perfectioris zelo charitatis, prætereà consilia Evangelica quæ amplectuntur , cum voto quo Deo strictissimè religantur, iuxta Regulâ quisquè suam, in obedientiâ, castitate , & paupertate, perpetuo Deo famulantur. Non novo, ut contendūt Heretici commento, sed jam indè à temporibus Eliæ & Elisæi sumpto incremento, à Christo ejusquè Discipulis perfectò, & deinceps in Ecclesiâ continuato . Et hæc omnibus Religiosis Ordinibus communia : singulis verò nonnulla superadduntur divino instinctu Statuta, quibus jejunia, abstinentia à carnibus , verbera, pedum

pedum nuditas, silentium, clausura, &c. diversimodè præscribuntur: quibus & votorum, mandatorumque perfectior inducatur observantia, proximorumque necessitatibus commodiùs subveniat. Tum ut unicuique à Deo ad perfectiorem statum ac sæculi contemptum vocato, optio detur ad illam inter omnes Religiones suscipiendam, quæ indole, valetudine, viribus, atque omnibus iuxta Christianam prudentiam consideratis, magis congruat. Hinc est quod Basilii, Augustini, Benedicti, Francisci, Dominici, Hieronymi, & alii, suas quisque, prout à Deo moti fuerunt, regulas condiderunt, & eodem sibi fine proposito diversa ad illum perveniendi media tradiderunt. Et sicut nihil in vitæ instituto rectè efformando prætermiserunt, sic etiàm vestium, habituumque discrimen, mediorum suorum diversitati congruum induxerunt. Sic qui Gloriosæ Virgini Mariæ peculiariùs serviunt ob puritatem integerrimam, candido: qui in labore & mortificatione præcellunt, cinericio: alii ob alias rationes, nigro sive alio habitu induuntur. Ita ut regu-

regulari eorum vitæ, habitus quoque
 five in modo, five in colore & signi-
 ficatione respondeat, & quod in mente
 geritur, foris exprimatur. Sed reverâ no-
 dum in scirpo quæris, dùm exprobras ag-
 minibus Dei viventis ea, quæ potiùs te in
 admirationem rapere deberent, non secùs
 ac Reginam Saba magnificentia Salomo-
 nis. 3. Reg. 10. 5. quandò *Sapientiam Salo-
 monis & habitacula servorum, & ordines mi-
 nistrantium, vestesq; eorum* contemplata est.
 Debueras illam varietatem in Regine no-
 stræ, Ecclesiæ inquam, ornatu cum Psal-
 mistâ venerari, Psal. 44. 10. *Astitit Regina
 à dextris tuis in vestitu deaurato*, nempè in
 charitate, *circumdatus varietate*, diversorum
 videlicet Institutorum & habituum famu-
 lorum Dei ad perfectionem unanimiter
 tendentium. Debueras in Sunamite spon-
 sâ Christi dilectissimâ, choros castrorum
 ex mirâ illâ Religionum diversitate con-
 stantes admirari, cùm hostibus suis facta
 sit *Terribilis ut castrorum acies ordinata*. Can-
 tic. 6. 3. Constat enim fortissimos hactenùs
 milites, adversùs omnes Ecclesiæ Dei visi-
 biles & invisibiles inimicos, ex Religiosis
 Ordi-

Ordinibus prodiisse, qui doctrinâ suâ hæreses in ipso suo limine sepelierunt, sanctitate morum mundum illustrârunt, & suis instructionibus infinitos propemodum filios Christo spiritualiter genuerunt. Meritò igitur Patres sine controversiâ vocandi sunt Religionum Institutores, qui seu mediatè seu immediatè posteros suos Christo genuerunt: & quotquot cum illis alios Christo gignunt, eodem sensu ac ratione Patres sunt, quâ Paulus 1. ad Cor. 4. 15. se ipsum Fidelium Patrem appellat, cum dicit, *ut Filios meos charissimos moneo: nam scedecem milli apædagogorum habeatis in Christo sed non multos Patres: nam in Christo Iesu per Evangelium ego vos genui.*

M O T I V V M X X X I V .

Quod Summus Pontifex permittat se vocari Patrem Sanctum, imò & Sanctissimum; quod Christus soli Patri Eterno tribuit, Ioa. 17. 11. Pater Sancte serva eos. Et etiam in abstracto dicatur Sua Sanctitas, velut de Deo attributa in abstracto prædicantur, Divinitas, bonitas. Et quod in Glossâ Clem. Cum inter-

patiatur

patiatur se Dominum Deum nostrum appellari. Quod etiã dicatur Leo de tribu Iudã, radix David, Salvator Sion: imò & Bellarminus ipsum sponsum Ecclesia nominet, etiã Christo secluso.

R E S P O N D E T U R.

Aliquos ex illis titulis sine fastu jure sibi arrogat Summus Pontifex, alios cum astu ipsi imponit Delphicus Minister.

AB ipsis Ecclesiæ incunabulis Romano Pontifici Christi in terris Vicario, nomen Patris & Papæ (quæ coincidunt) concessum est. Testem profero S. Ignatium Martyrem in epist. ad Mariam Sarbensem, *Dùm esses inquit apud Papam Linum.* Nec immeritò epithetum Sancti, & Sanctissimi adjungitur: non quidè ratione personæ, quæ dignitatem obtinet; sed ipsius dignitatis. Sanctum enim est, & Sanctissimum munus, Christi in terris vices obire, quod tantam talemque ab eo pote.

potestatem accepit, sanctione & decreto divino planè involabilem. Quàmvis igitur fortasse Summus Pontifex propter vitæ puritatem, aut regiminis integritatem, honorificum illum titulum non promereretur, siquidè simul atquè ritè & legitimè ad cathedram Petri, ad supremam nempe dignitatem evehitur, Sanctus ac Sanctissimus vocari potest & debet. Nec obstat primò, quod Sua Sanctitas vocetur in abstracto, cum nomina abstracta non sic Deo congruant, quin etiàm hominibus tribui possint. Alioquin & graviter peccarent Hollandi, cum Suæ Excellentiae, aut Celsitudinis nomen Principi tribuunt. Non obstat secundò, quod Christus Patrem Æternum eo nomine compellarit, Joan. 1. 7. 11. *Pater Sancte serva eos*. Quia, ut sæpè in simili repetitum est, hæc & similia creaturis per attributionem & analogicè applicari possunt. Quod manifestissimè declarat Apostolus, cum Ephes. 3. 15. *Flecto*, inquit, *genua mea, ad Patrem Domini mei Iesu Christi, ex quo omnis paternitas in Cælo, & in terrâ nominatur*. Clariùs innuere non potuisset, esse aliquam

quam Paternitatem extrà Deum in cœlo & in terrâ: eamdem tamèn à Deo dependere. Et nè longiùs exempla perquiram, solus Pater Æternus Christi Pater extitit: & tamèn Luc. 2. 48. Josepho tribuitur, *Eccè Pater tuus & ego dolentes querebamus te.* Christus Dóminus unigenitus Beatissimæ Virginis Filius fuit: attamèn ipsemet S. Joanni Evangelistæ in arâ Crucis Filii nomen concessit. Ioan. 19. 26. *Eccè filius tuus.* Et in Symbolo Apostolorum, ut frequenter videmus, dicitur: *Filium ejus unicum Dominum nostrum:* & tamen Genesi 6. 2. *Videntes filii Dei filias hominum.* Et Ps. 81. 6. *Ego dixi Dii estis, & filii Excelsi omnes.* Ergò aut Scripturæ sibi contradicunt, aut inane Ministri nostri argumentum est. Pater Æternus vocatur Pater Sanctus, ergò Papa non debet vocari Pater Sanctus. Christus est Sponsus Ecclesiæ, ergò Papa non est. Servator enim noster juxta promissionem per Oseam factam, attestante Paulo ad Ephesios 5. Ecclesiam verè sibi desponsavit: idèdque principalis est ejus Sponsus & unicus in illâ significatione. Nec tamèn desinit ejus Vicarius, ministe-

P

rialiter

rialiter saltèm, ejus Sponsus & esse & dici; eo sensu, quo quilibet Episcopus cum suâ Ecclesiâ matrimoniũ spirituale inire dicitur, quod per Electionem inchoatur, per Confirmationem ratificatur, & per Consecrationem consummatur. c. ult. de Transl. Præl. Cùm autem Summus Pontifex universalis Ecclesiæ sit Episcopus, meritò & universalis Ecclesiæ Sponsus appellatur: Christo minimè secluso, quod Bellarmino (ut legenti cuilibet constare poterit) mendaciter imponit. Eodem modo intelligendum est, si fortè alicubi Leo de tribu Judâ, radix David, Salvator Sion, aut alio simili elogio vocitetur. Citat Conc. Lateranense sess. 10. Quinque Lateranensia percurrimus, nec simile quid reperitur. Doctor noster Delphicus, hìc & alibi frequenter falsitatis convincitur. Vndè sufficienter colligere est, quàm immeritò, in antiquum Ecclesiæ usum, insurgat, contentus maledicere, cùm malè facere non possit. Quod autem Dominum Deum nostrum vocari se permittat Papa, in gloss. Clem. Cum inter. sine titulo citatæ, gratis asseritur: cùm nulla sit ex omnibus Clementinis,

mentinis, quæ sic incipiat. Et quamvis in aliquâ glossâ hujusmodi quidpiam reperire esset, id permittere Summus Pontifex, ideò dicendus non esset : certum est enim quod nulla glossâ à Sede Apostolicâ fuerit approbata ; nec usquàm apud Catholicos majorem habuit auctoritatem, quàm Auctor aliquis particularis. Quàpropter, si ita est, particularis abusus est, quales defendendos, ut sæpè dictū est, non suscepimus. Abusus, inquam, licèt fortè potius in modo loquendi, quàm in re. Manifestum est enim, quod nullus umquàm Catholicus existimavit, Papam dici aut esse Deum, nisi forsan in significatione latissimâ, sicut de hominibus Propheta aiebat, *Ego dixi, Dii estis*. Aut intelligendū Deum, pro Dei Vicario, vt intellexit sup̄iùs pag. 172. Arcopagita, Deum pro Angelo qui loco Dei apparebat : aut sicut secretius Regis Consilium, sub ipsiusmet Regis nomine decreta sua edit, cum ipsa, ut plurimum, Rex nequidēm viderit.

M O T I V V M X X X V .

Quod plenitudinem potestatis in cælo & in terrâ, atque in jure dispensandi facultatem usurpet, utpotè qui sibi videatur esse suprâ jura : Quod Sacra Scriptura admittenda non sint, nisi de suo judicio: Quod can. Si Papa. dist. 40. expressè habeatur, Si Papa suæ, & fraternæ salutis negligens, deprehenditur inutilis, & remissus in operibus suis, & insuper à bono taciturnus, quod magis officit sibi & omnibus: nihilominus innumerabiles populos catervatim secum ducit, primo mancipio gehennæ, cum ipso plagis multis in æternum vapulaturus. Hujus culpas istic redarguere præsumit mortalium nullus: quia cunctos ipse judicaturus, à nemine est judicandus, nisi deprehendatur à Fide devius. Vbi Pontifex à Fide posse deviare indicatur: cum tamèn Catholici sustineant, eum errare non posse, non sine manifestâ contradictione.

R E S-

RESPONDETUR.

Et Pontificiæ potestatis amplitudo confirmatur. An & quomodo Papa errare possit?

P Lenitudinem illam potestatis habuit D. Petrus, cui dictum est Matth. 16. 19. *Quodcumq; ligaveris super terram, erit ligatum & in cælis: & quodcumq; solveris super terram, erit solutum & in cælis.* Qui autem *quodcumq;* dicit, nihil excipit. Christus qui eam auctoritatem absque dubio concedere poterat, *quodcumq;* dixit, ergò plenitudinem potestatis Petro, & per Petrum legitimis ejus successoribus concessit. Nequè enim solo tempore Petri, externo regimine moderandus erat Ecclesiæ clauus: sed eadem duratura erat usquè ad mundi finem visibilis gubernatio: ergò in capite visibili par & equa potestatis plenitudo requirebatur in progressu, quæ à principio: ergò Summus Pontifex verus Petri successor, & Christi Vicarius non usurpato, sed pleno jure il-

lam plenitudinem sibi vendicat. Atque
 adeò per illam non solum Leges condere,
 sed & in juribus humanâ voluntate indu-
 ctis dispensare absque cōtroversia potest.
 Porro si magnæ, ut volunt Sectarii, arro-
 gantiæ est, Romanum ac Vniversalem Ec-
 clesię Pastorem sibi vendicare jus decla-
 randi, quęnam Scripturæ, ut Canonicae
 recipiendæ sint: quamvis hætenus eâ au-
 ctoritate usus non sit, nisi re maturè pru-
 denterq; in Oecumenicis Conciliis con-
 sultâ & consideratâ. Quantæ quæso erit
 audaciæ homuncionem aliquem priva-
 tum & vilem, sibi hanc auctoritatem arro-
 gare (quod inter hæreticos frequens est)
 particulari suo spiritu ductum, modò
 hunc, modò illum Scripturę librum, puta
 Machabæorum, reprobare, aut admittere?
 modò hanc, aut illam Epistolam in Cano-
 nicam recipere, aut prout lubet rejicere?
 Æquissimum hæc in parte judicem, quam-
 vis à Fide alienum propono Potentissi-
 mum Persarum Regem, qui in quâdam
 Epistolâ ad Summum Pontificem per
 Religiosum nostrum directâ, (testis ocu-
 laris loquor, hanc enim vidi, tenui, ac legi)
 inter

inter ceteros honoris titulos, quos Vicario Christi tribuebat, iste non erat infimus, *Ad quem pertinet interpretari sacram Scripturam, & verum ejus sensum declarare.* Hanc veritatem vidit infidelis, quam Hæreticorum & Sectariorum oculi non capiunt. Vndè fit, quod in rebus Fidei etià ventito instabiliore hùc & illuc ferantur, utpotè quibus in dubiis suis nullum umquàm sit certum refugium. Econtrà Orthodoxi, judicio Apostolico Pontificio & Pastoralistant, ut falli non possint. Promisit quippè, Christus suis Apostolis & Pastoribus quos constituit perpetuum in dijudicandis controversiis, & quâlibet re definiendâ subsidium, Matth. 28. 20: *Eccè ego vobiscum sum omnibus diebus, usquè ad consummationem sæculi.* Et Luc. 22. 32. Promisit idem Petro & in eo omnibus ejus successoribus: *Ego autem rogavi pro te, ut non deficiat Fides tua.* Deniquè super hanc petram ædificavit Christus Ecclesiam suam, Matt. 16. 18. *Et portæ Inferi non prævalebunt adversus eam.* Quamobrem infallibile planè cuilibet rectè sentienti esse debet, visibile Christi in terris caput, quatenùs tale est, Papam

Videlicèt ut Papam aliquid ex Cathedrâ dictantem errare non posse. Hoc quippè exigebat visibilis Ecclesiæ regimen, non solum Petro, sed & ejus successoribus promitti & concedi: eâque ratione Ecclesia Catholica à S. Paulo 1. Timot. 3. 15. rectè & verè, *Columna & Firmamentum veritatis* appellatur. Nequè supradictę doctrine adversantur verba, quæ ex ca. Si Papa. objiciuntur: *Nisi deprehendatur à Fide devius.* Quoniàm non est contrà Catholicam doctrinam, si quis asserat, Papam ut hominem posse errare, aut esse hæreticum; quod tamen hætenùs visum non fuit: sed solum in id communis Catholicorum sententia conspirat, ut affirmant Pontificem, siue hæreticus esse possit, siue non, non posse ullo modo definire aliquid hæreticum à totâ Ecclesiâ credendum. Quod saltèm sufficit, ad infallibilitatem doctrinæ universali Ecclesiæ propositæ stabilien-
dam. Sicùt & hoc saltèm necessario concluditur, ex locis Scripturæ superius memoratis, quæ Ecclesiæ ejusque capitis astruunt firmitatem, & certitudinem. Postremò non est quod stomachum tuum
moveat,

moveat, quod Canone allegato dicatur, Papam à nemine esse redarguendum. Moneri quidem potest per fraternam correctionem; sicut aliquandò Paulus Petrum monuit, ut testatur Hieron. Epist. ad Augustinum, quæ habetur inter Epistolas Augustini undecima, & Aug. Epist. 19. ad Hieron. & Gregor. Homil. 18. in Ezechiel. Verùm in iudicio redargui aut judicari non potest, eo quod non habeat quempiam se superiorem. Imperator Pontifici potestati subjicitur: nam, ut inquit Ambr. concione de Basilicis non tradendis hereticis, in fin. Tom. 5. *Imperator bonus intrà Ecclesiam est, non suprà Ecclesiam*, multò minùs suprà Ecclesiæ Pastorem. Greg. Nazianz. Vos, inquit, oves nolite pascere Pastores, neque super terminos eorum elevemini: nolite judicare Iudices, nec leges feratis Legislatoribus. Bernar. Epist. ad Conradum Imperat. *Omnis anima, inquit, potestatibus sublimioribus subdita sit. Quam sententiam cupio vos custodire in exhibendâ reverentiâ Christi Vicario, sicut ipsam vobis vultis ab universo servari imperio.* Et in Conc. Synuesiano communi & concordì voce Patres proclamarunt,

Prima Sedes à nemine judicatur, nequè ab Augusto, nequè à Regibus, nequè ab omni Clero, nequè à populo. Quandò verò Pontifices ad decernendas res Fidei, & ea quæ pertinent ad regimen universalis Ecclesiæ procedunt, non id faciunt temerè, nequè ex proprio capite: sed adhibito gravissimorum Prælatorum & Doctorum consilio, qui scrutantes Scripturas, juxtà consilium cœlestis Magistri nostri Iesu Christi, nec non doctrinam Sanctorum Patrum, omnia dilucidât, ut consona sint S. Litteris, & Apostolicis traditionibus. Et his omnibus, quasi quibusdâ dispositionibus præmissis, tādēm Spiritu Sancto afflante aliquod dēcretum Apostolicum ferunt. Dices quomodò fieri potest, quod decreta illa Spiritu Sancto dirigente fiant, cū sæpè viderimus ea immutari, & quod ab uno Pontifice statutum est, ab alio abrogari: nec tamèn Spiritus Sanctus sibi ipsi contrariari possit. Resp. In materiâ Fidei, maximè in substantialibus, nihil unquàm immutari: licèt nonnulla circà mores, quæ pro ratione temporum convenientia videbantur, successionē eorundem, ut inconvenien-

venientia abrogentur. Contingit etiã in rebus Fidei, ut ea quæ minùs clara populo credenda antè proposita sunt, Deo illuminante Ecclesiam, ut optimè advertit Hieron. hoc in dies fieri, magis inclarescant.

MOTIVVM XXXVI.

Quod Romanus Pontifex propter supremam illam potestatem, quam sibi ascribit, præsumi possit esse ille de quo Paulus 2. ad Thess. 2. 3. Nisi venerit discessio primùm, & revelatus fuerit homo peccati, filius perditionis, qui adversatur, & extollitur suprà omne quod dicitur Deus, aut quod colitur, ità ut in templo Dei sedeat, ostendens se tamquàm sit Deus. Quod Innocentius III. in Bullâ, quæ extat in tom. 3. Concil. distribuat augmenta gloriæ, his qui ad bellum transmarinum se conferrent. Et quod in Coronatione Pontificum ipsis dicatur, Scito te esse Patrem Principum & Regum, mundi Governatorem, & Christi in terris Vicarium. Quod Bonifacius VIII. postquàm habitu Pontificali indutus, & triplici coronâ caput ejus redimitum fuisset, Imperiali veste ornatus

natus, coronatus & armatus, tamquam in scaenam prodierit, & alterâ manu gladium, alterâ mundi globum sustinens exclamaverit, Ecce duo gladii hîc. Vides Petre tuum successorem. Vides Christe tuû Vicarium. Quod sub aeternae damnationis comminatione interdixerit, nè de supremo ejus tum in spiritualibus, tum in temporalibus principatu disputetur. Quod hic modus agendi non redoleat humilitatem & mansuetudinem Christi, quam commendatam reliquit Math. 11. 29. Discite à me, quia mitis sum & humilis corde: necquam praeserebat in suis epistolis, dum vocaret se Servum servorum Dei. Quo titulo etiam omnes ejus successores usi sunt, cum tamen pretendunt esse Domini Dominorum: & in dominationis hujus signum Imperatorem, Reges, & Principes, ac digniores, qui consecrationi intersunt, sibi equam ascendenti & descendentem, quasi famulas ephippium tenere Papa jubet. Quod Imperator tertio coronandus Romam ingrediens Papam in theatro cum Majestate sedentem, Cardinalibus stipatum, nudo capite, ter genu flexus salutat, & pedes ejus exosculatur. Quod itidem in consecratione Pontificum, dum solemnî ritu, & processionaliter progre-

*progrediuntur Venerabile Sacramentum antè se
præmittant inter plebem. Ipsi verò Cardinali-
um, Patriarcharum, Episcoporum, & nobilium
cateruâ stipati, in equo albo magnificentissimè
phalerato subsequantur. Quod hæc superbia
tolerabilis esset, si solum super Imperatores,
Reges, & Principes se diffunderet: sed quod
intolerabilis sit, dum supra Deum, cujus pote-
statem sibi arrogant, efferuntur. Omittimus
meras nugas alias responsione indignas.*

RESPONDETUR.

*Iterum de Papæ primatu, & de succës-
sione continuâ. Pompa ejus exterior lau-
dabilis: nec ideò est Antichristus.*

SI Sectarii nostri oculo simplici, quem
turbida passio non fascinaret, summum
illum Christi in terris Vicariatum con-
templarentur, non utiquè sic ignorantes
blasphemarent. Converterent procùl du-
bio inveteratum odium in piam venera-
tionem, & mente saniori Fidem ample-
cterentur quam spernunt. *Exacuerunt ut
gladium*

gladium linguas suas, Ps. 63. 4. *Venenum aspidum sub labiis eorum, quorum os maledictione & amaritudine plenum est.* Psal. 13. 3. Improperant Vicario Christi, & ex consequenti ipsimet Christo Domino. Dicent fortassè sicut Judæi Pilatò, Joan. 19. 21. *Noli scribere Rex Iudeorum, sed quia ipse dixit, Rex sum Iudeorum.* Pontifex Romanus non est Vicarius Christi, sed ipse se Vicarium facit. Verumtamèn etiàm ipsis invitis, veritas hæc est luce meridianâ clarior. Gaudet tali dignitate, Christus ad eam ipsum evexit, hanc ad nostra usquè tempora sine interruptione continuatam, cum communi Sanctorum Patrum consensu, & unanimi populorum acclamatione retinet. Soli Novatores in re tam clarâ cœcutire malunt, & contrà omnium antiquorum & modernorum torrentem contendere. In illam Ecclesiæ petram acies suas dirigunt, non ignorantes quod eâ positâ, corruat omnium hæreticorum vana præsumptio. Manet tamèn inconcussa, & quâlibet caute firmior impios conatus retundit. Nè tamèn hæc sine fundamento dicere videamur, lubet altiori indagine

indagine paulò maturiùs rem discutere, legitimam à Petro Christi Vicariorum successionem indagare, & Romani Pontificis auctoritatem stabilire. Cùm Christus Joan. 21. 14. de instituendâ Republicâ Christianâ, & Ecclesiâ, quam proprio sibi sanguine desponsavit, erigendâ cogitaret; idoneum Pastorem, qui loco suo pòst gloriosam Ascensionem visibiliter gubernaret electurus, virum divini amoris zelo & charitate, quæ virtutum regina est, flagrantem præficere voluit. Et quamvis scrutator ille cordium satis nosset, quantum Petrus eâ in virtute excelleret; placuit tamèn quasi quoddam examèn super ejus idoneitate præmittere, per tertio repetitam illam interrogationem, *Petre amas me?* Annuente Petro semel & iterum, bis respondit, *Pasce agnos meos.* Quasi diceret, Constituo te Pastorem agnorum meorum universalem, quos sive ex populo Judaico, sive ex Gentilitate congregabo: non horum aut illorum, sed omnium: indistinctè enim loquitur; sed nec ibi substitit. Tertiò interrogavit, *Petre amas me?* & tertiò affirmanti ait Christus, *Pasce oves meas.*

meas. Quarè hâc vice oves meas, & non agnos meos? Hec est differentia inter oves & agnos, quod oves sint agnorum matres. Per eas itaq; non ineptè intelligere possumus Ecclesię Pręlatos & Doctores, qui quâ docēdo, quâ regendo, Christo & ejus sponsę filios spiritualiter generant & nutriunt. *Pasce* itaquè *oves meas*, hoc est, Constituo te Pastorem omnium Pastorum, qui singularibus pręsunt Ecclesiis, sicùti antea agnis te Pastorem pręfeci. Rursùs Math. 16. 18. in solemniissimæ illius professionis Fidei, quàm Petrus collegii Apostolici nomine fecit, præsentem promissionem, Christus in hæc verba prorupit, *Et ego dico tibi, quia tu es Petrus, & super hanc petram ædificabo Ecclesiam meam, & portę Inferi non prævalebunt adversus eam, & v. 19. Tibi dabo claves Regni Cælorum: & quodcumq; ligaveris super terram, erit ligatum & in Cælis: & quodcumq; solveris super terram, erit solutum & in Cælis*. Quid luculentius & manifestius? Profectò efficacioribus verbis significari non posset illa supereminens potestas, quàm Petro conferebat, super bonorum spiritualium distributionem, ac myste-

myfteriorum Dei dispensationem. Hanc
 ipsam plenitudinem potestatis, à Petro
 in successores exindè, Deo ita disponente,
 derivatam Novatores admittant necessum
 est. Si enim Respublica quælibet tempo-
 ralis, ut persistat in materiâ regiminis,
 exigat in suis moderatoribus, nedùm
 primis, sed & succedentibus, auctorita-
 tem leges condendi & abrogandi pro tem-
 porum discrimine, fontes plectendi, be-
 nè meritos remunerandi; quidni illud ip-
 sum exiget Respublica Christiana à Christo
 Domino, cui *nullus similis in legislatoribus*,
 Iob 36.22. rectissimè instituta, quæ perse-
 veratura sit usquè ad consummationem
 sæculi? Certè potestatem illam Petro &
 successoribus ejus dandam multis antè se-
 culis vaticinatus est Isaias cap. 59.21. *Spiri-
 tus meus, qui est in te, & verba mea quæ posui
 in ore tuo, non recedent de ore tuo, & de ore
 seminis tui, & de ore seminis seminis tui, dicit
 Dominus amodò, & usquè in sempiternum.*
 Quod etiàm si de Christo secundum litte-
 ram intelligatur; cùm non nisi spiritualiter
 genuerit, de illâ Pastorum & Doctorum,
 quos Ecclesiæ dedit, continuâ & perenni

Q success-

successione, etiã appositissimè, & quidẽ litteraliter intelligendum venit. Neque enim minùs Clementissimus Deus Ecclesiæ sponsæ suæ providit, quàm Judæorum Synagoge olim, in quâ semper illam Pontificum successionem, usque ad ejus interitum conservavit: ad quos in dubiis recurri voluit, ut patet Deut. 17. 8. *Si difficile & ambiguum apud te judicium esse perspexeris inter sanguinem & sanguinem, causam & causam &c.* & 9. *Venies ad Sacerdotes Levitici generis, & ad judicem qui fuerit illo tempore, (nota) queresq; ab eis, qui indicabunt tibi judicii veritatem:* & v. 10. *Et facies quodcumq; dixerint, qui præsunt loco, quem elegerit Dominus:* & v. 12. *Qui autem superbierit, nolens obedire Sacerdotis imperio, qui pro tempore ministrat Domino Deo tuo, (nota benè) decreto judicis morietur homo ille.* Porro si illum ipsum Sacerdotem, & præcipiendi auctoritate, & in rebus Fidei definiendis assistentiâ suâ particulari Deus non munivisset, exposuisset populum manifestissimo errandi periculo. Hoc autem adedò consueverat Omnipotens Deus, ut cùm Synagogam, tamquàm adulteram jam repudiaret,

vix

vix potuisse abstinere videatur, quin ultimum suum Pontificem, si non in omnibus, saltèm in aliquo assistentiæ suæ munimine adhuc honoraret. Cayphas enim, etsi iniquissimus esset, utpote qui ipsum Dominum vitæ morti adjudicârit; attamen tamquàm caput languidum pereuntis Synagogæ, adhuc saltèm quantum ad hoc, assistentiam habuit à Spiritu Sancto; & fuit præco divini & æterni decreti, cùm hæc verba protulit: *Expedi ut unus homo moriatur pro populo, nè tota gens pereat.* Quod advertit Joan. II. 51. dicens: *Cùm esset Pontifex anni illius, prophetavit.* Illa enim sententia, prout originem ducebat ex ipso Cayphæ mente, plena fuit malitiâ, ambitione, & odio in Christum: sed ut proveniebat ex æterno divinæ Majestatis decreto, ex infinitæ bonitatis fonte emanabat. Fuit tamen promulgata per ipsum Caypham potius quàm per alium, eo quod esset Pontifex anni illius. Ut ostenderet Deus, quomodò antecessores ejus, dùm adhuc vigeret Synagoga, assistebat. Quandoquidèm ergò Christus ancillam cum liberis suis, id est, Synagogam ejece-

Q₂ rit;

rit, & liberam, videlicet Ecclesiam Catholicam pretio sanguinis sui sibi copulârit; cùm non dederit liberè, quod ancillæ concessit? Illa umbra fuit, hæc veritas: nihilominus illa ininterruptam se mutuò succedentium Sacerdotum seriem, ad quos in dubiis semper recursum est, recensuit; indefinens divinæ assistentiæ munus ad occasum usquè persensit; in suorum rectorum certitudine & infallibilitate gloriata est, Pontifices Prophetas habuit & singulos Divinum numen spirantes: ut non abs re auream laminam in pectore gestarent, jubente Deo, in quâ inscribebatur V E R I T A S, non bonitas, non sanctitas, aut aliud quoddam ex divinis attributis: quia in eo qui ad clavum regiminis Ecclesiastici sedet, non tam necessariò requiritur, ut à Deo in bonitate & sanctitate morum dirigatur, quàm in certitudine & infallibilitate doctrinæ. Cùm non Ecclesia Christi sponsa, filia gratiæ, tanto privilegio gaudeat, cùm non ignorarêt Christus Petri naviculam variis tempestatibus jactâdam, Petrum ipsum brevi è medio tollendum, & martyrii palmâ decorandum! Oportuit
indubiè

indubiè, si non personam eandem, saltem dignitatem, authoritatem ac potestatem in successoribus eandem perpetuò tueri & conservare, nè præda Inferis tam opima cederet, ac populus Christianus infinitis erroribus obnoxius, velut ovis erratica, & pastore destituta, variis dogmatum alienorum ventis circumferretur. Damnum sanè non corporale, sed spirituale; non temporalis, sed æterni boni: ac proindè quod tantò magis ab infinitâ divinæ providentiæ bonitate conveniebat impediri. Sæcularis dignitas temporali subditorum gubernationi tantum principaliter incumbit, nequè ulla facta est ipsi (de quâ constet) successionis duraturæ promissio. Pontificia autem majestas animas ad æternam dirigit salutem, & adversus eam certum est portas Inferi numquam prævalituras. Videmus tamèn, Deo ità disponente, Imperatorum successionem à Julio Cæsare ad nos usquè deductam: videmus longas Regum series à plurimis sæculis ad præsens usquè derivatas. *Numquid*, ait Apostol. 1. Cor. 9.9. *de bobus cura est Deo*, aut de rebus temporalibus? Ità profectò cura est ipsi:

Q 3 quan-

quandoquidè illa Regna & Imperia tamdiù confervavit. Sed longè major de fpiritualibus : ideòque multò follicitiùs Pontificiam fucceffionem hùcufque fine interruptione perduxit, & ad finem ufque mundi perducturus èft, juxta fuam promiffionem, quæ nec fallere, nec falli potèft. Neceffarium itaque planè eft, Romanorum Pontificû ilibatam fucceffionem in unitate Fidei, in unitate doctrinæ, in unitate potèftatis & auctoritatis admittère : nifi malis Deum mendacii & infidelitatis reum agere, cùm promiferit Matth. ult. ult. *Eccè ego vobifcum fum omnibus diebus ufque ad confummationem feculi.* Et Mat. 16. 18. *Super hanc petram edificabo Ecclefiam meam, & portæ Inferi non prævalebunt adverfus eam.* Certè hanc gloriofam fucceffionem Sanctus Iræneus coætaneus Sancto Polycarpo Sancti Joannis Evangeliftæ difcipulo enixiffimè veneratus eft lib. 3. ca. 3. his verbis: *Sed quoniam valde longum eft, in hoc tali volumine omnium Ecclefiarum enumerare fucceffiones; maxima & antiquiffimæ, & omnibus cognita à gloriofiffimis duobus Apoftolis Petro & Paulo Romæ fundatæ & con-*
ftitutæ

stituta Ecclesia, eam quam habet ab Apostolis traditionem, & annuntiata in hominibus Fidem, per successiones Episcoporum pervenientem usque ad nos indicantes; confundimus omnes eos, qui quoquo modo, vel per sui placentiam malam, vel vanam gloriam, vel per cæcitatem & malam sententiam, præterquam oportet, colligunt. Ad hanc enim Ecclesiam propter potentiorcm principalitatem, necesse est omnem convenire Ecclesiam, hoc est, eos qui sunt undique Fideles. Et S. August. tom. 6. contra Epist. Fund. c. 4. Multa sunt, inquit, alia quæ in ejus gremio me justissimè teneant. Tenet consensus populorum, atque gentium. Tenet authoritas miraculis inchoata, spe nutrita, charitate aucta, vetustate firmata. Tenet ab ipsâ Sede Petri Apostoli, cui pascendas oves suas post Resurrectionem Dominus commendavit, usque ad præsentem Episcopatum successio Sacerdotum, quam absque ullâ interruptione recenset Epist. 163. to. 2. Si enim, inquit, Ordo Episcoporum sibi succedentium considerandus est, quanto certius & verè salubriter ab ipso Petro numeramus, cui totius Ecclesie figuram gerenti Dominus ait: Super hanc petram edificabo Ecclesiam meam: porta Inferorum non vincet eam. Petro

enim successit Linus, Lino, Clemens; Clementi, Anacletus; Anacleto, Evaristus; Evaristo, Alexander; Alexandro, Sixtus; Sixto, Telesphorus, Telesphoro, Iginus; Iginio, Anicetus; Aniceto, Pius; Pio, Soter; Sotheri, Eleutherius; Eleutherio, Victor; Victori, Zepherinus; Zepherino, Calixtus; Calixto, Urbanus; Urbano, Pontianus; Pontiano, Antherus; Anthero, Fabianus; Fabiano, Cornelius; Cornelio, Lucius; Lucio, Stephanus; Stephano, Xistus; Xisto, Dionysius; Dionysio, Felix; Felici, Eutichianus; Eutichiano, Caius; Caio, Marcellinus; Marcellino, Marcellus; Marcello, Eusebius; Eusebio, Miltiades; Miltiadi, Sylvester; Sylvestro, Marcus; Marco, Iulius; Iulio, Liberius; Liberio, Damasus; Damaso, Siricius; Siricio, Anastasius. Nos quoque per tot sæcula exinde ad nos usque continuatam Summorum Pontificum seriem facile, si opus foret, referremus, & penes eos absque ullâ mutatione conservatam & intemeratam semper fuisse veram Fidem & doctrinam sanam in veritate, & unitate; non solum secundum substantiâ, verum etiam secundum modum docendi, explicandi, & intelligendi ostenderemus efficaciter. Verum cum nullus unquam

Hære-

Hæreticorū contrarium efficaciter proba-
 verit, aut probare possit, non videtur insti-
 tuto nostro cōveniēs, hisce diutiùs immo-
 rari. Romæ itaquè Petrus Cathedrā fixit,
 ut vrbs ea, quæ fuerat terrarū Gentiumq;
 domina temporalis, fieret etiā spiritua-
 lis. Cathedram fixit, non cathedras, quò
 magisterii & doctrinæ unitatem colligas,
 quam Christus adnotandam reliquit Mat.
 23.2. *Super Cathedram Moysi sederunt Scribæ,*
&c. Zacharias itidē Luc. I. 70. Sicūt locutus
est per os Sanctorum, qui à sæculo sunt Prophe-
tarum ejus, non per ora Sanctorum, quòd
omnes semper quasi unum os fuerint, ex
quo perpetuò eadem veritas, eadem do-
ctrina promanarēt in posteros. Et hanc
unitatem etiā advertit S. Cypr. lib. de
unitate Ecclesiæ: Vt unitatem, inquit, ma-
nifestaret, unam Cathedram constituit, & uni-
tatis ejusdē originem ab uno incipientem suā
auctoritate disposuit. Et infrā; Exordium ab
unitate proficiscitur, Primatus Petro datur, ut
una Christi Ecclesia, & cathedra una monstre-
tur. Et Optatus Milevitanus lib. 2. contrā
Parm. circā initium: Negare non potes, scire
te in Vrbe Romā, Petro primo Cathedram Epi-
scopalem

scopalem esse collatam. In quâ una Cathedra, unitas ab omnibus servaretur &c. Vt iam schismaticus & peccator esset, qui contrâ singularem cathedram, alteram collocaret. S. Hieron. lib. contra Jovinianum: Inter duodecim unus eligitur, ut capite constituto, schismatis tolleretur occasio. Illius unitatis rationem reddidit Paulus ad Ephes. 4. 5. Unus Deus, una Fides, unum Baptisma, atquè adeò, ut illi plenè responderetur, unus Supremus in terris Iudex, & visibilis Christi Vicarius constitui debuit: cujus potestas indefinente successionē, in finem usquē sæculi conservaretur: ut esset velut turris Davidica, turris à facie inimici, in quâ illud Sophoniæ 3. 9. compleretur: Reddā populi labium electum, ut invocent omnes in nomine Domini, & serviant ei humero uno. Quasi diceret, Dabo Fidelibus caput unum visibile, ex cujus ore continuò pendeant, & sub quo conveniant ad fortiter sustētandam unam Fidem, unam doctrinam. Quod exactissimè commendatum reliquit Apostolus 1. ad Cor. 1. 10. Obsecro vos fratres per nomen Domini nostri Iesu Christi, ut idipsum dicatis omnes, & non sint in vobis schismata: sitis autem perfecti in

Est in eodem sensu & in eadem sententiâ. In unitate videlicet Apostolicæ Ecclesiæ, de quâ illud Isa. 19. 18. Civitas Solis vocabitur una. Ecclesia nempe Christi, qui Sol justitiæ est, & sponsam suam jugiter illuminat, tum per se, tum per eos quos dedit Pastores & Doctores, velut sydera, quibus illud dicitur Matth. 5. 14. Vos estis lux mundi. Qui uni, ut summo Pastori subsunt, unam in uno Christo Fidem docent, Aspicientes in authorem Fidei & consummatorem Iesum, qui proposito sibi gaudio sustinuit crucem. Vnde optimè Angelicus Doctor super illud Hebr. 13. 9. Doctrinis variis & peregrinis nolite abduci. Doctrina Fidei, inquit, una est, quia à puncto in punctum non convenit ducere nisi unam rectam lineam. Omnes alia doctrinae multae sunt, quia à recto multis modis contingit deviare. Et quandoquidem veritas, secundum Philosophum, consistat in indivisibili, hinc quicquid ab ejus tramite recedit, mendacium est. Quapropter in unicâ Romanâ Ecclesiâ, quæ una ab illâ unitate commendabilis est, veram Fidem & veram doctrinam est invenire. Vnde quamvis interdum ejus Doctores in particulari-
ribu

ribus opinionibus, eisquē indifferentibus, quæ principiis Fidei non adversantur, discrepent; cū in his liceat cuique suo sensu abundare: conveniunt tamē omnes in unitate doctrinæ Christianæ & Apostolicæ, ut iis rectè & appositè quadret illud Eccle. 12. II. *Verba Sapientium sicut stimuli, & quasi clavi in altum defixi; quæ per magistrorum consilium data sunt à Pastore uno. His amplius fili mi ne requiras.* Verba sapientium, inquit, eorum scilicet, quibus contigit sapientiam invenire in loco, quem constituit Dominus; in Ecclesiâ, inquam, quæ est *Columna & firmamentum veritatis*, ab uno summo Pastore de Cathedrâ Petri edocti: quales sunt Hieronymus, Augustinus, Chrysostomus, Basilus, & cæteri sancti Patres, & Ecclesiæ Doctores. Cū ergo Sedes illa semper fuerit radix Ecclesiasticæ unitatis, oportuit omnes alias Ecclesias, quæ in illâ unitate Catholicâ vellet communicare, ad eam velut notissimum signum & aquilam Imperatoriam Christiani exercitus aspicere. Ad quam etiā perpetuò ab ipsis nascentis Ecclesiæ initiis, velut ad sacram anchoram recursum

sum est, ut patet ex Sancto imprimis Hieronymo, cujus unius testimonium sufficiens sit, ut quoslibet Novatores confundat. Epist. igitur de monogamiâ, ad Aguruchiam 11. cap. 3. *Antè annos plurimos, inquit, cùm in chartis Ecclesiasticis juvarem Damasum Romanæ urbis Episcopum, & Orientis atquè Occidentis Synodicis consultationibus responderem.* Orientis & Occidentis, ut ex quâlibet parte mundi, à quâvis particulari Ecclesiâ Romanam Sedem consultam videas: uti etiâ eundem locum intelligit Rheatinus Episcopus, cùm ait; *Audis quod ex toto orbe, & ab omnibus Synodis ad consulendam Apostolicam Romanam Sedem mittebatur.* Exindè verò, ubi se in Orientis deserta recepisset Sanctus Hieronymus, ibidè reperit admirabiles difficultates inter doctiores, circa formam & modum loquendi de mysterio Sanctissimæ Trinitatis: an scilicèt tres hypostases admittēde essent? Quæ altercatio potiùs circa modum loquendi, quàm sentiendi de substantiâ mysterii videbatur. Quare Epist. 57. & 58. scripsit Summo Pontifici Damaso, cupiens ab eo edoceri modum loquendi.

quendi. *Quoniam vetusto, inquit, Oriens inter se populorum furore collisus, indiscissam Domini tunicam, & desuper textam, minutatim per frustra discerpit, & Christi vineam exterminant vulpes: ideo mihi Cathedram Petri, & Fidem Apostolico ore laudatam censui consulendam, &c. Vbicumque fuerit corpus, illuc congregabuntur & aquile &c. Apud vos solos incorrupta Patrum servatur hereditas, ibi cespitem terra fecundo, Dominici seminis puritatem centeno fructu refert. Et infra: Quamquam igitur tui me terreat magnitudo, invitat tamen humanitas, à Sacerdote victimam salutis, à Pastore præsidium ovium flagito: cum successore Piscatoris, & discipulo crucis loquor. Ego nullum primum, nisi Christum sequens, Beatitudini tue, id est, Cathedre Petri communione consocior. Super illam petram edificatam Ecclesiam scio. Quicumque extra hanc domum agnum comederit, prophanus est. Si quis in arcà Noe non fuerit, peribit. Et mox: Quicumque tecum non colligit, spargit. Et in fine ejusdem: Quamobrem obtestor Beatitudinem tuam, per Crucifixum mundi salutem, per ὁ μ. & ο. ι. ο. ν. Trinitatem, ut mihi epistolis tuis, sive tacendarum, sive dicendarum hypostaseon detur auctoritas.*

Hæc

Hec Hiero. Admiremur eminentissimum Ecclesię Doctore, quem totus mundus plenis faucibus maximum proclamat. Literas petit à Pontifice, quibus modus loquendi ei præscribatur; imbutus ipse à Deo altissimâ & absconditâ maximè divinarum Scripturarum, mysteriorumque intelligentiâ, linguarum Latinæ, Græcæ, Chaldaicæ, Hebraicæ peritissimus, cui proinde commissam oportuit antiqui & novi Testamenti translationem. Addiscant Calvinus & Lutherus, eorumque sequaces. Addiscant Novatores, & erudiantur, ubi sit sapientiâ, & *locus intelligentiæ ejus*. Ad D. Hieron. confugerunt aliquando ad perscrutandas Sacras Litteras August. & pleraque alia lucidissima Ecclesiæ lumina: nihilominus ipse se judicio Romani Pontificis sistit, de sententiâ suâ non securus, nisi eam suprâ firmam petram fundet, & allidat. Verè Beatus secundum illud Psal. 136. ult. *Beatus, qui tenebit & allidet parvulos tuos ad petram*. Parvulos suos, discursus videlicet, & conceptus proprii intellectus adherere faciet Petræ, nempe Cathedræ Petri, quæ est Columna & firmamen-

mamentum veritatis; Nec solum voluit magister admirabilis à Summo Pontifice edoceri, circà substantiam mysteriorum: sed etiàm circà modum loquendi, ut colligere est ex ejusdem epistolæ verbis, *Nescio quid veneni in syllabis latet*: Ac propterea verba exigit, quibus explicari debeant, & subjunxit, *Discernite si placet, obsecro: non timebo tres hypostasies dicere, si jubetis. Cōdatur nova pòst Nicenam Fides, & similibus verbis cum Arianis confiteamur Orthodoxi*. Perpendite hyperbolem. Sciebat Papā errare non posse, ideoque asserit se recepturum quidquid è Cathedrâ dictāret. Ad eum modum quo Paulus ad Gal. 1. 8. *Sed licet nos, aut Angelus de cælo evangelizet vobis, praterquam quod evangelizavimus vobis, anathema sit*. Non quod Angelus, aut ipse Pāulus aliquid ab Evangelio alienum essent docturi: sed ut commendet firmiter adhærendum esse definitionibus Ecclesiæ, & doctrinæ Apostolicæ. Ità S. Ireneus expendens quamdam sententiam S. Justinii Martyris lib. 4. contrà hæreses c. 14. *Præclarè, inquit, dixit Iustinus in libro quem scripsit contrà Marcionem, nè ipsi quidem Domino se*
Fidem

Fidem adhibiturum, si alium Deum, prater ipsum mundi fabricatorem ei denuntiaret. Et Clemens Papa lib. 1. Epist. 58. docet hanc fuisse propositionem Apostoli Petri disputantis contra Simonem Magum. Cùm verò Summus Pontifex Damasus distulisset respondere, scripsit Hieronym. Epist. 58. expostulans iterùm Romanæ Sedis definitionem: Hinc in tres partes, ait, scissa Ecclesia ad se rapere me festinat, Monachorum circa manentium antiqua in me surgit auctoritas. Ego interim clamito: Si quis Cathedra Petri jungitur, meus est. Idcirco obtestor Beatitudinem tuam, per crucem Domini, per necessarium Fidei nostræ decus, per passionem Christi, ut qui Apostolos honore sequeris, &c. mihi litteris tuis, apud quem in Syriâ debeam communicare, significes. Nec solum petiit sensum, sed & verba: ut colligere est ex epistolâ hanc præcedenti superiùs citatâ: Non sufficit sensus, ipsum nomen efflagitant. Sicùt Hieronymus, sic semper etiàm alii Ecclesiæ Doctores, tam Græci quam Latini, ex ore Summorum Pontificum verba vitæ deprompserunt: utpotè quibus illud Isaiæ c. 59. 21. dictum videtur; Spiritus meus, qui est

R in te,

in te, & verba mea, quæ posui in ore tuo, non deficient de ore tuo, & de ore seminis tui, & de ore seminis seminis tui, amodò & usquè in sempiternum. Ab hac unitate communionis & successionis recesserunt Hæretici, tum antiqui omnes, tum nostri temporis Lutherus, Calvinus, Zuinglius, Oecolampadius, & ceteri hujus farine, eorumque discipuli, & velut inobedientes mortui sunt.

Qui enim superbierit nolens obedire Sacerdotis imperio, qui pro tempore ministrat Domino, morietur homo ille. Deuteron. 17. 12. Superbia olim Philosophos in materiâ doctrinæ teste August. lib. 18. de civit. Dei cap. 41. per sectas sejunxit: nam Scientia inflat. Similiter Novatores spiritu superbiæ & ostentationis, in abissum divisionis, & omnium errorum præcipites egit, velut Babylonice turris architectos, quos linguarum confusio derepentè sequestravit; cum *inter superbos semper jurgia sint.* Prov. 13. 10. *Attendunt spiritibus erroris & doctrinis demoniorum in hypocrisi loquentium mendacium.* 1. Timoth. 4. 2. Profectò dicente Prophetâ Ose. 10. 2. *Divisum est cor eorum, nunc interibunt.* Superbia enim parens dis-

sentionis

sentionis est & mortis. Judam Iscariotem
 imitantur, qui conquerenti Domino; *Vnus*
vestrum me traditurus est: Matth. 26. 21. Re-
 spondit: *Numquid ego sum Rabbi?* Animad-
 verterunt Chrysost. Hieron. Euthimius in
 hoc cap. Matth. eum aliis Apostolis non
 se conformasse, respondentibus: *Numquid*
ego sum Domine? Eo quod infamis prodi-
 tor, Deum suum traditurus, conceperat
 divisionem, quam verbo & facto erat pari-
 turus. Sic isti reformatores Evangelii,
 quamprimùm spiritu divisionis agitati,
 translati sunt ab eo qui eos *vocavit in gra-*
tiam Christi in aliud Evangelium. Gal. 1. 6.
 Quod jam olim nobis predictum est de
 illis Isaïe 22. 9. *Scissuras civitatis David vi-*
debitis, quia multiplicatae sunt. Econtrà Ca-
 tholici & Orthodoxi omnes, dùm sunt in
 hoc mundo, & caliginoso loco, ab illâ Pe-
 tri Cathedrâ in unitate Fidei requirunt
 sapientiam, de quâ Salomon Sap. 9. 13.
Quis hominum poterit scire consilium Dei, aut
quis poterit cogitare quid velit Deus. Et v. 16.
Difficile estimamus quae in terrâ sunt, & quae
in prospectu sunt invenimus cum labore: quae
autem in caelis sunt, quis investigabit? Sensum

autem tuum quis sciet, nisi tu dederis sapientiam & miseris Spiritum Sanctum tuum de altissimis? Certè Sapiencia hæc non invenitur inter filios hujus sæculi, nec in terrâ suaviter viventium. Job cap. 28. vers. 13. Tantùm est invenire eam in Ecclesiâ Catholicâ : in quâ Cathedra Apostolica, velut Sol refulget : de quâ prædixit Zachar. 8. 3. Vocabitur Ierusalem civitas veritatis : De quâ & Apost. 1. Timot. 3. 15. Hæc tibi scribo, ut scias quomodò oporteat te in domo Dei conversari, quæ est Ecclesia Dei vivi, columna & firmamentum veritatis : Vbi eam quisquis Fidelis & Catholicus est, majorum suorum vestigiis insistent, querit. Illa enim est de quâ dixit Jacob Genes. 28. 16. Verè Dominus est in loco isto: Verè non est hic aliud, nisi domus Dei & porta Cæli. Hujus rectoribus dixit Christus Mat. 28. 20. Ecce ego vobiscum sum, omnibus diebus usquè ad cōsummationem sæculi. Quorum legitima & vera successio usquè ad hunc Urbanum VIII. in illâ Romanâ Sede perseveravit & etiānum perseverabit usquè ad finem mundi. Sed forsitan objicient Sectarii. Vndè nobis constet Urbanum VIII. verum esse Christi

Christi Vicarium & Petri successorem? Respondeo sufficienter constare ex eo, quod ut talis ab Ecclesiâ per totum Orbem diffusâ recognoscatur. Nequè enim Deus in re tanti momenti permiserit Fideles à veritate deviare. Nequè hoc indiget majori probatione, cum tantâ evidentiâ contestatum sit, ut non nisi cum pervicaciâ possit adversus illam successi-
onem contendere. Nàm si motiva Fidei, quæ humanâ cognitione & percipiuntur, & perpenduntur, Fide præcedenti credi deberent, nullum esset credendi initium, esset processus in infinitum. Cavillationes Hæreticorum in contrarium non curavit S. August. ut suprâ vidimus, *Tenet me in Ecclesiæ gremio ab ipsâ Sede Petri Apostoli, usquè ad præsentem Episcopatum, successio Sacerdotum.* Noluit etiâ eas alios fideles curare, cùm dixit: *Numerate Sacerdotes, vel ab ipsâ Sede Petri, & in ordine illo Patrum, quis cui successerit, videte.*

His igitur præmissis superest ut noeniis hominis consistorialis & Ministri Delphici respondeamus: quas omnes, neglectis quibusdâ nugis, ad quatuor capita di-

stinctionis & brevitatis causâ reduco. Vel enim arguit Summorum Pontificum splendorem & magnificētiam, quasi paupertati & humilitati Christi & suorum majorum minùs consentaneam: vel eosdem superbię damnat, quod Regiæ & Imperatoriæ Majestati suam præferant dignitatem: vel quod in ipsorum coronatione major illis reverentia exhibeatur, quàm Venerabili Sacramento: vel deniquè, quod Christi Vicarii non sint, sed Antichristi.

Quantùm ad pompam illam & splendorem externum: ille Pontificiæ Majestati, tam in eorum inauguratione & coronatione, quàm deindè in exercitio Pontificalis status apprimè debetur. Quis enim dixerit Summo Christi in terris Vicario summum honorem non competere? Qui terreni Principis vices obeunt, sive legationis provinciam, sive regimen Regni cujuspiam acceptarint, quamvis humili loco nati, & honores impenso admittere, & non impenso exigere possunt & tenentur. Si enim quæcumquè Proregi exhibetur reverentia, ipsi Regi exhiberi censetur: ità quæ Pontifici defertur veneratio,

ratio, non tam in ipsum, quàm in Christum redyndat, cujus Vicarium agit, ipso Christo attestante Math. 25. 40. *Quamdiù fecistis uni ex fratribus meis minimis, mihi fecistis.* Sicùt & vice versâ vituperia, contemptus, & irrisiones ipsi factæ, potius Deum tangunt, quàm ejus vices gerentem. Hînc Zacharię 2. 8. *Qui tetigerit vos, tangit pupillam oculi mei,* & 1. Reg. 8. 7. de Samuele, *Non te abjicerunt, sed me.* Perpendant Reformati Evangelii sectatores, quem abjiciant, quem spernant, dùm Vicarii Christi *dominationem spernunt, Majestatem autem blasphemant.* Porro illa hoc corrupto sæculo inter plerosque consuetudo est, ut magnifico cum apparatu incedentes faciliùs venerentur & impensius, externo splendore ducti. Expedi autem non modicùm subditos ad obedientiam ejus induci, cui Clementissimus Deus ad imperandum in rebus ad salutem animæ spectantibus provinciam legavit: & ad hoc plurimùm conducit apparatus iste exterior, & potestas, quo satiùs coerceantur effrenes, nè leve Christi jugum excutiant. Nec idcirco super-

bię aut arrogantię labeſ incurritur : ut tandē cognovit Anachorita ille , de quo in vitis Patrum , qui dū inanis gloriolę tentatione pulſaretur , quod omnes in paupertate & ſui abjectione ſuperare videretur : revelatione divinā nihilomimūſ didicit , Gregorium Papam in nullo ei cedere , quin imō multō eſſe ſuperiorem. Minorem nāmquę affectum in divitiis & honoribus collocarat Gregorius , quā Monachus ille in ſuā feliculā. Dices fortē non eſſe eandem Eccleſię modernę faciē , quę fuit aliquandō primitivę : in quā Petrum , Linum , Clementem , & ceteros Summos Pontifices uſquē ad prædictum Gregorium Fideles ſanctē & ſalubriter rexiffe , etiā ipſe Calvinus fateatur ; in ſummā paupertate , humili abjectione , & magnā parcimoniā vitam degentes ſanctiſſimam. Quasi verō quęlibet rerum mutatio illicō vitio vertenda ſit. Naſcente Eccleſiā ſuperborum & ſublimium colla humilitate Chriſtianā Evangelicę veritatis jugo ſubjicienda erant : infirma enim mundi elegerat Deus , ut confunderet fortia. Verum matureſcente
& quo-

& quodammodò senefcente populo Chriftiano, per majeftatem & splendorem in debitâ reverentiâ, ac reverenti obedienciâ, quò magis divina reluceret providentia, continendi erant tranfgreffores, nè una ovis putrida totum gregem inficeret. Ecclefie fuę exemplum ipfe Chriftus in hoc reliquit. Pauper & egenus natus eft in ftabulo: postmodum magnificus & gloriofus in monte Thabor apparuit. Opprobriis faturatus fuit in Cruce; postmodum victorẽ se exhibuit in Refurrectione, & in Afcenfione triumphatorem. Is etiâ fuit veteris Synagoge ftatus, quæ ab humillimâ paupertate, fenfim ad summam magnificentiam devenit. In illius primordiis Jacob post vifam in fomnis myfticam fcalam Genef. 28. 18. *Lapidem quem fupposuerat capiti fuo, erexit in titulum fundens oleum defuper.* Quid hoc edificio exterioribus oculis vilius? erat tamèn *Domus Dei & porta Cæli.* Locus verè Sanctus, in quo Angeli afcendebant & descendebant, cujus fummitati Deus innitebatur: Quid oculis internis eo gloriofius? Occulta illa & abfcondita Majeftas externo tandèm cultu

R 5 erat

erat propalanda. Vivente Moyse constructum est Tabernaculum Testimonii & Arca foederis. Deindè populo in infinitum poenè multiplicato, erectum est stupèdum illud orbis miraculum, Templum Salomonis, centum quinquaginta myriadum sumptibus expensis. Nec pretio parcitum fuit, nec auro. Sacerdotum, Cantorum, & Cantatricum, & Sacrificiorum quotidianorum copia poenè incredibilis. Deo ita volente, ut multiplicato populo, majus esset splendoris & magnificentiae incrementum. Attamen semper par fuit ubiquè gloria & majestas interna. Summitati prioris Templi Deus innitebatur: de secundo scriptum est Exod. 40. 32. *Ope-ruit nubes Tabernaculum Testimonii, & gloria Domini implevit illud. Nec poterat Moyses ingredi tectum foederis, nube operiente omnia, & majestate Domini coruscante.* De tertio 3. Reg. 8. 11. *Non poterant Sacerdotes stare & ministrare propter nebulam: impleverat enim gloria Domini domum Domini. Hæc autem omnia in figurâ contingebant illis. 1. Cor. 10. 11. & exindè in Ecclesiâ Christi sponsâ completa sunt: cujus tanto major gloria esse*

esse debuit, quanto pòst se veritas figuram,
 corpus umbram, Christus Moyſen, gratia
 legem intervallo relinquit. Attamen eâ-
 dem planè ratione, majestate & splendore
 ejus interno invariato, exterior in dies ma-
 jora ſumpſit incrementa. Vidit initium
 ſub piſcatoribus: deindè auctâ Fidelium
 multitudine ſplendidior. Perſecutionum
 nihilominùs pondere gravis, ad perfectum
 debitumque ſplendorem devenire non
 potuit. At demùm Regum & Imperato-
 rum ſceptriſ cognitâ veritate Chriſto ſub-
 jectis, eorundem ac cæterorum munifi-
 centiâ & liberalitate auctæ ſunt Eccleſiæ
 facultates. Templorum ornatus, & cultus
 divinus celebrior factus eſt, ſacrificia cre-
 briora, numeroſior copia Prælatorum,
 ſtatus externè ſplendidior. Quid mirum
 quod præcipuus honor, ſplendor & aucto-
 ritas in Romanum Pontificem congera-
 tur, qui caput omnium eſt? Quid mirum
 ſi ſellâ aut humeris ſive Principum, ſive
 aliorum, Vicarius Chriſti geſtetur, genu-
 flexione, & pedum oſculo ſalutetur, longo
 ſtipatus comitatu incedat? Quod autem
 Venerabile Eucharistiæ Sacramentum, in
 quo

quo verum Christi corpus realiter contineri, & credimus & confitemur, in hac solemnitate Pontificiæ coronationis præferatur (ut supponimus cùm hoc ipsum incertum sit) nihil indè sequitur vituperabile. Quid si præferatur in recognitionem collatæ tantæ majestatis & auctoritatis, ut eò flumina redeant, undè exierunt? Visi sunt aliquandò terreni Principes subditorum suorum nuptiis interesse, sponsis primas absquè præjudicio suæ dignitatis & majestatis deferre: cùm Christus Vicarii sui inaugurationi non intersit, qui influxu interno & invisibili juxta promissionem suam eam ratificat & confirmat? Quæcùm ità sint, mirum non est Reges & Imperatores, ea Summo Pontifici exhibere obsequia, quæ omni loco & tempore à quolibet mortalium ei debentur. Eo amplius, quantò Imperialis & Regia dignitas Pontificali inferior est. *Sicùt enim, teste Angelico Doctore opusc. de regim. Princip. lib. 3. cap. 10. anima rationalis excellit & longè superat corpus in suo esse & dignitate: ità regimen spirituale antecellit Regium & merè politicum, sive humanum.* Regimina enim, sicut

ficūt actiones morales & humanæ, à fine speciem & excellētiam desumunt. Quantum ergò æterna & coelestis tranquillitas, quæ finis est regiminis spiritalis, terrenam & temporalem, quæ finis est merè politici exsuperat, tantum Princeps Ecclesiasticus sæculares quâvis dignitate fulgentes. Summus itaque *Pontifex ex hominibus quidè assumptus, pro hominibus constituitur in iis quæ sunt ad Deum*, nec indebitum sumit sibi honorem, cum sit vocatus à Deo tamquàm Aaron: adeoque jure merito Patri communi & Pastori universali Imperatores & Reges, more suorum majorum jam à tot sæculis in Ecclesiâ servato absquè ullâ controversiâ illum honorem impendunt, juxtà monitum Apostoli Ro. 13. 7. *Reddite ergò omnibus debita, cui tributum, tributum, cui vectigal, vectigal, cui timorem, timorem, cui honorem, honorem*. Soli Sectarii resistunt potestati & Divinæ ordinationi, excutientes omne jugum, ut effrenes suos appetitus sequantur. Quibus accommodari potest illud Threnor. 1. 5. *Facti sunt hostes ejus in capite: vel ut Septuaginta vertunt, in caput*. Quia nimirum ab hoc

tenet, in illo ipso splendore quo pridem. Necdùm etiàm venerunt duo illi testes, qui per trium annorum spatium amicti sacco & cilicio, Antichristo resistent: à quo tandèm interfecti à mortuis resurgent. Apocalyp. 2. Nequè Lutherus & Calvinus duo illi testes & Prophetæ fuerint, cùm nullum eis signum conveniat ex illis quæ ab Apostolo enumerantur. Restiterunt quidèm impudēter Pontifici; sed non in sacco & cilicio, cùm carnales fuerint; nequè interfecti sunt, nequè resurrexerunt etiamnùm. Hæc breviter de Pontificibus Romanis in genere dicta sufficiant, de quibus latiùs apud neothericos. Nunc unico verbo respondendum ad illud quod Minister Delphicus objicit de Innocentio III. quod tom. 3. Conciliorum accingentibus se ad bellum transmarinum distribuat augmenta gloriæ? Nihil simile umquàm Innocentius III. somniavit. Nequè enim loco citato aliud facit, quàm polliceri rectè facientibus, secundùm bona opera, in cœlis salutis eterne augmentum: quod Christus ipse asseverare non dubitavit Matth. 16. 27. *Filius enim hominis venturus*

venturus est in gloriâ Patris sui, cum Angelis suis, & tunc reddet unicuique secundum opera ejus. Et D. Paulus Rom. 2. 6. *Theſaurizas tibi iram in die iræ, & revelationis juſti judicii Dei, qui reddet unicuique secundum opera ejus.* Et Sapiens Prover. 24. 12. *Qui inſpector eſt cordis, ipſe intelligit, & Servatorem animæ tuæ nihil fallit, reddetq; homini juxta opera ſua.* Ut verò impoſtura hominis toti mundo pateſcat, & ex ungue leonem quilibet agnoſcat, ipſiſſima Innocentii III. verba ſubnecto. *Nos igitur omnipotentis Dei miſericordiâ & Apoſtolorum Petri & Pauli auctoritate confiſi, ex illâ quàm nobis, licet indignè, Deus ligandi atque ſolvendi contulit poteſtatem, omnibus qui laborem propriis perſonis ſubierint & expenſis, plenam ſuorum peccaminum, de quibus liberaliter fuerint corde contriti & confeſſi, veniam indulgemus, & in retributione juſtorum ſalutis æternæ pollicemur augmentum.* Aliud eſt diſtribuere, aliud polliceri. Diſtribuit Innocentius ex theſauro Eccleſiæ Indulgentias, juxta poteſtatem (ut ſuprà vidimus pag. 160.) ſibi ab antiquo conceſſam. Augmenta verò ſalutis æternæ non diſtribuit, ſed pollicetur. Sicùt & ego
Emanueli

Emanueli nostro, si convertatur & in sancto proposito usque in finem perseveraverit, vitam æternam polliceor. Si verò prætereà heroïcis virtutibus, atque pluribus bonis operibus incubuerit, juxtà opera sua, augmenta gloriæ promitto. Circà Bonifacii VIII. gesta quæ nobis obtrudit, authorem suum in promptu habet Carolum Molinæum Gallum; juxtà indicem librorum prohibitorum in primâ classe, graviter de hæresi suspectum. Certè in his & in multis aliis, homini malè fido ægrè fido, præsertim quod tam malæ causæ pejus patrociniū quærat.

MOTIVVM XXXVII.

QUOD Romanus Pontifex vendicet sibi potestatem, quam etià alii Sacerdotes exinde participant, rerum substantias remanentibus iisdem accidētibus immutandi. Quàm immutationem Romana Ecclesia vocat Trāsubstantiationem: res, ut putat, inaudita. Quod nequè in veteri, nequè in novo Testamento, nequè juxtà naturalem rerum ordinem, nequè supernaturalem, Deus umquàm quid simile fecerit.

S

cerit.

cerit. Quod ut ignaris hoc persuadeatur, oporteat adimere iis usum sensuum. Quod illud inter regulas Societatis J E S V proponatur, quo in Fide Romana Religionis confirmetur; quod si Ecclesia Catholica definiat aliquid esse nigrum, quod oculis nostris videatur esse album, potius nigrum credant quàm album. Quod Gabriel Biel super Canonem Missæ, dicat cælos ad verbum Sacerdotis esse apertos, & majoris eum esse potestatis, quàm Angeli aut Diva Virgo: quæ etiàmsi omnem creaturam superet plenitudine gratiæ; tedit tamen illis, quibus regimen Ecclesiæ commissum est circa executionem mysteriorum. Invehitur deindè in similes plures modos loquendi Catholicorum, ut quod eadem potestas tam malo quàm bono Sacerdoti conveniat, ad quorum verba Cæli aperiantur. Quod Romana Religio destruat plures articulos Symboli Apostolorum. Quod corpus illud quod Sacerdos sumit in Missâ, non sit de semine David, nequè conceptum de Mariâ virgine, nequè in ipsius utero formatum, sed quod sit panis coctus inter duo ferra, &c. qui distribuatur inter viginti millia communicantium, si urbem unam spectes: si verò totum mundum inter infinita: atquè panem illum faciant infinitum & Deum. Quod
 contrà

contrà Articulum illum Fidei: Sedet ad dexteram Dei Patris, Christum ponant in pluribus locis. Plerasq; similes nugas homine serio indignas siccè prætereo, quod responsum non mereantur. Ecce, Candide Lector, argumenta quibus Catholicam veritatem, circa Sacrosanctum Eucharistiæ Sacramentum, hic consistorii Delphici Doctor demoliri conatur.

R E S P O N D E T V R.

Ex Fide potius quàm ex ratione, & naturâ, Corporis Christi in Eucharistiâ veritatem, quæ hic ostenditur, esse indagandam.

IN Sanctissimum Eucharistiæ Sacramentum, & Deum ipsum, relictis creaturis, modò virulentam linguam convertit. Molitur ab Ecclesiâ divinum æternæ hæreditatis pignus, & miseræ hujus viæ, vitæque solatium quàm maximum dimovere. Stulti Novatores & tardi corde ad credendum, insaniunt in his, quæ tam apertè scripta sunt in singulis quatuor

cerit. Quod ut ignaris hoc persuadeatur, oporteat adimere iis usum sensuum. Quod illud inter regulas Societatis J E S V proponatur, quo in Fide Romana Religionis confirmetur; quod si Ecclesia Catholica definiat aliquid esse nigrum, quod oculis nostris videatur esse album, potius nigrum credant quàm album. Quod Gabriel Biel super Canonem Missæ, dicat cælos ad verbum Sacerdotis esse apertos, & majoris eum esse potestatis, quàm Angeli aut Diva Virgo: quæ etiã si omnem creaturam superet plenitudine gratiæ; tedit tamen illis, quibus regimen Ecclesiæ commissum est circà executionem mysteriorum. Invehitur deindè in similes plures modos loquendi Catholicorum, ut quod eadem potestas tam malo quàm bono Sacerdoti conveniat, ad quorum verba Cæli aperiantur. Quod Romana Religio destruat plures articulos Symboli Apostolorum. Quod corpus illud quod Sacerdos sumit in Missâ, non sit de semine David, nequè conceptum de Mariâ virgine, nequè in ipsius utero formatum, sed quod sit panis coctus inter duo ferra, &c. qui distribuatur inter viginti millia communicantium, si urbem unam spectes: si verò totum mundum inter infinita: atquè panem illum faciant infinitum & Deum. Quod
 contrà

contrà Articulum illum Fidei: Sedet ad dexteram Dei Patris, Christum ponant in pluribus locis. Plerasq; similes nugas homine serio indignas succè prætereo, quod responsum non mereantur. Ecce, Candide Lector, argumenta quibus Catholicam veritatem, circa Sacrosanctum Eucharistiæ Sacramentum, hic consistorii Delphici Doctor demoliri conatur.

R E S P O N D E T V R.

Ex Fide potius quàm ex ratione, & naturâ, Corporis Christi in Eucharistiâ veritatem, quæ hîc ostenditur, esse indagandam.

IN Sanctissimum Eucharistiæ Sacramentum, & Deum ipsum, relictis creaturis, modò virulentam linguam convertit. Molitur ab Ecclesiâ divinum æternæ hæreditatis pignus, & miseræ hujus viæ, vitæque solatium quàm maximum dimovere. Stulti Novatores & tardi corde ad credendum, insaniunt in his, quæ tam apertè scripta sunt in singulis quatuor

Evangeliiis, & in Epistolâ Pauli ad Corinthios : ut vix Grammatici ulli, quantumcûmque etiâ conarētur, verbis perspicacioribus nobis mysterium hoc declarare possint. Coenantibus discipulis Math. 26. 26. *Accipit Iesus panem & benedixit ac fregit, deditq; Discipulis suis, & ait : Accipite & comedite : Hoc est corpus meum. Et accipiens calicem gratias egit, & dedit illis dicens : Bibite ex hoc omnes : Hic est enim sanguis meus.* Quid clariùs ? non ampliùs panis est, non vinum : sed corpus, sed sanguis. Quicûmque Christiani sunt, Christo credant, non sensibus, quos decipi frequenter contingit. Errare non potest Christus. Via ipse, veritas & vita est. Nequè quod oculis videtur, creditur. *Est enim fides sperandarum substantia rerum, argumentum non apparentium* Hebr. 11. 1. Non apparet in hoc augustissimo mysterio corporeis oculis Christi corpus & sanguis : sufficiat Christum dixisse. *Hoc est corpus meum, Hic est sanguis meus*, ut ibi esse corpus & sanguis ejus credantur. In hoc enim potissimum inenitet fides & Religionis orthodoxæ excellentia, quod ab his quæ suprâ naturam

naturam sunt, capiat incrementum. Vul-
 gare Hæreticis est, Quod sensu aut ratione
 non capio, non credo. Intrepidè quisquis
 orthodoxus est etià ea, quæ suprà ratio-
 nem humanam sunt, Deo revelante &
 dicente, quia hoc est, credit & sustinet.
 Clamitet Calvinus cum sequacibus suis;
 Figura est, umbra est, non veritas: & so-
 la sibi pervicacia fundamentum sit. Si
 enim ad Sanctos Patres recurrat, tam-
 quàm hospes & advena, à totâ antiquita-
 te respuitur, quæ ab ipsis Apostolorum
 temporibus usquè in hanc diem hunc lo-
 cum semper litteraliter intellexit. Si ad
 Sacras Litteras; velut earum proffututor
 retunditur. Clamant Evangelistæ, &
 Christum asseverantem inducunt, Math.
 26. 26. *Hoc est corpus meum.* Marci 14. 24.
Hic est sanguis meus, & rursùm Luc. 22. 19.
Hoc est corpus meum, & Joan. 6. 56. *Caro*
enim mea verè est cibus, & sanguis meus verè
est potus. Intellige figuratè, si potes. *Verè*
dicit, non figuratè, non tropicè. *Verè di-*
cit est cibus, non verus est cibus: ut om-
 nem figuram, omnem tropum, remove-
 at, & se ostendat in omni proprietate lo-

qui. Non sicùt aliàs, *Ego sum vitis vera* Joan. 15. 1. *Vitis vera*, non propriè, sed comparativè; quò se viti veræ comparet, non viti alienæ, quæ expectatata *ut faceret uvas, fecit labruscas*. Isa. 5. 4. Ita August. ferm. 80. in Joannem: *Hoc est corpus meum. Hic est sanguis meus. Verè cibis, verè potus*: non comparativè, sed propriè. Nisi enim manducaveritis: quid? an figuram & imaginem? nihil minùs. *Amen Amen dico vobis, nisi manducaveritis carnem Filii hominis, & biberitis ejus sanguinem, non habebitis vitam in nobis*, Joan. 6. 54. Verba lucè meridianâ clariora sunt: quid ad similitudines recurritur? *Ego sum*, inquit, *panis vivus, qui de Cælo descendi, si quis manducaverit ex hoc pane, vivet in æternum: & panis quem ego dabo, caro mea est pro mundi vitâ. Litigabant ergò Iudæi ad invicem, dicentes: Quomodo potest hic nobis carnem suam dare ad manducandum?* Joan. 6. 51. 52. & 53. *Litigabant Iudæi, litigant Calvinistæ. Quomodo potest hic nobis carnem suam dare ad manducandum?* Deus est: hoc potest, rerum substantias convertendo. Omnipotens est: panem in corporis sui, vinum in sanguinis

sanguinis substantiam supernaturaliter convertit. Scandalizentur Judæi, scandalizentur Calvinistæ. *Durus est hic sermo & quis potest eum audire?* ibidem v. 61. durus Judæis, durus Calvinistis. Non credunt Christo: sed *numquid incredulitas eorum, Fidem Dei evacuabit?* absit. Rom. 3. 3. *Sciebat enim ab initio JESVS, qui essent non credentes, & quis traditurus esset eum.* Joan. 6. 65. Sciebat non credituros Judæos, non credituros Calvinistas: potius eum tradituros: quod non rarò faciunt, ubi pugionibus & gladiis sacras Hostias confodiunt, & sacrosancto Sanguine, ad miraculum interdum effluente, in cōfusionem vestram sacrilegas manus respergunt. *Durus est hic sermo:* superat captum credere nolentium: scandalizantur. Sed audiant Christum increpantem, Joan. 6. 63. *Hoc vos scandalizat? Si ergò videritis filium hominis ascendentem, ubi erat prius? Vtrumquè credant igitur, vel neutrum; cùm utrumquè suprà captum sensus humani sit. Multi discipulorum ejus abiērunt retrò, & jam non cum illo ambulabant. Abeunt & retrò Calvinistæ, nec cum illo ambulant. Cūr verò*

ita Judæi mittentes manum suam ad aratrum , velut inepti regno Dei abiêrunt retrò ? Loquebatur Christus de verâ & reali comestione carnis suæ ; illi non capiebant verbum hoc, *Durus hic sermo*. Non poterant eum audire. Audivissent utiquè & intellexissent, (nihil enim cōtrâ captum rationis dixisset) si symbolicè & figuratè locutus fuisset, non de veritate, sed de similitudine: nec tam facilè abiissent retrò. Sed ut ostenderent, quod aliquid suprâ naturam audiêrant, litigabant ad invicem dicentes : *Quomodò potest hic nobis carnem suam dare ad manducandum?* Christus tamen, qui deceptor animarum non est, iteratò jurejurando ingeminat, *Amen Amen dico vobis, nisi manducaveritis carnem filii hominis & biberitis ejus sanguinem, non habebitis vitam in vobis*: ut intelligant eum symbolicè non loqui , & credant aliquandò quod non intelligunt, etiàm renitente ordine naturæ, qui cum cœlo & terrâ transibit, at *Verbum Domini manet in æternum*. Psa. 116.2. Dubitabant solùm Judæi: *Durus est hic sermo*. At numquàm eò impudentiæ devenerunt, quò Calvinistæ nostri, ut penitùs

penitus inficiarentur, & absolute negarent. Hoc est, non corpus meum, sed figura corporis mei: non sanguis meus, sed figura sanguis mei. Nequè enim plus Hæretici Venerabili Eucharistiæ tribuunt, quàm manne, agno Paschali, & antiquæ Legis figuris. Judæus Christum crucifixit inter homines visibiliter conversantem: non veretur Calvinista in Venerabili Sacramento realiter presentem, opprobriis onerare, & injuriis, ac Diomede crudelior, equis manducandum objicere. Dicet fortè non se Christum, sed ejus figuram profanare. Profectò non Judaicum, non Christianum, sed diabolicum est Redemptoris sui, Creatoris, & Conservatoris imaginem contemnere: ubi *dæmones credunt & contremiscunt*. Pro minori crimine Judæi audiverunt. Joan. 8. 44. *Vos ex patre diabolo estis*. Certè novum illud & Calvinisticum Evangelium, nè dicam commentum, non posset nisi ex reconditissimis Inferni cavernis prodire, quod tales insolentias in Christi figuram, imò in ipsum Christum exerceri adeò maliciosè permittit & docet. Alienum à Christo est, ut ostendi,

alienum ab Oecumenicis Conciliis, & à Sanctis Patribus : quod modò auctoritatibus paucis ex multis selectis facile demonstrabo . Pretereo illos qui copiosius hâc de re scripserunt. Sufficiet imprimis S. Cyprianus *serm. de coenâ Dom. Panis iste non effigie* (notent Novatores) *sed naturâ mutatus, omnipotentiâ Dei factus est caro.* S Hilar. l. 8. de Trinit. *De veritate, inquit, carnis & sanguinis non est relictus ambigendi locus.* Eusebius Emiffenus relatus in c. quia corpus. de consecr. dist. 2. *Cælestis confirmat auctoritas, quia caro mea verè est cibus, & sanguis meus verè est potus. Recedat ergò omne infidelitatis ambiguum, quandoquidem qui auctor est muneris, ipse etiâ testis est veritatis: nam invisibilis sacerdos, visibiles creaturas in substantiam corporis & sanguinis sui verbo suo secretâ potestate convertit.* Ambr. lib. 4. de Sacram. c. 4. *Panis est usitatus : sed panis iste, panis est antè verba sacramentorum. Vbi accesserit consecratio, de pane fit caro Christi.* Vnum superaddo August. *serm. 28. de verbis Domini. tom. 10. Dixi vobis, quod antè verba Christi, quod offertur, panis dicatur: ubi Christi verba deprompta fuerint, jam non*

non panis dicitur, sed corpus appellatur. Et in Psal. 33. David ferebatur manibus suis: manibus suis nemo portatur. Quomodo intelligatur in ipso David secundum litteram non invenimus, in Christo autem invenimus; ferebatur enim Christus manibus suis, quando commendans ipsum corpus suum ait, Hoc est corpus meum: ferebatur enim illud corpus in manibus suis. Quod de reali & vero corpore intelligi debet, cum alioquin David & quilibet alius sine difficultate figuram suam in manibus portare possit. Idem August. relatus in cap. utrum. dist. 2. Corpus Christi & veritas, & figura est: veritas, dum corpus Christi & sanguis virtute Spiritus Sancti, in virtute ipsius ex panis & vini substantia efficitur: figura vero est id quod exterius sentitur. Denique Cyrillus Noster Hierosolymitanus Cathedra 4. sic habet: Cum Christus ipse dicat, Hoc est corpus meum, quis deinceps audeat dubitare? Et inferius: Aquam olim in vinum convertit in Cana Galilee, & non erit dignus cui credatur, quod vinum in sanguinem transmutarit? Hec itaque Catholica veritas sic antiquorum Patrum & omnium Orthodoxorum semper mentibus infedit, ut & ab

& ab invitis confessionem extorserit. Ipse Calvinus hujus acerrimus impugnator libello de Cœn. Domini, quasi palinodiam canit; rarò enim contingit mendacem sibi semper esse similem: aut saltèm testimoniorum evidentiâ convictus, sententiam suam fraudulenter textit sub nomine præsentiae virus suum cooperiundo. *Necesse est*, inquit, *nos in cœnâ verè corpus & sanguinem Christi recipere*: & infrà: *Intelligimus Christum nobis in cœnâ veram propriamq; corporis & sanguinis sui substantiam donare*. Et in 1. ad Corinth. 2. *Concludo realiter, ut vulgò loquuntur, nobis in cœnâ dari corpus Christi*. Et lib. 4. Instit. cap. 17. §. 32. *In sacra cœnâ jubet me sub symbolo panis & vini, corpus & sanguinem suum sumere, manducare, ac bibere. Nihil dubito quin & ipse verè porrigat & ipse recipiam*. Audiamus ejusdem scholæ hominem, Plessœum lib. 4. de Euch. c. 2. *Dùm sacra cœna, inquit, ex præscripto Christi celebratur, Christum realiter & substantialiter recipimus*. Accessit his cæcus & cæcorum dux Lutherus in epist. ad Argentinenses. *Vellem, inquit, posset mihi aliquis persuadere nihil esse in Eucharistiâ, præ-*
ter

ter panem & vinū: magno ille me beneficio devinciret. Iā sapè gravibus curis in hâc materiâ desudavi, (ibidē testatur se quinque annos in eo studio posuisse) & videbā me hoc modo plurimū posse Papatui incommodare. Verūm ego me captum video, nullā elabendi viā relictā: textus Evangelii nimis est apertus. Quod hoc Lutherus concedat, Evangelii claritas facit. Agnovit realem Christi in Sacramento præsentiam, etiā eunte libidine in contrarium. In eo tamē à veritate deviavit, cū afferit panem & vinum simul cum substantiâ corporis & sanguinis Christi remanere: ita ut simul panis triticeus, & panis qui de Cœlo descendit, per modum unius butyracii more Belgico manducetur. Cujus asserti falsitas vel ex eo maximè colligi potest, quod id fieri deberet, vel per unionem hypostaticam, vel simplicem conjunctionem aut contiguationem. Per unionem hypostaticam fieri, dici non potest, cū novum ibi esset mysteriū Incarnationis credendū, seu potius impanationis: assumeret enim Christus naturam panis, sicut naturam humanam assumpsit: & quemadmodū
vera

vera hæc est propositio & de fide: *Verbum caro factum est*, ita etiã illa esse deberet, *Verbum panis factũ est*. Deberet itaque fieri per nudam conjunctionem, aut contiguationem, contrà expressam Christi mentem. Nequẽ enim ex eo quod panis butyro jungatur, vel corpus aliquod alteri per penetrationem connectatur, unum aliud esse dici potest: Christo nihilominus dicente, *Hoc est corpus meum, Hic est sanguis meus, Panis quem ego dabo caro mea est &c.* Restat ergò, ut cum SS. Patribus & totã antiquitate dicamus, quod panis & vinum in corpus & sanguinem Christi realiter convertantur & transubstantientur, unã substantiã in alteram transeunte vi verborum consecrationis, cùm illa Lutheri assertio & positio teste D. Thoma 3. p. q. 75. art. 2. in corp. contrarietur formæ hujus Sacramenti, in quã dicitur, *Hoc est corpus meum. Quod non esset verum, si substantia panis ibi remaneret. Numquã enim substantia panis est corpus Christi, sed potius esset dicendum, Hic est corpus meum.* Nec est quod in vocem illam *transubstantiatio* debacchentur hæretici (ut objectionibus Delphici

Delphici Magistri tandèm satisfaciam) cùm rei veritas ipsi patrocinetur, & nomen ipsum cōgruentissimum sit. Rem ipsam ex verbis Christi probavimus, quantumcūque obganniant. Audiant tamèn iterùm S. Ambrosium validissimum hæreticorum malleum lib. de iis qui myster. init. cap. 9. *Sacramentum istud, quod accipis, Christi sermone conficitur. Quod si tantum valuit sermo Eliæ, ut ignem de Cælo deponeret, non valebit sermo Christi, ut species mutet elementorum? De totius mundi operibus legisti, quia ipse dixit, & facta sunt: ipse mandavit & creata sunt. Sermo ergò Christi qui potuit de nihilo facere quod non erat, non potest ea quæ sunt in id mutare quod non erant? Non enim minùs est, novas rebus dare quàm mutare naturas. Numquid in naturæ usus præcessit cùm JESVS ex MARIA nasceretur? Si ordinem querimus, viro mixta fæmina generare consuevit. Liquet ergò quod præter naturæ ordinem Virgo generavit, & hoc quod conficimus, corpus ex Virgine est. Quid hîc queris naturæ ordinem in Christi corpore, cùm præter naturam sit ipse JESVS partus ex Virgine. Ipse clamat Dominus JESVS, Hoc est corpus*

corpus meum. Ità præclarè S. Doctor, conversionem substantiæ in substantiam expressis verbis nos docet. Eamdem verò in sacris Litteris & aliàs auditam esse patet ex illo Joan. 2.7. quandò Christus in Canâ Galileæ aquam in vinum commutavit. *Dicit eis JESVS: Implete hydrias aquâ: & impleverunt eas usquè ad summum: & dicit eis JESVS: Haurite nunc. Vt autem gustavit Architrclinus aquam in vinum factam, & non sciebat undè esset, ministri autem sciebant.* Vndè nec mirum esse debet, conversionem similem in hoc augustissimo Sacramento fieri; super quo factò appositissimè B. Cyrillus Hierosolymitanus Catechesi. 4. Mystag. *Aquam, inquit, mutavit in vinum in Canâ Galileæ solâ voluntate: & non erit dignus cui credamus, quod vinum in sanguinem transmutasset? Si enim ad nuptias corporeas invitatus stupendum miraculum operatus est: cùr non multò magis corpus & sanguinem suum filiis sponsi dedisse illum confitabimur? Nàm sub specie panis datur tibi corpus, sub specie vini sanguis Christi: etiàmsi sensus tibi aliud renuntiet, Fides tamèn te confirmat. Procertissimò habe panem hunc qui videtur à nobis, non esse*

esse panem, etiã si gustus panem esse sentiat: & vinum quod à nobis conspicitur, tamẽ si sensus gustus vinum esse videatur, non tamẽ vinum, sed sanguinem esse Christi. Quamobrẽm non malẽ determinat Societas JESV, standum potiùs esse & credendum verbis Christi & definitionibus Ecclesiæ, quàm propriis sensibus, etiã reluctantibus, cùm eos decipi in multis frequens sit. Quod autẽ tanta potestas solis Sacerdotibus competat, nihil absurdi. Quod ad nutum eorum cæli aperti sint, ut rectissimẽ docet Gabriel Biel, nullum inconueniens. Ità & Greg. lib. 4. dialog. c. 58. *Quis Fidelium dubitare possit in ipsã immolationis horã ad Sacerdotis vocem cælos aperiri, in illo Christi mysterio Angelorum choros adesse, unum quid ex visibilibus & invisibilibus fieri.* Placuit Domino ad tantam dignitatem ministros suos evehere, ut instrumenta suæ omnipotentix; non Angelos, non B. Virginem, quibus dictum non est, *Hoc facite in meam commemorationem.* Non ignoramus quidẽ solum Deum in hoc ineffabili opere per modum causæ principalis concurrere: Sacerdotes verò siue bonos, siue malos,

T per

per modum causæ instrumentalis , non propriâ virtute, sed divinâ; ut colligere est ex D. Ambr. lib. 4. c. 4. de Sacram. *Reliqua omnia, inquit, quæ dicuntur, laudem Deo deferunt, oratio præmittitur pro populo, pro Regibus, pro cæteris. Vbi venit ut conficiatur Venerabile Sacramentum, jam non suis sermonibus Sacerdos, sed utitur sermonibus Christi. Ergò Christi sermo hoc conficit Sacramentum.* Et August. lib. de corpore Domini citatus in cap. utrùm de consecrat. dist. 2. *Intrâ Ecclesiam Catholicam, ait, in mysterio corporis & sanguinis Domini, nihil à bono majus, nihil à malo minus perficitur Sacerdote: quia non in merito consecrantis, sed in verbo perficitur Creatoris, & virtute Spiritus Sancti.* Ergò Christus ipse transmutat per Sacerdotem, tamquàm per instrumentum: ut qui Pater omnium existens, Virginis filius propter nostram salutem fieri non est dedignatus; sic nec dedignatur omnium Creator pro amore nostro à creaturâ suâ quasi creari. Non quidèm creatione propriè dictâ, cùm illa fiat de nihilo; sed per quamdam reproductionem ejusdem omninò corporis, quod ab Abraham, Davide, & gloriosâ Virgine

Virgine Mariâ accepit. Adeoq; non Deus
 triticeus est (ut non credentes blasphemant
 impii Calvinistæ) nequè inter duo
 ferra formatus: sed ille ipse qui conceptus
 est de Spiritu Sancto, natus ex Mariâ Vir-
 gine. Nequè opus ideò novo Symbolo
 Apostolico. Juramus omnes in verbo illi-
 us, quod in hanc usquè diem absquè ullâ
 adulteratione à temporibus Apostolorum
 semper in Ecclesiâ servatum est. Figura,
 gustus, quantitas, & qualitas panis, rema-
 nentes pòst consecrationẽ, accidentia cor-
 poris Christi non sunt; sed ibidẽ divinitus
 conservantur sine subjecto, ut Fides locum
 habeat. Quamobrẽ licèt interdum corrũ-
 pantur, aut à muribus rodantur, aut aliud
 quodvis incommodum patiantur, illud
 Christo Domino, aut corpori ejus non
 officit: cùm gloriosum sit, immortale &
 incorruptibile: nequè in Sacrà Eucharis-
 tiâ sit, velut in loco aut spatio circumscri-
 ptivè ut locum occupet, sed modo quo-
 dam spiritali, & sacramentali, ut cum
 Theologis loquar. Hinc fit quod etiã si
 diversis in locis plura hostiarum millia si-
 mul eodem tempore consecrentur, in to-

tidem mirante naturâ , divinâ verò omnipotentia operante , simul totus & idem Christus reperiatur. Non quod infinitatis attributum, soli divinitati debitum, corpori Salvatoris nostri attribuamus : cum hostiæ quantumvis innumerabiles , numquam infinitæ actu sint. Scimus Christum ad dexteram Patris ascendisse , undè venturus sit judicare vivos & mortuos, nequè dexteram Patris relinquere, nec ad singulas consecrationes in terram descendere , aut umquam de facto descendisse : sed credimus & confitemur illud ipsum corpus , quod in Coelis gloriosum sensibilibiter , visibilibiter , & cum omnibus suis dimensionibus & qualitatibus existit , in omnibus hostiis ritè consecratis , realiter & substantialiter reproductum esse & præsens, modo planè ineffabili , spirituali, indivisibili, sacramentali. Nec lubet ulterius indagare, cum sit suprâ modum & rationem humanam; mysterium Fidei, non naturæ . Sufficiat necessum est cuilibet Orthodoxo, quod Christus asseruerit hoc esse corpus suum : eò magis quod Ecclesia Catholica , & Apostolica ità perpetuò

petuò docuerit, & Sancti Patres à seculo in sæculum huc usquè passim sic cõfirmârint, ut non nisi infideli & pagano dubium esse possit. De cetero juxtà monitum Apostoli, captivamus intellectus nostros in obsequium Fidei: & existimamus, quod scrutatores majestatis plerumquè opprimantur à gloriâ: atquè, ut dicitur Sap. 9. 16. *Difficile æstimamus, quæ in terrâ sunt, & quæ in prospectu sunt invenimus cum labore: quæ autem in cælis sunt quis investigabit? Sensum autem tuum quis sciet, nisi tu dederis sapientiam, & miseris Spiritum Sanctum tuum de altissimis?*

M O T I V V M XXXVIII.

QUOD Ecclesia Romana in administratione Sacramentorum tantum à primitivâ Ecclesiâ distet, quantum factus suppositivus à legitimo; quantum sanus ab infirmo. Quod in Sacramento Baptismi conferendo tot novitates adinvenierit, quarum nullum vestigium sit in Sacris Litteris, aut in antiquitate fundatum: videlicet conjurationes & exorcismos salis, aquæ & olei, ut sint salus mentis & corporis, ad
T 3 ejiciendos

ejiciendos dæmones, morbosq; pellendos. Quod salem baptizandorum ori imponendum doceat, dicaturq; Salutare Sacramentum ad effugandum inimicum: ita ut videatur quasi salem pro octavo Sacramento admittere. Ridet deinde Ceremonias Ecclesiæ & exorcismos quos adhibet super baptizando. Interrogat undè sciant Ministri Ecclesiæ diabolum esse in corporibus puerorum, antequàm baptizarentur? Vndè habeant quod salivam suam auribus & naribus infantium ingerere debeant? Vndè, quod oleo eorum pectora & humeros ungere? Deinde mentionem facit aliquarum questionum, quæ inter Catholicos proponi solent: Vtrum Baptismus validè conferatur deficiente aquâ, in urinâ, jure, lixivio, aquâ rosacâ, nive, luto, &c. Postremò asserit, quod Catholici, omnes indifferenter utriusquè sexus, tam Fideles, quàm Infideles, Hæreticos, & Iudæos admittant, tamquàm veros ministros Sacramenti Baptismi: imò etiàm ipsum diabolum.

R E S-

RESPONDETUR.

*Nostras Baptismi cœremonias non esse
novas, ut sunt Calvinisticæ.*

V Idetur noster Delphicus muscas imitari hinc indè volitantes, & oportu-
nè, seu importunè omnia interturbantes,
& fœdantes. Nihil relinquit intactum;
optimè novit omnia carpere, sed nihil
probare. Verùm priusquàm cathegoricè
objecta refellam, velim respondeat hisce
paucis: Cùm Calvinus ejusque discipuli, in
Baptismo cœremonias adhibent, quæ nec
ex præcepto Divino, nec ex antiquo Ec-
clesiæ usu, aut sacris Litteris præscriptæ
sunt? Cùm infantem baptizandum præcisè
Dominico die, ubi frequentior est populi
concurfus, ad Ecclesiam deferri vult? Cùm
docet eos, qui infantem deferunt, debere
spondere se illum in morum ac Fidei præ-
ceptis instructuros? Vndè habet, quod no-
men baptizato tunc imponendum sit? Vn-
dè quod forma, linguâ vernaculâ pronun-
tianda? Vndè quod oratio Dominica,

Symbolum, & nonnullæ similes preces tunc recitandæ? Vestigium in sacris Literis, Sanctis Patribus, ac vetustis Ecclesiarum ritualibus monstraret. Circà nominis impositionem, eam à nobis mutuavit. Reliqua undè? Orationem Dominicam, Symbolum Apostolorum ex Scripturâ quidè desumpsit; sed baptismo esse applicanda, undè? Neque enim hæc aliundè quàm ex proprio cerebro Calvinus deprompsit. Itaque supponamus Pontificem aliquem Romanum cœremonias, quibus in Baptismo, aliisque Sacramentis utimur, suâ auctoritate induxisse: minorisne sit circà hæc Petri successor & Christi Vicarius, potestatis quàm Calvinus? Profectò si mutandi fuerint Ecclesię ritus, aut novi inducendi in Rempublicam Christianam, privatorum hominum & subditorum non fuit: sed eorum dumtaxat, quibus Deus Clementissimus ligandi & solvendi provinciam commisit: ne si hoc unicuique pro libitu liceret, brevi sibi dissimilis secundum singulorum ingeniorum varietatem, Ecclesia redderetur. Quibus incommodis subjacere non potest, quandò penes

caput

caput solum remanet illa potestas. Præsertim cum cœremoniæ illæ non sint de substantiâ Sacramenti, nec de jure divino, sed positivo. Constat nobis Calvinum hoc temerariè usurpassè inducendo incognita & inaudita: sed Pontificem suo jure hæc in parte usum fuisse non ità constat. Quandoquidè satis manifestum sit, Sanctam & Apostolicam Romanam Ecclesiam in Sacramentorum administratione vix aliis hucusquè usam cœremoniis, quàm illis ipsis quas continuâ successionè ab Apostolis accepit. Atquè adeò eas novitatis falsò accusant. Facile verò est omnium poenè illarum, non quidè originem, sed antiquissimum usum ex probatissimis auctoribus ostendere. De benedictione aquæ Dionysius Areopagita Apostolis coætaneus & Pauli discipulus mentionem facit Eccles. Hierarch. c. 2. de Baptismo his verbis. *Sacrâ appellatione, invocationeq; sanctificatis aquis, cum eas trinâ unguenti perfusione, Crucis specie perfecit, pariq; numero, sacrosanctarum unguenti asperersionum, &c.* Et infrà: *Ter quidè illum qui initiatur, demergit.* Vides, hæretice, antiquitatem: ni-

hil clariùs. Idèmetiàm docet Cyprianus lib. 1. epist. ult. Ambros. lib. 1. de Sacram. cap. 5. Basil. lib. de Spiritu Sancto c. 27. Vbi asserit hanc esse Apostolicam traditionem, & similiter Augustinus lib. 6. contrà Julianum cap. 8. & alibi diversis locis. De sale ori Catechumeni ingerendo testatur Conc. Carthaginese III. cap. 5. Origen. homil. 6. in Ezechielem. August. lib. 1. Confess. cap. 1. *Signabar*, inquit, *jàm signo crucis ejus, & condiebar ejus sale.* Etenim cùm sal sapientiæ sit symbolum, *Vos estis sal terræ*, Math. 5. 13. ori ejus, qui baptismum suscipit, imponitur, ut aptissimâ illâ coereconiâ, donum sapientiæ, unà cum Fide cæterisque virtutibus divinitus baptizatis infundi significetur; ipseque aliquandò mysteria Fidei cognoscat & suo tempore ore confiteantur, *Corde enim*, teste Apost. Rom. 10. 10. *creditur ad justitiam: ore autem confessio fit ad salutem.* Et quàmvis salutare Sacramentum ad fugandum inimicum ista salis impositio appelletur, non idcirco creditur distinctum à Baptismate constituere Sacramentum. Sed ibidè solùm accipitur pro Sacramentali;

mentali, seu Sacramenti accidente, vel
 cœremoniâ. Salus etiâ est mentis &
 corporis ad fugandos dœmones, mor-
 bosque pellendos, non tam vi propriâ,
 quàm orationis ab Ecclesiâ fusæ virtute,
 & Sacerdotis benedictione. Exorcismo-
 rum & conjurationum in expellendis ab
 homine dœmonibus efficaciam, eorum-
 que antiquitatem ostendunt imprimis
 Justinus in dialog. cum Triphone. *Illi, in-*
quit, per nomen JESV CHRISTI adju-
rati, nempè dœmones, nobis parent. Ter-
 tull. lib. de coronâ militum & alibi. Cy-
 prianus lib. ad Demetrianum circà medi-
 um. *O si audire & videre eos velles, quandò*
à nobis adjurantur & torquentur spiritualibus
flagris & verborum tormentis de obsessis corpo-
ribus ejiciuntur. Item Dionysius Areopa-
 gita loco suprâ citato. Ambros. loco cita-
 to, Leo primus epist. 4. c. 7. Nazianzenus
 orat. in Sanct. Baptis. *Nè exorcismi medi-*
cinam respuas, nec ob illius longitudinem ani-
mo concidas. Cyrillus Cathe. 1. *Suscipe cœ-*
lestem thesaurum, & in exorcismis studiosè
versare. Coelestinus Primus in epist. 1. ad
 Episc. Gall. cap. 12. *Sive parvuli, sive juve-*
nes ad

nes ad regenerationis veniunt Sacramentum, non prius fontem vitæ adeunt, quàm exorcismis & exsufflationibus clericorum spiritus immundus ab eis abigatur. Et deniquè unus Aug. loco omnium sufficiet lib. 1. de sym. c. 1. tom. 9. Parvuli exsufflantur, & exorcizantur, ut pellatur ab eis diaboli potestas inimica, quæ decipit hominem. Et ibidem lib. 4. cap. 1. Omnia Sacramenta aguntur in vobis per ministerium servorum Dei, exorcismis, orationibus, canticis spiritualibus, insufflationibus, cilicio, inclinatione cervicum, &c. Nec desunt Concilia antiqua & œcumenica, quæ assertum nostrum stabiliant. Quale est Constantinop. II. universale can. 7. Cârthaginense III. cap. 7. Quare admiror Novatoris hujus perfidam temeritatem, & Calvinisticum spiritum, cui antiqua planè, ut probavimus, nova sint. Interrogat an diabolus corpus infantium invadat in ipso utero materno pòst animationem, an pòst partum? Nos parvulorum corpuscula doemonem nec invasisse, nequè diversis motibus agitare dicimus; sed animam quæ peccaverit, sive peccato originali, sive actuali mortali, fili-
am

am esse iræ, & sub inimici potestate constitutam: ac consequenter quamdam subjectionem pati, quâ dæmon sic ejus corpus & sensus præpediat, ut ad bonum reddatur inhabilior. Quod experientia docet in adultis, qui peccato mortifero obnoxii, quamdam difficultatem in exercendis operibus virtutum perferunt, quam in gratiâ constituti non advertunt. Per exorcismos igitur & exsufflationes removeretur & arcetur invisibilium spirituum potestas à corpusculo & sensibus parvuli, ut sic quodammodò disponatur ad suscipiendam in animâ gratiam baptismalem. Removentur impedimenta, & obices quos dæmon interdum ad impediendum Baptismum aut effectum Baptismi solet obtrudere. Nec interest sive adhuc in utero materno infans hæreat, sive jam natus lucem aspiciat. Dum sub peccato originali est, æquè dominio ac potestati dæmonum subiacet utrobiquè. Sanctitas Matris illud non impedit: omnes naturâ nascuntur filii iræ, mortis & damnationis. Undè ut eripiantur, prius adhibemus exorcismos, deindè baptismum.

mum. Accuset nos quantum velit Calvinus cum suis affectis: tantumdem olim fecit Pelagius Calvini præcursor apud Augustinum lib. 1. de nupt. & concupis. cap. 18. *Accusat Ecclesiam, inquit, toto orbe diffusam, in quâ utiquè omnes baptizandi infantuli, non ob aliud exsufflantur, nisi ut ab eis Princeps mundi mittatur foras.* Vestigium itaque antiquitatis habemus, nisi nos fallat Augustinus; quod absit. Quod Sacerdos auribus ac naribus baptizandorum infantium salivam imponat, eorumque pectora, dorsum ac scapulas inungat oleo, nihil etiâ novum. Prioris meminit D. Ambr. lib. 1. de Sacram. cap. 1. Vbi refert exemplum Christi Domini, qui Marci 7. 33. muti linguam, & surdi aures sputo linivit, & sanavit, quod imitatur Ecclesia. Posterioris meminit Clemens Papa Apostolorum discipulus lib. 3. recognitionum, *Baptizetur unusquisque vestrum in aquis perennibus, nomine trinae Beatitudinis super se invocato, perunctus primum oleo per unctionem sanctificato.* Chrysost. homil. 6. in cap. 2. ad Colos. *Inungitur, ait, baptizandus more athletarum, qui stadium*
jâ

jàm ingressuri sunt. Idem docent Ambros. Cyrillus, August. & alii. Nequè indè sequitur, quod concludere tentavit, nos illis externis coeremoniis efficaciam & valorem Baptismi potiùs tribuere, quàm meritis, & pretiosissimo sanguini Salvatoris nostri JESV CHRISTI. Credimus & confitemur manifestissimè, coràm cœlo & terrâ, omnem Sacramentorum, adeoque & Baptismi virtutem ac valorem ab iisdem meritis & Christi sanguine, in nostram salutem abundè profuso, principaliter profluere: à Baptismi substantialibus materiâ, formâ, & ministri intentione instrumentaliter: à coeremoniis verò, sine quibus & validum esset Baptisma, solummodò quasi dispositivè, tamquàm causâ removente prohibens, non quidè effectum Baptismi; sed ejus faciliorem progressum. Ad quæstiunculas illas, nescio quo fine propositas circà materiam Baptismi, uno verbo cum Theologis respondetur: necessariam esse aquam veram & naturalem, ut omnis antiquitas semper tenuit & credidit. Et probatur ex Joan. 3. 5. *Nisi quis renatus fuerit*

fuert ex aquâ & Spiritu Sancto, &c. Vndè cum urina, aqua rosacea, & fimiles mutaverint speciem, nec propriè possint dici aqua naturalis, non possunt etiàm esse materia hujus Sacramenti. Verum est, quod ob necessitatem hujus Sacramenti, si valorem præcisè spectes, omnes utriusque sexus fideles & infideles, boni & mali legitimi ministri sint, ut docet August. tract. 5. in Joa. circa med. To. 9. & cum ipso omnes Theologi orthodoxi, *Quid in Christo, inquit, non noverat Ioannes? potestatem Baptismi ipsum dominum habiturum, & sibi retenturum: sed ministerium planè transiturum in bonos & malos. Quid tibi facit malus minister, ubi bonus est dominus?* Dæmonem tamèn à Catholicis admitti hujus Sacramenti ministrum esse posse, falsissimum est. Nequè enim ignoramus solis Sacerdotibus ex officio, Diaconis ex commissione, reliquis hominibus in necessitate, solisque hominibus (utpotè in quorum salutem tantùm Sacramenta instituta sint) hoc ministerium competere. Ità Conc. Florent. Tertull. Hieron. & alii.

MOTIVVM XXXIX.

Conatur probare aliquot argumentis Sacrificium Missæ in Ecclesiâ Dei non esse admittendum. 1. More solito asserit absquè ulla probatione, incognitum fuisse in primitivâ Ecclesiâ, nullumq; ejus vestigium reperiri in Sacris Litteris. 2. Esse superfluum probat, eo quod sufficienter & abundanter pro omnium delictis, in cruenti Crucis sacrificio satisfecerit Christus: undè Apostolus ad Hebr. 10. 8. Vbi autem horum remissio, jam non est oblatio pro peccato. Undè etiâ concludit: si Sacrificium Missæ remissionem peccatorum jam abunde factam non operetur, nullo modo esse necessarium: aut si operetur, esse blasphemum, eo quod Sacrificium Crucis de insufficientiâ arguat. 3. Non admittendum probat ex illo Pauli ad Hebr. 9. 22. Sine sanguinis effusione, non fit remissio. Atquè adeò cum in Sacrificio Missæ non fiat effusio sanguinis, non fiet etiâ remissio, & per consequens erit superfluum.

V RES

RESPONDET V R.

Sacrificium incruentum rursus impugnatum, denuò propugnando.

ANtichristi prodromos seu præcursores esse se satis palàm ostendunt Sectarii hujus sæculi. In persecutione Antichristi & ministrorum ejus, juxta Danielis prophetiam, cap. 12. v. 11. auferetur ex Ecclesiâ jure sacrificium. Certum autem est hoc intelligi non posse de cruentâ illâ Christi in cruce oblatione, quæ jam dudum cessavit: nequè de actu aliquo interno, cum is non sit propriè & formaliter sacrificium: nequè de ejusdem oblationis memoriâ aut valore, quia tempore Antichristi, & illa in reliquorum Fidelium mentibus perdurabunt. Reliquum ergò est, ut intelligatur Propheta loqui de Sacrificio externo visibili & incruento, cum aliud nullum super sit. Quod dum auferunt Heretici, substituunt abominationem desolationis, de quâ Daniel. 12. & quantum est de se, operantur ex nunc mysterium

sterium iniquitatis, de quo Paul. 2. Thess. 2.7. Nihilominus Ecclesia Catholica credit & sustinet, incruentum illud & Sacrosanctum Missæ Sacrificium, nec definit illud pro vivis & defunctis offerre. Prædictum enim est ab antiquis Prophetis, in novâ Lege futurum aliquod Sacrificium, quo Gentes ad Deum & Fidem conversæ illum essent jugiter veneraturæ. Isa. 19.21. *Cognoscent Aegyptii Dominum in die illâ, & colent eum in hostiis & muneribus, & vota vovebunt Domino, & solvent.* Quem locum S. Hieron. & Tertull. de hâc mundâ oblatione intelligunt. Clarius Malach. 1.11. loco superius pag. 156. allegato & ponderato. ubi ostendimus Prophetam ibi prædicere Sacrificium quoddam in Lege novâ futurum, quod aliud esse non potest, quàm Sacrificium nostrum incruentum. Adeoque, ut impleantur illa quæ scripta sunt à Moyse & Prophetis, necessum est in verâ Dei Ecclesiâ Missæ Sacrificium admittere, quod in omni loco possit offerri. Probatur, iterum ex Psal. 109.4. *Tu es Sacerdos in æternum, secundum ordinem Melchisedech.* Proprium & principale Sacerdotis officium est

um est offerre Sacrificia : *Omnis enim Pontifex ad offerendum munera & hostias constituitur.* Hebr. 8. 3. Christus Dominus Sacerdos quidem fuit in arâ Crucis: sed non secundum ordinem Melchisedech. Ibi enim panem & vinum non obtulit, sed seipsum. Debit ergò, ut sit illius ordinis Sacerdos offerre verum Sacrificium, quando in coenâ pretiosi corporis & sanguinis sui Sacramentum instituit. Dixit enim indistinctè: *Hoc, idest, Sacramentum & Sacrificium, facite in meam commemorationem.* Atquè adeò Sacerdotes Catholici & Apostolorum successores, Missam ex institutione Christi celebrando, verum & propriè dictum Sacrificium offerunt. Eadem veritas ex sacris Evangelii verbis non obscure colligitur. Matth. 26. 26. *Acceptit Jesus panem & benedixit, ac fregit.* Vbi Eucharistici Sacrificii partes, expressè declarantur, secundum communem Ecclesiæ sensum à mille sexcentis & amplius annis semper receptum. Rursus ex verbis paulò antè memoratis, *Hoc facite in meam commemorationem.* Verbum enim *facere*, ut alibi diximus, in Sacris Litteris sæpè pro sacrificare

ficare usurpatur. Deniquè probatur ex antiquo Ecclesiæ, tum Græcæ, tum Latinæ usu, quem comprobant veteres Liturgiæ Sanctorum Petri, Jacobi & aliorum, & omnes unanimiter Sancti Patres: ex quibus paucos refero. Imprimis Clemens Romanus lib. 6. constit. cap. 23. Irenæus contrà Hæreses cap. 32. lib. 4. Cyprianus lib. 2. Epist. ad Steph. Papam de Concil. Ambr. lib. 5. de Sacram. c. 1. Theodoretus in Ps. 109. Hiero. Epist. 146. ad Damasum. Augustin. deniquè Epist. 95. & lib. 16. de civit. Dei ca. 22. In eandem omnes conveniunt sententiâ, ut sacrosanctum illud, quod in Missâ peragitur, mysterium existiment, esse verum novæ Legis Sacrificium. S. Andreas, ut in vitâ ejus legitur, ad Proconsulem inquit, se quotidie offerre Deo Patri Agnum immaculatum. S. Ignatius Apostolorum discipulus, qui Christum vidit, Epist. ad Smirneneses clarissimè de hoc incruento Sacrificio loquitur: *Non licet, inquit, sine Episcopo offerre, nequè Sacrificium immolare, neque Dochen celebrare.* Irenæus Lugdunensis Episcopus lib. 40. c. 32. *Eum qui ex creaturâ panis est, accepit, &*

gratias egit dicens: Hoc est corpus meum. Et Calicem similiter, qui est ex eâ creaturâ, quæ est secundum nos, suum sanguinem confessus est, & novi Testamenti novam docuit oblationem, quam Ecclesia ab Apostolis accipiens, in universo mundo offert Deo. S. Cyprianus Martyr ita Cæcilio fratri scribit, Admonitos autem nos scias, ut in Calice offerendo Dominica traditio servetur, nequæ aliud fiat à nobis, quàm quod pro nobis Dominus prior fecerit: ut Calix qui in commemorationem ejus offertur, mixtus vino offeratur. Isidorus lib. 1. de Officiis. cap. 15. Ordo Missæ vel orationum, quibus Deo oblata sacrificia consecrantur, primò à Sancto Petro est institutus: cujus celebrationem uno eodemq; modo universus peragit orbis. Ex quibus omnibus evidentissimè docetur, hujus Sacrificii usum, tam in Ecclesiâ primitivâ, quàm in ejus progressu semper esse servatum. Reliquorum Sanctorum verba etiàm clarissima prætereo, ne sim legenti tædio. Ratiunculas novelli hujus Theologiæ reformatoris ex Calvinii & Lutheri armariis depromptas, ut faciles, & futiles, etiàm minimus nostræ Religionis Catholicæ Philosophus absquæ labore explo-

exploferit. A Christo ipfo hoc Sacrificium
 institutum effe jam vidimus, & in Sacris
 Litteris institutionem ejus oftendimus.
 Quod objicit Christum fufficienter in
 Cruce pro omnibus peccatis fatisfeciffe:
 adeoq; fupernum effe Sacrificium novę
 Legis, nifi velimus fateri Christum non
 fufficienter fatisfeciffe, retorqueri potest.
 Eadem enim ratione valeret hoc argu-
 mentum. Oratio Christi fuit infiniti valo-
 ris & æftimationis apud Deum Patrem, &
 fufficientiffima, ut pro nobis omnia impe-
 traret: ergò dùm Calviniftę orant, in fuâ
 fententiâ magnam inferunt fufficientiæ
 orationis Christi injuriam. Non dubita-
 mus, quin Sacrificium, quod Summus
 Sacerdos Christus effufo fanguine in arâ
 Crucis immolavit, plenè & fecundùm
 omnem rigorem juftitiæ, pro redemptione
 totius humani generis fuerit fufficien-
 tiffimum: & fimiliter credimus & confi-
 temur, quod nec alio Sacrificio cruento,
 nec alterius cujufpiam pretio aut valore
 diftincto opus fit ad noſtram ſalutem: ſed
 hoc aſſerimus, quod iſta tantùm intelligi
 debeant, quoad ſufficientiam, non quoad

efficaciam : alioquin nullus damnaretur, cum Christus pro omnium peccatis sufficientissimè satisfecerit. Requiritur igitur aliquid aliud, ut efficaciter redemptio nostra, quàm Christus operatus est, suum effectum consequatur : ejusdem videlicet infiniti pretii applicatio. Quæ congruentius fieri non potest, quàm per ea quæ Christus ipse instituit media, Baptismum scilicet & alia Sacramenta, Sacrosanctum Missæ Sacrificium, & similia. Hoc sibi voluit Apost. Hebr. 5. 9. *Et consummatus, factus est omnibus obtemperantibus sibi causa salutis æternæ.* Nonnè omnibus omninò ? sufficienter quidè ; sed efficaciter omnibus duntaxat, qui mandatis divinis obtemperant & mediis ad tantum pretium consequendum cōstitutis ritè & legitimè utuntur. Insuper incruenta illa & munda novæ Legis oblatio, re ipsâ non distinguitur ab ipso cruento Crucis Sacrificio, cum idem utrobiq; principalis Sacerdos sit & eadem hostia: adeoque idem Sacrificium, quod multoties ad prioris applicationem repetitur. Differt tamèn in modo, quod in priori intercesserit sanguinis effusio: in posteriori

riori verò illa non intercedat, licet idem corpus & idem sanguis, qui in Cruce effusus est, in Altari realiter offeratur. In Cruce Christus fuit solus Sacerdos simul & hostia: in Altari Sacerdos in æternum, ita tamèn ut homine etiàm peccatore, non paris potestatis, velut instrumento, ministro, aut Vicario utatur. Postremò, ut alteri objectioni fiat satis, quod ex Apostolo desumitur: *Sine sanguinis effusione non fit remissio.* Et *Vbi non est remissio, jam non est oblatio.* Ergò cùm in altari non fiat sanguinis effusio, non fiet etiàm peccatorum remissio: atquè adeò si non sit remissio, jam non erit oblatio. Dicimus in Sacrosancto Missæ Sacrificio illius cruenti fieri commemorationẽ & applicationem, atquè virtute ejusdem peccatorum remissionem.

MOTIVVM XL.

Arguit Romanam Ecclesiam tamquàm conscientiarum operatricem: eo quod variis votis & observationibus Fideles subjiciat, quæ sub divini Verbi præcepto non cadant, nec in primitivâ Ecclesiâ practicata sint. Quod
 V 5 homines

*homines rebus à Deo in eorum usum creatis
privet, quibustamen legitime, & sine scrupulo
uti possint.*

R E S P O N D E T V R.

*Laudabiliter opera pœnitentiæ & per-
fectionis suscipi ac præcipi, etiãmsi
Lege divinâ non præcipiantur.*

A Nimaless homines sunt adversarii no-
stri, & planè carnales nec percipiunt
ea quæ Dei sunt: filii diffidentie, desideria
carnis sequuntur, & *admirantur non con-
currentibus nobis in eandem luxuriæ confu-
sionem, blasphemantes.* 1. Pet. 4. 4. Horrent
ad instar pestis pœnitentiæ, abstinentiæ,
& mortificationis opera, & velut dæmonis
incitamenta detestantur. Quasi verò dia-
bolus non potius ad concupiscentiam car-
nis, ad concupiscentiam oculorum, & su-
perbiam vitæ, quàm ad mortificationem,
paupertatem, & humilitatē invitet. Quasi
verò non potius opera illa fuerint à Chri-
sto Domino & Apostolis verbo & exem-
plo commendata, & à Sanctis Patribus
summâ

summâ contentione & studio semper exercita. Certè vel in hoc solo liquet, quidnam hæresis Calvinistica & Lutherana redoleat, dum hæc ipsa in tantum abominatur. Sed disquiramus quo fundamento. Vel enim opera poenitentiae & vota rejiciunt, quod de se malum sit propter alicujus virtutis motivum rebus à Deo creatis abstinere & ad hoc se obligare. Vel quod etiã si bonum sit, vel saltẽ indifferens; leges tamẽ, præcepta, aut vivendi regulas, præter eas quæ in Scripturis nominatim designatę sunt, ferre de hâc abstinentiâ malum sit & illicitum. Primò ergò legum circà rerum abstinentias latarum utilitatem & convenientiam paucis demonstro. Cùm enim versentur circà temperantiam, quæ omnium judicio virtus est moralis & excellentissima, cujus pulchritudo omnium oculos & animos allicit, quis leges in materiâ virtutis tantæ ab habente potestatem latas contemnat? Hanc commendavit Christus simul & prædixit Matth. 9.15. *Venient autẽ dies cùm auferetur ab eis sponsus, & tunc jejunabunt.* Vbi jejunium sumitur generaliter pro omnibus carnis

carnis mortificationibus. Matt. 11. 12. pòst laudatam Joannis Baptistæ austeritatem Servator noster clamat, *Regnum Cælorum vim patitur, & violenti rapiunt illud.* Violenti, non molles, non delicatuli, qui modici jejunii præcepta, aut voluntariam carnis pro Christi amore macerationem, quantumcumquè levem suscipere detrectant. In quorum caput illud evibratur, quod Matth. 11. 21. Judeis exprobratum est. *Va tibi Corozain, va tibi Bethsaida, quia si in Tyro & Sydone factæ essent virtutes, quæ factæ sunt in vobis, olim in cilicio, & cinere pœnitentiam egissent. Pœnitentiam non resipiscentiam, ut nugantur Sectarii, in cinere & cilicio, in asperitatibus & austeritatibus vitæ. In veteri Testamento Prælati, licet minoris essent auctoritatis, quàm in novo, sæpè jejunia indicebant, ut 1. Reg. 14. 24. Vbi Saul adjuravit populum dicens: Maledictus vir, qui comederit panem usquè ad vesperam, donèc ulciscar de inimicis meis. 2. Paralip. 20. 3. Iosaphat autèm timore perterritus, totum se contulit ad rogandum dominum, & predicavit jejunium universo Iuda. Et 1. Esdræ 8. 21. Et predicavi ibi jejunium*
juxta

juxta fluvium Aha, ut affligeremur coram Domino. Esther 4. 16. Quando mandavit Esther Mardocheo, *Vade & congrega omnes Iudaos, quos in Susa repereris, &c. Non comedatis, & non bibatis tribus diebus, & tribus noctibus.* Item Dominus Deus Jerem. 35. summis laudibus effert Rechabitas, quod præcepto patris sui Jonadab, à diversis rebus aliàs licitis abstinerint. In lege etiàm gratiæ abstinencia & mortificatio plurimùm commendatur. Imprimis Gal. 5. 24. *Qui sunt Christi, carnem suam crucifixerunt cum vitiis & concupiscentiis.* Et ad Rom. 8. 13. *Si secundum carnem vixeritis, moriemini: si spiritu facta carnis mortificaveritis, vivetis.* 1. ad Cor. 9. 27. *Castigo corpus meum & in servitutem redigo, nè fortè, &c.* Addo deniquè quod quotquot à Christo nato (ut Patres, ac prophetas antiquæ legis fileam) ad nostra usquè tempora sanctitatis culmen adepti sunt, omnes omninò per mortificationis angustam viam eo pervenerunt. Quod exemplis clariùs patet, quàm ut expositione indigeat. Supervacanea esse opera meritoria asserunt Novatores, quod Christo Do-

mino,

mino, & operi Redemptionis nostræ injuriosa sint, cùm is pro nobis in rigore justitiæ satisfecerit; sed illius argumenti vim jam superiùs retudimus, cùm de sacrificio Missæ ageretur. Hic tamem & illud addidero, quod dùm nos propter bona opera injuriarum reos agunt, simul etiàm D. Paulum vas electionis in eadem damnatione involvant. Etenim si infinitus est Christi Passionis valor, non solum quo ad sufficientiam, sed etiàm quo ad efficaciam; undè Colos. 1. 24. dicit: *Gaudeo in passionibus pro nobis, & adimpleo ea quæ desunt passionum Christi in carne meâ.* Si infinita est Passio Christi, quomodò ei deest aliquid, quod à Paulo per passiones in carne gestas suppletur? aut si deest aliquid, quomodò infinita? Certè responderi non potest, nisi ut nos suprà: quod infinita quidem sit quo ad sufficientiam, ubi nihil ad implendum, seu supplendum restat: quod pretiosissimi sanguinis inæstimabile pretium sufficiat ad plures, si darentur, mundos redimendos. Sed hoc ipse voluit, ut infinitum illud pretium quilibet figillatim consequeretur, cuilibet etiàm

etiàm figillatim applicaretur. Quod Paulus circa se ad implevit passionibus suis in carne, castigando corpus suum, & in servitutem redigendo, bonum certamen certando, cursum consummando, fidem servando: ut sic coronam, non solum benignitatis & misericordiæ divinæ, sed & justitiæ sibi repositam consequeretur: hoc est, debitam sibi ex justitiâ in suorum operum (quibus ea quæ desunt passionum Christi adimplevit, seu quibus passionis Christi merita sibi applicuit) remunerationem. Vnum itaque è duobus necessarium est, ut vel in Christi passionem injurius fuerit Paulus, quod blasphemum est, vel Calvinus ejusque sequaces. Taceo quod in eandem damnationem irretire cupiant Apostolorum Principem Petrum asseverantem 1. Pet. 2. 21. *Christus passus est pro nobis, vobis relinquens exemplum, ut sequamini vestigia ejus.* Taceo, inquam, ut brevitati consulam innumera alia Scripturæ loca, quæ Calvinum, & ejus sequaces consistoriales Delphicos apertè condemnant. Et concludo, quod sive voluntariè, aut ex voto illa opera suscipiantur, ut fit

ut sit præsertim à Religiosis; sive à Sanctâ Romanâ Ecclesiâ præcipiantur, laudabiliter admodum & præcipi & suscipi: Religiosos sic corpus macerare, ut animam impinguent: Ecclesiam sic subditorum suorum conscientias onerare, ut eorum simul profectum, perfectionemque plurimum promoveat, & ad imitationem Christi, ejusque Passionis exemplum per poenitencias, corporis afflictiones, & alia opera meritoria incitet, & impellat. E contrâ Calvinismus omnimodam suis permittit sine lege libertatem, ut velût discincti nepotes, aut effrenes equi, quocumquè fert libido sine conscientia ferantur.

M O T I V V M X L I.

Rursùm objicit, quod tales vivendi norma Religiosorum nullâ lege Divinâ proponantur. Traditiones & inventiones hominum sint in primitivâ Ecclesiâ ignorata, quas introduxerint quidam popularis auræ amatores, atquè estimationem apud plebeculam vanè ambientes. Quod illa diversitas Ordinum repug-

repugnet Apostolo I. Cor. I. 12. Cùm alter dicat, ego sum Benedicti, ego Bernardi, ego Francisci, ego Carmelita, &c. Instar eorum, qui dicebant, Ego quidè sum Pauli, ego autèm Apollo, ego verò Cephæ, ego autèm Christi, &c. Tandèm irruit in Venerabilem Societatem JESV, quasi præsumptuoso fastu sibi pulcherrimum illud nomen ad aliorum exclusionem usurparit. Quod ad virorum normam, diversa sæminarum erecta sint Instituta, è quibus illud potissimùm irridet, quod Patrum Iesuitarum vivendi modum imitari velit: quod Apostolico diplomate Urbani VIII. fuit abolitum.

RESPONDETUR.

Statuta Religiosorum quàm Scripturæ conformia, antiqua, & utilia. Reformatorum nomen ut Calvinistis conveniat.

A Paritate rationis sic argumentor. Nullâ lege divinâ sancitum est, ut Hollandi tertiam aut quintam suorum
X pro-

proventuum portionem rebellibus Statibus persolvant: ergò persolvendi non sunt. Vel sic, Societas Classis Indicæ aliquot statuta decrevit, quæ omnes illi, qui eam ingredi, ejusque lucris participare voluerint, tenentur observare: atqui hæc in Sacris Litteris non inveniuntur: ergò tamquam traditiones hominum sunt rejicienda. Dices, in genere cautum est, ut tributa persolvantur, ut Dominis etiã discolis & tyrannis pareatur, ut Fides in contractibus observetur. Fateor: sed quâ Lege divinâ tanta tributi quantitas exsolvenda discernitur? Sic etiã quæcumquæ in Religiosorum Regulis præcipiuntur, in genere sancita sunt, & ad Sacras Litteras reducuntur; aut sunt media poportionata, quibus observantia punctualis Præceptorum divinorum promovetur; aut determinatio in particulari, quomodò aliquid in genere expressum, hoc vel illo modo exerceri debeat. Exempli gratiã, mandatum est à Deo, ut Deum & proximum diligamus. Regulæ Religiosorum hoc ipsum statuunt. At quia impossibile est in omni genere actuũ charitatis hoc præceptum benè & perfectè adim-

adimpleri , determinant iis , qui eas liberè
 amplectuntur , in quale opus principaliter
 incumbendum sit. Prædixit Christus , ut
 suprâ vidimus, quod cùm sublatus fuerit
 ab eis Sponsus, tunc jejunabunt: determi-
 nant Religiones quibus diebus & quo-
 modò jejunandum sit , quomodò licitis
 corporum macerationibus indulgendum.
 Dixit Christus Matth. 26. 41. *Vigilate &
 orate , &c.* Præscribunt Religionum statu-
 ta , quandò vigilandum sit, quâ ratione
 orandum, & sic de cæteris. Si igitur velint
 Hollandi ad tantam tributi quantitatem
 suos obligare, & eos qui Societatem, quàm
 vocant , Indicam subintran ad diversas
 conditiones: cùm non permittant à Catho-
 licis iniri quasdam Societates , non lucris
 temporalis, sed meriti æterni gratiâ , &
 nonnulla statui , quibus ad divina Præce-
 pta meliùs servanda unanimiter conspire-
 tur ? Temerariè profectò & perversè ju-
 dicant , quicumquè tam piarum, tamque
 laudabilium Congregationum authores
 ambitionis accusant, quos constat integer-
 rimos & perfectissimos fuisse humilitatis
 amatores. Et quamvis summâ cum gloriâ

eorum laudes in ore hominum versentur, non effectus fuit ambitionis, sed virtutis, qui velut umbra corpus, fugaces gloriæ viros sequitur, & invitos assequitur: sicut sui avidos fugit. Ineptissimè quoquè ad Religionum Institutores applicantur duo illa loca Epist. ad Colloss. 2. 18. & 21. quibus Apostolus duas hereses in Ecclesiâ insurgentes recondit. In primo enim sic habet; *Nemo vos seducat volens in humilitate, & Religione Angelorum, quæ non vidit ambulans frustrà inflatus sensu carnis sue.* Ibi quæ invenitur in hæresim, sive Simonianam sive Cherinthianam, quæ Angelos supra Christum extollebant, atquè eos ut mediatores suos, aut Deos medios, juxtà Platoniorum errorem, in humilitate ac Religione, id est, secundum istam doctrinam, vilem, contemptibilem, ac superstitiosam adorabant, & Christum tamquam Angelis inferiorem negligebant. De hac hæresi videndus est Tertull. lib. 1. de Præscrip. advers. hæret. c. 33. 46. & 48. Chrysostomus & alii, quos citat Estius & Interpretes in hunc locum, & Concil. Laodicenum can. 35. Eundem sensum non obscure indicant verba Apostoli

stoli subsequencia ver. 19. *Non tenens caput,*
 (id est Christum, qui caput est Ecclesiæ,
 non Angeli) *ex quo totum corpus per nexus*
& conjunctiones subministratum & constru-
ctum crescit in augmentum Dei. Nos Angelos
 colimus: ita tamèn ut caput teneamus, &
 in totius corporis compage maneamus.
 Angelos colimus, non ut mediatores no-
 stros, qualis solus est Christus: sed ut no-
 stros apud Deum intercessores. Angelos
 colimus, ut Christi ministros, non superio-
 res: sicut eos coluerunt Religiosorum Or-
 dinum Patriarchæ, secundùm Ecclesiæ
 primitivæ usum, non juxtà vilem & abje-
 ctam Platoniorum, Simonianorum, aut
 Cherinthianorum superstitionem. Atquè
 adeò nequè nos, nequè Religionum Au-
 thores tangit Apostolus: sed eos potius,
 qui corporis Christi, quod est Ecclesia, uni-
 onem & communionem lacerant, sicut
 hæretici. Impertinentissimè etiàm appli-
 catur Religiosis secundus locus ejusdem
 Epistolæ v. 21. *Nè tetigeritis, nequè gusta-*
veritis, nequè contrectaveritis; quæ sunt omnia
in interitum ipso usu, secundùm præcepta &
doctrinas hominum, quæ sunt rationem quidè

habentia sapientiæ in superstitione, & humilitate, & non ad parcendum corpori, non in honore aliquo ad saturitatem carnis. Ibi enim solos reprehendit Judæos, aut Christianos Judaizantes, qui cibos aliquos, tamquàm immundos, tangere aut gustare detrectabant. Nos omnes cibos mundos putamus, nec ab iis abstinemus quasi immundi sint; sed mortificationis majoris ergò, ut corpus nostrum in servitutem mentis cum Apostolo redigamus, & peccatorum nostrorum poenas voluntariâ afflictione in hoc sæculo demus. Nequè ibidem Apostolus respuit præcepta & doctrinas hominum, Christianæ doctrinæ conformes, aut ad eam reducibiles; quales sunt Religiosorum regulæ: alioquin sibiipso contraveniret Paulus, cùm multa præceperit, & multa docuerit: sed eas solùm improbat, quæ à Christo alienæ sunt; quales sunt Judæorum & Hereticorum, quas suprâ retulimus. Ex his apparet quàm immeritò Religiosorum Ordines impugnentur, quasi solùm humano ingenio inducti sint, aut Christo contrarii. Pari temeritate & ignorantia Religiosus Status novitatis arguitur,

tur, quasi in primitivâ Ecclesiâ inauditus
 & incognitus, Etenim omnibus vel medi-
 ocriter in historiâ temporum versatis, li-
 quidò constat omni ætate & sæculo homi-
 nes exurrexisse, qui sublimiori & emi-
 nentiori suprâ vulgus cultu Deo deservie-
 rint. Genes. 4.26. Refert Spiritus Sanctus
 de Enos: *Ipse cepit invocare nomen Domini.*
 Non quod non incoepissent antè ipsum
 Adam, Abel, Seth Pater ejus & cæteri: sed
 quia Religiosorum more, altiore quam-
 dàm vivendi normam, præter communẽ,
 sibi præscripserit. Nazaræi seipso Deo
 consecrabant, & particularia quædam ser-
 vanda Deo annuente assumebant. Numer.
 6. Rursus in veteri Testamento Elias &
 Eliseus, cum filiis Prophetarum, Religio-
 sum institutum peculiariter incoeperunt,
 atque à divitiis & uxoribus abstinerunt,
 teste Hieron. ad Rufinum & Epist. in ordi-
 ne 4. à ca. 2. ubi ait: *Filii Prophetarum, quos*
monachos in veteri Testamento legimus, edi-
ficabant sibi casulas propter fluentia Iordanis, &
turbis urbium derelictis potentia & herbis
agrestibus victitabant. Item Epistol. 13. ad
 Paulinum cap. 3. *Noster Princeps Elias, in-*
quit,

quit, *noſter Eliſeus, noſtri duces filii Prophe-
tarum, qui habitabant in agris & ſolitudinibus,
& faciebant ſibi tabernacula prope fluentia Ior-
danis.* Inſigne teſtimonium extat apud Je-
remiam de inſtituto Rechabitarum, ac di-
vinâ ejus approbatione, cap. 35. 6. *Non bi-
bemus vinum: quia Ionadab filius Rechab, pater
noſter præcepit nobis dicens: Non bibetis vi-
num vos, & filii veſtri, uſquẽ in ſempiternum,
& domum non edificabitis, & ſementem non
ſeretis, & vineas non plantabitis, nec habebi-
tis: ſed in tabernaculis habitabitis cunctis die-
bus veſtris, ut vivatis diebus multis ſuper fa-
ciem terra, in quâ vos peregrinamini. Obedi-
vimus ergo filii Rechab patris noſtri, &c.* at-
que ideò benedictionem unâ cum appro-
batione ſui inſtituti à Deo. ſuſceperunt, ut
videre eſt in fine ejusd. ca. *Propterea, inquit,
hac dicit Dominus exercituum, Deus Iſrael.
Non deficiet vir de ſtirpe Ionadab filii Rechab
ſtans in conſpectu meo cunctis diebus. Quod
ſpiritualiter intellectum, etiam nũ hodie
in Religioſis videmus adimpleri. Prædictis
ſucceſſit Joannes Baptiſta; de quo Chriſo-
ſtomus hom. 1. in Marc. Sicũt Sacerdotum
Principes ſunt Sacerdotes Apoſtoli: ſic Mona-
chorum*

chorum Princeps est Ioannes Baptista. Idem
 habet Nazianzenus: Hieronym. verò ad
 Eustoch. de custod. virginit. c. 16. de Ere-
 mitis agens: *Hujus vita*, inquit, *author Pau-*
lus, illustrator Antonius, & ut ad superiora
conscendam, Princeps Ioannes Baptista fuit.
 Ex Philone Judæo habemus mores, ac vi-
 vendi normam, quam S. Marcus Evange-
 lista Monachis ac Monialibus Alexandrie
 nascente primùm Ecclesiâ præscripsit: ac
 inter cætera paupertatis, continentiae, je-
 juniorum, ac Psalmodiæ professionem
 tunc in usu fuisse. Damasus scribit in vitâ
 S. Dionysii Papæ, qui secundo pòst Chri-
 stum sæculo floruit, quod ex Monacho in
 Pontificem fuerit evectus. De S. verò
 Antonio, qui tertio sæculo vixit, scribit
 Athanasius in ejus vitâ, quod cùm vitam
 Monasticam amplecti decrevisset, ad se-
 nem quendam accessit, qui ab ineunte
 ætate vitam Monasticam fuerat professus.
 De Religiosis sui temporis plura August.
 li. 1. de morib. Eccles. c. 31. ubi ab eorum
 vitâ exemplari Manicheorum falsam con-
 tinentiam, quantò magis Calvinisticum
 luxum ac impoenitentiam confundit. *Con-*

*temptis, inquit, atquè desertis hujus mundi illecebris, in communem vitam castissimamq; congregati, simul etatem agunt &c. Nemo quidquam possidet proprium. Et paulò post: Patres non solum sanctissimi moribus, sed etiàm divinà doctrinà excellentissimi, omnibus rebus excelsi, nullà superbià (advertant Sectarii) consulunt iis, quos filios vocant, magnà suà in jubendo auctoritate, magnà illorum in obtemperando voluntate. Ecclesię decus Augustinus quàm clarè Doctorem nostrum Delphicum confutat? Superiorum Leges subditorumq; obedientiam approbat, Religiososq; suo tempore floruisse demonstrat. Deniquè ipsimet Apostoli vitam communem & cœnobiticam exegerunt, quod irrefragabili testimonio Actor. 4. 32. liquet: *Multitudinis autem credentium erat cor unum & anima una: nec quisquam eorum quæ possidebat aliquid suum esse dicebat, sed erant illis omnia communia.* Eccè primitivæ Ecclesię faciem ad vivum paucis illis verbis expressam: quam & habemus hodiè in Ecclesià Romanà, saltèm in Religiosis Ordinibus, apprimè & nativè delineatam, & ab Apostolis ad nos usquè continuâ successionē*

cessione deductam. Inter Calvinistas semper viguit, verbum illud divisionis, meum & tuum, nec quidquàm habuerunt unquam commune, nisi forsitan & vixdum errorem. Tanta igitur est Religiosi Status antiquitas : nec minor utilitas. Omnes enim penè Sancti Patres & Ecclesiæ Doctores Græci æquè ac Latini ex eo tamquam ex fertilissimo seminario prodierunt, vitam Monasticam professi. Prodierunt, & quotquot penè insurgentia hæresum singulis ætatibus monstra, quibus Infernus Ecclesiam turbare & subvertere conatus fuit, profligaverunt. Quid igitur mirum, si humani generis hostis per se ac suos ministros hereticos in Sacras Religiones insurgat, ac totis viribus expugnare molia-
tur turrin illam David fortissimam, ex quâ *mille clypei pendent, omnis armatura fortium*. Canticor. 4. 4. Omne armorum spiritualium genus, orationes, jejunia, mortificationes, virtutum studia, &c. Quantum verò hujusmodi arma adversus dæmonum potestates valeant, Servatoris nostri testimonio clarum fit, Math. 17. 20 *Hoc genus non ejicitur, nisi per orationem*

tionem & jejunium. Chrysostomus per hoc genus, ait intelligi omne genus dæmoniorum. Et alibi : *Vigilate, & orate, ut non intretis in tentationem.* Math. 26. 41. Cœnobita itaque Religiosorum nihil aliud sunt, quàm prædestinatorum seminaria, militum Christianorum academiæ, capilli sponsæ Christi Ecclesiæ, in quibus veluti in Sampsonis crinibus magnâ ex parte robur ejus & fortitudo consistit. Quibus abscissis facilè Dalila illudendam traderet Philisthæis. Hoc inter hæreticos Bucherus quidam adeò perspicuè cognovit, ut dicere non dubitaret : *Tolle Thomam & dissipabo Ecclesiam.* Porro Religiosorum Ordinum diversitas non inducit divisionem in Ecclesiam Catholicam, in cujus unitate omnes conveniunt, ut alibi notavimus : nequè alias parit æmulationes, quàm virtutis ; & eas quas Paulus nos habere desiderat 1. Cor. 12. 31. *Æmulamini charismata meliora.* Omnes siquidè ad Charitatis perfectionem & unitatem, licet diversis mediis, sicut & diversæ mansiones sunt in Cœlo, totis viribus tendunt. Omnes sub uno capite invisibili Christo

Christo in Evangelicâ perfectione militans. Omnes sub uno capite visibili Christi in terris Vicario, in unâ eâdemque Fide coalescunt. Et si qua forsân humanitûs nascatur inter illos controversia, unicum omnes recognoscunt Superiorem, Pastorem, ac Judicem, qui omnia determinet: Summum nempè Pontificem, cui in personâ Petri dictum est, Luc. 22. 32. *Confirma fratres tuos.* Et quamvis unusquisque Ordinum se à suo sigillatim Institute denominet, longè abest ab eorum errore quos reprehendit his verbis Paulus: Ego sum Pauli, ego Cephæ, &c. Quoniâ illi existimabant gratiam baptismalem virtuti ministri esse commensurandam, & ab eâ procedere secluso Christo, qui ut causa principalis invisibiliter internum effectum Sacramentorum operatur. Vnde illicò subdit, 1. ad Cor. 1. 13. *Numquid Paulus crucifixus est pro vobis? aut in nomine Pauli baptizati estis?* Et cap. 3. ejusd. epist. v. 4. *Quid igitur est Apollo? quid verò Paulus? ministri ejus cui credidistis, &c. & Itaque nequè qui plantat est aliquid, nequè qui rigat, sed qui incrementum dat Deus.* Arguit itaque

itaque Paulus eos, qui schismata semina-
bant, asserentes se maiorem gratiam à mi-
nistro majori in baptismo suscepisse: non
autem eos, qui se diversorum Christi fa-
mulorū imitatores exhibere contendunt.
Si enim hæc imitatio schisma suscitaret,
cùm Paulus ad illam invitat cap. 4. ejusd.
epist. v. 15. *In Christo Iesu per Evāgelium
ego vos genui. Rogo ergò vos imitatores mei
estote, sicut & ego Christi.* Atque adeò lici-
tum erit omnium eorum, qui Christi imi-
tatores fuerunt, vestigiis insistere, & se
eorum sectatores prædicare, & exhibere
in unitate Fidei & charitatis, sub unius
Pastoris ductu. Non sic hæretici, non sic,
sed tamquàm pulvis, quem projicit ven-
tus à facie terræ, scinduntur in scismata,
& totidem divisionibus subjacent, quot
ex hac hydrâ infernali capita, in materiâ
Fidei, & morum repullularunt; Luth-
erani, Calvinistæ, Zuvingliani, Hussitæ, &
millealii, qui sine capite omnis unitatis
expertes, in mille errores præcipitantur,
& in iisdem contabescunt. Jàm pridem
hoc cognoverat Basilius magnus, qui eâ
de causâ salubri consilio censuit, relin-
quen-

quendos esse sibi ipsis Hæreticos: sic fore aliquandò, ut in tantâ animorum & doctrinæ discordiâ mutuis se moribus jugulent atquè consumant. Inveteratum Hæreticorum odium in Patres Societatis JESV silentio transire non possum. Nodum in scirpo quærunt Novatores nostri, dum eos arrogantiae arguunt, quod nomen Societatis JESV sibi vendicent & usurpent, quasi cæteris exclusis: cum laudabile maximè sit, autoritate præsertim Apostolicâ, nomen sibi aliquod ex eo Redemptionis & Fidei nostræ mysterio, cui devotus est, petitum imponere ac retinere, absquè eo quod cæteros ab ejus mysterii devotione secludat. Jam olim instituta fuit Religio, cujus Sectatores à Sanctissimæ Trinitatis nomine, Trinitarii nuncupantur: nequè tamèn ullus mortaliùm dixerit, quod nimium sibi arrogant, aut alios à Sanctissimæ Trinitatis fide, aut devotione arceant. Atquè in præsentiliceat respondere, quod unus ex Patribus Societatis, dum in priori bello Germanico, à Christiano Alberstratenfi captivus abduceretur. Interrogatus, cùm se ex Societate

cietate J E S V jactaret, cùm cæteri etiã
 justî Societatem J E S V ambiant & in eâ
 vivant? Simili interrogatione petitum
 diluit. Cùm Christianus vocaretur ipse
 Princeps, cùm & alii omnes, qui Chri-
 stum profitentur, Christiani dicantur.
 Sed quâ fronte, quo titulo, quâ ratione
 Evangelicorum nomen, ac Religionis
 Reformatæ sibi arrogant Hæretici. Dicet
 fortè quispiam ex eis: Evangelici dicimur,
 quia nihil aliud præter Evangelium aut
 Verbum Dei scriptum admittimus: tra-
 ditiones, leges, & alia quælibet humana
 commenta respuimus. Evangelium aut
 Verbum Dei scriptum admittant, qui
 tam graviter ejus præcepta prævarican-
 tur, dùm Traditiones, opera meritoria,
 & alia hujusmodi, quæ expressima sunt
 in Sacris Litteris rejiciunt, & ut suprà do-
 cuimus, impudenter contemnunt? Illi
 sunt Religionis Reformatæ, qui sublato
 bonorum operum merito, hominum ani-
 mos in omne malitiæ & nequitiae genus
 præcípites trahunt? Deformatæ potiùs
 Religionis sunt, qui intrinsecùs & extrin-
 secùs omnia deformant. Intrinsecùs, cùm
 inter-

internorum actuum medullâ careant, illosque velût vanos & inutiles vilipendant. Extrinsecus, cùm longè absint ab illâ externâ Ecclesiæ pulchritudine, quæ in ornatu, coeremoniis & admirabili rerum omnium ordine consistit; & substantiales partes, sine quibus vera Religio consistere non potest, ut sunt Sacerdotum, Sacrificium, Lex, & pleraquè Sacramenta penitus sustulerint. Legem quidem, cùm Ecclesiasticam omnem detestentur: & Divinam non juxtâ Sanctorum Patrum & Ecclesiæ sensum; sed juxtâ proprium sui cujusque cerebri captum interpretentur & sequantur, ut illis sit pro lege & pro ratione voluntas. Nullum pariter habent Sacerdotium, ut apud omnes in confesso est. Nequè illis patrocinetur (quo tamèn omnes recurrunt) illud

1. Petri 2. 9. *Vos autem genus electum, regale Sacerdotium, gens Sancta, populus acquisitionis*: quasi omnes prorsus in lege gratiæ Sacerdotes forent: cùm ibi solum loquatur de quodam Sacerdotio metaphorico, seu mystico: non de verè & propriè dicto, quale requiritur in omni verâ

Y

& per-

& perfectâ Religione, ut notavit August. lib. 19. contrâ Faust. c.2. Oportet enim ut veri Sacerdotes distinguantur à populo, & sacrificia pro eo offerre, & intercedere possint: ut colligitur ex illo Apost. Heb. 5. 1. *Omnis namq; Pontifex ex hominibus assumptus, pro hominibus constituitur in iis, quæ sunt ad Deum, ut offerant dona & sacrificia pro peccatis.* Quasi diceret, quod aliquis è populo eligatur, qui sit verè Sacerdos: non autem quod omnis populus sit Sacerdos verè & propriè dictus sed tantum latè & metaphoricè. *Nec enim quisquàm sumit sibi honorem: sed qui vocatur à Deo tamquàm Aaron.* Sacrificium ipsimet palàm rejiciunt, & impudenter respuunt. Illud enim cruentum in Cruce peractum, ad quod videntur recurrere, manet dumtaxat in virtute, non tamèn in actu & formaliter. *Christus enim resurgens à mortuis, jam non moritur.* Rom. 6.9. Quare necessariò recurrendum est ad incruentum; & cum illud non admittant, nullum sibi reservant. Sic etiàm Sacramenta omnia, excepto Baptismo & Matrimonio, missa faciunt. Undè igitur Evangelica est Calviniana
aut

aut Lutherana hæresis? Planè nec in substantialibus, nec in accidentalibus. Vnde Religio Reformatæ? Non aliter sanè, quàm si reformatam sic intelligas, ut vulgari sermone Legiones aut Cohortes Reformatæ dicuntur, dùm annullatæ fuerunt, & exauctoratæ. Ità ut verum sit dicere: Ea quæ viguit quondam in Hollandiâ vera Religio, nunc reformatæ est in Synagogas Calvinistarum, hoc est, nullâ apud eos ampliùs est Religio, sed merus atheismus, aut nescio quid opinionis, aut hereseos in atheismum vergētis & declinantis. Quoad Sanctimonialium instituta, nec illa laude, nec suâ utilitate carent. Nequè mulieres à perfectionis tramite arcēdæ sunt, ad quam virorum exemplo æquè laudabiliter aspirant, quidquid cavilletur Delphicus Minister. Minima autem perfectio non est in perpetuâ virginitate Deo famulari juxta Apost. 1. Cor. 7. Quibus etiã abundè ab Ecclesiæ Prælatis provisum est, ut per clausuram perpetuam ab occasionibus removeantur, & earum fragilitati subveniatur. Quod autem illas mulierum congregationes, quæ absquè auctoritate Apostolicâ, commu-

nem vitam agebant, & forſitan Societatis JEſu Patres imitari videbantur, diploma-
te Pontificio ad futuri cautelam reproba-
rit Urbanus VIII. eâ fortè de cauſâ fieri
contigit, quod non interceſſerit priùs au-
ctoritas Sedis Apoſtolice, aut quod ad
clauſuram non obligarentur: licèt earum
zelus interim vituperabilis non fuerit.

MOTIVVM XLII.

Quod Eccleſia Romana inter cætera, quibus
hominum conſcientias operat, Clericis &
Religioſis indicat cælibatum: interdicens
per votum ſolemne ſanctum matrimonium;
quamvis aliàs ab affectionibus, quæ ad ejus legi-
timum uſum impellunt etiã eos, qui vas ſuum
volunt poſſidere in ſanctificationem, minimè
ſint immunes. Quod in ſacris Literis nihil ſimi-
le reperiatur: nequè Patriarchis, nequè Apoſtolis,
aliisq; in Eccleſiâ primitivâ prohibitum fuerit
matrimonium. Quod ex hujusmodi prohibitio-
ne ſternatur via graviſſimis peccatis. Quibus
conſideratis Pius II. Pontifex maximus teſte
Platinâ, cenſuit quod quamvis propter graves
& urgentes rationes interdictum fuerit matri-
monium,

monium, attamen ob rationes longè graviores Sacerdotibus esse permittendum. Et D. Bern. serm. 66. in Cantica: Tolle, inquit, de Ecclesiâ honorabile connubium, & thorum immaculatum; nonne reple eam concubinariis, incestuosis, semini fluvis, mollibus, masculorum concubitoribus, & omni denique genere immundorum?

RESPONDETUR.

Clericorum cœlibatus antiquus, & laudabilis.

Refuscitant adversarii nostri antiquas Vigilantii & Joviniani hæreses, quas olim extirpavit & delevit Sanctus Hieronymus Epist. 53. ad Riparium, & lib. 1. contra Jovinianum. Eum legat consistorium Delphicum, & inveniet errorem suum, vel me silente, confutatum. Legat cæteros Ecclesiæ Doctores, qui omnes Hieronymo subscribunt: & reperiet, ac videbit, Lutherum & Calvinum sic se in Angelos lucis transmutare non potuisse, quin vel in hoc solo duo cornua, quæ à

Patre suo diabolo ex intestato receperunt, invitè patefaciant. Alterum quod virtuti illi coelice, castitati nempè, & integritati, adeò adversentur: alterum, quod omnis Religiosi cultus sese inimicos ostendant. Etenim apud omnes penè nationes invaluit, ut qui præessent sacrificiis, ad plura strictiùs adstringerètur, quàm vulgus. Ipsi Gentiles lumine naturæ ducti, eos quos ut Deos habebant purâ mente & corpore ilibato esse colendos prædicabant, & semper irreligiosum estimarunt ad eorum cultum post usum matrimonii accedere. Refert Hieronymus Gentium sacerdotes ab uxoribus abstinuisse: imò & populi devitasse consortia, jejuniisque & aliis austeritatibus vacare consuevisse, eo tempore quo ad sacrificia suis Diis offerenda tenebantur. Idem asserit lib. 1. in fine contra Jovin. Hierophantas Atheniensium, cum ad dignitatem Sacerdotalem evehebatur, solitos fuisse frigidissimam aliquam potionem forbere, quâ ad actus venereos omnino inhabiles redderentur. Et quod mirabilius est, docet idem S. Hieronymus, quod Sacerdotes Ægyptii numquam mulieribus

bus se miscuerunt: numquàm cognatos,
 propinquos, & liberos viderunt ex eo
 tempore quo cœperant altari deservire,
 Prætereo Vestalium castitatem studiosis-
 simè semper assertam & conservatam, &
 alia hujusmodi: quibus docemur, inter
 densissimas Gentilitatis tenebras Ethnicos
 lumine dumtaxat rationis cognovisse, di-
 vinum Numẽ impollutâ corporis integri-
 tate religiosè colendum. Sectarii verò nec
 Deum verum, nisi uxore cognitâ veneran-
 dum esse contendunt, nec ullâ prorsus si-
 gnificatione exteriori eum colunt: cære-
 monias, quas antiqui utriusq; Testamenti
 Patres devotissimè observârunt, irrident:
 bona opera, jejunia, & austeritates, quæ in
 Dei cultum suscipiuntur, contemnunt:
 omne Sacrificium rejiciunt: & nunc
 quoquè ab illis, qui Deo immortalì & in-
 visibili quotidie sacrificant, puritatem
 corporis & sacrum coelibatum tollere mo-
 liuntur. Antiquæ Legis Sacerdotes veri-
 tatem Apostolicam & mentem Dei pro-
 piùs affecuti, in continentia mentis &
 corporis, nêdum à venere illicitâ, sed & à
 licitâ abstinentes, dùm altaribus esset in-

serviendum, Deo famulati sunt. Et si vitam omninò coelibē non degebant, plurimùm tamèn suprà vulgus eorum matrimonia coarctabantur. Habetur enim Levit. 21. 13. de summo Sacerdote: *Virginem ducet uxorem: viduam autèm & repudiatam & sordidam non accipiet.* Tempore immolationis victimarum, per dies plurimos à matrimonii usu arcebantur. Vndè cùm illi umbra fuerint Sacerdotum, qui in Lege Gratiæ constituendi erant, & quasi lauiones, animalium sanguini immergerentur, & coquorum instar, inter ollas, sartagine, & cacabos versarentur; ut hinc Lex Mosaica & ejus justificationes, carnales dictæ sint, ut videre est Hebr. 7. 16. & 9. 10. Itidèm apud Chrysost. orat. 13. in eamd. Epist. cujus verba hæc sunt: *Quid est mandati carnalis? circumcide carnem, unge carnem, lava carnem, munda carnem, tunde carnem, &c.* Quantò magis illi, qui Hostiam puram, & immaculatam, ipsum scilicèt Dei Filium, sub vini & panis speciebus quotidie manibus terunt; illam ipsam Hostiam, quæ in Cruce pependit, quæ candor est lucis eternæ, ac splendor paternæ gloriæ, in dies Deo Patri immo-

immolant, ab immunditiis carnis abstin-
 nentes, castitatem mentis & corporis illi-
 batam seruire tenentur. Quibus Chrysost.
 serm. de proditiōe Judæ: *Pura inquit, sit
 mens in omnibus, pura cogitatio; quia & Sacri-
 ficiū purum est.* Non coluerunt quidē
 perpetuum coelibatū Sacerdotes Mo-
 saici: sed quibusdam temporibus propa-
 gationi sui generis intendebant, eo quod
 Abrahamæ semini promissus fuisset Messias;
 vel ut ait Ambr. in 1. Timoth. 3. quod diu
 vacarent à ministerio ob multitudinem,
 quæ tūc erat Sacerdotū, sic ut rarò cu-
 jusque vices recurrerent. Nunc autē in
 Lege Gratię, cū nec ampliū Messias ex-
 pectetur, adeoque ad propagationem hu-
 mani generis non ita directē destinantur
 omnes, à conventu foeminarum, qui liberē
 statum Sacerdotalem acceptant, desistere
 coguntur: cū necesse sit eos quotidie in
 Ecclesiā prestō esse. Elias & Eliseus perpe-
 tuam virginitatem coluerunt: aliqui etiā
 alii in matrimonio sibi modum & limites
 pręscripserunt, non ignari, quod continen-
 tia prophetandi muneri, & Dei colloquio
 perfructu plurimū conferret. Vnde

Hieron. Epist. 11. ad Ageruchiam de monogamiâ: *Hieremias, inquit, captivitate propinquâ uxorem prohibetur accipere. Ezechiel in Babilone: Mortua est, inquit, uxor mea, & apertum est os meum. Nec ducturus uxorem, nec ille qui duxerat, possunt in opere conjugali liberè prophetare.* Et lib. 1. cap. 11. contra Jovinian. de Moyse refert, quod cùm Sēphoræ Sacerdotis Madianitæ per illustribus filiæ jūctus esset, multosque liberos ex eâ suscepisset, per illam insignem rubi visionem à Deo vocatus, ut sibi specialiùs deserviret, conjugio posthabito, uxorem ampliùs non cognovit. Et hoc voluit Deus Exo. 3. 5. *Solve calceamentum de pedibus tuis.* Tunc enim solvere & relinquere calceamentum, idem erat symbolicè ac uxori renuntiare, ut colligitur ex Ruth 4. 7. Sic Mòyses, cùm vidisset visionem magnam, & Angelum, sive Deum loquentem in rubo, nequaquàm ad eum voluit accedere, nisi solvisset calceamenta de pedibus & abjecisset vincula nuptiarum. Nequè hoc mirum videri debet in Sancto Prophetâ, Legislatore atque amico Dei: cùm omnis populus ad montem Sina Dei eloquium per-

percepturus, non aliter dignè potuerit accedere, nisi postquàm tribus diebus fuerat sanctificatus, atquè ab uxoribus abstinuerat. Exod. 19. 16. Ità sanctè philosophatur magnus Ecclesię Doctor Hieronymus, cui subscribit Ambr. lib. 1. de officiis. cap. ult. ubi ad probandam Clericorum continentiam ultimum illud exemplum in medium producit. Cum quibus concludo Evangelicos Sacerdotes & Religiosos, qui toties ad Deum, tùm sacrificando, tùm orando accedunt, ac suam conversationẽ cum Paulo in coelis habere debent, ac divino confortio frui, longè majori ratione à conjugis esse arcendos. Ità ab initio nascentis Ecclesię praxis nos docuit. De S. Joanne certissimum est, quod illibatum virginitatis florem Deo consecrãrit. S. Jacobum majorem in coelibatu vitam transēgisse sustinet Epiph. hæref. 58. Idem asserit de S. Jacobo minore hæref. 78. De S. Andrea sentit Metaphrastes in vitã S. Petri. De Paulo clarum est ex 1. Cor. 7. 7. & ex Hieron. Epist. 22. ad Eustoch. cap. 8. Ac deniquè cæteros etiã Apostolos ad matrimonium numquã convolasse existimat Tertull.

Tertull. lib. de monogam. c. 8. & Hieron. lib. 1. contra Jovinian. cap. 14. solum Petrum ab hac regulâ excipiendum putat. Non ita tamèn, quod tamquàm certum asserat, & in Ecclesiâ indubitatum. Quod & si qui præter ipsum conjugati fuerint, cum ad Apostolatus honorem à Domino vocati sunt, statim conjugio renuntiaverint, juxtà consilium Domini dicētis Luc. 14. 33. *Qui non renunciat omnibus quæ possidet, non potest meus esse discipulus.* Id ipsum dicendum est de Episcopis Apostolorum successoribus. Cùm enim pauci tunc temporis essent Christiani, necessum interdum fuit ad dignitatem tam Episcopalem, quàm Sacerdotalem promovere conjugatos, non tamèn bigamos, præstantes cùm doctrinâ tum virtute, uti indicat Paulus 1. Timoth. 3. 2. *Oportet Episcopum irreprehensibilem esse, unius uxoris virum.* Qui eo ipso vovebant & profitebantur castitatem, cum separatione thori; & cum uxoribus, tamquàm cum suis sororibus, conversabantur. Ità explicandi sunt antiqui Canones, & antiquissima Concilia, quæ mulieres quandoquè Episcopas, Presbiteras,

ras, Diaconissas, nuncupabant; eo quod Episcoporum, Presbiterorum, Diaconorum uxores essent. Sic Concil. Laodicense II. Turonense, Antisiodorense &c. Sic refert Gregor. lib. 4. Dialog. cap. 11. loquens de Presbytero Ursino. *Ex tempore Ordinationis accepta, Presbyteram suam, ut sororem diligens, sed quasi hostem cavens, ad se propius accedere numquam sinebat*: Accedit Apostol. ad Titum 1. 8. *Oportet Episcopum sine crimine esse, &c. hospitalem, benignum, sobrium, justum, sanctum, continentem, &c.* non solum à copulâ illicitâ, sed etiâ licitâ abstinentem. *Nemo enim militans Deo implicat se negotiis sæcularibus*, 2. Tim. 2. 4. Conc. Ancyranum in Oriente antè annos mille & ducentos celebratum can. 10. decernit Diaconos, qui in ipsâ ordinatione non protestantur se affectare conjugium, non posse illud post ordinationem inire: si autem protestentur, cum dispensatione Episcopi posse. Neocæsariense paulò post celebratum, anno scilicet 314. sic sensuit can. 1. *Presbyter si uxorem duxerit, ordine suo moveatur*. Concil. Carthaginense II. circa annum

annum

annum 394. can. 2. præclarum hujus veritatis dat testimonium his verbis. *Omnibus prælatet ut Episcopi, Presbyteri, Diaconi, vel qui Sacramenta contrectant, pudicitie custodes etiam ab uxoribus se abstineant. Quod Apostoli docuerunt, & ipsa servavit antiquitas, nos quoque custodiamus,* Telum efficacissimum, quo nedum Hæretici confodiantur, sed & aliqui Catholici convincantur, qui à Siricio Papâ hoc decretum de Sacerdotum continentia præmanasse contendunt. Sequuntur Concilium V. Carthaginense can. 3. Africanum sub Cœlestino & Bonifacio ca. 37. Romanum II. sub Sylvestro can. 8. & cœtera, quæ in Germaniâ, Galliâ, & Italiâ, & Hispaniâ celebrata sunt. Omitto Sanctos Patres tam Græcos, quam Latinos, qui unanimiter idem sentiunt. Sufficient utriusque Ecclesiæ Græcæ & Latinæ Doctorum Principes, Chrysostomus & Augustinus. Quorum prior Homil. 2. de Patientia Job: *Dixit Apostolus, inquit, Vnius uxoris virum, non eâ ratione, quod id nunc in Ecclesiâ observetur. Oportet enim omni prorsus castitate Sacerdotem ornatum esse:* Ità illud Græciæ decus.

cus. August. verò lib. 2. de adult. conjug. c.

20. *Solemuseis proponere continentiam Clericorum : qui plerumquè ad eandem sarcinam subeundam capiuntur inviti, eamq; susceptam usquè ad debitum finem, Domino adjuvante, perducunt. Vbi notandum est, quod initio Ecclesiæ ob penuriam virorum capacium, interdum ad statum Episcopalem assumerentur conjugati, qui uxori- bus abstinere cogebantur. Qui mos paulatim crescente numero Fidelium abolevit, ità ut modò non nisi liberè & volentes in Episcopos aut Sacerdotes potestatem habentes sue voluntatis consecrentur. Vndè illa consilia Pauli 1. Cor. 7. 8. Dico autem non nuptis & viduis, bonum est illis si sic permaneant, sicut & ego. Inferius v. 27. Solutus es ab uxore noli quarere uxorem, & v. 32. Volo vos sine sollicitudine esse. Qui sine uxore est, sollicitus est quæ domini sunt, quomodò placet Deo. Qui autem cum uxore est, sollicitus est quæ sunt mundi, quomodò placeat uxori, & divisus est, & mulier innupta & virgo, cogitat quæ Domini sunt, ut sit sancta corpore & spiritu. Et paulò post, Porro hoc ad utilitatem vestram dico, non ut laqueum vobis injiciam, sed ad*

sed ad id quod honestum est, & quod facultatem præbeat sine impedimento Dominum obsecrandi. Et v. 38. Qui matrimonio jungit virginem suam, benè facit: & qui non jungit, meliùs facit. Et tandèm, Beatior autèm erit, si sic permanserit, id est innupta, secundum meum consiliùm: puto autèm quod & ego spiritum Dei habeam. Vt quid ergò Novatores, nè dicam Apostolicæ doctrinæ deformatores, in tantum contrà Ecclesiam Catholicam latrant, quod admittat vota castitatis liberè & spontaneè voventium, cùm secundum Apostolum castitas sit majus bonum. Quod si majoris boni vota fieri laudabile non sit & acceptum Deo, cùm vovit Jacob Domino in Bethel? Genes. 28. 20. Vnde Deuteron. 23. 21. Cùm votum voveris Domino Deo tuo, non tardabis reddere, quia requiret illud Dominus Deus tuus: & si moratus fueris, reputabitur tibi in peccatũ: si nolueris polliceri absquè peccato eris. Quod autèm semel egressum est de labiis tuis, observabis, & facies sicut promisisti Domino Deo tuo, & propriâ voluntate, & ore tuo locutus es. Ps. 75. 12. Vovete & reddite Domino Deo vestro, omnes qui in circuitu ejus affertis munera.

nera. Et de votis Legis Gratiaæ prædixit
 Isa: 19. 21. *In die illâ colent eum in hostiis &
 muneribus & vota vovebunt Domino & sol-
 vent :* & alibi passim Scriptura. Sic vo-
 verunt Rechabitæ, sic Nazaræi. Ex qui-
 bus omnibus colligitur, quod etiãmsi
 præcepti divini non sit vovere, illo tamèn
 astringuntur ut reddant, quicumquè libe-
 rà voluntate voverunt. Quamobrèm exi-
 gendo votorum adimpletionem, fide-
 lum conscientias non onerat Ecclesia: cùm
 illa necessaria simpliciter non sint, sed li-
 bera; & necessaria tantummodò secun-
 dùm quid & ex conditione: sicùt neces-
 sarium est illi qui contractum aliquem
 inivit, ut pòst inítum ab eo non resiliat,
 ut patet C. de pactis, l. pacta. Nequè
 enim in Lege novâ ad statum Religio-
 sum quis cogitur, cùm eo ipso in Ecclesiâ
 Catholicâ vota profitentium invalida ha-
 beantur, quo illa inviti emisserunt. Con-
 gruentissimum tamèn fuit, & divino cul-
 tui maximè consentaneum, ut acceptato
 statu Religioso & votis liberè emissis, aut
 Sacris Ordinibus susceptis, ob rationes
 superius deductas, quilibèt perpetuam
 Z castita-

castitatem colat, & spurcitiis carnalibus absterneat. Nec est quod nugetur Minister Delphicus, Religiosos interdum affectionibus carnis & concupiscentiæ agitari, & interdum impelli ad actus venereos: cum illas etiã Paulus in carne suã persenserit, nec tamẽ ideò veneri vel licitæ vel illicitæ indulgit. Sciebat enim quod *Fidelis est Deus, qui non patietur vos tentari, suprà id quod potestis: sed faciet etiã cum tentatione proventum, ut possitis sustinere.* I. COR. IO. 13. Quod obijcitur ex Platinã de Pio II. cui Sacerdotibus magnã ratione sublata nuptiã videbantur, majori tamẽ restituenti. Missum facio, juxtã multos, Platinam non itã rectẽ Sedi Apostolicæ affectum fuisse, ex eo quod à Paulo II. tormentis subjectus fuerit, tamquã conjurationis reus: & dico nihil hoc coelibatui Ecclesiastico officere, cum nusquã tale decretũ à Pio II. emanaverit. Quare dato etiã quod illud aliquandò senserit ut Doctor privatus & particularis; numquã tamẽ e Cathedrã ut Papa dictavit. Quod verò S. Bernardus serm. 66. in Cant. dicit Ecclesiam abominationibus & gravissimis scele-

sceleribus replendam, si tollatur conjugium; nihil quoque contrà nos facit. Quandoquidè ibidem S. Bernardus reprehendat solos Hæreticos, ut Manicheos, & similes, qui matrimonium omnimodè ex Ecclesiâ tollere nitebantur. Quod nullus umquàm Pontificum in Ecclesiâ Catholicâ tētavit: ubi quibuslibet semper nuptiæ licitæ fuerunt, illis dumtaxat exemptis, qui voto continētiae se obstrinxissent. Nec est quod coelibatui aut votis ascribantur peccata illa, quæ fieri quandoque contingit, cùm nec matrimoniis adulteria, aut alia non minùs detestanda ascribantur: & potius sit abusus votorum, & coelibatus; quorum fructus est secundùm Apost. 1. Cor. 7. 34. cogitare quæ Domini sunt; esse sanctum & corpore & spiritu. Nequè voluit etiàm Paulus 1. Timoth. 3. 2. Sacerdotes connubia amplecti, ubi dicit: *Oportet Episcopum irreprehensibilem esse, unius uxoris virum*: sed secundùm litterâ vult *unius uxoris*, id est, non bigamos, in Episcopos eligi, quandò necessitas cogit conjugatos assumere; ut alibi diximus. Nec obest nobis loc. cit. 1. Timoth. 4. 1. *Discedent quidam à Fide, atten-*

dentes spiritibus erroris, & doctrinis dæmoniorum, in hypocrisi loquentium mendacium, & cauteriatam habentium suam conscientiam, prohibentium nubere, abstinere à cibis, &c. Ibi enim invehitur Apostolus in Hæreticos, quales fuerunt Marcion, Manthes, & Tractianus, qui damnabant nuptias, quas numquam Ecclesia Catholica damnavit; sed contrà semper asseruit. Atquè adeò potius ibidè prædictum est de Luthero, Calvino, & Consistorialibus Delphicis: *Quia in novissimis temporibus discedent quidam à Fide, attendentes spiritibus erroris, & doctrinis dæmoniorum, in hypocrisi loquentium mendacium, &c.* Cùm inimici castitatis, mortificationis, orationis, & aliarum virtutum, tantoperè à Christo, ab Apostolis, & SS. Patribus verbo & facto commendatarum, non capiant verbum istud: *Sunt Eunuchi, qui seipsos castraverunt propter regnum cælorum. Qui potest capere, capiat.* Matth. 19. 12.

M O T I V V M X L I I I.

Doctrinam Orthodoxam Ecclesia circa Purgatorium fabulosam existimat, quod repugnet

pugnet. iustitia, & misericordiae divinae. Iustitia quidem, eo quod Christus pro nobis satisfecerit, qui secundum Isa. 53. 5. Vulneratus est propter iniquitates nostras, disciplina pacis nostrae super eum: Nec injustus sit, ut secundam satisfactionem exigat, & sanguis JESU CHRISTI Filii ejus emundat nos ab omni peccato. 1. Joa. 1.7. Misericordiae verò, eo quod Deus peccata remittendo, etiam poenam remittat: atque adeò, quod semel ignovit, rursùm punire non potest.

RESPONDETUR.

Et Purgatorii veritas multipliciter probatur.

NON miror equidem quod Calvinistae in hoc vel futuro saeculo nullum Purgatorium experiantur, ut Catholicam doctrinam admittant, quos non Purgatorium, sed Infernus expectat. Expetunt sibi è Sacris Literis omnia probari. Et nè quidem ex iis contrarium unum Iota probarent. Irrefragabiliter itaque ex verbis utriusque Testamenti veritatem hanc demonstro.

monstro. Imprimis 2. Machab. 12. 43. Misit Judas Machabæus in Jerusalem *duodecim millia drachmas argenti*, offerri pro peccatis mortuorum sacrificium, *benè & religiosè de resurrectione cogitans, &c.* Et concludit, *Sancta ergò & salubris est cogitatio pro defunctis exorare, ut à peccatis solvantur.* Qui locus Scripturæ ità manifestus est, ut Hæretici non invenientes subterfugium, quo hoc jaculum evitent, satius duxerint negare hunc librum esse Canonicum. Et nè sine fundamento hoc dixisse videantur, hanc rationem allegant, quod Author in fine libri veniam petat, si quâ in re erraverit. Eccè perfidiam hæreticæ pravitatis : de infallibili veritate suspectum habent, quod humiliter de seipso sentiat. Revocent à pari in dubium Regii Prophetæ Psalmos, quos tamèn ut maximè authenticos amplectitur Ecclesia, imò & Synagoga, qui nihilominus similiter de se sentit & loquitur. Ps. 68. *Deus tu scis insipientiam meam, & delicta mea à te non sunt abscondita.* Et Psal. 24. *Delicta juventutis meæ & ignorantias meas, ne memineris.* Solet autèm Spiritus Sanctus ità per os Prophetarum suorum loqui,

loqui, ut stilo & communi ipsius Prophetę loquendi modo se accommodet: ut non difficile esset pluribus exemplis probare, nisi brevitati consulerem. Enimverò libri Machabæorum semper in Ecclesiâ ut Canonici habiti sunt, & videre est ex diversis Conciliis, præsertim Carthagenensi III. can. 47. ex decretis Pontificiis, inter cetera Innocentii I. Epist. 3. ad Exuperi. can. 3. & ex Sanctis Patribus, inter quos S. August. lib. 18. de civit. Dei cap. 36. *In quibus sunt Machabæorum libri, quos non Iudæi, sed Ecclesia pro Canonicis habet.* Et Hiero. 2. Prolog. super eosdem libros ait: *Machabæorum libri, licet non habeantur in Canone Hebræorum: tamen ab Ecclesiâ inter divinorum voluminum adnotantur historias.* Et rursus Aug. lib. de hæresibus ad Quod vult Deum c. 53. Arium in numero Hæreticorum collocat, eo quod negaverat licere pro defunctis orare. Et lib. de curâ pro mortuis agendâ: *Defunctis, inquit, cum omni diligentia misereri & subvenire studeamus, attendentes, & quod Iudas Machabæus fecerit. Dixit enim quod sancta esset cogitatio, pro defunctis exorare, ut à peccatis solvantur.* Tanti fecit

Augustinus horum librorum auctoritatem. Eadem veritas Purgatorii stabilitur.

Tobiæ 4. 18. *Panem tuum, & vinum tuum super sepulturam iusti constitue, & noli ex eo manducare & bibere cum peccatoribus.* Hinc

orta est consuetudo illa antiquissima & planè laudabilis, quæ adhuc servatur, ut consanguinei defuncti mittant cibum & potum pauperibus & Religiosis, ut deprecantur pro defunctis. Sic Chrysost. homil.

32. in Matth. *Cùm post mortem tuorum pauperes convocas? cùm Presbyteros, ut pro eis velint orare, obsecras?* 1. Reg. ult. 12. pro morte

Saul habitatores JabesGalaad septem diebus jejunaverunt. Et 2. Reg. 1. 12. *Flevit David & jejunavit pro Saule & Ionatha, aliisque*

occisis. Et Isa. 4. 4. *Si abluerit Dominus sordes filiarum Sion, & sanguinem Ierusalem laverit*

de medio ejus, in spiritu judicii & spiritu ardoris. Quod intelligit August. de poenâ Purgatorii lib. 20. de civit. Dei c. 25. Et Mich.

7. 8. *Ne lateris inimica mea super me, quia cecidi. Consurgam cùm sedero in tenebris. Dominus lux mea est, iram Domini portabo, quoniam*

peccavi ei, donè causam meam judicet, & faciat judicium meum, educet me in lucem,

& faciat judicium meum, educet me in lucem,

videbo

videbo iustitiam ejus. Vbi glossa ordinaria illud, iram Domini portabo, exponit, hic vel in Purgatorio. Et Hiero. lib. 1. advers. Pelag. ca. 9. dicit per hunc locum Scripturæ Purgatorium probari. Deindè ex novo Testamento id ipsum probatur 1. Cor. 3. 14. Si cujus opus manserit, quod superædificavit mercedem accipiet. Si cujus opus arserit, detrimentum patietur; ipse autem salvus erit, sic tamèn quasi per ignem. Quem locum S. August. de igne Purgatorio intelligit, serm. 4. de Sanct. in commem. anim. Multi sunt, inquit, qui lectionem istam malè intelligentes, falsâ securitate decipiuntur, dùm credunt, quod si suprà fundamentum Christi capitalia crimina ædificent, peccata ipsa per ignem transitorium possint purgari, & ipsi postea ad vitam perpetuam pervenire. Intellectus iste, Fratres charissimi, corrigendus est, quia ipsi se seducunt, qui taliter sibi blandiuntur. Illo enim transitorio igne, de quo dixit Apostolus, Ipse autem salvus erit, sic tamèn quasi per ignem; non capitalia, sed minuta peccata purgantur. Qui enim commiserit opera digna igne, ut sunt peccata venialia, verba otiosa, de quibus (teste Domino Matth. 12. 36.) etiàm reddenda

est ratio in die iudicii, in igne purgandus est, aut poenam aliquam vel in hac vitâ, vel in futurâ subiturus: non æternam, cùm hoc dissentaneum foret divinæ justitiæ; ergò aliquam temporalem. Rursùm Matth. 5. 22. *Qui irascitur fratri suo, reus erit iudicio, Qui autem dixerit fratri suo Racha, reus erit concilio. Qui autem dixerit fatuè, reus erit gehennæ ignis.* Quæ tria exponit S. Aug. lib. 1. in ser. de monte c. 9. de poenis animarum pòst hanc vitam, & dicit damnationem æternam solùm tribui tertio generi peccatorum recensitorum: primo verò & secundo, utpotè leviorum defectuum, leviores poenas, ac proindè temporales: & sic communiter Doctores. Matth. 5. 25. dicitur: *Esto consentiens adversario tuo cito, dùm es in viâ cum eo; nè fortè tradat te adversarius iudici, & iudex tradat te ministro, & in carcerem mittaris. Amen dico tibi, non exies indè, donec reddas novissimum quadrantem.* Vbi per adversarium intelligitur ipsa Lex Dei, vel dictamen conscientiae, quæ legem Dei semper objicit peccanti: & dicuntur adversarii, quod adversentur carni, & pravis affectionibus. Ità Ambr. Comment. in Luc.

Luc. lib. 7. cap. 12. August. in cap. 5. Matth. Homil. 1. de verb. Domini. Grego. Homil. 39. in Evangelia. Bern. serm. 85. in Cant. In viâ, id est, in hâc vitâ, ut expresse significatur in Psal. 118. 1. *Beati immaculati in viâ*: & degentes in hâc vitâ dicuntur viatores. Per carcerem, juxtâ communem SS. PP. sensum, intelligitur Infernus: in quo diversę sunt mansiones, alię pro damnatis, alię pro his qui purgantur. *Non exies indè donèc reddas novissimum quadrantem.* Quod indè non sint dimittendæ animæ donèc plenè satisfiat justitiæ Divinæ, aut per satisfactionem bonorum operum seu suffragiorum, quæ in Ecclesiâ militante illis applicantur, aut per ipsarum animarū satisfactionem, id est, ut poena tolerata coæquari possit cum defectibus remissis. Vndè additur *novissimum quadrantem.* Cōmuni etiâ Patrum consensu plura Oecumenica Concilia Purgatorium asseruerunt, Carthaginense III. cap. 79. In Hispaniâ Concil. Bracharense I. ca. 34. In Galliâ Conc. I. Cabillonense c. 4. & Cabilonense II. sub Leone Papâ III. cap. 39. & Aurelianense II. cap. 15. In Germaniâ
Wor-

Wormacienſe cap. 10. In Italiâ Conc. Sextum ſub Symmacho. Idem docetur in variis liturgiis Jacobi, Baſilii, Chriſoſtomi, Ambroſii, &c. in quibus omnibus fit oratio pro defunctis. Accedunt teſtimonia Patrum. Dionyſ. de Eccle. Hierarch. c. 7. *Accedens*, inquit, *divinus antistes, ipſi mortuo ſanctè precatur &c. Precibus quidè à divinâ benignitate contendit, ut & omnia peccata, quæ humanâ fragilitate, imbecillitateq; admiſſa ſunt, ei qui exceſſit è vitâ, remittat, & eum in lucem ac regionem vivorum deducat in locum, à quo fugit dolor, triſtitia & gemitus.* Athanaſius quæſt. 34. Clemens Alexand. li. 6. conſtit. Gregor. Nazianz. oratione 2. Ephrem in ſuo teſtamento. Cyrillus Catecheſi myſtag. 5. & alii. Inter quos Chriſoſt. homil. 41. in 1. Cor. clariſſimè aſſertum noſtrum aſtruit: *Iuvetur quidè mortuus non lachrymis, ſed precibus, ſupplicationibus, eleemoſinis.* & Homil. 69. ad pop. *Non temerè ab Apoſtoliſ hac ſancita fuerunt, ut in tremendis myſteriis defunctorum agatur commemoratio. Sciunt enim indè multum eis contingere lucrum, utilitatem multam.* Similia etiàm habet in morali digreſſione ſerm. 3. ſuper Epift. ad Phi-

Phi-

Philip. E Latinis Tertu. lib. de coron. mili. cap. 53. inter traditiones Apostolicas numerat suffragia pro defunctis. Cyprianus tom. 1. Epist. 66. *Episcopi antecessores nostri religiosè considerantes, & salubriter providentes, censuerunt nè quis frater excedens, ad tutelam vel curam clericum nominaret: ac si quis hoc fecisset, non offerretur pro eo, nec sacrificium pro dormitione ejus celebraretur.* Ambros. lib. 2. Epistol. 8. Hieronym. Epistol. ad Pammachium de obitu Paulinæ. Augustinus lib. de curâ pro mortuis cap. 1. *In Machabeorum, inquit, libro legimus, oblatum pro mortuis Sacrificium. Sed etsi nusquam in Scripturis veteribus omninò legere- tur, non parva tamèn est universæ Ecclesiæ, quæ in hac consuetudine claret, auctoritas: ubi in precibus Sacerdotis, quæ Domino Deo ad ejus altare funduntur, locum suum habet etiàm commendatio mortuorum.* Vbi duo potissimùm notanda recurrunt: primò juxtà doctrinam Chrisost. Cypriani, & Augustini ex communi, antiquâ, imò Apostolicâ traditione, usum esse in Ecclesiâ orandi & sacrificia offerendi pro defunctis. Quare certissimum & omninò indubi-

dubitatum esse debet, Purgatorium admittendum esse, cum in eo tota Ecclesia errare non possit, nisi Christus ipse arguatur infidelitatis & mendacii. Nequè dici potest Chrysost. Cyprian. & August. à veritate in eo deviasse : nam indubiè, si ita esset, cæteri Patres & Doctores, qui illo sæculo & sequentibus claruerunt, contradixissent, eorumque sententias refutassent. Quamobrèm cum usus communis & antiquissimus Ecclesiæ sit, ex Apostolicâ traditione proveniens, quales æstimare oportet hosce Novatores Lutherum & Calvinum, eorumque sequaces, qui Purgatorium & suffragia pro mortuis abolere contendunt? Audiant Aug. epist. 118. cap. 5. dicentem & eos redarguentem : *Insolentissima insania est disputare contra id quod tota Ecclesia facit.* Secundò notandum est, commentitium dogma Calvinii lib. 3. instit. cap. 5. §. 10. Vbi confessus antiquissimam consuetudinem illam in Ecclesiâ jam antè mille & trecentos annos fuisse, erroneam tamèn esse asserit. *Antè mille & trecentos annos usu receptum fuit, ut preces fierent pro defunctis.*

Etis : sed omnes quidè̃m fateor in errorem abrepti fuerunt. Hæc Calvinus : itaq̃ue hâc Catholicâ veritate manifestissimè probatâ, testimoniis antiqui & novi Testamenti, traditionibus, Conciliis, auctoritate SS. Patrum & Doctorum, communi universalis Ecclesiæ usu & consensu, qui, ut inquit August. lib. 4. de Bapt. c. 24. *Non potest non esse legitimus, tamquàm ab Apostolis inchoatus, & à Christi potestate descendens.* Tandè̃m complures apparitiones & revelationes fide dignissimas, utpotè multorum SS. Patrum ac testium omni exceptione majorum testimonio stabilitas omittens, ob pervicaciam & duritiâ cordis adversariorum nostrorum idipsum rationibus ostendam. Argumentum Hæreticorum, in quo tamquàm in suo Achille confidunt, est poenam simul remitti cum culpâ, eo quod ablatâ causâ, teste Philosopho, auferatur effectus: atqui remissio quoad culpam non fit in futuro sæculo, sed in præsentî, ut evidenter constat ex Scripturis, & omnes etiẫm Catholici admittunt: ergò sicùt pòst hanc vitam non manet ampliùs reatus ad culpam, nequè

nequè etiàm remanebit reatus ad poenam; & per consequens frustrà & fictitiè ponitur Purgatorium. Respondetur & simul confirmatur Catholica sententia, negando majorem, remissâ videlicèt culpâ tolli etiàm reatum ad poenam: & evidenter ex Sacris Litteris contrarium probatur, 2. Reg. 12. 13. Cùm David post delicta gravissima contrà Deum patrata exclamaret coràm Propheta Natan, *Peccavi Domino*: statim replicuit Propheſa, *Dominus quoquè tranſtulit peccatum tuum, non morieris*. Eccè peccatum juxtà vocem Prophetę deletum. Subjunxit nihilominùs Nathan. *Verumtamèn quoniam blaſphemare feciſti inimicos Domini, propter verbum hoc, filius qui natus eſt tibi, morte morietur*. Eccè gravissima poena, quam post remiſſionem peccati ſuſtinere cogeſatur: non utcumquè, ſed in vindictam commiſſi, *quoniam blaſphemare feciſti nomen Domini*, atquè adeò falſitatis ſpeciem habet & infidelitatis, aſſerere poſt remiſſam culpam non remanere ordinariè reatum poenæ. Item Sap. 10. 1. dicitur *illum qui primus formatus eſt à Deo, Pater orbis terrarum, cùm primus*

primus esset creatus custodivit & eduxit illum à delicto suo. Habemus culpam remissam.

Nihilominus in vindictam peccati gravissima mala perpeffus est toto tempore vite, orbatus deliciis paradisi, & cunctis bonis, quibus fruitus fuisset, si in innocentia perseverasset. Vnde Genes. 3. 17.

Quia audisti vocem uxoris tue, & comedisti deligno, ex quo praeceperam tibi nè comederes: maledicta terra in opere tuo: in taboribus comedes ex eâ cunctis diebus vitae tuae. Spinâs & tribulos germinabit tibi, & comedes herbam terrae. In sudore vultus tui vesceris pane, donec revertaris in terram, de quâ sumptus es: quia pulvis es & in pulverem reverteris. Quæ

mala tulit Adam, ut constat ex sacro textu, in poenam justam culpæ, non tamquam paternam correctionem, ut à malis futuris abstineret, sed in punitionem delicti, *quia audisti vocem &c.* Plura similia exempla facile est è Sacris paginis adducere: verum duo hæc sufficient, quibus constet evidenter, non semper cum culpâ condonari omnem poenam. Nequè in eo injurii sumus redemptioni humani generis factæ per merita & passionem Chri-

A a sti, ut

sti, ut plerumquè fingunt Hæretici: alioquin etiàm post susceptum baptismum, quo peccatum originale deletur, non amplius patereimur poenas ipsum peccatum originale subsecutas, qualis est mors cum cæteris miseriis, quas in eo contraximus. Tantùm verò abest, ut vel misericordiæ, vel justitiæ Divinæ posito igne purgatorio aliquid detrahatur: quin potius eâ ratione utraqùè virtus in Deo mirabiliter conjungitur & maritatur: ut & ex errore Novatorum nostrorum utraqùè destruitur. Certum est enim quod sicut justitia sine misericordiâ crudelitas est; ità misericordia sine justitiâ saltèm aliquali injustitiâ est, & alteram sine alterâ in Deo reperire est impossibile. Atqui Sectarii Deum faciunt, sine justitiâ misericordem, cùm culpâ remissâ nullam poenam à delinquente subeundam restare asserunt. Nos verò in remissione culpæ misericordiam Dei admiramur; & in poenâ temporali restante, ejus justitiam veneramur, & misericordiæ conjungimus.

MOTIVVM XLIV.

QUOD Romana Ecclesia, ut ex fabuloso Purgatorio eripiat animas, in usu habeat concedere indulgentias iis, qui eas promerebuntur, elargiendo eleemosinas pecuniarias Ecclesiis, aut instituendo aliquam peregrinationem & similia. Irridet liberalitatem Pontificiam in distributione illius thesauri, & laudat eos qui contrarium sentiunt: scientes quod non corruptibilibus auro vel argento redempti estis de vanâ vestrâ conversatione paternæ traditionis: sed pretioso sanguine agni immaculati Christi I. Pet. I. 18. Quod illis, qui putant sibi Regnum Cælorum acquirere pecuniis, dici possit illud Petri ad Simonem Magum Act. 8. 20. Pecunia tua tecum sit in perditionem, quoniam donum Dei existimasti pecuniâ possideri. Non est tibi pars, nequè fors in sermone isto: cor enim tuum non est rectum coràm Deo.

R E S P O N D E T V R.

Suffragia pro defunctis & indulgentiæ confirmantur.

Purgatorium omni rectè sentienti admittendum esse abundè demonstravimus, & à fabulositate vindicatam veritatem à quolibet Orthodoxo credendam sustinuimus. Indulgentiarum usum in Ecclesiâ esse non novum verissimum est. Antè annos octingentos à Pontificibus Indulgentias concessas, testis est S. Thom. in 4. sentent. d. 20. q. 1. art. 3. quæstiunc. 2. ubi S. Gregorium Magnum eas in diebus Stationum populo impertivisse docet. Sergius, qui sedet in Pontificatu anno 844. trium annorum & trium quadragenarum Ecclesiam S. Martini in Montibus, festo titulari ejusdem visitantibus distribuit, ut legere est in tabulâ marmoreâ, incisâ literis antiquissimis. Similiter Leo III. ut refertur à S. Lutgero suæ Epist. cap. 9. *Idem S. Leo Papa, inquit, anno Dominicæ Incarnationis octingentesimo tertio, cum magnâ solemnitate*

nitate suorum Cardinalium , Archiepiscoporum , Episcoporum & Prelatorum ad Imperatorem Carolum in Germaniam veniens , & ab eodem Imperatore , imperialiter cum suis receptus , inter multa pietatis suæ opera , instantiâ ejusdem Serenissimi Imperatoris & Regis , Aquisgrani in Palatio dedicavit Ecclesiam perpetuæ Virginis Mariæ , donans eamdẽ Ecclesiam multis Indulgentiis . Et bis infrâ idipsum confirmat aliis exemplis , quæ Colonia Agrippinæ & in Galliâ contigerant . Doceri etiã potest ex diversis Conciliis Generalibus , quorum aliqua nuper pag. 161 , citavimus . Quibus addi possunt Claramontanum , teste S. Antonino , Lateranense IV. Lugdunense , Viennense , Constantiense , & tandẽ Tridentinum . Quæ licet à Sectariis non admittantur , non tamẽ ideò ipsorum auctoritas extenuatur : cùm proprium sit hereticorum , ea contemnere & reprobare , in quibus ipsorum errores damnantur . Sic Arianæ olim respuerunt Conc. Nicenum , Nestorianæ Ephesinum , Pelagianæ Arauxicanum , Eutichianæ Calcedonense , Lutherani & Calvinistæ Tridentinum . Etiã si secundum Augustin.

Epist. 118. semper fuerit in Ecclesiâ plenariorum Conciliorum saluberrima auctoritas. Vndè cùm communis sit consensus Ecclesiæ, tàm quoad doctrinam, quàm quoad praxim, nequè ostendi possit initium, juxta communem Sanctorum regulam, à Christo & ab Apostolis emanasse certissimè credendum est. Quamvis antè annos recensitos, non ità frequens fuerit in Ecclesiâ earum usus, quod fervor primorum Patrum necdùm ità in posteris concidisset; sicut jam declinante magis seculo in malitiæ senium. Doctrina contraria fugienda est, velut blasphema in Christum & Sponsam ejus Ecclesiam: In Christum, quod eum fallaciæ insimulet, velut non stantem promissis, quibus sponpondit portas Inferi adversùs Ecclesiam non prevalituras: hoc verò posito prævaluissent; nequè in amore eterno, & sponsalitie perseverasset sancta & immaculata; sed fornicata fuisset cum erroribus multis, quod blasphemum est in eam. S. Bernardus his qui ad bellum Hierosolymitanum erant ituri, prædicavit Indulgentias concessas ab Eugenio Papâ III. & prædicationem suam pluribus

pluribus & evidentibus miraculis confirmavit, ut patet ex initio lib. 2. de consideratione. S. Franciscus divinâ revelatione accepit Jubilæum pro Ecclesiâ S. Mariæ de Angelis, quod postea Summus Pontifex approbavit. Item S. Birgitta, cujus Revelationes apud gravissimos Theologos in æstimatione sunt, edocta fuit à Christo Domino de abundantibus Indulgentiis, quæ sunt in Vrbe. Et quamvis hæc ab hæreticis floccipendantur, suam tamen fidem merentur. Et quemadmodum in unaquaque Republicâ, si recto regimine potitur, constitui solet thesaurus publicus ad subveniendum egenorum necessitatibus, ut ex affluentia divitum sustententur: sic ex thesauro illo, & superabundantia meritorum Christi & Sanctorum, quæ satisfactoria sunt, in Ecclesiâ (quæ Respublica à Christo Domino instituta, rectissime ordinata est) laborantibus penuriâ satisfactionum, five in hac vitâ etiamnum degant, five in aliâ detineantur, ut faciant satis divinæ justitiæ, pro reatu poenæ succurritur, applicando merita Christi & satisfactiones ejus ac Sanctorum. Hujus autem

infiniti thesauri dispensationem & applicationem penes Pontificem esse, & legitimos Christi Vicarios, satis colligitur ex illâ amplissimâ ligandi & solvendi potestate à Deo ipsis concessâ. Vndè Paulus 1. Cor. 4. 1. *Sic nos existimet homo, ut ministros Christi, & dispensatores mysteriorum Dei.* Et de Indulgentiis satis clarè, ut ex toto contextu patet, 2. Cor. 2. 10. *Nam & ego quod donavi, si quid donavi propter vos in personâ Christi:* Vbi non culpam, sed poenam donavisse intelligendus est Apostolus. Merita enim passionis Christi Domini, quamvis infinitæ virtutis sint, & infiniti valoris ad satisfaciendum æterno Patri pro omni debito nostro, nisi applicentur per nostram cooperationem, aut virtutem sacramentorum, aut per alia media quæ in Ecclesiâ statuta sunt, non sortiuntur efficaciter effectum: aliàs fatendum esset omnes indiscriminatum salvari, & nullum perire: quod plusquàm temerarium est, & falsissimum, & contra ipsum sacrum textum multis in locis, *Multi enim Matth. 20. 16. sunt vocati, pauci verò electi.* Et 7. v. 14. *Arcta via est quæ ducit ad vitam, & pauci sunt qui inveniunt eam.* Et v.

13. *Spatiosa via est quæ ducit ad perditionem, & multi sunt qui intrant per eam.* Atquæ adeò cõformiter explicanda sunt illa loca Scripturæ. 1. Joa. 2. 2. *Ipse est propitiatio pro peccatis nostris: non pro nostris autem tantum, sed & totius mundi.* Et Isaia 53. 5. *Ipse autem vulneratus est propter iniquitates nostras, attritus est propter scelera nostra, & similia.* Cùm ergo sæpissimè contingat multos ex hâc vitâ decedere condonatâ offensâ, non tamèn ablato plenè reatu poenæ; necessum est ut in Purgatorio per satisfactiõem, aut per divitias Ecclesiæ à supremo ejus Oeconoמו erogatas, justitiæ divinæ satisfaciant. Adjunguntur etiã satisfactiões superabundantes B. Virginis & Sanctorum; nam sicut in effectibus naturalibus, eo quod causæ secundæ concurrant cum causâ primâ ad suos effectus producendos, nullatenus minuitur virtus infinita Dei operantis: quin potius magis in eo resplendet divinæ sapientiæ & providentiæ dispositio, cùm causalitas ipsa causæ secundæ in primam causam, nempe Deum refundatur: Ità pariter merita satisfactoria Sanctorum, etsi cooperantur

cum infinito valore & virtute Dominicæ Passionis, non propterea extenuatur & vilescit, cum inde omnem suam vim trahât, tamquam à fonte, & in Christum & ejus Passionem totum redundet. Vndè ineptissimè objicitur illud I. Pet. I. 18. *Scientes quod non corruptibilibus auro vel argento redempti estis: sed pretioso sanguine agni immaculati.* Et illud Act. 8. 20. *Pecunia tua tecum sit in perditionem, quoniam donum Dei existimas si pecuniâ possideri.* Nequè enim ullus umquam Catholicus existimavit, nos esse redemptos auri, argenti, aut alicujus puræ creature pretio: sed tantum solius Christi sanguine primariò; & meritis Sanctorum, quæ totum suum valorem à Christo trahunt, quasi secundariò. Profectò manifestissima calumnia est, hoc ipsum Ecclesiæ impingere, quod simoniam admittat: quâ tamèn ipsa vehementer semper detestata gravissimè punit. Quasi verò propter pecunias, Indulgentias impertiatur, dum elargitionem alicujus eleemosynæ pecuniariæ eas lucraturis Fidelibus præscribit, aut simile aliquod opus pium, ut sunt peregrinationes ad Divam Lauretanam, Jacobum

bum Compostellanum & limina Apostolorum: quibus, si cum debitis circumstantiis fiant, mens humana ad maiorem devotionis & reverentię erga Deum incitatur affectum, & ad imitationis Sanctorum studium impensius inflammatur.

MOTIVVM XLV.

R *Vrsum occasione Indulgentiarum debachatur in Sanctos. Quod Papistæ eorum meritis prætendant magnam partem Regni cælestis, eosdemq; venerantur ob miracula: quæ si perpendantur, longè distant à miraculis Prophetarum & Apostolorum. Quod exigentes miracula sint infideles, cum Fideles illis non indigeant. Et sicut non est credendum omni spiritui, sicut dicitur 1. Ioa. 4. 1. Probate spiritus si ex Deo sunt: sic nec omnibus miraculis. Quod dignoscendorum miraculorum signum exprimitur Israelitis Deut. 13. 1. Si surrexerit in medio tui Prophetes, aut qui somniũ vidisse se dicat, & prædixerit signum atque portentum, & evenerit quod locutus est, & dixerit tibi: Eamus & sequamur Deos alienos quos ignoras, & serviamus eis: non audies verba Prophetæ illius aut som-*

somniatoris : quia tentat vos Dominus Deus vester , ut palàm fiat utrùm diligatis eum, an non , in toto corde, & in totâ animâ vestrâ. Propheta autèm ille aut fictor somniorum interficietur: quia locutus est, ut vos averteret à Domino Deo vestro &c.

R E S P O N D E T V R.

Et Sanctorum in meritis communio, & miraculorum veritas asseritur.

QUod Sanctorum merita nobis profutura confidamus , verissimum est. Quod per illa suo modo partem regni coelestis pretendamus , orthodoxum est. Et quidni? Amici Dei facti sunt, nimis confortatus est principatus eorum. Sedebunt super sedes duodecim , judicantes duodecim tribus Israël. Satisfactiones eorum superabundantes sunt , quæ mutuata à Christi Passione virtute nobis prodesse possunt. Quidni confidamus? Gavisi sunt Sancti, gavisus est Apostolus in passionibus suis pro nobis. Adimpleverunt Sancti, adimplevit Apostolus ea quæ desunt Passio-

Passionum Christi in carne suâ pro nobis: quidni profint, si applicentur per eos, qui constituti sunt dispensatores mysteriorum Dei, qui quod donant, in personâ Christi donant? *Nunc gaudeo*, inquit, *Apostolus Colof. 1. 24. in passionibus pro vobis, & adimpleo ea quæ desunt Passionum Christi in carne meâ pro corpore ejus, quod est Ecclesia.* Sanctos etiâ colimus & veneramur propter miracula: & hoc ipsum ratio suadet. Illis movemur, & ad sanctitatem mentis & corporis excitamur: cû non colamus? Ægrè tulit ipsa veritas Judæorum duritiam & pervicaciam, quod signis ejus non moverentur, & fulminavit in caput eorum Væ Væ. Reformidet illud ipsum Consistorium Delphicum, & quot Sanctorum miracula pro nugis æstimant, & virtute diabolicâ facta cavillantur, quandò nimis evidentia sunt, ut negari non possint. *Væ tibi*, inquit *Math. 11. 21. Corozaim, Væ tibi Bethsaida, quia si in Tyro & Sydone factæ essent virtutes, quæ factæ sunt in vobis, olim in cilicio, & cinere penitentiam egissent.* Cavete Calvinistæ, *Tyro & Sydoni remissius erit in die judicii, quam vobis,*

vobis, nisi convertamini. Omnia poterat Paulus in Christo JESU, *Omnia*, inquit, *possum in eo qui me confortat*. Philip. 4. 13. Omnia possunt Sancti in fide & virtute ejus qui omnipotens est. Joa. 14. 12. *Amen amen dico vobis, qui credit in me, opera quæ ego facio & ipse faciet, & majora horum faciet*. Quantum ergò mirabilia Sanctorum distent à signis, quæ Christus & Apostoli patrarunt, si Christus confortet? Assueverat, *qui credit in me majora horum faciet*. Et esto majora non sint, de quo non ambigitur: distent: sufficiat miracula esse, ad nostram confirmationem, & hæreticorum confusionem. Mirantibus Apostolis Math. 21. 21. quod continuò ad verbum Domini aruisset ficulnea, replicuit JESVS: *Amen dico vobis, si habueritis fidem & non hesitaveritis, non solum de ficulneâ facietis, sed & si monti huic dixeritis: Tolle, & jacta te in mare, fiet*. Nequè solet Ecclesia miracula ulla Sanctorum admittere, nisi præmissis gravissimo, & maturissimo examine, interveniente jurejurando testium omni exceptione majorum. Experimentum itaque fumit & indagat qualia sint, & quo spiritu fa-

tu facta sint. Nequè ignoramus non ita
 necessaria credentibus esse miracula : sci-
 mus tamèn interdùm necessum esse ea
 fieri, ut convertantur increduli, & debi-
 liores in fide stabiliantur, aut merè ut San-
 ctorum gloria toti mundo amplius inno-
 tescat. Admittimus etiàm notam eviden-
 tem esse, quâ dignoscantur, illam quæ
 recensetur Deuter. loc. cit. Si enim quis
 admiranda faciat, & aliam fidem prædi-
 cet, ut Deos alienos sequamur, eum ut
 anathemate percussum fugimus & dete-
 stamur : opera ejus velut opera mortis re-
 jicimus & execramur. Sancti verò, quos
 ut tales universalis Ecclesia Catholica &
 Apostolica agnoscit, nequè somniatores
 sunt aut Pseudoprophetae, qui prædicent
 Deos alienos, nequè operâ eorum fideles
 à Dei veri cultu in idololatriam divertunt;
 etiàm si colamus Dei & Sanctorum ima-
 gines, quas absquè ullâ infidelitatis aut
 idololatriæ notâ colendas alibi satis su-
 perque demonstravimus : cùm in illis
 non veneremur Jovem aliquem, aut Jo-
 vis vatem : sed Deum verum Vnum &
 Trinum, & Sanctos, quatenùs amici veri
 Dei

Dei sunt, sic ut totus honor non aliò, quàm in Deum redundet.

M O T I V V M X L V I.

Quod Religio Romana, ut idololatriam multiplicet, Reliquias Sanctorum Fidelibus colendas sacrilegè proponat: cujus tamèn nulla mentio fiat in Sacris Litteris. Irridet miraculum aliquod factum in quâdam infirmâ per applicationem Reliquiarum S. Ignatii de Loyolâ: quasi ratione illius præcisè relatus fuisset in numerum Sanctorum. Quod Dominus Deus satis ostenderit non esse venerandas Reliquias, ex eo quod corpus Moysis ita occultatum remanserit, ut in hunc usquè diem sepulchrum ejus incognitum sit. Quod Ezechias serpentem aneum destruxerit. Quod utrumquè factum sit ad tollendam occasionem idololatriæ. Vndè concludit, quod quandoquidè Scriptura non commendat cultum præputii Christi Domini, aut vestium ejus, lactis B. V. crinium, &c. (quæ apud Catholicos, ut putat, non magis invenire est, quàm umbram S. Petri) verè coli non debeant.

R E S-

RESPONDETUR.

Quod Reliquiarum Veneratio Scripturae congruit.

Circà miraculum S. Ignatii in diocesi Audomarenſi factum, non eſt quod tam ſcurriliter nugetur Dominus Miniſter. Approbatum fuit ab Epifcopo Audomarenſi, teſtimonio Medicorum, & aliorum fide dignorum interveniente non temerè, ſed re ſatis maturè penſatâ. Nec tali facto indigebat S. Ignatius, ut à Summo Pontificè in album Sanctorum referretur, cùm ſatis manifeſtum ſit, quod rigidiffimo cum examine, & exactiſſimâ oculatiſſimâque circumſpectiōne ad huiusmodi Canonizationes in Romanâ Curiâ procedatur. Quapropter nullus ſanæ ac piæ mentis in dubium revocare poteſt, quin præter illud miraculum, cætera omnia quę ad graviffimum tanti momenti negotium deſiderantur, ſufficientiſſimè intervenerint. Quod magno in honore habeamus Sanctorum Reliquias convenientiſſimum ſemper fuit, &

B b

hoc

hoc ipsum satis manifestè declaravit Deus

4. Reg. 2. 14. ^T quando percussione pallii

Elic aquas divisit Eliseus. Et quando eod.

lib. cap. 13. v. 21. per contactum ossium

Elisei mortuus resuscitatus est. Et Act.

19. 12. per sudaria & semicinctia Pauli

Spiritus nequam ex hominum corpori-

bus ejiciebantur, & languidi sanabantur.

Et Math. 9. 20. mulier, quæ sanguinis

fluxum patiebatur, per contactum fim-

briæ vestium Christi sanata est. Et Math.

14. 36. rogaverunt Christum plures, *ut*

vel fimbriam vestimenti ejus tangerent (Eccè

venerantur Reliquias ejus, & ipso permit-

tente) *& quicumquè tetigerunt salvi facti*

sunt. Satis, inquam, manifestè declaravit

Reliquias colendas, cùm per tot miracu-

la eorum cultum approbarit, & etiam-

nùm in dies approbet. Extant etiã gra-

vissima Sanctorum Patrum testimonia,

tam Ecclesiæ Græcæ, quàm Latinæ,

quos brevitatis gratiã prætermitto. Ci-

tantur à Bellarm. lib. 2. Contr. tomo. 2.

c. 3. Instar omnium sit nobis unus August.

epist. ad Quintianum: *Portant, ait, sanè Re-*

liquias Beatissimi & gloriosissimi Martyris

Stephani,

Stephani, quas non ignorat Sanctitas vestra, sicut & nos fecimus, quàm convenienter honorare debeatis. Et lib. 22. de civit Dei. cap. 8. maximum numerum miraculorum, ad Reliquias S. Stephani Protomartyris patrum adefert. Certum etiàm est, plurimorum Sanctorum corpora integra & incorrupta divinitus servata: ut in Burgundiâ S. Claudii ab annis hinc mille: in Umbriâ apud Montem Falcum corpus B. Claræ ab hinc trecentis annis incorruptum: Albæ in Hispaniâ S. Matris nostræ Theresiæ, ubi non solum extitit hucusque incorruptum, verum emanat ex ipsâ carne oleum, quod ad stuporem & miraculum, plurimis sanitatem restituit. Nec mirum: *Custodit Dominus omnia ossa eorum, unum ex his non conteretur.* Ps. 33. 21. *Custodit inquam, imò ipse veneratur: Vnum ex his non conteretur.* Quantò magis nos ad eorum venerationem obligamur? Quod verò Deus occultaverit corpus Moyfi, & per Ezechiam confregerit serpentem æneum, nihil contrà nos facit: cum hoc fecerit ob mores populi planè rudis, & ad idololatriam admodum proclivis: cujus

modò in Ecclesiâ Catholicâ, pòst idola, & simulacra gentium penitus destructa & subversa, nullum est periculum. Vndè potiori ratione concludo, quod quandoquidem Deus in Sacris Litteris per tot miracula Reliquiarum cultum comprobarit, eas esse colendas, & verè apud Catholicos reperiri.

M O T I V V M X L V I I.

Postremò, ut nihil incontaminatum relinquat, contemnit rosaria, grana benedicta, agnos Dei, missas pro defunctis, &c. Admiratur illa verba, quæ dicuntur in canone missæ pro defunctis, qui dormiunt in somno pacis: quod impossibilia videantur, dormire in somnopacis, & pati graves Purgatorii pœnas. Irridet benedictionem campanarum, preces quasuprà eas funduntur, cum omnibus ceremoniis. Item quod Sacerdotes sacrilegia, ut vult, committant, celebrando pro equis, porcis, & aliis bestiis. Quæ omnia, præter multa alia, maturè consideranti & ruminanti P. F. Emanueli (ut nobis obtrudit hic Minister) ansam præbuerunt, ut relictâ supersticiosâ Religione Romanâ, traderet se Religioni Reformatæ & Calvinisticæ.

R E S.

RESPONDETUR.

Quod animæ justæ etiã in mediis tormentis pacem interiorem servant. Benedictiones creaturarum licitæ : ut & preces atquè sacrificia pro bonorum temporalium conservatione.

ANtiquus Hæreticorum genius semper conatus est, omnia instrumenta pietatis, & devotionis, quibus animæ Christianæ excitari solent ad cultum, honorem & amorem Dei, & propriã salutem è medio tollere. Capere nequeunt Confistoriales Delphici, quomodò animæ defunctorum in poenis Purgatorii degentes, dormire possent in somno pacis, dùm tormentis Purgatorii subjiciuntur. Quasi verò internâ pace frui non possint, quæ naturaliter resultat ex gratiâ habituali, in quâ decesserunt, sive in Purgatorio patiantur, sive alibi sint. Benedictiones campanarum irrident, quasi nugaces sint.

Quid novum creaturas benedicere. Math. 14. 19. panes multiplicaturus Christus in Cœlum aspexit, & benedixit. Et Paulus creaturas benedicendas afferit 1. ad Tim. 4. 4. *omnis creatura Dei bona est, &c. Sanctificatur enim per verbum Dei & orationem.* Et Cyrillus Cathecesi 3. docet quod ut illa, quæ in aris offeruntur, cum naturâ sint pura, invocatione dæmonum impura efficiuntur: sic contrâ, aqua simplex, per Spiritus Sancti, Christi, & Patris invocationem acceptâ virtute, sanctitatē consequitur. Et Cyprian. epist. 70. ad Janua: Oportet, inquit, prius mundari & sanctificari aquas à Sacerdote. Benedicuntur itaque campanæ meritò, cum inserviant ad convocandum & congregandum populum ad solemnitates Ecclesiæ, ad exercitia spiritualia, ad perceptionem Sacramentorum: & aliquandò admirabiles effectus fortiuntur, si non ex opere operato, uti faciunt Sacramenta; benè tamen ex opere operantis & benedicientis. Atque adeò piè credimus per tales benedictiones, juxta doctrinam SS. Patrum fugari spiritus nequam, & bonos advocari, ut nos adjuvent, augeant pietatem & devo-

devotionem. Quod verò Miſſę private recitentur pro equis & aliis brutis animalibus, & ſuper ea Sancti quidam determinati invocentur, quid ibi mali & peccati? quid ſacrilegii? profectò nihil. Implorant fideles divinam clementiam per ſacrificia & interceſſionem Sanctorum pro bonis temporalibus conſervandis, & malis avertendis. Quare ſicùt licite nobis deſideramus & petimus à Deo bona temporalia, ſanitatē, ſuſtentationē, cœteraſque commoditates: ità etiā licitè ad illas impetrandas ſeu conſervandas offeruntur ſacrificia, & petuntur Sanctorum patrocinia. Numquid quintus ille Angelus Apocalypſeos commendabat quatuor Angelis, quibus datum erat nocere terræ, & mari, &c. *Nolite nocere terræ, & mari, nequè arboribus, quoaduſquè ſignemus ſervos Dei noſtri in frontibus eorum?* Cur non licebit petere ab iſdem Angelis, & Sanctis in Cœlo cum iſtis regnantibus, ne nocetur equis & aliis animantibus, quæ humano deſerviunt obſequio?

B b 4

Exhor.

Exhortatio ad P. Fr. Fœlicem Emanuellem, & conclusio operis.

TAndèm ad te venio, *Emanuel* amantissime, fili prodige, qui projecisti suave Christi jugum, & dixisti, non serviam; per viscera illa amoris, quibus jam te Religio nostra Deo genuisse putaverit. Venio, inquam, obtestaturus, nunc aliquandò ad stateram revoces, argumentorum illorum pondera, quibus vestro illo libello permotus diceris, ut Religionedùm Carmeli, sed & Romano-Catholicæ nuntium remitteres ac valediceres. Videbis illa sua ipsa levitate concidisse, efficaciter soluta, & penitus enervata. Videbis artificium malefici, illius ac venefici Delphici incantantis sapienter, insipienter dicam, qui te miserè fascinavit, dirutum & contractum. Proindè à pestiferâ illius suggestionè, si sapis, quasi à morsu tortuosi colubri fuge, & ad Fidelium discipulorum coetum, quos Deus per Cathedram Petri erudit, sicut olim in columnâ nubis loquebatur ad eos, festinus advola. Vanâ spe

spe robustum Sectariorum Herculem ad pedes tuos, veritatis gladio prostratum habes; arma, inquam, contrà Ecclesiæ Dei phalanges vibrata, adeò ut velut sagittæ parvulorum factæ sint plagæ eorū, in suorum authorum caput retorta. Exurge itaque, qui lethali sopore correptus obdormiscis, ut te Christus illuminet, & pedes tuos dirigat in viam pacis æternæ. Et si verè salutem quæris, ingredi janua[m] veræ Fidei: accedentem enim ad Deum oportet credere, ait Apostolus Hebr. 11. cum nullus spiritali vitâ, quâ rectâ aspi- ret ad perennem illam vereque vitalem, vivere possit sine Fide: dicente Prophetâ Abac. 2. *Iustus ex Fide vivit*. Et quo pacto vitâ vivet, quæ in Dei gratiâ sita est, si juxtâ doctrinam Doctoris Gentium ubi suprà, *Sine Fide impossibile sit placere Deo*? Rectè quidem impossibile, quod gravissi- mum & maximè execrabile & injurium Divinæ Majestati facinus admittat, quasi Deum ipsum mendacii, & falsitatis ar- guens, qui ea non credit, quæ Deo reve- lante per Ecclesiam credenda proponun- tur. Vndè ipsemet Dei Filius, illius extre-

mæmaliciæ gravitatem indicans Joan. 3. *Qui non credit, inquit, jam judicatus est.* Nequè enim talis impius resurget in iudicio discussione: veniet tamèn in sempiternę damnationis. Hæc sedulò perpende & noli esse incredulus, sed fidelis. Serva fidem, eamquè virginèam, id est, integram & inviolatam. Quippè qui peccaverit in uno factus est omnium reus Jacobo teste. Et si apostatę Angeli unico superbię actu principatum suum deferentes, in iudicium magni diei vinculis eternis sub caligine sunt reservati: nec non Protoparentes nostri simul ac prævaricati sunt, etiàm unico inobediencię peccato, utpotè Paradisi deliciis indigni, turpi longoquę exilio damnati sunt: quantò maiorem sibi damnationem accersit Hereticus, qui cum illis impiis relatus à Prophetâ Job 21, Deo refractariè dicit, *Recede à nobis, scientiam viarum tuarum nolumus.* Fidem nempe quę est sperandarum substantia rerum, & omnium virtutum radix. Sic purissimam Fidei nostre virginitatem, quâ, de sponsi sui coelestis providentiâ & benignitate, suprâ modum fulget S. Mater nostra Ecclesia Catholica,


tholica, etiàm in ipso sue nativitatis limine
 deflorare & planè demoliri contenderunt
 Sectarii. Illi imprimis, quos fugiendos
 Pseudoprophetas, aut Propheticae, Apo-
 stolicæque doctrinae pseudo-interpretes
 ipsa veritas iussit & docuit. Hos scilicèt
 antè omnes, qui erraverunt ab utero, à do-
 ctrinâ nempè revelatâ, & locuti sunt falsa
 impudenter contrà ipsum authorem Gra-
 tiæ, velut Arius, Nestorius, & his plures;
 & deindè qui erraverunt circà media sa-
 lutis æternæ consequendæ, uti Pelagius, &
 Faustus &c. qui auxiliorum divinæ Gratiæ
 efficaciam, & cetera ad salutem necessaria
 penitùs sustulerunt. Ac demùm, ut ad no-
 stri sæculi Hæresiarchas transeam, qui non
 minùs crudeliter quàm enormiter, non se-
 cùs ac lupi rapaces in vestimentis ovium,
 id est, Pastorum & Doctorum seminâ-
 runt zizania: quos nec misit Christus, nec
 ulla electio canonica pro animarum Pa-
 storibus comprobavit. Qui etiàm si ex no-
 bis aliquandò prodierint, non erant ex
 nobis: nam si ex nobis fuissent, mansissent
 nobiscum. Qui nec per portam intrave-
 runt, sed seipsos intrudere, & proindè ha-
 ben d

bendi tamquàm fures, ac latrones: quales sunt Calvinus & Lutherus, & qui Fidei Orthodoxæ vestem inconfutilem his novissimis temporibus lacerare ac discerpere moliti sunt. Maximè etiàm circà media ad æternam vitam consequendam omninò necessaria, prorsùs sunt sacrilegi; ut & circà Ecclesię Sacramenta & potissimùm circà Venerabilem Eucharistiam, quæ est cor & anima viventium Christo in unione spiritus & Fidei; circà opera meritoria, cultum sacrarum Imaginum, & his plura, de quibus suprà. Hos ubi, mi Emanuel, fili doloris mei, æternæ Sapiëntiæ monitu è fructibus eorum dignoveris, devita, fuge, desere: cæci enim sunt, & cæcorum duces, & *sicacus caco ducatum præstet*, dicente Domino, *ambo in foveam cadent*. Repliqueris forsitan, ut alibi vidêris indicare, horum doctrinam te simul cum lacte è maternis uberibus jugiter suxisse; adeoque eo radicatum esse fortasse simulas, quò vixdum proscindi queat. Insto. Repete tantisper & defœccatâ mente, sedatoque animo, quâ longiùs potes! Avorum tuorum seriem inspicere; si Paternos Avos sigillatim

tim revoces, advertes dubio procùl non
 minùs augustam, quàm omni soliditate
 Catholicam Serenissimorum Lusitaniæ
 Regum progeniem, in quâ nullum um-
 quàm à Fide descivisse comperies. Quin-
 imò qui regna, numerosissimosque popu-
 los Christo & Ecclesiæ (ut & alibi insinu-
 avimus) subjugarunt. Attamèn si gloriaris
 in deliciis genitricis tuæ, ediffere quid
 divinitatis aut splendoris gratiæ cœlestis
 ab ejus uberibus persenseris, ut ejus fidem
 sectari proponas? Recense maternum ge-
 nus, & numerabis majores ejus ex parte
 Matris Saxonie Duces, ex parte Patris
 Nassaviæ Comites, omnes & verè Fidei
 Catholicæ professores, & propugnatores.
 Solos Avos excipiam, quos à Fide præva-
 ricatos invenies, non quidèm amore veri-
 tatis & salutis: sed propter temporales
 quosdam respectus, quibus mente eorum
 obnubilatâ errores in materiâ Fidei &
 morum admiserunt, ut faciliùs populum
 à naturalibus suis Principibus averterent,
 licentiosiori illo vivendi modo inducto.
 Nec judicabant se id effecturos, nisi hisce
 indebitis mediis uterentur. Et hinc totius
 pro-

excepturi, omnimodam tibi securitatem utrimquè pollicemur: cùm non aliud pre- tendamus, quàm animam tuam saluam fa- cere. Redi itaque, & iterùm dico, redi: & progeniei tuæ, & Religioni Catholicæ, quod non tam ex maliciâ, quàm humanæ conditionis fragilitate derogatum arbitror restitue. Prima opera quę fecisti, cùm in- ter nos conversareris, intrepidè rursùm fac in verâ & inconcussâ Fide, sequutus consilium Angeli datum Episcopo Smir- nensi Apoc. 2. 5. Sicque experieris indu- biè, Spiritus Sancti fructus: inter quos est Gaudium & Pax illa incomparabilis, quæ exuperat omnem sensum. Dignetur om- nipotens & clementissimus Deus vocî meæ dare vocem virtutis, & tibi aures au- diendi, ut tandèm aliquandò optatissimo intento fruamur. Vale.

*Omnia Sanctæ Matris nostræ Ecclesiæ
judicio submitto.*



9-3-3

